

Mahubiri kupitia Wagalatia

KUTOKA
TOHARA YA MWILI
HADI MAFUNDISHO
YA TOBA
(I)

PAUL C. JONG



KUTOKA TOHARA YA MWILI HADI MAFUNDISHO YA TOBA (I)



Hephzibah

Mafundisho ya Maombi ya toba ni ya kuua roho yako

Kama vile watu wengi wanavyokufa bila kugundua virusi ambavyo vimewaambukiza, Wakristo ulimwenguni kote wanaangamia kwa kuambukizwa na mafundisho ya maombi ya toba. Ni nani angejua kwamba fundisho la sala za toba linaweza kuwa fundisho la hatari? Je! Unajua ni nani amewaongoza Wakristo wengi kwenye shimo la mkanganyiko wa kiroho? Ni viongozi wa Kikristo ambao wamefundisha Neno bila hata kuzaliwa upya tena.

Kwa hivyo hata sasa, lazima uamini katika Injili ya Neno la Maji na Roho ambayo Mungu amekupa na kukuosha kutoka katika dhambi zako zote. Ni lazima Usi ruhusu nafasi hii ya Baraka kupotea. Kwa kuamini Injili ya Ukweli ya maji na Roho, sote lazima tuachiliwe kutoka katika machafuko ya Kiroho na kukaa katika nuru ya Ukweli.

Ikiwa haukujua ukweli wa mafundisho ya maombi ya toba mpaka sasa, basi lazima utagundua kutoka katika kitabu hiki, kuamini Injili ya Maji na Roho, na kurudi kwa Bwana. Baada ya kuandaa mkate wa maisha mapya, Bwana anakungojea.

-Paul C. Jong-

**KUTOKA
TOHARA YA MWILI
HADI MAFUNDISHO
YA TOBA
(I)**

PAUL C. JONG



Hephzibah Publishing House

**A Ministry of THE NEW LIFE MISSION
SEOUL, KOREA**

Unaweza Kupakua Vitabu vya Kikristo vya Mchungaji Paul C. Jong
katika Kompyuta, Kompyuta-Kibao, au kwenye Simu-Mahiri

Mahubiri kupitia Wagalatia

KUTOKA TOHARA YA MWILI HADI MAFUNDISHO YA TOBA (I)

Toleo Lililorekebisha. Hakimiliki © 2017 na Kampuni ya Uchapaji ya Hephzibah

Haki zote zimehifadhiwa. Hairuhusiwi kunakiri kubadili sehemu ya kitabu hiki kwa njia yoyote ile ikiwa ni pamoja na kunakiri, kurekodi, au kukidurufu bila ya ridhaa ya maandishi toka kwa mmiliki wa kitabu hiki.

Nukuu za Maandiko ya Biblia zinatoka katika Tafsiri ya Ushirikiano wa Makanisa – Kenya (Nairobi) na Tanzania (Dodoma)

ISBN 978-89-282-1416-7

Jalada Limebuniwa na Min-soo Kim

Vielelezo Vimetolewa na Young-ae Kim

Tumepata ruhusa ya kutumia picha za jalada la juu kutoka kwa Mike Rayner/Fairfaxphotos, ambaye ndiye mwenye hakimiliki ya Fairfaxphotos
Kimechapishwa Nchini Korea

Hephzibah Publishing House

A Ministry of THE NEW LIFE MISSION

Seoul, Korea

♠ Website: <https://www.nlmission.com>
<https://www.bjnewlife.org>
<https://www.nlmbookcafe.com>

♠ E-mail: newlife@bjnewlife.org

Unaweza Kupakua Vitabu vya Kikristo vya Mchungaji Paul C. Jong
katika Kompyuta, Kompyuta-Kibao, au kwenye Simu-Mahiri

Yaliyomo

Dibaji ----- 7

SURA YA 1

Bwana Ametukomboa Toka Katika Ulimwengu
Huu Wenye Uovu
(Wagalatia 1:1-5) ----- 19

Pengine Imani Yako Ni Kama ya Wanatohara?
(Wagalatia 1:1-5) ----- 36

Bwana Ametukomboa Kikamilifu Mara Moja na Kwa Wote
(Wagalatia 1:3-5) ----- 62

Hakuna Injili Nyingine Zaidi ya Injili ya Maji na Roho
(Wagalatia 1:6-10) ----- 95

Wale Ambao Mioyo Yao Imendaliwa Kama Watumishi
wa Mungu
(Wagalatia 1:10-12) ----- 124

Imani ya Mtume Paulo na Maonyo Yake Kwa Wanatohara
(Wagalatia 1:1-17) ----- 149

Maisha ya Kiimani ya Kisheria Huleta Laana Tu
(Wagalatia 1:1-24) ----- 182

SURA YA 2

Ni Kwa Nini Mtume Paulo Aliwapuuza Waishio Kisheria?
(Wagalatia 2:1-10) ----- 201

Kiini cha Imani ya Paulo
(Wagalatia 2:20) ----- 224

Je, Sisi Tumekufa na Kufufuka Pamoja na Yesu Kwa Imani
Katika Mwana wa Mungu?
(Wagalatia 2:20) ----- 256

Mtu Hahesabiwi Haki Kwa Matendo ya Sheria Bali
Kwa Imani Katika Injili ya Maji na Roho
(Wagalatia 2:11-21) ----- 305

Tunahesabiwa Haki Kwa Imani Safi Tu
(Wagalatia 2:11-21) ----- 334

SURA YA 3

Wakati Wote Uishi Maisha Yako Kwa Imani Katika
Injili Ya Maji na Roho
(Wagalatia 3:1-11) ----- 365

Ni Wakati Gani Ambapo Utupu wa Mioyo Yetu
Unapotoweka?
(Wagalatia 3:23-29) ----- 381

Sasa Hatupaswi Kuwa Chini ya Laana ya Sheria
(Wagalatia 3:1-29) ----- 409

Dibaji

Mtume Paulo pamoja na Timotheo waliihubiri injili ya maji na Roho kwa Wagalatia, naye Paulo aliyatembelea mara kadhaa makanisa ya kule Galatia alipokuwa katika safari zake za kimissionari (Matendo 16:6). Lakini kadri muda ulivyoziidi kwenda, Wagalatia walijaribu kuwa watu wa Mungu kwa kuuchanganya wokovu uliotolewa na Mungu wa ondoleo la dhambi pamoja na matendo yao ya kisheria. Hivyo, Mtume Paulo aliuandika waraka huu ili kuilinda imani ya watakatifu. Paulo alionyesha katika waraka wake kuwa imani ya Wagalatia ambayo ilikuwa ikidai umuhimu wa tohara ya kimwili ilikuwa ni imani ya kijinga. Hivyo, ‘Waraka wa Paulo kwa Wagalatia’ ni wito wa kuwalinda na kuwatetea Wakristo dhidi ya wale ambao wanatishia wakati wote kuidharau na kuishusha imani ya wale wanaoamini katika injili ya maji na Roho.

Walimu wa Kiyahudi katika makanisa ya Galatia waliendelea kuihamasisha imani yao potofu, huku wakisema kuwa wale wote walio ongoka ni lazima watahiriwe kimwili na waishike Sheria. Hivyo, ili kulizuia fundisho hilo la wanatohara ambalo limekuwa ni chanzo cha watu kutoamini katika Kanisa la Mungu lisiweze kuenea, Mtume Paulo alijaribu kuijenga upya imani katika injili ya maji na Roho katika mioyo ya watakatifu waliokuwepo wakati huo. Paulo aliuandika waraka huu ili kuiondoa imani ya kimwili ya wanatohara katika makanisa ya Galatia na alitumia wakati huo kuianzisha imani sahihi kwa watakatifu.

Hivyo, Kitabu cha Wagalatia ni chombo cha Ukweli ambacho kinawalinda Wakristo wengi sana dhidi ya aina mbalimbali za wanasheria ambao wanaitishia injili ya maji na

Roho bila kukoma.

Ujasiri Unaotokana na Mawazo ya Mtu Binafsi Utaharibika

Tunachopaswa kukitambua hapa ni kuwa kimsingi mawazo ya kibinadamu mara nyingi huwa yanaongozwa kimakosa. Kwa mfano, wakati watu wanapofanya jaribio la kuandika wakati wakitafuta leseni ya udereva, basi mara nyingi watu huchagua lile wanaloona kuwa ndilo jibu sahihi kati ya maswali mengi ya kuchagua. Hivyo mtahiniwa anajochagua jibu mara nyingi huwa anafanya hivyo akiamini kuwa hilo ndilo jibu sahihi. Na mara nyingi wale wanaofanya mtihani wa kupata leseni huwa wanajiamini kuwa wapo sahihi—yaani huwa anaamini kuwa ikiwa wengine watafeli mtihani ule basi bila shaka yeye atafaulu hilo jaribio.

Hata hivyo, wakati matokeo ya jaribio yanapotangazwa, bila shaka wengine kati yao watajikuta kuwa majina yao hayamo katika orodha ya watahiniwa waliofanya vizuri na kufanikiwa. Basi hali wakiwa wamekata tamaa, watu hao hufikia hatua ya kufahamu kuwa kwa nyakati fulani mawazo yao yanaweza yasiwe sahihi. Hivyo, wanapojiandaa kwa kufanya jaribio jingine tena, basi watu hao huyaacha mawazo yao binafsi na kisha kuyazingatia maelezo ya jaribio husika, na hufanya hivyo ili waweze kushinda jaribio. Kwa maneno mengine, watu wanapojionea wao wenyewe kuwa wameshindwa kutokana na kuyaegemea mawazo yao binafsi, basi hufikia hatua ya kutambua kuwa wakati fulani fikra zao zinaweza zisiwe sahihi, na wanapotambua hilo huyaweka kando mawazo yao binafsi, na kisha huzingatia yale yaliyoandikwa katika kitabu cha jaribio la udereva, hujitahidi

kujibu maswali vizuri kwa mujibu wa sheria za usalama barabarani.

Vivyo hivyo, hata kwa Wakristo wanaomwamini Yesu Kristo kuwa ni Mwokozi wao mara nyingi huamini hivyo kwa mujibu wa mawazo yao binafsi, wao hufikiri kuwa Yesu Kristo alizitoweshea mbali dhambi zao zote mara moja kwa kusulubiwa kwake. Wengi wao wamekuwa wakiamini wanachokiamini hata pasipo kukifikiria kuwa imani yao inaweza kuwa na makosa. Ukweli ni kuwa Yesu Kristo amezitoweshea mbali dhambi zetu zote si kwa damu ya pale Msalabani pekee, bali amezitoweshea mbali dhambi zetu kwa maji, damu, na kwa Roho (1 Yohana 5:4-8).

Vivyo hivyo, Wakristo wa leo hii wanauhakika kuwa wanaweza kuoshwa dhambi wanazozifanya kila siku kwa kupitia sala zao binafsi za toba. Hata hivyo, hata kama watajaribu kiasi gani kuzioshelea mbali dhambi zao kwa kupitia sala zao za toba, ukweli ni kuwa hatimaye hutambua kuwa dhambi zao hazijatoweka katika mioyo yao. Pamoja na hayo, bado wanaendelea kujihakikishia na kuamini kiujinga huku wakifikiria hivi, “Siku moja dhambi zangu zote zitasafishiliwa mbali! Ipo siku ambapo dhambi zangu zote zitaoshelewa mbali kwa kupitia sala zangu za toba!”

Kwa kweli, Wakristo wenzangu, mnapaswa kulitafakari fundisho la kidini la toba mnaloliamini na kisha mlichunguze kwa uangalifu. Je, ni kweli kuwa dhambi zenu zitaondolewa mbali ati kwa sababu tu ya kuzisema sala za toba? Ikiwa mnaamini hivyo, je, hiyo ina maanisha kuwa hamna dhambi katika mioyo yenu? Je, ni kweli kuwa dhambi zenu zinaoshelewa mbali na kutoweshewa mbali kwa kupitia sala zenu binafsi za toba? Na kama sivyo, je huo mkazo wenu hautokani na mawazo yenu binafsi?

Ni wazi kuwa mnalishikilia Fundisho la Kidini la

Kuhesabiwa Haki kwa Imani huku mkijaribu na kutumaini kuwa, “Kwa kuwa ninamwamini Yesu kuwa ni Mwokozi wangu, basi ni hakika kuwa ataniita na na kuniona kuwa nisiye na dhambi.” Hii ni kwa sababu wale wanaolikubali Fundisho la Kidini la Kuhesabiwa Haki wanafikiri kuwa wanaokolewa kwa kumwamini Yesu hata ikiwa wana dhambi. Hata hivyo, Mungu hawaambii wenye dhambi kuwa wamefanyika kuwa watu wake. Wakati huu wote hadi hivi sasa, mmejipumbaza ninyi wenyewe kwa mawazo yenu binafsi, huku mkiamini hivi, “Kwa kuwa Yesu ameniokoa kikamilifu kwa kusulubiwa na kuimwaga damu yake hadi kifo, kwa hakika hivi sasa sina dhambi! Kwa kweli nina uhakika sana kuhusu hili!” Imani ya jinsi hiyo ni ile inayotokana na kujipumbaza kibinafsi na inatokana na matumaini potofu.

Ikiwa wewe una matumaini potofu kama haya, je hilo litamaanisha kuwa huna dhambi mbele za Mungu? Je, hufikirii kuwa mawazo yako kwa huo muda wote hadi hivi sasa yamejaa makosa? Je, unaweza kweli kuziosha dhambi zako toka katika moyo wako kwa kupitia sala zako binafsi za toba? Je, ulipokuwa ukiiamini damu pekee ya Yesu Kristo aliyoimwaga pale Msalabani, dhambi zako zilitoweka? Je, dhamiri zenu zinaamini maelezo haya pasipo shaka?

Sasa ninawaeleza ninyi Wakristo wote, Wakristo wote wanaweza kuwa na uhakika kuhusiana na ondoleo lao la dhambi kwa kuamini katika Neno la injili ya maji na Roho. Ni vigumu kuwa na uhakika wa kweli wa ondoleo la dhambi kwa kupitia sala za toba ambazo Wakristo wengi siku hizi wanaziamini. Ni kwanini basi watu hao wanang’ang’ania fundisho lenye makosa kama hilo? Ni kwa sababu hawaufahamu wokovu wa kweli ambao umetujia kwa kupitia injili ya maji na Roho. Kwa kupitia Neno la Mungu Wakristo wanapaswa kuwa na uhakika kuwa dhambi zao zimeoshelewa

mbali kwa kupitia injili ya maji na Roho. Lakini kuna Wakristo wengi ambao wanashindwa kuwa na uhakika huu. Sasa, kila mtu ni lazima aifahamu injili ya maji na Roho kuwa ndio Ukweli wa wokovu, na anapaswa kuwa na ujasiri kwa wokovu wao wa kweli.

Nimefikia hatua ya kutambua kuwa Mtume Paulo na watenda kazi wenzake walikabiliana na magumu mengi wakati wakijaribu kuihubiri injili ya maji na Roho kutoka kwa wanatohara. Mimi pia nilikutana na magumu mengi sana wakati nilipokuwa nikihubiri injili ya maji na Roho ulimwenguni kote, na hiyo ilitokana na uongo wa fundisho la toba ambalo lipo katika Ukristo wa leo. Hivyo, kwa kupitia kitabu hiki, ninatumaini kusahihisha makosa ya kawaida ambayo unaweza kuwa nayo, nitalinganisha imani yenye makosa ya wanatohara ambayo iliinuka katika makanisa ya Galatia pamoja na imani potofu ya leo ya fundisho la toba.

Ninatumaini utatambua kuwa lengo langu ni kukusaidia uweze kufahamu jinsi fundisho la kidini la toba lilivyo na mkanganyiko, na kwa kufanya hivyo nitaweza kukuongoza kuufahamu Ukweli wa injili ya maji na Roho ili uweze kusimama imara katika imani yako. Kama utayasikiliza maonyo ya Roho Mtakatifu, basi ni hakika kuwa unaweza kusimama kwa usahihi mbele za Mungu kwa kuiweka imani yako katika injili ya maji na Roho, na si katika sala zako binafsi za toba ambazo ni sawa na tohara ya kimwili ya wakati wa Mtume Paulo.

Wale wote wanaoamini katika injili ya maji na Roho wanaweza kuonana na Bwana wakiwa mbali na dhambi na wakiwa na furaha wakati Bwana atakaporejea (Waebrania 9:28). Na waamini wa injili ya maji na Roho wanaweza kuwa na ujasiri kuhusiana na wokovu wao toka katika dhambi zao zote, pia wanafahamu kuwa wamefanyika kuwa watenda kazi wa Mungu

kwa ajili ya haki ya Mungu.

Lengo langu kuhusiana na kitabu hiki ni kukuhubiria Ukweli wa injili ya maji na Roho, Ukweli ambao Mtume Paulo aliuamini. Ni matumaini yangu kuwa ninyi nyote mtakombolewa toka toka katika imani potofu na kisha kufanyika watenda kazi halisi wa Mungu kwa kuuamini Ukweli wa injili ya maji na Roho katika mioyo yenu. Ili niweze kuwasaidia kuufahamu Ukweli uliodhihirishwa katika kitabu cha Wagalatia, basi nitatumia muda huo kwa ufupi kuelezea kiini cha injili ya maji na Roho kwa kina. Hii ni kwa sababu usipoifahamu injili ya maji na Roho, basi itakuwa vigumu kufahamu kile ambacho Kitabu cha Wagalatia kinazungumzia.

Ukweli Halisi wa Injili ya Maji na Roho Umezungumzwa Katika Biblia

Kwanza kabisa, ili uweze kuokolewa kikamilifu toka katika dhambi zako zote, basi unapaswa kumwamini Yesu ambaye ndiye Mwana pekee wa Mungu kuwa ni Mwokozi wako. Yesu alikuja hapa duniani akafanyika mwili wa mwanadamu kwa uweza wa Roho Mtakatifu ili aweze kukuokoa toka katika dhambi zote za ulimwengu. Yesu alizichukua dhambi zote za wanadamu mara moja kwa kubatizwa na Yohana Mbatizaji. Hii ina maanisha kuwa Yesu alizibeba dhambi zote za wanadamu kwa kuwekewa mikono na Yohana Mbatizaji, ambaye alikuwa ni Kuhani Mkuu wa mwisho wa Agano la Kale na mwakilishi wa wanadamu wote. Baada ya kuwa amezibeba dhambi zote za ulimwengu, Yesu alisulubiwa, akaimwaga damu yake, na kisha akafa. Hii ina maanisha kuwa Yesu alilipa mshahara wa dhambi zetu zote.

Sisi ni wanadamu ambao tunaendelea kutenda dhambi

hadi siku tutakapokufa. Kila jamii inao utaratibu wake wa kusimamia nidhamu na kanuni. Hivyo, ili watu waweze kuishi vyema hujitahidi kuzifuata hizo desturi na kanuni kwa namna moja au nyingine, lakini kanuni hizi zote ni zile ambazo zimewekwa na wanadamu na hazijaagizwa na Mungu.

Kimsingi, Sheria ambayo Mungu aliwapatia wanadamu wote ni tofauti na hizo kanuni zilizowekwa na wanadamu. Ili kuwawezesha wanadamu waweze kuifahamu hali yao ya dhambi, Mungu aliwapatia Amri Kumi na kanuni ndogo nyingine 613 za Sheria katika Agano la Kale. Lakini kwa kweli wanadamu hawawezi kuzishika hizi kanuni zote za Sheria. Na kwa kupitia kanuni na sheria hizo ndipo wanadamu wanapoweza kujitambua jinsi walivyo. Uhalisio unaonyesha kuwa hakuna mwanadamu anayeweza kuzishika amri zote pamoja na Sheria.

Kwa hakika watu hawawezi kuupata wokovu wao kwa sababu ya wao kuwa wema au kwa sababu ya kuishi maisha mema. Bali, tunapaswa kwanza kujitambua kuwa sisi i wenye dhambi, na kwa sababu hiyo ni lazima tuikiri hali yetu ya dhambi kwa Mungu kama ilivyo. Kisha tunaweza kuokolewa toka katika dhambi zetu zote kwa kuamini katika Ukweli kuwa Yesu alikuja kwetu kwa maji, damu, na Roho.

Wakristo wengi siku hizi wanaamini hivi, “Niliokolewa kwa sababu Yesu alimwaga damu yake ya thamani na kufa Msalabani.” Hata hivyo, Wakristo hao bado wanaendelea kutenda dhambi na kusumbuliwa na dhambi. Hii ni kwa sababu wanaudharau Ukweli kuwa Yesu alibatizwa na Yohana Mbatizaji kwa maji. Hivyo, Wakristo ni lazima waliamini Neno la Mungu kamilifu, yaani waamini kuwa Yesu alikuja kwa maji, damu, na Roho (1 Yohana 5:6-8). Kila mwanadamu anaweza kufikia hatua ya kuliadini kikamilifu Neno la Mungu ikiwa atauamini ukweli kuwa Yesu alibatizwa kwa maji. Ule

ukweli kuwa Yesu alibatizwa na Yohana Mbatrizaji kwa maji una maanisha kuwa dhambi zote za wanadamu—yaani kila dhambi katika muda wote na mahali pote—zilipitishwa kwenda kwa Yesu kwa kupitia mikono ya Yohana Mbatizaji. Mikono ya Yohana Mbatizaji, aliyekuwa Kuhani Mkuu wa mwisho wa Agano la Kale na mwakilishi wa wanadamu, iliwekwa katika kichwa cha Yesu, aliyekuwa Mwanakondoo wa upatanisho, na kwa tendo hilo dhambi zote za wanadamu zilipitishwa kwenda kwa Yesu.

Kama utalisoma toleo langu la kwanza katika mfululizo wa vitabu vyangu vya Kikristo vilivyochapishwa na Utume wa Maisha Mapya (The New Life Mission), utaweza kuifahamu injili ya maji na Roho kwa kina: Kwanza kabisa kitabu kila kinazungumzia kuhusu dhambi zetu, na kinatuelezea sisi wanadamu kuwa ni lundo la dhambi. Pia kitabu hicho kinazungumzia juu ya Sheria iliyotolewa na Mungu, na kinafafanua kuwa dhumuni la Sheria ilikuwa ni kutuwezesha tuweze kuzitambua dhambi zetu. Kisha hicho kitabu kinaelezea kuwa Yesu ametupatia wokovu wa milele kwa kupitia maji na damu yake ya thamani, na kinakazia umuhimu wa kuwa imani kamilifu kwa vitu hivi. Kitabu hicho kinaelezea jinsi Bwana alivyokuja kwa maji, damu, na Roho Mtakatifu. Na kinaelezea kipekee umuhimu wa ubatizo ambao Yesu aliupokea katika Mto Yordani toka kwa Yohana Mbatizaji, ubatizo ambao umekuwa ukidharauliwa na Wakristo wa siku hizi. Hivyo, ili tuweze kuokolewa, na ili tuweze kumshinda Shetani na dhambi za ulimwengu, basi sisi wanadamu ni lazima tuliamini Neno la Mungu kikamilifu, na si kuamini kuwa Yesu alikuja kwa kupitia damu yake ya thamani na Roho peke yake, bali tunapaswa kuamini pia kuwa Yesu aliyachukua makosa yetu yote kwa kupitia ubatizo wake wa maji. Ubatizo wa Yesu unaonyesha wa upana jinsi upendo wa Mungu ulivyo mkuu

kwetu sisi, na kitabu hicho kinakazia kuwa ubatizo huu ni mfano wa wokovu wetu (1 Petro 3:21).

Kwa kifupi, Yesu amelipa mshahara wote wa dhambi zetu kwa kubatizwa kwa maji na kwa kuimwaga damu yake pale Msalabani. Kuamini hivyo ndiko kunakofanya uwe na imani kamilifu katika Neno la Mungu, yaani imani isiyomkufuru Mungu. Sisi wanadamu tunawekwa huru toka katika dhambi zetu na tunaupata wokovu wetu unaotuwezesha kuingia katika Ufalme wa Mungu.

Hata hivyo, Wagalatia walifikiri kimakosa kuwa walipaswa kutahiriwa kimwili ili waweze kuwa watu wa Mungu na kwamba kwa kufanya hivyo ndipo wangelielea vyema katika imani ya Ibrahimu. Aina hii ya imani inapatikana katika sala za toba ambazo Wakristo wanazitoa hivi sasa. Pamoja na hayo hizi sala za toba ambazo Wakristo wa siku hizi wanazitoa hazihusiani kwa lolote na ondoleo la dhambi zao. Kama ambavyo Paulo aliwaonya Wagalatia kuachana na mafundisho ya wanatohara na kisha kurejea kwenye injili ya maji na Roho, basi Wakristo wa siku hizi wanapaswa kuamini injili ya kweli ya maji na Roho badala ya kuziamini sala zao za toba.

Watakatifu wa makanisa ya Galatia walikuwa na huzuni ya kiroho kwa sababu ya fundisho la tohara ya kimwili. Kutoka katika Kitabu cha Wagalatia, tunapata ufahamu kuwa Paulo alikuwa akionya kujihadhari na wanatohara na aliwatia moyo Wagalatia kuamini injili ya maji na Roho. Wanatohara walikazia kuwa waamini wangeluweza kuwa watu wa Mungu wakamilifu kiwa tu watapokea tohara ya kimwili kwa mujibu wa Sheria, lakini fundisho hili ni potofu.

Kama nilivyokwisha waeleza, fundisho la sala za toba linapaswa kuwekwa mbali, kwa kuwa linatokana na imani potofu. Hata hivyo, kuna Wakristo wengi sana ambao

wanaamini kuwa fundisho la sala ya toba ndiyo njia pekee ya kuweza kuzioshelea mbali dhambi zao. Sasa, kwa kupitia Neno la Ukweli lililodhihirishwa katika Kitabu cha Wagalatia, ni lazima uukwepe uongo mwingi wa kiimani. Ninawaasa ninyi nyote muweze kuupitia mfululizo wa mahubiri yangu kuhusiana na injili ya maji na Roho, ili muweze kuwa na imani inayowaweka huru toka katika dhambi zenu na kisha muweze kufanyika watu wa Mungu. Ni matumani na maombi yangu kuwa ninyi nyote mtalisoma Neno la Wagalatia, na kwamba mtafanyika kuwa wenye haki mnaoweza kutanabaisha kati ya imani ya kweli na imani ya uongo. Halleluya! ✉

SURA YA 1



Unaweza Kupakua Vitabu vya Kikristo vya Mchungaji Paul C. Jong
katika Kompyuta, Kompyuta-Kibao, au kwenye Simu-Mahiri

Bwana Ametukombo Toka Katika Ulimwengu Huu Wenye Uovu

< Wagalatia 1:1-5 >

“Paulo, mtume, (si mtume wa wanadamu, wala kutumwa na mwanadamu, bali na Yesu Kristo, na Mungu Baba aliyemfufua kutoka kwa wafu), na ndugu wote walio pamoja nami,

Kwa makanisa ya Galatia;

Neema na iwe kwenu, na amani, zitokazo kwa Mungu Baba, na kwa Bwana wetu Yesu Kristo; ambaye alijitoa nafsi yake kwa ajili ya dhambi zetu, ili atuokoe na dunia hii mbovu iliyopo sasa, kama alivyopenda Mungu, Baba yetu. Utukufu una yeye milele na milele, Amina.”

Bwana Aliutoa Mwili Wake Kwa Ajili Yetu Ili Atuokoe Toka Katika Ulimwengu Huu Wenye Uovu

Katika mahubiri ya leo nitayaelekeza mahubiri haya katika Wagalatia 1:4. Katika aya hii imeandikwa kuwa Kristo “alijitoa nafsi yake kwa ajili ya dhambi zetu, ili atuokoe na dunia hii mbovu iliyopo sasa, kama alivyopenda Mungu, Baba yetu.” Ni matumaini yangu kuwa utaufahamu Ukweli mpana uliomo katika kifungu hiki kwa kufuata mipaka ya injili ya

maji na Roho, na kwa sababu hiyo utaweza kupata faida kubwa sana za kiroho.

Kipindi hiki ni kipindi chenye uovu kilichotawaliwa na dhambi. Bwana wetu aliutoa mwili wake kwa Mungu Baba kama ili uwe kipatanisho cha dhambi zetu, Bwana wetu alifanya hivyo ili aweze kutukomboza toka katika kipindi hiki chenye uovu. Ndio maana Yesu alibatizwa, akaimwaga damu yake hadi kifo pale Msalabani, kisha akafufuka toka kwa wafu, na kwa sababu hiyo ametuokoa toka katika dhambi zetu zote mara moja na kwa wote.

Yesu aliitimiza injili ya maji na Roho na kisha akatupatia ili kutuokoa toka katika dhambi za ulimwengu huu. Ni Bwana wetu ndiye aliyetuokoa toka katika dhambi zote za ulimwengu huu kwa kupitia injili ya maji na Roho. Kwa lugha nyingine, Bwana wetu ametukomboza toka katika kipindi kiovu kama hiki kwa kupitia injili ya maji na Roho. Hivyo, hatuna namna nyingine ya kufanya zaidi ya kumshukuru Bwana kwa kutupatia injili hii ya kweli. Kwa hakika, Bwana wetu ametupatia wokovu wa kweli kwetu sisi sote tunaouamini ukweli huu kwa kuutoa mwili wake kwa Mungu Baba. Sasa tumepokea ondoleo kamili la dhambi zetu kwa kuamini katika injili ya maji na Roho ambayo ni Ukweli wa wokovu mkamilifu.

Bwana wetu aliitoa sadaka moja kwa ajili ya dhambi zetu milele kwa tendo lake la kuupokea ubatizo na kufa Msalabani. Bwana amefanyika kuwa Mwokozi wetu wa kweli baada ya kufufuka toka kwa wafu siku ya tatu, kwa sasa ameketi mkono wa kuume wa Mungu Baba. Hata hivyo, kuna watu wengi sana ambao bado hawauamini Ukweli huu mkamilifu wa wokovu, na ndio maana maisha yao yanaishia kukwama. Kwa kweli inanihuzunisha sana ninapoona wachungaji wengi na wafuasi wao wakishindwa kuupata Ukweli wa injili ya maji na Roho,

na kwa matokeo hayo wao hufikiri kuwa wanapaswa kupambana na kuishinda dhambi kwa kutegemea jitihada zao wenyewe. Watu hao wamefungwa kwenda kuzimu pamoja na kuwa wanamwamini Yesu, hii ni kwa sababu wanajiamini wao wenyewe kuwa ni wenye dhambi ambao wamefungwa katika dhambi na uovu, na wanawaza hivyo kutokana na dhambi wanazozifanya kila siku.

Pamoja na kuwa Bwana amemwokoia kila mtu kikamilifu kwa kupitia injili ya maji na Roho, ina maana gani basi wakati watu wengi wanaposhindwa kuiamini injili hii ya Kweli na kisha kubakia katika dhambi zao? Hivyo, sisi sote ni lazima tutambue kuwa Bwana ameutumiza wokovu wetu wa milele kwa injili ya maji na Roho. Hivyo, ni lazima twende mbele za Bwana hali tukiwa na ufahamu mzuri na huku tukiwa na imani katika Ukweli wa injili ya maji na Roho, injili ambayo Bwana ametupatia.

Mara nyingi huwa ninawaona wachungaji baadhi katika TV wakihubiri kuhusu kazi ya Yesu Kristo ya ukombozi. Ingawa huwa wanaanza mahubiri yao kwa wimbo mfupi wa sifa ili kuonyesha kuwa mahubiri yao ni “mahubiri ya kiinjili” kana kwamba ni wafuasi wa mwanazuoni aliyeitwa C. H. Spurgeon, ukweli ni kuwa mwisho wa mahubiri yao huhitimisha wakisema, “Hebu tujitahidi kuisha maisha mema na kwa uaminifu.” Kwa maneno mengine, wao wamejiundia aina fulani ya viwango vya kimaadili na kinidhamu vya Kikristo, na wanatumia viwango hivyo kuwahubiria wafuasi wao, unaweza kuwasikia wakisema, “Hebu tusiangukie katika dhambi, bali tupambane na kuishinda dhambi.”

Hata hivyo, suala la kuzingatia hapa ni ikiwa kweli unaweza kupambana na kuzishinda dhambi za ulimwengu. Je, tunaweza kuishika na kuifuata Sheria iliyotolewa na Mungu kikamilifu katika maisha yetu? Hapana, kwa kweli hilo ni

jambo lisilowezezana. Bwana Mwenyewe alitambua wazi kuwa hutaweza kupambana na kuzishinda dhambi za ulimwengu huu, na ndio maana alizichukua dhambi zote za mwanadamu kwa kubatizwa na Yohana Mbatizaji, alihukumiwa kwa ajili ya dhambi hizi Msalabani kwa niaba yako, kisha akafufuka tena toka kwa wafu, na kwa sababu hiyo amekuokoa toka katika dhambi za ulimwengu. Hatupaswi kusahau kuwa Bwana hajatupatia ukweli mwingine wa wokovu zaidi ya injili ya maji na Roho.

Kwa kweli, sisi sote tunaomwamini Yesu ni lazima tupambane na kuzishinda dhambi za ulimwengu, lakini ili kufanya hivyo, ni lazima kwanza dhambi zetu ziondolewe kwa kuamini injili ya maji na Roho. Sababu inayowafanya watu wengi kubakia katika kifungo cha dhambi ni kwa sababu hawaifahamu na wala hawaiamini injili ya maji na Roho. Kwa hakika hatuwezi kuishinda dhambi ikiwa tushindana nayo kwa kuzitegemea nguvu zetu wenyewe. Kwa kweli hatuwezi kuitenda haki ya Mungu na wala hatuwezi kuishinda nguvu ya dhambi hadi pale tutakapokuwa tumepokea ondoleo la dhambi zetu kwa kuzaliwa tena upya kupitia injili ya maji na Roho.

Je, Unaweza Kuishinda Vita Yako Dhidi ya Dhambi?

Ili uweze kuishinda dhambi ambayo unashindana nayo, unapaswa kwanza kuamini katika injili ya maji na Roho katika moyo wako, na hapo ndipo utakapokuwa mtakatifu asiye na dhambi. Yesu Kristo alizitenda kazi za haki ili aweze kutupatia karama ya wokovu wa kweli sisi ambao tulikuwa hatuwezi kuzishughulikia dhambi za ulimwengu. Yesu ni Mwokozi ambaye alibatizwa na Yohana Mbatizaji, akazipokea dhambi

zote za ulimwengu mara moja na kwa wote, kisha Yesu akaimwaga damu yake Msalabani, kwa sababu hiyo akatuokoa sisi sote toka katika dhambi zetu zote mara moja na kwa wote. Ingawa Yesu Kristo ametuokoa toka katika dhambi zetu zote kwa kuutoa mwili wake kwa Mungu Baba akiwa kipatanisho, ukweli ni kuwa kuna watu wengi sana ambao bado hawaifahamu injili ya maji na Roho, injili ambayo ni karama ya Mungu ya wokovu wa kweli; kwa msingi huo wakristo hao wanaendelea kuishi hapa duniani wakiwa ni wenye dhambi maisha yao yote.

Hivyo, wale ambao hawaifahamu injili ya maji na Roho, na ambao bado wanaendelea kupambana na dhambi zilizo katika mioyo yao ni hakika kuwa wanapigana vita hiyo bure. Wale ambao wameendelea kupambana hadi leo hii kutatua tatizo lao la dhambi kwa kutegemea nia yao binafsi basi wanapaswa sasa kujitambua kuwa wao ni akina nani. Ukweli ni kuwa watu hao hawawezi kujitetea na wataendelea kutenda dhambi hadi siku watakapokufa.

Kwa kweli lingekuwa ni jambo la kupendeza sana ikiwa watu wote wangelishi pasipo kutenda dhambi yoyote, lakini ukweli ni kuwa hakuna mtu anayeweza kujizuia kutofanya dhambi. Kwa kuwa sisi sote tunazaliwa kama wazao wa watenda maovu, basi ndio maana hatuwezi kuzaa matunda ya namna nyingine zaidi ya matunda ya dhambi. Kwa maneno mengine, wanadamu wote ni viumbe dhaifu ambao wataendelea kutenda dhambi mbele za Mungu katika maisha yao yote. Ni dhahiri kuwa tunaweza kupokea ondoleo la dhambi na kisha kuwekwa huru toka katika dhambi zote ikiwa tutauamini Ukweli wa injili ya maji na Roho kwa mioyo yetu yote, ukweli ambao ni wokovu wa Mungu.

Wakristo ambao wana dhambi katika mioyo yao kwa wakati huu wanaweza kutambua jinsi nafsi zao zinavyotia

huruma. Wakristo wa jinsi hiyo ni wale ambao imani ya ni imani ya kisheria, imani inayotaribu kupata kibali toka kwa Mungu kwa kuishika na kuitekeleza Sheria na kujizuia kutotenda dhambi, na wanafanya hivi kwa sababu hawaufahamu Ukweli wa injili ya maji na Roho. Kwa kweli ni jambo lisilowezekana kuwaita waamini wa siku hizi wa kisheria kuwa ni wajinga. Maana wanajaribu kuoshwa dhambi zao nje ya Ukweli wa injili ya maji na Roho. Watu hawa ni lazima watambue kuwa hata kama watajaribu kiasi gani kuzioshelea mbali dhambi zao na kujitakasa wao wenyewe kwa sala zao za toba, ukweli ni kuwa haiwezekani kabisa wakaishi wakiwa huru mbali na dhambi.

Tunapaswa kutambua hapa kuwa Bwana hafurahishwi anapowaona watu wakiishi maisha ya kiimani ya kisheria. Kinyume chake, Bwana anataka wayakwepe maisha hayo ya kiimani ya kisheria na badala yake waamini katika injili ya maji na Roho. Bwana wetu alitambua dhahiri kuwa hatutaweza kupambana na kuzishinda dhambi hizi zote, ndio maana alizichukua dhambi zetu zote kwa kupitia ubatizo wake, kisha akalipa mshahara wote wa dhambi zetu zote kwa damu yake pale Msalabani hadi kifo. Bwana alizioshelea mbali dhambi zetu zote kwa Ukweli wake wa maji na damu. Hivyo, kila Mkristo aliye mwenye dhambi ni lazima aamini katika injili iliyotolewa na Bwana ambayo ni injili ya maji na Roho, na kwa kufanya hivyo ataweza kuokolewa toka katika dhambi zake zote na atakuwa huru mbali na utumwa wa dhambi.

Ndugu waamini wenzangu wapendwa, je, ni kweli kuwa mnaweza kupambana na kuzishinda dhambi zote mnazozitenda kila siku? Je, ni kweli kuwa mnaweza kuishi pasipo kutenda dhambi kwa kujaribisha? Hapana, haiwezekani! Kwa kuzingatia hali yetu ya kiasili, sisi ni wadhaifu sana na hatuwezi kuzishinda dhambi za ulimwengu huu kwa

kujitegemea wenyewe. Hivyo ni lazima tuikiri hali yetu dhaifu na hali ya kutoweza kukwepa dhambi, na ni lazima tuupokee wokovu wetu kwa kuamini katika injili ya maji na Roho ambayo Bwana ametupatia. Ikiwa hatutautambua udhaifu wetu, halafu tukawa hatuifahamu injili ya maji na Roho ambayo imetuokoa toka katika dhambi zetu, kisha tukaendelea kufuata mwenendo wa hivi sasa wa kuamini kama wanavyoamni watu wengine, basi ni hakika kuwa tutaishia kushindwa milele.

Bwana Aliutoa Mwili Wake Ili Kutuokoa Toka Katika Kipindi Hiki Kiovu

Mtume Paulo alisema kuwa Bwana “alijitoa kwa ajili ya dhambi zetu, ili aweze kutuokoa katika kipindi hiki chenye uovu.” Kwa kweli ukiri huu wa imani ambao Paulo aliosema si jambo jema sana la kiimani? Ukiri huu unathibitisha kuwa kama ilivyo kwetu sisi, Mtume Paulo pia aliamini katika injili ya maji na Roho. Imani ya Mtume Paulo ilikuwa ni ile inayouamini Ukweli—kuwa wakati Yesu alipobatizwa alizichukua katika mwili wake sio tu dhambi za Paulo bali dhambi zote za wanadamu, na kwamba Kristo alibeba pia adhabu ya hizo dhambi zote za mwanadamu kwa kusulubiwa. Sisi pia tumeweza kukombolewa toka katika dhambi zetu zote kwa kuwa tuliufahamu na kuuamini Ukweli wa injili ya maji na Roho.

Ukweli wa injili ya maji na Roho unatoa ondoleo kamilifu la dhambi mara moja na kwa wote kwa wale wote wanaouamini ukweli huo. Dhambi zetu hazitoweki kutokana na hoja kuwa tunaishi maisha mazuri na kwamba tunatenda matendo mema. Ingawa umetenda baadhi ya matendo mema, ukweli ni kuwa wewe mwenyewe unapaswa kutambua kuwa

matendo yako mema hayajaweza kukuweka huru mbali na dhambi zako. Hivyo, badala ya kujaribu kutotenda dhambi kwa kuzitegemea jitihada zako binafsi, basi ni vema kwetu sote kuamini kuwa Bwana ameukamilisha wokovu wetu kwa injili ya maji na Roho. Bwana ni Mwokozi wetu. Bwana ametufanya sisi tunaoamini katika injili ya maji na Roho kuwa wakamilifu mara moja na kwa wote. Sisi tunaweza kuishinda nguvu ya dhambi na kuwa washindi ikiwa tu tutawekwa huru toka katika dhambi zetu na kisha kuwa wasio na dhambi kwa kupitia imani yetu katika injili ya maji na Roho. Je, utakataa kuyaonja maisha ya milele, utakataa kuupokea wokovu wako toka katiak dhambi zote kwa kuiweka imani yako katika injili ya maji na Roho?

Kwa kuwa kimsingi tulizaliwa tukiwa na dhambi hapa ulimwenguni, basi ndio maana hatukuweza kuwa na chaguo zaidi ya kuendelea kuwa wenye dhambi. Hata hivyo, Bwana ametuokoa wewe na mimi toka katika dhambi zote ulimwengu mara moja na kwa wote kwa kupitia Ukweli wa injili ya maji na Roho. Pamoja na kuwa tunaishi katika kipindi hiki kiovu, ukweli ni kuwa kadri tunavyozidi kumwamini Yesu Kristo Mwokozi wetu, basi tunaweza kusimama mbele za Mungu pasipo hofu huku tukizitumainia kazi za haki alizozitenda Bwana wetu. Kwa mara nyingine tena ninamshukuru sana Bwana wetu kwa kuja hapa duniani na kwa kutupatia injili ya maji na Roho.

Hivyo, badala ya kujaribu kupambana na kuzishinda dhambi zako kwa kuzitegemea nguvu zako binafsi, basi unapaswa kuzishinda hizo dhambikwa kuamini kwa moyo wako katika injili ya maji na Roho ambayo Bwana ametupatia. Mnapaswa kutambua hapa kuwa ikiwa mnaiamini injili hii ya Bwana, basi ni hakika mtaweza kuushinda ulimwengu huu (1 Yohana 5:4-8). Ni lazima tuamini injili ya maji na Roho

kwa mioyo yetu yote, injili ambayo ni Ukweli wa wokovu ambao umetuokoa toka katika dhambi. Kwa kuwa tumepokea ondoleo la dhambi zetu na kwa kuwa tumezaliwa tena upya kwa kuamini injili ya maji na Roho, basi kwa sasa inawezekana kwetu sisi kuzifanya kazi za Mungu kwa imani tukiwa watumishi wa Yesu Kristo.

Kwa maneno mengine, kwa wale ambao sasa wanaamini katika injili ya maji na Roho, ni hakika kuwa hawana dhambi katika mioyo yao. Sisi tunafanywa kuwa wenye hekima na tunaoweza kuushinda udhaifu wetu kwa kuamini katika Ukweli wa injili ya maji na Roho. Haijalishi kuwa unaweza kuwa umetenda dhambi gani mbele za Mungu au mbele za wanadamu wenzako, ukweli ni kuwa mara unapoiamini injili ya maji na Roho, basi ni wazi kuwa hutakuwa na haja yoyote ya kushughulika na dhambi. Kuanzia sasa na kuendelea wewe na mimi ni lazima tuishi kwa ajili ya haki ya Mungu huku tukisimama imara katika imani hii inayoamini katika injili ya maji na Roho.

Kama umekwisha amini katika injili ya maji na Roho, basi kwa sasa huna haja ya kushughulika na dhambi za ulimwengu. Hii ni kwa sababu wale wanaoiamini injili hii ya kweli hawana lolote la kufanya kuhusiana na dhambi, wao ni wana wa Mungu, na wale ambao wamefanyika kuwa wana wa Mungu wanaweza kuishi wakiwa na nguvu sana kwa kuwa wanaitumainia injili ya maji na Roho.

Tunapaswa kutambua kuwa tunapoishi hapa ulimwenguni hali tukiwa tumeitumainia injili ya maji na Roho, basi hapo ndipo neema ya Mungu na baraka zake zinapotushikia kikamilifu. Wale ambao wamefanyika kuwa wenye haki kwa kuamini haki ya Mungu wanaweza kuishi kwa imani yao katika injili ya maji na Roho, huku wakimtolea Mungu shukrani kwa kila pumzi waliyo nayo. Ni lazima tuzipitishe

dhambi zetu na udhaifu wetu kwenda kwenye mwili wa Yesu Kristo, na ni lazima tuyaishi maisha yetu hali tukiwa tumeungana na Bwana kwa kupitia imani yetu katika injili ya maji na Roho.

Wale waliozaliwa tena upya ni lazima sasa wakusanyike katika Kanisa la Mungu na kisha wayaishi maisha yao wakiwa wameungana na injili na huku wakiitumikia haki ya Mungu. Kwa hakika jambo linalomfurahisha Mungu ni kuona sisi tukiungana pamoja hali tukiwa na imani moja katika injili ya maji na Roho. Ndio maan Bwana alisema hivi, *“Tazama, jinsi ilivyo vema, na kumpendeza, Ndugu wakae pamoja, kwa umoja!”* (Zaburi 133:1). Injili ya maji na Roho ni karama kuu ambayo Mungu ametupatia. Bwana ametupatia karama ya thamani sana itokayo juu mbinguni. Kuanzia sasa na kuendelea ni sahihi kwetu sisi kuishi ndani ya Kanisa la Mungu hali tukiwa na imani inayoamini katika injili ya maji na Roho.

Kwa hakika, tunatambua kuwa ni haki kwetu sisi kuishi kwa imani, na kwamba inatupasa kuziongoza familia zetu kuelekea katika Kanisa la Mungu na kisha kuokolewa, na kwamba ni wajibu wetu kuwaita wengine ili waweze kujiunga katika familia yetu ya kiimani inayoamini katika injili ya maji na Roho. Hatupaswi kamwe kujaribu kumpendeza Mungu kwa kujitakasa sisi wenyewe au kwa kujaribu kutenda matendo mema kwa kuzitegemea nguvu zetu wenyewe. Hiyo ni njia ya Kaini. Sisi tunapaswa kuishikilia imani yetu katika injili ya maji na Roho na kisha kumtumikia Bwana kwa imani hii.

Je, Nini Maana ya Kuifuata Injili Nyingine?

Kwetu sisi tunaoamini katika injili ya maji na Roho, injili nyingine ni ipi? Ni injili ya kisheria inayotuingiza katika

mkanganyiko. Sasa hii injili ya kisheria inayotusumbua ni kitu gani? Injili ya siku hizi ya kisheria ni ile inayodai kuwa watu wanaweza kuoshwa dhambi zao zikawa nyeupe kama theluji kwa kutoa sala za toba. Kimsingi, madai ya jinsi hiyo ni tofauti kabisa na injili ya maji na Roho.

Injili ya maji na Roho ni Ukweli unaotangaza kuwa Yesu Kristo ametuokoa toka katika dhambi kwa kupitia ubatizo wake na damu yake Msalabani. Hata hivyo, tatizo lililopo ni kuwa miongoni mwa Wakristo wa siku hizi hapa duniani, ni wachache sana wanaoiamini injili ya maji na Roho, wakati huo huo wapo wengi wanaoendelea kuiajini injili ya kisheria isiyo na msingi wowote ule. Wale wanaoiamini injili ya kisheria kama hiyo wamejitoa kuzifanya sala za toba kwa lengo la kujaribu kuzioshelea mbali dhambi zao. Imani ya watu kama hao ndio inayoleta matatizo mengi sana kwa Wakristo katika ulimwengu huu. Hivyo, Wakristo wengi wanayaaminia mawazo yao binafsi kuwa ndio Ukweli badala ya kuiajini injili ya maji na Roho, na ndio maana kuna matatizo mengi sana.

Injili ya maji na Roho ipo tofauti kabisa na injili nyingine za kisheria. Injili ya maji na Roho ndio injili ya Ukweli ambao Biblia inauzungumzia. Ni hakika pasina shaka kuwa Bwana wetu ametuokoa toka katika dhambi zote za ulimwengu kwa kuja hapa duniani, kwa kuzichukua dhambi zetu katika mwili wake kwa kupitia ubatizo wake, na kwa kufa Msalabani.

Ni jambo la kuhuzunisha kuwa Ukristo wa madhehebu makuu hauiamini injili ya kweli, madhehebu hayo yanafundisha kuwa dhambi ya asili inasamehewa wakati mtu anapomwamini Yesu, lakini pamoja na hilo anapaswa aendeleo kulitafuta ondoleo la dhambi zake binafsi kwa kufanya sala za toba kila siku. Pia madhehebu hayo yanafundisha hivi: “Pamoja na kuwa sasa tunahesabiwa kuwa ni wenye haki kwa

kumwamini Yesu, ukweli ni kuwa hii haimaanishi kuwa hatuna dhambi. Hiyo ina maanisha kuwa Mungu anaitua sisi kuwa wenye haki kutokana na kazi ya Yesu hata kama bado sisi ni wenye dhambi. Hivyo tujitahidi kadri tuwezavyo kutofanya dhambi. Na kwa kuwa Biblia inasema hivi, *‘Basi, wapendwa wangu, kama vile mlivyotii sikuzote, si wakati mimi nilipokuwapo tu, bali sasa zaidi sana mimi nisipokuwapo, utimizeni wokovu wenu wenyewe kwa kuogopa na kutetemeka’* (Wafilipi 2:12), basi ni lazima tutubu kila siku na tudumu katika njia ya utakaso.”

Ndugu waamini wenzangu, je, ni kweli kuwa mtu anaweza kuokolewa toka katika dhambi zake kwa kuamini namna hii? Tunawezaje kupambana na kuishinda dhambi kwa kuzitegemea nguvu zetu binafsi? Kwa hakika, tunapaswa kupambana na kuishinda dhambi, lakini tunawezaje kulifikia lengo hilo pasipo kuwa na imani katika injili ya maji na Roho? Je, unaweza kupambana na kuzishinda dhambi za ulimwengu kwa kufanya maamuzi yako binafsi ukisema, “Kamwe sintafanya dhambi yoyote ile tena”?

Hapana, hutaweza kamwe kuitimiza hiyo nia yako. Biblia inasema, *“Je! Mkushi aweza kuibadili ngozi yake, au chui madoa-doa yake? Kama aweza, ndipo na ninyi mwaweza kutenda mema, ninyi mliozoea kutenda mabaya”* (Yeremia 13:23). Kadri utakavyokuwa ukijaribu kutoanguka na kutenda dhambi za ulimwengu huu, ndivyo utakavyotambua jinsi nafsi zetu zinavyoanguka zaidi katika dhambi za ulimwengu huu.

Kuna baadhi ya watu ambao wanapata mashaka, “Ikiwa ni hakika kuwa waamini wa injili ya maji na Roho hawana dhambi hata pale wanapokuwa wametenda dhambi, je kama ni hivyo si watafanya dhambi nyingi sana hapo baadaye?” Hofu na mashaka kama hayo ni matokeo ya kutoiamini injili ya maji na Roho. Kwa kweli hakuna haja ya kuwa na hofu namna hii.

Kati ya yule ambaye nguo zake ni safi na yule ambaye nguo zake ni chafu, ni nani atakayekuwa makini kutozichafua nguo zake?

Kwa kuwa waamini wa injili ya maji na Roho hawana dhambi, na kwa kuwa waamini hao wameokolewa toka katika dhambi za ulimwengu, basi wao wana kila sababu ya kuyaishi maisha yao wakichukia kuifuata dhambi. Kutokana na mtazamo wa mtu anayeamini injili ya maji na Roho, mtu huyo hata akitenda dhambi, ukweli ni kuwa Bwana amekwisha shughulikia tatizo la dhambi zake, na kwa sababu hiyo nia yake ya kutenda dhambi inakuwa imepunguzwa sana. Mtu anapokuwa hana dhambi hata pale anapotenda dhambi, basi ile nia na hamu ya kutenda dhambi inapungua, hivyo mtu huyo mara nyingi hujitenga na dhambi yeye mwenyewe.

Mtume Paulo anasema kuwa alishangazwa kuwaonaw watakatifu wa Galatia wakiifuata injili nyingine kiurahisi tu, kisha akaeleza wazi kuwa hakuna injili nyingine zaidi ya ile aliyowahubiria yeye. Zaidi ya yote, Paulo aliweka bayana kuwa mtu yeyote anayehubiri injili nyingine na alaaniwe hata kama atakuwa ni malaika toka Mbinguni. Kwa hiyo, kwa hakika Mungu atawalaani wale wote wanaohubiri injili ya kisheria inayowafanya watu waangukie katika mkanganyiko na kuichafua mioyo yao. Kwa hakika watu wa jinsi hiyo wanangojea laana ya Mungu ambayo itawatupa katika moto mkali wa kuzimu.

Je, kuna yeyote yule miongoni mwenu ambaye kwa namna fulani anasubiri mafundisho mengine zaidi ya injili ya maji na Roho? Kanisa la Mungu ni mahali ambapo kuna hazina inayohubiri Neno la injili ya maji na Roho. Lakini kuna baadhi ya watu ambao wanaichukulia injili hii kwa urahisi, na hufikia hatua ya kusema hivi, “Ooooh, ameanza tena, anasema jambo lile lile tena na tena. Ananifanya niwe na usingizi sana!” Watu

wa jinsi hiyo wangekuwa na furaha ikiwa wangelienda kwenye mikutano ya uamsho ambapo nyimbo za sifa zinaimbwa kwa mbwembwe za kurusha ngumi na mahubiri ni ya kuamsha hisia. Pengine wangelikuwa na furaha ikiwa wangelisikia injili ya kisheria inayosisitizia juu ya maadili na nidhamu huku ikiwahamasisha kuishi kwa kwema. Hata hivyo, injili yoyote ile ambao si injili ya maji na Roho ni injili potofu iliyotoka kwa Ibilisi mwenyewe.

Hivyo tunapaswa kutambua jinsi ilivyo muhimu kwa Kanisa la Mungu kuihubiri injili ya maji na Roho. Kwa kweli ni baraka kubwa sana kuipokea injili hii katika mioyo yetu na kuiamini, hii ni kwa sababu tutapata amani katika akili zetu. Mafundisho yote ya Biblia yanafahamika kuwa ni mafundisho sahihi pale yanapotafsiriwa na kutumiwa katika wigo wa injili ya maji na Roho. Ikiwa utanza kulifahamu Neno la Mungu katika wigo wa injili hii ya Ukweli, basi hapo ndipo Neno litakapojikita kwa kina katika moyo wako, na utafikia hatua ya kuipata furaha kubwa zaidi. Ikiwa kwa upande mwingine moyo wako hauamini sawasawa katika Neno la injili ya maji na Roho, na ikiwa hauamini Ukweli, basi ni hakika kuwa utaishi ukiwa mwenye dhambi hadi mwisho.

Wale wanaosimama kinyume na injili ya maji na Roho mara nyingi ni wale wajiitao wana uamsho na wale wenye kufuata vikundi dini. Na makundi hayo mawili ndio yanayounda sehemu kubwa ya Ukristo wa madhehebu makuu. Kwa kweli, wao wanaihubiri injili iliyo tofauti kabisa. Wanauamsho wanaamini kuwa kama wakiomba huku wakirusha ngumi na mikono hewani huku wakiwa wamefungulia muziki kwa sauti kubwa na kumwomba Mungu kwa nguvu, basi wanaamini kuwa Mungu atawapatia Roho Mtakatifu na karama zake nyingine. Wanauamsho hawana haja na ondoleo la dhambi, bali wao wanataka baraka za mali na

vitu, uponyaji, na kunena kwa lugha. Hivyo, hata pale wanapokiri kumwamini Yesu kuwa ni Mwokozi wao, kwa hakika dhambi huwa bado zimo katika mioyo yao. Wakati mtu aliye na dhambi anapozitenda karama za Roho Mtakatifu, je, kufanya hivyo si ni sawa na kutenda maovu? Wale watendao maovu mbele za Mungu ni wale wanaotabiri huku mioyo yao ikiwa bado imo kwenye dhambi (Mathayo 7:23).

Kwa nyongeza, wainjili ni miongoni mwa wapinzani mahiri sana wa injili ya maji na Roho. Watu hawa wanafundisha kuwa ikiwa mtu anamwamini Yesu kuwa ni Mwokozi wake, basi mtu huyo anakuwa hana dhambi. Wao huamini katika hali ya upofu kuwa hawana dhambi ingawa kwa kweli wana dhambi. Kwa hakika wao hawana lolote la msingi zaidi ya kuwa na hiyo imani potofu. Kipindi hiki cha sasa kimegeuka na kuwa kipindi ambacho injili nyingine mbali na injili halisi ya maji na Roho zinapotea na kunyauka, na hiyo ni kwa sababu watetezi wa injili hizo wamewafanya watu kuuchoka Ukristo na injili zake za uongo. Kwa kifupi, wamewafanya watu wakae mbali na Yesu.

Kwa maneno mengine, kile ambacho Biblia inasema kimetimia: *“Maana utakuja wakati watakapoyakataa mafundisho yenye uzima; ila kwa kuzifuata nia zao wenyewe watajipatia waalimu makundi makundi, kwa kuwa wana masikio ya utafiti; nao watajiepusha wasisikie yaliyo kweli, na kuzigeukia hadithi za uongo”* (2 Timotheo 4:3-4). Mara nyingi watu huwa wanasikiliza kwa makini sana pale wanapolisikia jambo ambalo lina manufaa kwa miili yao. Kwa kuwa utajiri wa mali na vitu umekuwa ndio kiongozi katika dunia hii, basi watu wengi wanatamani sana kupata fedha kiasi kuwa makanisa yanafundisha kuwa mtu anaweza kuwa tajiri ikiwa tu atatoa sadaka nyingi.

Ndugu waamini wenzangu, je, dhambi zako zinaweza

kutoweka ikiwa utafanya sala nyingi za toba? Je, utapokea Roho Mtakatifu ikiwa utaomba kwa nguvu sana? Hapana, kwa kweli hiyo si kweli! Unapotoa sala za toba, ni hakika kuwa moyo wako unapata amani kwa kitambo kifupi, na hiyo ni kutokana na fikra binafsi za kujiridhisha. Inawezekanaje kwa mtu ambaye ana dhambi katika moyo wake akadiriki kupokea Roho Mtakatifu? Unapaswa kutambua kuwa Roho Mtakatifu hapokelewi kwa namna hii. Hii ni kwa sababu Mungu Roho Mtakatifu si Yule anayekuja au kwenda kwa kufuata amri yako. Yeyote ambaye hajapokea ondoleo la dhambi zake hawezi kumpokea Roho Mtakatifu. Hivyo, ikiwa mtu ana dhambi katika moyo wake na anadai kuwa amempokea Roho Mtakatifu, kisha akaendelea kufanya ishara mbalimbali ikiwemo kunena kwa lugha na kujifanya kuwaponya wengine magonjwa yao, basi hiyo itakuwa ni dhahiri kuwa kitu alichokipokea si Roho Mtakatifu balini roho mwovu.

Biblia inasema, *“Petro akawaambia, Tubuni mkabatizwe kila mmoja kwa jina lake Yesu Kristo, mpate ondoleo la dhambi zenu, nanyi mtapokea kipawa cha Roho Mtakatifu”* (Matendo 2:38). Kwa maneno mengine, Roho Mtakatifu ni karama ya Mungu kwa wale ambao wameoshwa dhambi zao kwa kuamini katika injili ya maji na Roho, na kwa sababu hiyo Roho Mtakatifu ni kwa wale ambao mioyo yao haina dhambi. Vivyo hivyo, mtu hawezi kupokea karama ya Roho Mtakatifu wa Mungu ikiwa atakuwa hajaoshwa dhambi zake kwa kuamini katika injili ya maji na Roho. Roho Mtakatifu ni Mungu mtakatifu Mwenyewe ambaye hawezi kukaa mahali palipo na dhambi. Na ndio maana mtu anaweza kupokea karama ya Roho Mtakatifu ikiwa tu atakuwa ameoshwa dhambi zake zote.

Ingawa kwa sasa injili ya kisheria inatawala sehemu kubwa ya jamii za Kikristo katika kipindi hiki chenye uovu,

sisi tunaoamini katika injili ya maji na Roho hatupaswi kamwe kuivumilia injili ya namna hiyo. Hivyo, ninamshukuru sana Mungu kwa kuwa amenikomboa toka katika kipindi hiki kiovu. Kwa hakika tulikuwa tumedaganywa na injili nyingine ambayo ni potofu na yenye mkanganyiko, lakini kwa sasa tumepokea karama ya Roho Mtakatifu kwa kuamini katika injili ya maji na Roho, na kwa sababu hiyo tumeweza kuzifanya kazi za Mungu na kuufuata Ukweli na haki yake.

Ndugu waamini wenzangu, je, mnafuraha kwa kuwa Mungu amewakabidhi jukumu la kuieneza injili ya maji na Roho? Je, mnaona vigumu sana kulitekeleza lile ambalo Mungu amewakabidhi? Ingawa kuna nyakati tunapojisikia kuchoka, kwa hakika tunaendelea kumshukuru Mungu kwa wokovu ambao ametupatia na tunamshukuru Mungu kwa kuturuhusu kuishi katika Kanisa lake.

Ni matarajio yangu kuwa wewe na mimi tutaendelea kuamini na kuihubiri injili ya maji na Roho hadi mwisho wa ulimwengu, na kwamba tutaendelea kuishi kwa neema ya Mungu tukiwa na tumaini. ☒

Pengine Imani Yako ni Kama ya Wanatohara?

< Wagalatia 1:1-5 >

“Paulo, mtume, (si mtume wa wanadamu, wala kutumwa na mwanadamu, bali na Yesu Kristo, na Mungu Baba aliyemfufua kutoka kwa wafu), na ndugu wote walio pamoja nami,

Kwa makanisa ya Galatia:

Neema na iwe kwenu, na amani, zitokazo kwa Mungu Baba, na kwa Bwana wetu Yesu Kristo; ambaye alijitoa nafsi yake kwa ajili ya dhambi zetu, ili atuokoe na dunia hii mbovu iliyopo sasa, kama alivyopenda Mungu, Baba yetu. Utukufu una yeye milele na milele, Amina.”

Katika kipindi cha Kanisa la Mwanzo, makanisa ya Galatia yalikumbana na matatizo mengi sana. Kulikuwa na baadhi ya walimu katika makanisa haya ambao walisababisha matatizo mengi sana ya kiroho. Hali wakiwa na lengo la kuyafanya makanisa yawe ya Kiyahudi, watu hao walikuwa wakiineza injili nyingine iliyo tofauti kabisa miongoni mwa watakatifu huku wakidai kuwa watu wangeluweza kuwa watu wa Mungu ikiwa tu watatahiriwa kimwili. Kwa matokeo hayo, watu wengi katika makanisa ya Galatia ambao walikuwa bado ni wachanga kiroho waliyaamini na kuyafuata mafundisho hayo, na matokeo ya mafundisho hayo yalikuwa ni makubwa sana kiasi cha kutishia uhai wa Kanisa.

Maelezo ya utangulizi kuhusiana na mafundisho ya

wanatohara, ambao walikuwa ndio chanzo cha matatizo katika makanisa ya Galatia ni kama yafuatavyo: Kwa mujibu wa agano ambalo Mungu alikuwa amelifanya na Ibrahimu, wana wa Ibrahimu waliwekwa alama iliyowaonyesha kuwa wao ni watu wa Mungu kwa kufanyiwa na kuipokea tohara ya kimwili. Kwa matokeo haya, katika fikra za Kiyahudi iliambiwa kuwa kupokea tohara ya kimwili ikuwa ni kuingia katika ukoo wa Ibrahimu.

Lakini kiuhalisia, sharti hili la tohara ilikuwa ni ishara iliyokuwa ikiuelezea wokovu wetu wa kiroho, na ishara hiyo ilikuwa ikielezea jinsi ambavyo Yesu Kristo atakuja na kuziondoa dhambi zetu zote toka katika mioyo yetu. Ndio maana katika Agano la Kale imandikwa hivi, *“Jitahirini kwa Bwana, mkaziondoe govi za mioyo yenu, enyi watu wa Yuda na wenyeji wa Yerusalemu; ghadhabu yangu isije ikatoka kama moto, ikawaka hata mtu asiweze kuizima, kwa sababu ya uovu wa matendo yenu”* (Yeremia 4:4); *“Basi, zitahirini govi za mioyo yenu, wala msiwe na shingo ngumu”* (Kumbukumbu la Torati 10:16). Wakati Mungu alipoitaja tohara ya kimwili katika Agano la Kale, kwa kweli alikuwa akizungumzia juu ya tohara ya mioyo yetu—yaani ondoleo la dhambi zetu.

Warumi 2:29 inasema hivi, *“Na tohara ni ya moyo, katika roho, si katika andiko.”* Hivyo, kwa kuwa kuna watu ambao wametahiriwa kimwili kama sehemu ya desturi zao, basi hii haimaanishi kuwa wao watafanyika kuwa watu wa Mungu walio wakamilifu. Hivyo ilikuwa muhimu sana kufundisha kuwa imani iliyokuwa ikitetea tohara ya kimwili ilikuwa ni imani potofu. Hii ni kwa sababu watu wengi sana katika makanisa ya Galatia waliamini kuwa tohara ya kimwili ina jukumu muhimu sana linalowafanya watu kuwa watu wa Mungu kuliko imani katika injili ya maji na Roho. Ndio maana Paulo aliamua kuishuhudia injili ya maji na Roho ambayo yeye mwenyewe

aliiamini, na kwa kufanya hivyo aliuweka wazi uovu wa tohara ya kimwili ambao ulikuwa umezagaa sana katika makanisa ya Galatia, na Mtume Paulo aliwakemea kwa kuikumbatia imani hiyo potofu ya kisheria.

Hivyo, kuanzia mwanzo katika Kitabu cha Wagalatia, Mtume Paulo aliongea kwa mamlaka kabisa akiwapinga wale waliokuwa wakiitetea tohara ya kimwili na akawaeleza kuwa imani yake ni tofauti kabisa na imani yao: *“Paulo, mtume, (si mtume wa wanadamu, wala kutumwa na mwanadamu, bali na Yesu Kristo, na Mungu Baba aliyemfufua kutoka kwa wafu),” (Wagalatia 1:1).* Kwa maneno mengine, Paulo aliweka wazi yeye alifanyika kuwa mtumishi wa Mungu si kwa kufanyiwa tohara ya kimwili bali kwa kuuamini Ukweli wa injili ya maji na Roho.

Imani ya kisheria ya jinsi hiyo ya wanatohara ni sawa na fundisho la kidini la toba ambalo limejikita sana katika Ukristo wa siku hizi; na kwa sababu hiyo mimi pia ninataka kukemea na kuweka wazi imani potofu iliyo katika Ukristo wa leo hii na ninataka kuisahihisha imani hiyo potofu. Siku hizi, kuna Wakristo wengi sana ambao wanaliamini fundisho potofu la sala ya toba na wanaitenda, na kwa sababu hiyo, Wakristo wa jinsi hiyo wanaelekea katika kifo chao wenyewe cha kiroho. Wale walio na aina hii ya imani wanaamini kuwa dhambi zao za kila siku zinaoshelewa mbali kwa kupitia sala zao za toba za kila siku. Kutokana na ukweli kuwa mafundisho ya kidini ya jinsi hiyo yanazipotisha nafsi nyingie, kwa kweli sasa ni wakati wetu sisi tunaoamini katika injili ya maji na Roho kuisahihisha imani yao iliyopotoshwa na fundisho potofu la sala za toba. Ni kwa kufanya hivyo ndipo watakapotambua kuwa hakuna dhambi inayoweza kuoshelewa mbali kwa kupitia sala zao binafsi za toba, na kwa msingi huo wataigeukia injili ya maji na Roho na kisha kupokea ondoleo halisi la dhambi.

Wakristo wengi siku hizi wanaamini kimakosa kama ifuatavyo: “Ninapomwamini Yesu, dhambi ya asili ambayo nimezaliwa nayo kwa asili inaondolewa mbali, na dhambi binafsi ambazo ninazifanya kuanzia hapo na kuendelea zinasamehewa kila ninapofanya sala za toba.” Huu ndio msingi wa fundisho la sala za toba. Kwa hiyo watu wengi wanaamini hivyo na wanalitegemea fundisho la sala za toba badala ya kuiamini injili ya maji na Roho iliyotolewa na Mungu. Kwa kuwa macho yao yamefumbwa, wanashinda kuuona uongo ulio katika fundisho la kidini la sala za toba, ambalo ni moja kati ya fundisho kuu katika Ukristo.

Hata hivyo, Wakristo ambao wamekuwa wakitoa sala za toba kwa muda mrefu wanafahamu jinsi sala hizo zisivyo na maana. Wakati walipokuwa waamini wapya, bila shaka walidhania kuwa mioyo yao ililiridhika kila walipofanya sala za toba kwa Mungu, na bila shaka waliamini kuwa dhambi zao zilikuwa zimeoshelewa mbali; hata hivyo kadri muda ulivyo zidi kwenda na kadri walivyoendelea kuishi katika maisha ya ya kila siku walifikia hatua ya kutambua kuwa dhambi zao zilikuwa zinatarajiwa tu katika mioyo yao. Dhambi si kitu ambacho kinatoweka wakati mtu anapofanya sala za toba. Badala yake mtu anapofanya sala za toba basi zile dhambi ambazo zinatarajiwa kuoshelewa mbali kwa kupitia sala zake za toba zinaendelea kujaa katika moyo wake, na kwa hakika hakuna Mkristo anayeweza kuukana ukweli huu.

Vivyo hivyo, Wakristo wengi wamebakia kutoifahamu injili ya maji na Roho, na kwa sababu hiyo wanaishi maisha yao hali wakiwa wamefungwa na injili potofu, hali mioyo yao ikiwa imejaa dhambi. Hivyo, Wakristo hawa ambao walikuwa wameamini katika fundisho la sala za toba hadi wakati huu wanapaswa kugeuka mara moja, na wanatakiwa kuiamini injili ya maji na Roho ili waweze kupokea ondoleo kamili la dhambi zao.

Kati ya Mafundisho ya Kidini ya Ukristo, Ni Fundisho Gani Ambalo ni Sawa na Tohara ya Kimwili?

Katika Biblia, tohara ya kimwili inahusisha kukata ngozi ya sehemu ya mbele ya uume wa mwanaume. Wayahudi wamekuwa wakiamini kuwa wanafanywa kuwa watu wa Mungu kwa kutahiriwa kimwili. Hata hivyo, katika kipindi hiki cha Agano Jipya, kinachotufanya tuwe au tusiwe watu wa Mungu kinatokana na ikiwa tumepokea ondoleo la dhambi zetu kwa kuamini katika injili ya maji na Roho. Tunachopaswa kukitambua hapa pasipo shaka yoyote ile ni kuwa haijalishi ikiwa tumetahiriwa kimwili au la, ikiwa tunaamini katika injili ya maji na Roho, basi hapo tunafanyika kuwa watu wa Mungu. Ikiwa watu wa Israeli katika kipindi cha Agano la Kale walifanywa kuwa watu wa Mungu kwa kupokea tohara ya kimwili, basi katika kipindi hiki cha Agano Jipya, watu wanafanywa kuwa watu wa Mungu kwa imani katika injili ya maji na Roho.

Hivyo, ni kosa kubwa na ni imani potofu kufikiri kuwa mtu anaweza kuoshelewa mbali dhambi zake leo hii kwa kufanya sala za toba. Wakristo wengi wamenaswa katika ufahamu huu potofu wakidhani kuwa walipomwamini Yesu kwa mara ya kwanza walisamehewa dhambi zao hadi siku ile walipoamini, na kwamba dhambi wanazozitenda kila siku kuanzia siku hiyo walipoamini na kuendelea zinaoshelewa mbali kwa kufanya sala zao binafsi za toba. Ingawa wanaliona fundisho la kidini la sala za toba kuwa ni la kibiblia na lenye ukweli, ukweli ni kuwa ikiwa watafikiria zaidi kuhusiana na fundisho hilo la kidini, basi watatambua kuwa fundisho hilo lina makosa makubwa sana na kwamba linasimama kinyume na haki ya Mungu.

Kurudia rudia sala zako binafsi za toba ni upotoshaji mkubwa na ni makosa. Hakuna mtu anayeweza kuzitoweshea mbali dhambi zake binafsi kwa kutumia sala za toba. Mtu anaweza kuzioshelea mbali dhambi zake zote kwa kuamini katika injili ya maji na Roho ambayo imesheheni haki ya Mungu na si vinginevyo.

Katika kipindi cha Kanisa la Mwanzo, makanisa ya Galatia yalikuwa na watu waliokuwau wakifundisha mafundisho ya kidini ambayo ni hatari yenye makosa makubwa. Watu hawa waliamini kimakosa na walidai kuwa waamini wanaweza kuwa watu wa Mungu ikiwa tu watatahiriwa kimwili. Siku hizi pia kuna idadi kubwa sana ya Wakristo ambao wanaamini kimakosa kuwa dhambi zao zinaweza kutoweshewa mbali ikiwa watazifanya sala zao za toba. Kwa kuwa hawafikirii wala hawadhanii kuwa fundisho la sala za toba lina makosa, ndio maana hawahitaji kabisa kusahihishwa imani yao. Kwa kweli watu hao wanashindwa kabisa kuwekwa huru toka katika fundisho hilo potofu la kidini kwa kuwa hawaifahamu injili ya maji na Roho.

Kwa kuwa Wakristo wengi sana wameamini katika fundisho potofu la kidini la Kikristo lenye msingi kwenye jitihada binafsi, ndio maana hawajaweza kuokolewa toka katika dhambi zao. Ni lazima utambue kuwa fundisho la kidini la sala za toba ni fundisho lililoundwa na wanadamu ambao hawana tofauti yoyote na wewe. Wakristo wengi sana ulimwenguni kote wanalitegemea fundisho la kidini la sala za toba, na hii ndio maana badala ya kuzikwepa dhambi zao wanajikuta dhambi ikizidi kulundikana katika mioyo yao pamoja na kuwa wamemwamini Yesu. Wakati watu wanapomwamini Yesu kwa mara ya kwanza wanafikiri kuwa sala zao za toba hatimaye zitawageuza na kuwafanya kuwa watu wema. Kwa maneno mengine, wanafikiri kuwa fundisho

la kidini la sala za toba litawaongoza kuelekea katika maisha yenye nuru.

Hata hivyo, kadri muda unavyozidi kwenda, ndipo wanapofikia hatua ya kutambua kuwa fundisho hili la kidini la sala za toba linazifunga zaidi nafsi zao katika dhambi ingawa wakati huo huo wanataka kuoshwa dhambi zao. Mwishowe, watu wa jinsi hiyo huishia kufanya dhambi zaidi ilhali wakiwa wanamwamini Yesu kuwa ni Mwokozi, na kwa sababu hiyo hujikuta wameangukia katika maisha na imani ya kisheria iliyojaa unafiki. Ni hakika kuwa watu hao wamefungwa katika dhambi na wataangamia kutokana na fundisho hilo potofu. Lakini pamoja na ukweli huu, ni watu wachache sana wanaofahamu kuwa fundisho la kidini la sala za toba lina makosa. Na hata ikitokea kuwa baadhi yao wametambua kuwa fundisho la kidini la sala toba lina makosa, na ukizingatia kuwa hawana chaguo jingine la kuweza kushughulikia tatizo la dhambi zao za kila siku, basi wengi wao wataendelea kuishi maisha yao ya kiimani huku wakiendelea kuzitegemea sala zao za toba.

Vipi kuhusu wewe? Je, kwa namna yoyote ile bado unajaribu kusamehewa dhambi zako binafsi kwa kuzifanya sala za toba? Ikiwa ni hivyo, basi unapaswa kuutambua Ukweli kuwa dhambi zako zote zilitoweshewa mbali kikamilifu mara moja na kwa wote wakati ulipoiweka imani yako katika injili ya maji na Roho.

Kwa hakika mbele za Mungu watu walio waovu kabisa ni wale wanaolifundisha fundisho potofu la sala za toba. Maana hawa ndio watu wanaozipotosha nafsi na kuwakwaza wakati nafsi hizo zingeliweza kuokolewa kwa kupitia Ukweli wa Neno. Bwana wetu alisema, *“Na ye yote atakayemkosesha mmojawapo wa wadogo hawa waniaminio, afadhali afungiwe jiwe la kusagia shingoni mwake, na kutupwa baharini”*

(Marko 9:42). Hivyo ni lazima wairudie injili ya maji na Roho mara moja.

Je, Unafahamu Kuwa Fundisho la Kidini la Sala za Toba ni Potofu?

Je, unaweza kuelezea kwa ufasaha kwamba ni kwa nini fundisho la kidini la sala za toba ni potofu?

Fundisho la kidini la sala za toba kwa hakika ni potofu. Haijailishi jinsi mtu anavyoweza kuzifanya sala za toba kwa bidii, ukweli nikuwa dhambi katika moyo wake haziwezi kutoweka kutokana na hizo sala za toba. Hata hivyo, kwa kuwa takribani asilimia 99.9 ya Wakristo wote ulimwenguni wanaliadini fundisho hili kwa nguvu zao zote, ni nani basi anayeweza kudiriki kusema kuwa fundisho hili la sala za toba lina makosa? Ni nani anayeweza kuelezea vizuri upotoshaji wake na akaweza kulisahihisha fundisho hili?

Hapo zamani kidogo, nilipata nafasi ya kutembele gereza fulani, na nikiwa pale niliweza kuwaona Wakristo fulani walioitwa “wazee” na “madikoni.” Walikuwa hawafahamu chochote kile kuwa dhambi zao zinaweza kuoshelewa mbali kwa kuamini katika injili ya maji na Roho. Hivyo, kutokana na kukosa uelewa, kulikuwa na watu wengi sana ambao walikuwa wamejikita katika sala zao binafsi za toba. Ingawa wengi wao huapa kuwa hawatatenda dhambi tena kwa kusema hivi, “Nitakapotoka gerezani, sintatenda uhalifu wowote ule,” lakini mwishowe hushindwa kuikabili tamaa ya dhambi inayoamshwa katika mioyo yao, na kwa sababu hiyo hujikuta wakitenda tena uhalifu na hivyo kurudi tena gerezani.

Siku hizi wahudumu wengi wanahubiri hivi, “Kila mtu ni lazima awekwe huru toka katika dhambi.” Msemo huu kama

ulivyo upo sahihi kabisa. Hata hivyo, wahudumu hawa hawawezi kabisa kufundisha kikamilifu jinsi mtu anavyoweza kuwekwa huru toka katika dhambi. Kwa nini? Ni kwa sababu wao wenyewe hawafahamu namna ya kuweza kuwekwa huru toka katika dhambi zao zote. Kwa kuwa wao ni vipofu wa kiroho na kwa kuwa hawajapokea ondoleo la dhambi zao, ndio maana basi wanashindwa kuiongoza nafsi ya mtu awaye yote kwenda katika nuru ya Ukweli. Bwana wetu alisema, “*Je! Aliye kipofu aweza kuongoza kipofu? Hawatatumbukia shimoni wote wawili?*” (Luka 6:39)

Bwana alisema kuwa kila mtu ni lazima kwanza azaliwe upya kwa kuiamini injili ya maji na Roho. Hii ni kwa sababu ni baada ya kufanya hivyo ndipo mtu anapoweza kuuona na kuingia Ufalme wa Mbinguni. Lakini kuna tatizo kubwa maana kuna watumishi wachache sana wa Mungu ambao wanaweza kuuhubiri Ukweli wa injili ya maji na Roho kwa watu. Ndio maana watu wanashindwa kitu cha kuchagua na hivyo kuamua kung’ang’ania sala zao za toba na kuendelea kuishi maisha ya kiimani ya kisheria, na wanafanya hivyo kwa kuwa wengi wao hawafahamu jinsi ya kuweza kuoshwa dhambi zao na kuzaliwa tena upya.

Watu wa jinsi hiyo hufikiria hivi, “Nipo kwenye tatizo hili kwa sababu sijatoa fungu la kumi,” au “Ni kwa sababu zinafanya sala za toba za kutosha ndio maana kuna dhambi nyingi sana katika moyo wangu. Ikiwa nitaendelea kufanya sala zangu za toba kwa uaminifu, nina hakika kuwa sintafungwa katika dhambi.” Vivyo hivyo, watu wanajaribu kuyatua matatizo yao ya dhambi pasipo kuwa na imani yoyote ile katika Ukweli wa injili ya maji na Roho, ndio maana kadri muda unavyozidi kwenda tangu wakati walipomwamini Yesu kwa mara ya kwanza, ndivyo wanavyozidi kuwa wenye dhambi wabaya. Wakifikia hapo hujiangalia na kujishangaa

kuwa ni kwa nini wamebadilika na kuwa wachafu zaidi, wanafiki zaidi, na watu waovu zaidi, na hushangaa hivyo kwa kuwa wamekuwa wakimwamini Yesu kwa muda mrefu. Hivyo, ninawasihi ninyi nyote kuitafakari, kuichagua, na kuiamini injili ya maji na Roho.

Upotoshaji wa Mafundisho ya Kidini ya Kikristo

Sababu ambayo imefanya mafundisho mengi ya kidini ya Kikristo wakati huu yamejaa makosa ni kwa sababu Wakristo ulimwenguni kote wanamwamini Yesu kuwa ni Mwokozi wao pasipo kuufahamu Ukweli wa injili ya maji na Roho. Kwanza, wanaamini kuwa dhambi zao zinaoshelewa mbali wakati wanaposali sala za toba. Upotoshaji huo unafanana kabisa na mafundisho ya uongo yaliyokuwa yakienezwa katika makanisa ya Galatia hapo zamani, mafundisho ambayo yalidai kuwa watu wangeluweza kuwa watu wa Mungu ikiwa tu wangelitahiriwa kimwili. Hata sasa, watu hawa bado hawaifahamu injili ya maji na Roho ambayo Mungu amewapatia wanadamu wote, na kwa sababu hiyo wanaiamini damu ya Yesu pale Msalabani tu, na kwa msingi huo hujikuta wakikubaliana na imani potofu kuwa watasamehewa toka katika dhambi zao ikiwa tu watazifanya sala za toba kila siku. Ndio maana kuna Wakristo wengi sana wanaokuja kanisani kuzifanya sala za toba kwa machozi siku baada ya siku, na hufanya hivyo wakijaribu kuzioshelea mbali dhambi zao.

Kila wanapofanya dhambi, watu hao huomba wakisema hivi: “Bwana, nisamehe. Ninazitubia dhambi zote ambazo nimefanya wiki iliyopita. Ninafahamu kuwa sikupaswa kutenda dhambi, lakini niliishia kufanya dhambi mbalimbali kwa mara nyingine tena. Bwana, ulisulubiwa kwa ajili yangu,

lakini angalia nimefanya tena dhambi namna hii. Kwa kweli ninaona aibu. Lakini wewe Bwana ni mwenye rehema, na kwa sababu hiyo ninaomba unisamehe. Ikiwa utanioshelea mbali hizi dhambi zangu zote kwa damu ya Msalabani basi ninaahidi kuwa sintatenda dhambi tena. Ninaamini kuwa umenisamehe dhambi zangu zote, maana ulisema, “Ikiwa tutaziungama dhambi zetu Wewe ni mwaminifu na wa haki hata utatuondolea na uovu wote.” Amina.”

Kwa kuwa hivi ndivyo Wakristo wote ulimwenguni kote walivyojifunza toka kwa wahudumu wao—yaani kuwa wanaweza kuoshelewa mbali dhambi zao ikiwa watamwamini Yesu kuwa ni Mwokozi wao na ikiwa watatoa sala za toba—basi ndio maana hawana chaguo jingine zaidi ya kuendelea kufahamu na kuamini hivyo. Na watu hao hufikiri kuwa ikiwa watakuwa waaminifu kwenye kanisa lao, na ikiwa watajitoe kwa ajili ya huduma na ibada mbalimbali, na ikiwa watafanya sala nyingi za toba, basi ni hakika kuwa watenda Mbinguni. Hata hivyo, je, ni kweli kuwa mtu anaondolewa dhambi zake kwa kufanya sala za toba?

Kwa kweli mtu anapotumia kama dakika 5-10- akikiri na kuungama dhambi zote ambazo anataka kuziungama, huku akimwomba Mungu amsamehe, huku akiifikiria damu ya Yesu ya thamani aliyoimwaga pale Msalabani, basi inaweza kuonekana kana kwamba dhambi zake zote zimeoshelewa mbali. Hata hivyo, kwa wale wanaoamini hivyo, ni hakika kuwa dhambi zao haziwezi kutoweshwa, bali wataendelea kuzilundika dhambi katika mioyo yao.

Je, kuna yeyote yule miongoni mwenu anayefikiria hivi na anayeishi maisha ya kiimani ya jinsi hiyo? Kwa wale wanaotenda hivyo, je mnadhani hakuna katika maisha yenu ya kiimani? Mbali na kuyaona matatizo yaliyomo katika imani yenu, je, mnaweza kujivunia imani yenu, huku mkidhani kuwa

imani yenu ni ya muhimu sana katika imani ya Kikristo siku hizi? Kwa kweli aina hii ya imani haina uhusiano wowote ule na imani inayoamini katika injili ya maji na Roho, na ni muhimu mtambue hilo.

Sisi sote ni lazima tutambue kuwa Wakristo ulimwenguni kote wameanguka kwa pamoja katika upotoshaji mkuu unaoitwa sala za toba. Hii imetokea kwa sababu kwa miaka mingi, nchi za Kikristo za Magharibi zilikuwa zikituma wamissionari wengi sana waliokuwa wakiliamini fundisho hili la sala za toba kwenda nchi mbalimbali duniani, na kwa matokeo hayo, Wakristo wengi duniani kote wamefikia na wao kuliamini fundisho la kidini la sala za toba. Ninawasihi ninyi nyote kukumbuka kuwa njia pekee inayoweza kuwafanya kuukwepa huo upotoshaji mkuu ni kuipata imani ya walizaliwa tena upya kwa kuamini katika injili ya maji na Roho.

Imani ya Paulo Haikutoka kwa Wanadamu

Mtume Paulo alihisi uwepo wa rushwa ya kiroho iliyokuwa ikifanyika miongoni mwa waamini wa Galatia. Hivyo, katika barua yake kwa watakatifu wa Galatia, kuanzia mwanzoni tu mwa waraka wake Paulo alionyesha aina ya imani aliyokuwa nayo na ambayo alikuwa amewahubiria. Paulo aliweka baya kuwa imani yake “haikuwa ya kutoka kwa wanadamu.” Kwa maneno mengine Paulo alimaanisha hivi: “Imani ambayo imenifanya kwa sasa kuwa mtumishi wa Mungu na ambayo imeniokoa toka katika dhambi zangu zote haikutoka kwa wanadamu wala sikujifunza toka kwa wanadamu. Imani yangu yote ilitoka kwa Yesu Kristo na Mungu Baba, na imani hii ndio ile inayoamini katika injili ya maji na Roho. Mimi niliweza kuokolewa atoka katika dhambi

zangu zote kwa imani hii na imani hii imeniwezesha kuwa mmoja kati ya watu wa Mungu.”

Imani ya Mtume Paulo haikuwa kitu kilichotoka kwa wanadamu. Hata hivyo, imani ambayo ilikuwa imetoka kwa wanadamu kwa wakati huo iliweza kuenea kwa haraka sana katika makanisa ya Galatia. Imani hii ilikuwa inadai kuwa, “Hata kama watu wanamwamini Yesu kuwa ni Mwokozi wao, watu hao wanaweza kuwa watu wa Mungu wakamilifu ikiwa watatahiriwa kimwili.” Hili lilikuwa ni fundisho la uongo ambalo lilikuwa ni kinyume na Ukweli wa injili ambao ulieleza kuwa watu wangeluweza kupokea ondoleo la dhambi zao na kisha kufanyika watu wa Mungu kwa kuamini katika injili ya maji na Roho. Hata hivyo, watakatifu wa Galatia wa wakati huo walizolewa na mkondo wa mafundisho hayo ya uongo, na kwa matokeo hayo wengi wao waliangukia katika kifo cha kiroho.

Hata sasa, hali kama hiyo bado ipo katika Ukristo ulimwenguni kote. Ukweli ni kuwa tunaposema kuwa tumezaliwa tena upya na kufanyika wana wa Mungu hakutokani na matendo ya Sheria. Ukweli halisi unaeleza kuwa Mungu Yesu alikuja hapa duniani kwa maji na kwa damu, na akazitoweshea mbali dhambi zote za wanadamu ulimwenguni kote, na kwamba Mungu ameitimiza wokovu mkamilifu kwa mapenzi yake, na amefanya hivyo ili wale waoamini katika injili hii waweze kuzaliwa tena upya na kuwa wana wa Mungu. Imani ya kweli haitokani na kuyaamini mafundisho potofu ya sala za toba, mafundisho ambayo yametoka kwa wanadamu, bali imani ya kweli inapatikana ikiwa mtu anaiamini injili ya maji na Roho. Lakini pamoja na ukweli huu, bado kuna Wakristo wengi ulimwenguni kote ambao hawaufuati Ukweli huu, na badala yake wanayafuata mafundisho ya kidini ya sala za toba ambayo yametoka kwa wanadamu, na kwa sababu hiyo

wanaangukia katika kifo cha kiroho.

Vivyo hivyo, imani ya wale wanaotetea sala za toba katika Ukristo wa kisasa ni sawa na imani ya wanatohara waliokuwepo katika Kanisa la Mwanzo. Fundisho la siku hizi la sala za toba, ambalo linadai kuwa mtu anaoshwa dhambi zake pale anapofanya sala za toba si fundisho lilitoka kwa Mungu. Ni fundisho la kidini lililotoka kwa wanadamu, na mafundisho ya kibinadamu ya jinsi hiyo bado yanaendelea kutiririka toka kwa matapeli wa kiroho katika Ukristo hata hivi sasa. Matapeli hawa hudai kuwa “Kwa kuwa sasa nimeshatoa sala zangu za toba, basi moyo wangu umeridhika, na nimeoshelewa mbali dhambi zangu.” Pia huwafundisha waumini wao kuwa mtu anatakaswa hadi kuufikia wokovu ikiwa ataendelea kufanya sala za toba kila siku. Hata hivyo, watu wa jinsi hiyo ni watu vipofu wanawaongoza vipofu wengine na wote kwa pamoja wataangukia katika moto wa kuzimu.

Je, Wakristo wa leo wanaamini kimakosa kuwa dhambi zao zitatoweka ikiwa watafanya sala za toba? Ndio, Wakristo wengi wanaamini hivyo. Wakristo wengi sana ulimwenguni kote wanakubaliana na imani hii potofu kuwa ikiwa watatubu kwa kupitia sala zao za toba, basi ni hakika kuwa wataoshwa dhambi zao. Hivyo hata wakati wanapofanya ibada, kwa sasa limekuwa ni jambo la kawaida kuwa watatenga muda kidogo kwa ajili ya kusali sala za maungamo, huku ukiachwa muda kidogo ili mhudumu aweze kusoma maandiko yaliyoandaliwa yaitwayo “uthibitisho wa ondoleo la dhambi.” Lakini ukweli ni kuwa dhambi zao haziwezi kutoweka kwa namna hii hata kama watajaribu kufanya hivyo kwa nguvu zao zote. Dhambi zao zote zinaweza kuondolewa mbali pale tu watakapolifahamu na kuliadini Neno la Ukweli linaloeleza kuwa Bwana wetu amezitoweshea mbali dhambi zao zote kwa kupitia injili ya maji na Roho.

Njia ya Kuufikia Wokovu Toka Katika Dhambi Zote Ilikuwa Kutoka Katika Upendo wa Haki ya Mungu

Wokovu ambao Mungu ametupatia ni sheria ya Ukweli ambayo imetimizwa kutokana na upendo wa Mungu wenye haki. Ndio maana Mungu alijitoa Mwenyewe ili kuyatimiza masharti ya haki ya Sheria inayoeleza kuwa mshahara wa dhambi ni mauti, na akaikamilisha sheria hiyo kwa sheria yake ya upendo. Kwa kuwa Mungu ni mwenye haki na kuwa yeye ni upendo, basi ndio maana ametuokoa kwa kupitia injili ya maji na Roho na ameyatimiza masharti yote ya haki na upendo wake.

Mshahara wa dhambi ni mauti (Warumi 6:23). Hii ina maanisha kuwa mwenye dhambi ni lazima bila kukwepa ahukumiwe chini ya sheria ya Mungu na atupwe kuzimu kwa sababu ya dhambi zake. Kwa maneno mengine, ikiwa tunatubu kwa midomo yetu mbele za Mungu na mbele za wanadamu huku tukisema, “Nimekosa,” hiyo haimaanishi kuwa dhambi zetu zitatoweka. Ili tuweze kuwajibika kutokana na dhambi zetu ni lazima tuadhibiwe na kufa kwa ajili ya hizo dhambi.

Hata hivyo, kwa kuwa Mungu ni mwenye rehema na mwenye haki, Mungu mwenyewe alikuja hapa duniani akafanyika mwili wa mwanadamu akiwa na jina linaloitwa Yesu, alifanya hayo yote ili aweze kuzipatanisha dhambi zetu. Na kwa kuwa huyu Yesu alizitoweshea mbali dhambi zetu zote kwa Ukweli wa injili ya maji na Roho, basi alifanya iwezekane kwetu sisi kuoshwa dhambi zetu zote kwa imani.

Mungu Baba alimfanya Mwanawe pekee Yesu Kristo kuzipokea dhambi zote za mwanadamu mara moja na kwa wote kwa kupitia ubatizo wake, kisha Bwana akajitwika dhambi hizo zote hadi Msalabani ambako aliibeba adhabu ya dhambi hizo zote. Hivyo, kwa sasa yeyote anayeuamini Ukweli

wa injili ya maji na Roho, yaani kuwa Yesu amezitoweshea mbali dhambi zetu zote kikamilifu anaweza kupokea ondoleo la dhambi bure. Kwa maneno mengine, Mungu amezioshelea mbali dhambi zote katika maisha yetu ytoe kwa ubatizo wa Mwana wake na damu yake aliyoimwaga Msalabani, na kwa sababu hiyo ametuokoa sisi sote mara moja na kwa wote.

Kwa sasa, sisi sote tunaweza kupokea ondoleo la kweli la dhambi zetu wakati tunapomwamini Yesu Kristo kuwa ni Mwokozi wetu aliyekuja kwa injili ya maji na Roho, na ambaye amezitoweshea mbali dhambi zetu zote mara moja na kwa wote. Na ikiwa tutapokea ondoleo la dhambi zetu kwa kuamini katika injili ya maji na Roho, basi ikiwa tutaendelea kujiona wenye mapungufu na kisha tukatenda dhambi tena, bado tunaweza kuendelea kumfuata Mungu hali tukiwa na roho safi kwa kuurejelea tena wokovu wetu huku tukiiweka imani yetu katika injili hii ya kweli.

Sisemi kuwa hatutafanya dhambi yoyote ile baada ya kuwa tumepokea ondoleo la dhambi zetu. Bali ninachokisema hapa ni kuwa ni kuwa kuwa bado tutaendelea kuishi katika mapungufu yetu ya kimwili maisha yetu yote yaliyosalia hapa duniani, ni hakika kuwa tutaendela kutenda dhambi hata baada ya kuwa tumezaliwa tena upya. Hata hivyo, badala ya kufanya sala za toba na kumwambia Mungu, “Baba, nimekosa tena. Tafadhali naomba unisamehe,” kwa imani yetu katika injili ya maji na Roho tunaweza kuungama kwa Mungu kikamilifu kwa imani kama ifuatavyo: “Mungu, nina mapungufu mengi ndio maana nimetenda dhambi hizi. Lakini ninakushukuru Wewe Baba maana mtu kama mimi nilipaswa kufa, lakini Mwana wako alikuja hapa ka duniani, akazichukua dhambi zangu kwa kubatizwa kwake, akafa Msalabani, akafufuka toka kwa wafu, na kwa sababu hiyo amefanyika kuwa Mwokozi wangu mkamilifu. Bwana, ninaamini kuwa umezitoweshea mbali

dhambi zangu zote kikamilifukwa injili ya maji na Roho, ninakushukuru sana kwa jambo hili. Ingawa nina mapungufu kama hivi, mambo uliyoyakamilisha ni makamilifu sana kiasi kwamba umenifanya mimi kuwa mwenye haki nisiye na dhambi milele. Kwa kweli ninakushukuru sana kwa kuwa umenipatia injili hii ya maji na Roho na umenipokea mimi kuwau mwana wako. Amina.”

Ingawa wale waliozaliwa tena upya kwa kupitia injili ya maji na Roho wanafanya dhambi, wao wanaweza kufanya ungamo la kweli la kiimani namna hiyo, huku nguvu zao zikirudishwa upya wanaweza kumfuata Bwana hali wakiwa na dhamiri safi (1 Petro 3:21).

Unaweza kuelewa ni kwa nini Yesu Kristo alikuja hapa duniani, na kwamba ni kwa nini alibatizwa na Yohana Mbatizaji kabla ya kusulubiwa? Bwana wetu hakutuokoa sisi kwa maneno tu. Yesu alizitoweshea mbali dhambi zote za ulimwengu kwa kupitia huduma yake ya injili ya maji na Roho na alifanya hivyo kwa matendo halisi. Hivi ndivyo Bwana alivyouleta wokovu wa haki kwa wale wote wanaouamini Ukweli huu wa injili. Ingawa sisi sote tulipaswa kufa kutokana na dhambi zetu, Mungu Baba alituokoa sisi sote kikamilifu toka katika dhambi zetu zote na akatukomboha toka katika maangamizi kwa kumtuma Mwana wake hapa ulimwenguni. Vivyo hivyo, Mungu alimtuma Mwana wake hapa duniani kwa kuwa alitupenda; naye Yesu alizibeba dhambi zote za ulimwengu kwa kuupokea ubatizo toka kwa Yohana ambaye ni mwakilishi wa wanadamu, akafa Msalabani, akafufuka toka kwa wafu, na kwa sababu hiyo amezitoweshea mbali dhambi zetu zote kwa haki, na ametufanya sisi kwa ukamilifu kuwa watu wa Mungu.

Hampaswi kuiamini damu ya Yesu ya pale Msalabani peke yake. Badaka yake, mnapaswa kutambua na kuamini

kuwa kabla ya kufa pale Msalabani, Yesu alipaswa kuzichukua dhambi katika mwili wake kwa kubatizwa na Yohana. Ndio maana alipokuwa karibu na kubatizwa, Yesu alimwambia hivi Yohana, *“Kubali hivi sasa; kwa kuwa ndivyo itupasavyo kuitimiza haki yote” (Mathayo 3:15).*

Hatupaswi kumwamini Yesu kuwa ni Mwokozi wetu pasipo kuifahamu injili ya maji na Roho kwa usahihi. Mungu alisema kuwa aliupenda ulimwengu huu sana kiasi cha kumtoa Mwana wake pekee (Yohana 3:16). Kutokana na upendo huo, Mungu alizitoweshea mbali dhambi za ulimwengu huu kwa kumtuma Mwana wake Mwenyewe. Hivyo, kazi halisi ya wokovu inatokana na ule ukweli kuwa Yesu alizipokea dhambi zote za mwanadamu mara moja na kwa wote kwa kubatizwa na Yohana Mbatizaji katika Mto Yordani, na kwamba Yesu aliwaokoa waamini wake kwa kufa Msalabani. Kwa kuwa Yesu alizipokea dhambi zote za mwanadamu kwa kupitia ubatizo wake ndio maana aliweza kusulubiwa na akaadhibiwa kwa ajili ya hizo dhambi zote kwa niaba yetu. Wakati Bwana alipokuwa akiimwaga damu yake pale Msalabani alisema hivi, *“Imekwisha!”*—alisema hivyo akitangaza kukamilika kwa wokovu wetu mkamilifu (Yohana 19:30).

Kwa kweli hatuwezi kuokolewa kwa kumwamini Yesu kuwa ni Mwokozi wetu katika hali ya upofu. Ikiwa tunatambua kuwa tulimwamini Yesu vibaya—yaani ikiwa tutatambua kuwa dhambi zetu bado zipo katika mioyo yetu huku tukiwa tunamwamini Yesu—na hapo ndipo tutakapotakiwa kuchunguza kuwa ni mahali gani ambapo tuliamini vibaya, na tutapaswa kugeuka, na kisha kuiamini injili ya maji na Roho. Hatupaswi kuiruhusu imani yetu iendane na sala za toba ambazo huishia kwenye utupu. Ni lazima ukumbuke kuwa huwezi kuoshwa dhabi zako kwa kupitia sala zako za toba. Kufanya sala za toba kwa ukaidi ni sawa na kuyafuata

mafundisho ya wanatohara.

Hivyo, kwa sasa ili Wakristo wote ulimwenguni kote waweze kupokea wokovu mkamilifu, ni lazima waachane na fundisho potofu la kidini la sala za toba na kisha waamini katika injili ya maji na Roho. Ingawa sisi sote tunamwamini Yesu kuwa ni Mwokozi wetu, kwa hakika hatupaswi kumwamini Yesu katika hali ya upofu inayoamini damu ya Msalabani tu, bali tunapaswa kuamini katika injili ya maji na Roho ambayo Mungu ametupatia, na kwa kufanya hivyo ndipo tunapoweza kupokea ondoleo la dhambi katika mioyo yetu. Ili tuweze kuokolewa kikamilifu toka katika dhambi zetu zote, ni lazima tuiweke imani yetu katika injili ya maji na Roho.

Injili ya maji na Roho ambayo sasa inaenezwa ulimwenguni kote si injili iliyokuja toka kwa wanadamu. Ni injili iliyokuja toka kwa Mungu Baba na Yesu Kristo. Kama vile Mtume Paulo alivyoeleza kwa wazi katika kifungu cha leo cha Maandiko, injili ya maji na Roho ni Ukweli uliotoka kwa Mungu. Hata hivyo, wanatohara walifundisha kuwa waamini wanaweza kuwa watu wa Mungu ikiwa watatahiriwa kimwili. Hilo lilikuwa ni fundisho la kidini lililotoka kwa wanadamu, na kwa sababu hiyo walikuwa wakiwaongoza watakatifu wa Galatia kuelekea mautini.

Vivyo hivyo, manabii wa uongo wa siku hizi wanawafundisha wafuasi wao kuwa wanaweza kupokea ondoleo la dhambi zao kwa kuamini damu ya Msalaba peke yake na kwa kufanya sala za toba kila siku, hivyo ni muhimu sana kwa Wakristo wote ulimwenguni kote kutambua mra moja jinsi fundisho hili lilivyo potofu. Na ni lazima wajifunze kuhusiana na injili ya maji na Roho, injili ambayo imetoka kwa Mungu Mwenyewe, waiamini, na kisha waachane na fundisho la kidini la sala za toba ambalo wamekuwa wakiliamini kwa muda mrefu pasipo manufaa yoyote yale. Tunaweza kuwa

Wakristo tuliozaliwa tena upya na watu wa Mungu Mwenyewe ikiwa tutajifunza na kuifahamu injili ya maji na Roho, na ikiwa tutaia mini injili hiyo kikamilifu.

Paulo alisema kuwa, “Neema na iwe kwenu, na amani, zitokazo kwa Mungu Baba, na kwa Bwana wetu Yesu Kristo.” Kifungu hiki kinaonyesha kuwa amani inawafikia waamini kutoka kwa Yesu Kristo na Mungu Baba kama zawadi ya wokovu kwa kupitia injili ya maji na Roho. Kwa sasa, Wakristo wote ulimwenguni kote ambao walikuwa wamefungwa katika dhambi kwa sababu ya kuzitegemea sala zao za toba ni lazima waiamini injili ya maji na Roho, na kwa kufanya hivyo watapokea ondoleo la dhambi zao na kisha kuzaliwa tena upya kama wana wa Mungu. Wakishafanya hivyo ndipo wanapoweza kuionja raha ya neema na amani toka kwa Mungu.

Imani ya kidini ya sala za toba ni matokeo ya kazi ya mwanadamu, na haiwezi kabisa kuleta amani katika moyo wa mtu awaye yote. Fundisho la kidini la sala za toba si chochote bali ni nadharia isiyo na maana inayotokana na mawazo binafsi ya mwanadamu. Ingawa maneno ya matapeli wa kiroho ni matamu sana unapoyasikia, ukweli ni kuwa maneno hayo yana gharama kubwa sana. Ikiwa utaendelea kuuamini uongo wao, basi utakapokuja kusimama mbele za uwepo wa Bwana, ni hakika kuwa hutaweza kuikwepa adhabu ya kutisha kuzimu kutokana na dhambi zako.

Ukristo wa leo hii hauwahubirii waumini injili ya maji na Roho, ambayo ni Neno la Mungu, badala yake ukristo huo unaeneza maadili ya kibinadamu pamoja na fundisho la kidini la sala za toba lililoundwa na mwanadamu. Na kwa sababu hiyo ukristo umejikuta hatimaye ukiyaeneza mawazo ya watu. Hata hivyo, Bwana ametupatia injili ya maji na Roho, ambayo ni Neno la Ukweli lenye kudumu. Ninyi nanyi mmetambua

kutokana na vitabu vyetu kuwa injili ya maji na Roho ni Ukweli halisi ambao ulitoka kwa Mungu Baba na Yesu Kristo. Kwa wale ambao ambao mnaweza kushindwa kuifahamu injili ya maji na Roho kwa usahihi, ninawasihi kwa unyenyekevu kukisoma kitabu cha kwanza katika mfululizo wa maandiko ya Kikristo kilichotolewa na Huduma ya Utume wetu. Kitabu hicho kinaitwa *Je, Umezaliwa Upya Kweli kwa Maji na Kwa Roho?* Unaweza kukipata kitabu hiki bure katika tovuti yetu.

Ni kwa muda gani Wakristo ulimwenguni kote wamekuwa wakiliamini fundisho la kidini la sala za toba kuwa ni ukweli halisi? Je, si wamekuwa wakielewa na kuamini vibaya, huku wakifikiri kuwa wanaweza kuoshwa toka katika dhambi zao kwa kupitia sala zao binafsi za toba? Kwa kweli, kutokana na kutoifahamu injili ya maji na Roho, injili ambayo walipaswa kuifahamu, Wakristo hao wamekuwa wakiamini kwenye ukiri mbali mbali wa imani wa Kikristo na kuushikilia. Mnachopaswa kukitambua hapa ni kuwa Wakristo ulimwenguni kote wameangukia katika imani ya kisheria kama ilivyokuwa kwa watakatifu wa Galatia, wanamwamini Mungu kwa msingi wa fundisho potofu la kidini. Na jambo baya kabisa ambalo ni tatizo kubwa ni ule ukweli kuwa katika Ukristo wa leo hii kuna idadi kubwa sana ya Wakristo ambao hawatambui kuwa fundisho la kidini la sala za toba limejaa upotofu.

Ikiwa kwa hakika unataka kuiamini injili ya maji na Roho na kisha kuzaliwa tena upya, basi kwanza kabisa unapaswa kuachana na imani zenye makosa zinazoeleza kuwa mtu anaweza kuziosha dhambi zake kwa kupitia sala zake binafsi za toba. Ni lazima tutambue kuwa ikiwa hatatuuelewa uongo uliomo katika fundisho la kidini la sala za toba na kisha kuliweka kando, basi ni hakika kuwa hatuwezi kupokea ondoleo la dhambi zetu kwa kuamini katika injili ya maji na

Roho ambayo Mungu ametupatia.

Watenda kazi wenzangu pamoja na mimi tunatamani kuieneza injili ya maji na Roho ulimwenguni kote. Hivyo tunataka kutumia fursa hii kuelezea vizuri kwa kupitia mahubiri katika Kitabu cha Wagalatia ili kuonyesha jinsi fundisho la sala za toba lilivyo na makosa. Maana ni kwa kufanya hivyo ndipo Wakristo wanapoweza kuwekwa huru toka katika hila za Shetani, na hapo ndipo watakapoweza kuiamini injili ya maji na Roho kwa usahihi, na kisha kuupokea wokovu wa kweli. Hapo zamani, kulikuwa na watu wengi katika makanisa ya Galatia waliojaribu kulidhalilisha Kanisa la Mungu na kulifanya liwe la Kiyahudi kwa kutetea na kuhamasisha tohara ya kimwili, basi katika kipindi hiki cha sasa kuna watu wengi sana wanaojaribu kuugeuza Ukristo kuwa ni dini ya kawaida, hivyo kuna umuhimu mkubwa sana wa kuisahihisha imani yao.

Sasa, sisi sote ni lazima tuufahamu ushawishi wenye uovu wa manabii wa uongo na tunapaswa kuifundisha injili ya maji na Roho kwa usahihi. Kwa sasa, sisi ambao tumezaliwa tena upya hatupaswi kukaa tu chini na kuwaangalia manabii wa uongo wakiyahubiri mafundisho potofu ya kidini kwa nafsi nyingi kiasi cha kuwafanya wengi kwenda kwa Shetani, bali tunapaswa kuwaongoza watu kwenda kwa Kristo kwa kutumia injili ya maji na Roho. Kwa hakika hatuwezi kushindwa kushuhudia ukweli wa injili ya maji na Roho. Ni lazima tuitangaze injili hii hadi mbali na kwa sauti kubwa ili kwamba wale wote wanaotaka kumrudia Mungu na kupokea ondoleo la dhambi zao waweze kuzaliwa tena upya kwa kuamini katika injili ya maji na Roho. Hapo ndipo watu wengi sana miongoni mwa Wakristo ulimwenguni kote watakapoamini injili ya maji na Roho, watazaliwa tena upya, na kisha watasimama kama watenda kazi wa Mungu. Na wakiungana na sisi watakuwa

sasa ni wajumbe wa nuru inayoiangaza injili ya maji na Roho kwa watu wao ambao wanakabiliwa na dhambi na mateso.

Ndugu waamini wenzangu, kitendo cha kuamini kuwa mtu anaweza kupokea ondoleo la dhambi zake kwa kuamini damu ya Msalaba pekee na kwa kufanya sala za toba uthibitisho wa kuikubali imani potofu. Ni lazima utambue kuwa hili ni fundisho potofu la Kikristo ambalo limetokana na mkondo ule ule potofu wa mafundisho ya wanatohara. Ikiwa hadi mwisho unajaribu kuoshwa dhambi zako kwa kuzitegemea sala za toba, na kwa kufanya sala za toba kila siku, basi ni hakika kuwa hutaweza kuikwepa nafasi yako kama mwenye dhambi hadi siku utakapokufa. Ikiwa unamwamini Yesu kwa namna hiyo, basi kadri unavyozidi kumwamini Yesu ndipo dhambi zinavyozidi kujaa katika moyo wako, na hatimaye hutakuwa na uchaguzi mwingine zaidi ya kugeuka na kuwa Mkristo wa kisheria ambaye kama walivyokuwa Mafarisayo unaonekana kwa nje tu kuwa ni mtu wa Mungu.

Tunaweza kuitangaza injili hii ya maji na Roho kwa ujasiri kiasi hiki kuwa injili hii ni Ukweli halisi. Ni lazima tuwashuhudie ulimwengu mzima kuwa imani ya Mtume Paulo na imani yetu ni moja na haikutoka kwa wanadamu, wala haikupitia kwa wanadamu, bali ni imani yenye msingi wake katika injili ya maji na Roho. Imani ya Mtume Paulo ilikuwa ni ile iliyoamini katika injili ya maji na Roho. Ndio maana aliweza kuonyesha moja kwa moja jinsi mafundisho ya wanatohara yalivyokuwa na makosa, wanatohara ambao walidai kuwa watu wangeluweza kuwa watu wa Mungu ikiwa tu watapokea tohara ya kimwili. Mtume Paulo anaeleza kuwa injili ya maji na Roho ndio Ukweli halisi ambao haukutoka kwa wanadamu bali ambao ulikuja kupitia Mungu na Yesu Kristo.

Biblia inasema hivi, *“Ee mlinzi, habari gani za usiku?”*

(Isaya 21:11). Biblia inatuuliza ni kwa nini ulimwengu huu umekuwa ni giza mno kiroho. Kwa nini Ukristo wa leo unashindwa kuchanua ulimwenguni kote? Inasemekana kuwa katika nchi za Kikristo za Magharibi huko Ulaya na Amerika ya Kusini, idadi ya Mabudha inaongezeka kwa kasi kubwa. Kwa nini hali iko hivyo? Ni kwa sababu Ukristo wa leo hii unaeneza imani potofu kuwa mtu anaweza kuoshwa dhambi zake kwa kupitia sala zake binafsi za toba. Hali hiyo inatokea kwa sababu Ukristo wenyewe unaeneza kitu ambacho si cha kweli. Na ni dhahiri kuwa fundisho hilo haliwezi kabisa kuziondolea mbali dhambi katika moyo wa mtu anayeamini. Ndio maana imani ya Kikristo imekuwa dhaifu, na kwa sababu hiyo imani ya Kikristo imeonekana kuwa haina nguvu, ndio maana watu katika nchi hizo wamekatishwa tamaa na kuvunjwa mioyo kiasi cha kushindwa kusimama kwa ujasiri mbele ya wasio Wakristo.

Nilifikia hatua ya kuchapisha mahubiri haya toka katika kitabu cha Wagalatia kama sehemu yangu ya kuomboleza kutokana na ukweli halisi wa Ukristo wa siku hizi, ambao watu wengi wanaomboleza huku wakiwa chini ya fundisho potofu la sala za toba na huku wakiwa wanashindwa kuondokana na fundisho hilo potofu. Ni matumaini yangu kuwa kwa kupitia kitabu hiki, Wakristo ulimwenguni kote watatambua kuwa fundisho la kidini la sala za toba halitokani na Neno la Mungu, bali ni mafundisho ya kisheria ambayo yanatokana mkondo ule ule wa mafundisho ya wanatohara, ambayo ni mafundisho potofu toka kwa wanadamu.

Je, kuna yeyote yule miongoni mwenu ambaye bado anamwamini Yesu wakati bado ni mwenye dhambi, huku akiwa ameiweka imani yake katika fundisho la sala za toba? Ninawasihi ninyi nyote kuifahamu injili ya maji na Roho na kuiamini, na hapo ndipo mtakapoweza kukombolewa toka

katika dhambi zenu zote. Sisi ambao tulizaliwa tena upya hapo awali ni lazima tuihubiri injili ya maji na Roho ulimwenguni kote ili kila mtu aweze kuipata baraka hii. Hii ni kwa sababu sisi sote ni watumishi wa Mungu tunaoamini katika injili ya maji na Roho. Ikiwa tutashindwa kuitangaza injili ya maji na Roho, basi kila mtu hapa ulimwengu atashindwa kupokea ondoleo la dhambi zake, na kwa matokeo hayo atatupwa katika moto wa milele wa kuzimu. Hivyo, ikiwa watu wote ulimwenguni wataashindwa kuokolewa toka katika dhambi zao kwa sababu tu hawakuweza kuusikia Ukweli wa injili, basi ni hakika hilo litakuwa ni kosa letu. Haijalishi ikiwa wataisikia injili ya maji na Roho au la, ukweli ni kuwa kuihubiri injili hii ni jukumu letu. Kwa hiyo, ni lazima tumwamshe kila mtu ulimwenguni ili aweze kutambua kuwa hakuna ondoleo la dhambi linaloweza kupatikana kwa kupitia sala za toba, na ni lazima tuihubiri injili ya maji na Roho. Ninamwomba Mungu ili aweze kutushika na kutubariki sisi sote ambao tunaitumikia injili.

Injili hii ya maji na Roho tuliyopewa na Bwana ni injili kamilifu iliyotimizwa kwa haki ya Mungu na upendo wake, ndio maana inaweza kuzitoweshea mbali dhambi zetu zote. Kwa kuwa Bwana wetu ni mwenye haki, ndio maana basi alizichukua dhambi zetu zote katika mwili wake kwa ubatizo wake katika Mto Yordani, na wala hakuiacha dhambi yoyote ile—yaani ikiwa dhambi hiyo imefanywa dhidi ya Mungu au wanadamu, au ikiwa ni kubwa au ndogo—kisha Yesu aliulipa mshahara wote wa dhambi hizo kwa damu yake aliyoimwaga pale Msalabani.

Kwa maneno mengine, kabla ya Mungu kumfanya Mwana wake asulubiwe hadi kifo, Mungu Baba alimfanya kwanza ajitwike dhambi zote za wanadau kwa kubatizwa na Yohana Mbatizaji. Mungu alifanya hivyo kwa kuwa hapo ndipo

dhambi za wanadamu zingeliweza kutoweshewa mbali kwa haki. Kwa namna hii, Bwana wetu alibatizwa ili kuzibeba dhambi za ulimwengu, akazibeba hadi Msalabani ambapo alilipa mshahara wote wa dhambi kwa kuimawga damu yake na kufa, kisha akafufuka tena toka kwa wafu; na kwa kupitia haya matendo yote Yesu amefanyika kuwa Mwokozi kwetu sisi sote tunaoamini katika injili ya maji na Roho.

Ni matumaini yangu kuwa kwa kupitia kitabu hiki, ninyi nyote mtabarikiwa na mtaupata uhuru toka katika mtego wa Shetani unaoitwa fundisho la sala za toba, na mtapokea ondoleo la dhambi zenu kwa kupitia injili ya maji na Roho, na mtazaliwa tena upya kama wana wa Mungu. Halleluya! ☒

Bwana Ametukomboa Kikamilifu Mara Moja na Kwa Wote

<Wagalatia 1:3-5 >

“Neema na iwe kwenu, na amani, zitokazo kwa Mungu Baba, na kwa Bwana wetu Yesu Kristo; ambaye alijitoa nafsi yake kwa ajili ya dhambi zetu, ili atuokoe na dunia hii mbovu iliyopo sasa, kama alivyopenda Mungu, Baba yetu. Utukufu una yeye milele na milele, Amina.”

Je, Imani Yako Ikoje?

Katika kifungu cha leo cha Maandiko, Mtume Paulo anasema kuwa Kristo *“ambaye alijitoa nafsi yake kwa ajili ya dhambi zetu, ili atuokoe na dunia hii mbovu iliyopo sasa, kama alivyopenda Mungu, Baba yetu”* (Wagalatia 1:4). Kifungu hiki kinatueleza kuwa Bwana ametuokoa mara moja toka katika makosa na dhambi zilizojaa katika kipindi hiki kiovu na toka katika dhambi zitokazo katika mioyo binafsi ya watu, kifungu kinaweka bayana kuwa Bwana alizichukua dhambi zote za ulimwengu mara moja na kwa wote kwa kubatizwa na Yohana Mbatizaji, kwa kuimwaga damu yake Msalabani, na kwa kufufuka tena toka kwa wafu.

Bwana alisema kuwa alikuja kutuokoa toka katika ulimwengu huu wenye uovu. Na ili aweze kulitimiza jukumu

hili, Bwana wetu alibatizwa na Yohana Mbatizaji katika Mto Yordani, akaimwaga damu yake Msalabani, na kwa sababu hiyo ametuokoa mara moja na kwa wote toka katika dhambi zetu zote. Hivyo, kila mtu anapaswa kuuamini Ukweli wa injili ya maji na Roho. Kwa lugha tofauti, ni lazima tuokolewe toka katika dhambi za ulimwengu kwa kuamini injili ya maji na Roho. Kama hali ndio iko hivi, basi tunapaswa kuachana na imani yetu ya kisheria ya sala za toba, na badala yake tunatakiwa kuamini katika injili ya maji na Roho kwa mioyo iliyofoyanywa upya.

Ni injili gani ambayo Wakristo wa leo ulimwenguni kote wanaamini? Je, ni injili ya maji na Roho? Au wanazitegemea sala zao binafsi za toba? Je, kwa namna yoyote ile wewe huziamini sala za toba kama sehemu ya kuzioshelea mbali dhambi zako? Ikiwa jibu lako ni ndiyo, ni hakika kuwa unalichukulia fundisho la toba kama injili yako. Lakini unapaswa kutambua huwezi kuokolewa kikamilifu toka katika dhambi zako kwa kupitia sala zako za toba. Ikiwa imani yako imejengwa katika sala zako za toba au katika fundisho la kidini la utakaso unaozidi, basi hii itamaanisha kuwa umeangukia katika imani ya kisheria. Na kama ni hivyo unaweza kukombolewa toka katika dhambi za kipindi hiki kiovu kwa kupitia imani yako ya kisheria kwa kuzitegemea sala za toba au fundisho la kidini la utakaso unaoongezeka? Hapana, kwa kweli hilo haliwezekani. Njia pekee inayoweza kutusaidia kuyashinda maovu yote yaliyopo hapa ulimwenguni na kisha kuoshwa dhambi zetu zote ni kwa kumwamini Yesu Kristo aliyekuja kwa injili ya maji na Roho. Sisi sote ni lazima tulifahamu jambo hili vizuri.

Nguvu ya fundisho la kidini la sala ya toba ambalo linaaminiwa sana na Wakristo wa kawaida ni tofauti kabisa na nguvu ya injili ya maji na Roho iliyoandikwa katika Biblia.

Utofauti wa nguvu hizo ni kama ifuatavyo: Wakati mtu anapoamini katika injili ya maji na Roho, dhambi zake zinaoshelewa mbali mara moja, lakini kwa kupitia sala za toba, dhambi za mtu hazioshelewi kwenda mbali. Hivyo tunaweza kuona hapa na kutambua kati ya injili hizi mbili kuwa ipi iliyo na Ukweli wa wokovu, yaani kati ya fundisho la sala ya toba na injili ya maji na Roho. Tunaweza kuutambua Ukweli unaoweza kutukomboza toka katika makosa na maovu yetu yaliyomo katika ulimwengu huu.

Je, mnafahamu tofauti kati ya imani ya kisheria ya sala za toba na imani katika injili ya maji na Roho? Kwa kweli kuna tofauti kubwa sana ya nguvu kati ya injili hizo kiasi cha kushangaza kabisa. Injili ya maji na Roho ni injili ambayo imezitoweshea mbali dhambi zetu mara moja na kwa wote, ilhali fundisho la kidini la toba ni injili ya uongo tu. Sisi sote ni lazima tutambue hivyo na kuamini ipasavyo. Hata hivyo, kwa bahati mbaya, Wakristo wengi leo hii wanaamini kuwa wameondolewa dhambi zao kwa kuamini damu ya Msalaba pekee na katika fundisho la toba. Lakini kwa kupitia hizo sala za toba, ni hakika kuwa wokovu na ondoleo la dhambi haviwezi kukamilishwa wala kupatikana. Ni hakika kuwa watu hao hawawezi kupambanua kati ya Ukweli wa wokovu na mafundisho ya kidini ya uongo.

Wale wasioamini katika injili ya maji na Roho, na badala yake wanaamini kuwa wanaweza kuziosha dhambi zao kwa kupitia sala za toba ni hakika wanaweza kutambua kuwa wao ni wenye dhambi wakati wote, maana dhambi zao bado zimeandikwa katika dhamiri zao (Yeremia 17:1). Wale wote wasioamini katika injili ya maji na Roho hawawezi kukwepa kuishi wakiwa wameelemewa na dhambi zao.

Ikiwa ni hivyo, watu hao wanawezaje basi kupokea baraka ya wokovu wa milele kwa kuufahamu na kuuamini

Ukweli wa injili ya maji na Roho? Kwanza kabisa, watu hao wanapaswa kuwa masikini wa roho. Injili ya maji na Roho ni Ukweli wa injili ambao unaweza kusikilizwa na masikio ya wale ambao ni masikini kiroho, wale wanaoifanya mioyo yao kuwa minyenyekevu, na kwa sababu hiyo mioyo hiyo inawafanya waweze kupokea ondoleo la dhambi zao. Kwa sasa ni wakati ambapo kila mtu hapa ulimwenguni ni lazima akutane na injili ya maji na Roho, na ni kipindi ambacho kila mtu anatakiwa kujifunza jinsi wokovu halisi ulivyo.

Nguvu ya Injili ya Maji na Roho Inatosha Kabisa Kumkomboa Kila Mtu Toka Katika Dhambi Zake

Nguvu ya injili ya maji na Roho inaweza kuwaokoa wanadamu wote katika ulimwengu huu. Injili ya maji na Roho inatangaza kuwa Yesu alizichukua katika mwili wake na akazitoweshea mbali dhambi za kila mwenye dhambi kwa kuzaliwa kwake hapa duniani, kwa kubatizwa na kusulubiwa, na kisha kwa kufufuka kwake toka kwa wafu. Tunaweza kupokea ondoleo la dhambi kwa nguvu iliyo katika Ukweli wa injili ikiwa tu tutamfahamu na kumwamini Yesu Kristo ambaye ametuokoa kwa kupitia injili ya maji na Roho.

Wale ambao imani yao imejengwa katika damu ya Yesu ya Msalaba pekee wanazifahamu sala zao za toba. Hata hivyo, wanachopaswa kutambua ni kuwa kwa kupitia sala za toba hawawezi kukombolewa toka katika dhambi zao. Hivyo, wanapaswa kutambua kuwa injili ya maji na Roho iliyotolewa na Bwana ndio injili pekee ya kweli. Ni Yesu Kristo tu Ndiye aliyetukomboza toka katika dhambi zote za ulimwengu huu kwa kupitia injili ya maji na Roho.

Injili ya maji na Roho ipo hivi: Yesu alibatizwa na

Yohana, aliimwaga damu yake Msalabani, alifufuka toka kwa wafu, na kwa sababu hiyo amezitoweshea mbali dhambi zetu zote. Injili ya maji na Roho, ndio injili pekee iliyo na nguvu ya kuweza kuwaokoa wanadamu wote toka katika dhambi za ulimwengu huu. Yesu Kristo ametukomboha toka katika kipindi hiki kiovu na madhaifu yetu yote kwa kuupokea ubatizo wake toka kwa Yohana na kwa damu yake aliyoimwaga. Tunapaswa kutambua kuwa injili ya maji na Roho ambayo tunaamini imetukomboha toka katika maovu yote ya ulimwengu huu kikamilifu, na tunapaswa kutambua kuwa nguvu ya injili ina nguvu ya kuweza kutukomboha toka katika kizazi hiki kiovu.

Ndugu waamini wenzangu, je, ni kweli kuwa mmekombolewa toka katika kipindi hiki kiovu kwa imani yenu katika injili ya maji na Roho? Je, nguvu ya injili ya maji na Roho ina nguvu za kutosha kuweza kuzitoweshea mbali dhambi zote za ulimwengu huu?

Kama vile Paulo alivyosema, *“Na dhambi ilipozidi, neema ilikuwa nyingi zaidi”* (Warumi 5:20), injili ya maji na Roho ilikuwa na uwezo mkubwa wa kuweza kutuokoa toka katika dhambi za ulimwengu mara moja na kwa wote. Alichouwa akikisema Paulo ni kuwa neema ya Mungu ya wokovu ilizidi sana kiasi kuwa iliweza kuziondolea mbali dhambi za kila aliyeamini. Kusema kweli, kwa kupitia ubatizo ambao Yesu Kristo aliupokea toka kwa Yohana Mbatizaji, ilikuwa haiwezekani kwa dhambi yoyote ile hapa ulimwenguni kutopitishwa kwenda kwa Yesu Kristo. Mungu ametupatia injili ya maji na Roho, na amewapatia wale wanaoamini injili hii katika mioyo yao nguvu na imani ya kuweza kuyashinda maovu ya ulimwengu.

Yesu Kristo alizichukua katika mwili wake dhambi za ulimwengu mara moja na kwa wote kanywa kubatizwa na Yohana Mbatizaji, na kwa kuimwaga damu yake na kufa

Msalabani, na kisha kufufuka tena toka kwa wafu, Yesu aliyafanya hayo yote ili aweze kuutoweshea mbali uovu wote wa wenye dhambi na ili aweze kutupatia wokovu wa kweli. Yesu Kristo ametukomboha toka katika dhambi za ulimwengu huu na ametukomboha toka katika uovu wa ulimwengu huu kwa kupitia injili ya maji na Roho. Injili ya maji na Roho ni kitu halisi cha imani ya kweli ambacho kinaweza kuzioshelea mbali dhambi za kila mtu mara moja na kwa wote.

Nguvu inayopatikana katika injili ya maji na Roho kwa hakika ni ya kipekee hasa unapoilinganisha na nguvu ya imani ya wale ambao bado wanaamini katika imani ya kisheria, huku wakizitegemea sala zao binafsi za toba. Kwa kuwa imani katika injili ya maji na Roho ina nguvu sana kuliko imani hii ya kisheria, sisi nasi tunaweza kuokolewa toka katika dhambi zetu kwa kuamini injili ya kweli pekee. Hii ndio maana ninaihubiri injili ya maji na Roho kwa wale wote ambao bado wanafanya sala za toba. Ninafanya hivi ili kwamba waweze kupokea ondoleo la dhambi zao zote.

Ukweli wa injili ni upi? Ni ule uitwao kwa lugha ya kiyunani *'euaggelion'* yaani habari njema. Neno la Kiyunani linalomaanisha "injili" ni *"euaggelion,"* na neno hilo lilisemekana kuwa lilikuwa na kitu cha Mungu ndani yake kinachoitwa *"dunamis."* Neno la Kiyunani *"dunamis"* lina maanisha ni nguvu, mamlaka, au uwezo, neno "baruti" kwa asili yake linatokana na neno hilo (Warumi 1:16). Kwa kuwa injili ya maji na Roho ni kama baruti, basi ikiwa utaiamini injili hii kwa moyo wako wote, basi ni hakika kuwa unaweza kuzifutilia mbali dhambi zako zote kwa imani hii na wala hakuna dhambi hata moja itakayoachwa. Injili ya maji na Roho ambayo Bwana wetu ametupatia ni injili inayotuwezesha sisi kuzaliwa tena upya. Injili hii ya maji na Roho inatolewa kwetu na Bwana ni injili yenye nguvu inayoweza kutuokoa toka

katika dhambi zote za ulimwengu huu. Kama vile baruti ilivyo na nguvu, injili ya maji na Roho ni injili kamilifu inayoweza kumwokoza mtu yeyote yule kikamilifu toka katika dhambi zote za ulimwengu huu wenye uovu.

Injili ya Maji na Roho ni Injili ya Ukweli Ambayo Imetuokoa Toka Katika Uovu

Injili ya maji na Roho imekuokoa wewe na mimi kikamilifu. Haijalishi mapungufu tuliyo nayo, na haijalishi jinsi kipindi hiki kiovu kinavyoweza kuwa kimefuniwa na dhambi, ukweli ni kuwa injili yenye nguvu inaweza kutuokoa kikamilifu toka katika dhambi za ulimwengu huu. Kwa kuwa Bwana ametupatia injili hii ya maji na Roho, basi kila matu anayeamini injili hii ameoshwa dhambi zake zote. Hii ni kwa sababu injili hii ya kweli ina uwezo mkubwa sana wa kutuokoa wewe na mii toka katika dhambi za ulimwengu huu. Je, unaamini kuwa injili ya maji na Roho ni injili ya wokovu ambayo imetuokoa toka katiak dhambi za ulimwengu mara moja?

Je, matendo yako yana mapungufu mbele za Mungu? Kwa namna yoyote ile, kuna yeyote yule kati yetu ambaye hajapokea ondoleo la dhambi ziletazo mauti, ilhali ni wazi kuwa dhambi zako zimeshughulikiwa na Yesu? Ikiwa kuna yeyote yule miongoni mweni ambaye anafikiria hivyo, basi ninawasihi muweze kumwamini Yesu Kristo aliyekuja kwa injili ya maji na Roho kwa mioyo yenu yote. Baada ya kumwaini Yesu, ndipo mnapoweza kuzioshelea mbali dhambi zenu zote ikiwemo zile dhambi zinazoonekana kubakia katika mioyo yenu. Ni lazima muiweke mioyo yenu katika kichwa cha Yesu Kristo kwa imani, na ni lazima muwe na imani inayowaunganisha na adhabu ya dhambi ambayo Yesu Kristo aliibeba.

Hata sasa, ikiwa unauamini ubatizo wa Yesu na damu yake Msalabani, basi ni hakika kuwa utaondolewa dhambi zako zote. Bwana wetu alizichukua katika mwili wake dhambi zote za ulimwengu huu pamoja na mapungufu na madhaifu yetu kwa kupitia ubatizo alioupokea toka kwa Yohana Mbatizaji. Kisha Yesu aliadhibiwa mara moja na kwa wote kwa kuimwaga damu yake Msalabani. Bwana wetu ametuokoa sisi sote tunaoamini katika injili ya maji na Roho toka katika dhambi zote za ulimwengu huu mara moja na kwa wote.

Bwana wetu hakuzitoweshea mbali dhambi za watu wachache walioteuliwa, bali yeye ni Mwokozi wa kweli ambaye alizibeba na kuzitoweshea mbali dhambi zote za ulimwengu, yaani ikiwemo hata dhambi zote zinazofanywa katika kipindi hiki kiovu. Kwa kuwa Bwana alizichukua hata dhambi zako zote kwa kupitia ubatizo alioupokea toka kwa Yohana, basi ninawasihi ninyi nyote mzipitishe dhambi zenu kwenda kwa Yesu kwa kuuamini Ukweli huu. Kila dhambi mliyo nanyo ilitoweshewa mbali kwa kupitia ubatizo ambao Yesu Kristo aliupokea toka kwa Yohana na damu yake aliyoimwaga Msalabani. Hivyo, mnachotakiwa kukifanya hivi sasa ni kuwa na imani katika injili ya maji na Roho, na kwa imani hiyo mnaweza kuokolewa toka katika dhambi zenu zote.

Bwana wetu ana mamlaka na nguvu ya kuweza kuzisafisha dhambi zetu mar amoja na kwa wote kwa kupitia ubatizo wake na damu yake aliyoimwaga. Kwa kuwa Bwana wetu amezitoweshea mbali dhambi za ulimwengu huu kwa injili ya maji na Roho, basi ni hakika kuwa Bwana amefanya dhambi za wote wanaoamini kutobakia katika mioyo yao. Nguvu na mamlaka inayoweza kubatilisha dhambi zetu haipatikani mahali pengine popote pale bali inapatikana katika injili hii yenye nguvu, yaani injili ya maji na Roho. Kwa kuwa injili ya maji na Roho ni injili ya kweli, basi ikiwa utaiamini

injili hii kwa hiari yako, basi nguvu za wokovu huu mkuu zitakaa katika moyo wako. Kwa upande mwingine, ikiwa hauamini hivyo, basi ni hakika kuwa huwezi kuupata wokovu wa Mungu.

Ikiwa injili ya maji na Roho itakuwemo katika mioyo yetu, basi ni hakika kuwa dhambi za ulimwengu huu haziwezi kamwe kututawala. Yesu amezioshelea mbali dhambi zote zilizofanywa na watu binafsi, dhambi zote zilizofanywa na jamii, dhambi zote zilizofanywa na makundi, na dhambi yoyote ile iliyofanywa hapa duniani kwa kupitia ubatizo ambao Yesu aliupokea kwa ajili yetu na damu yake Msalabani. Bwana ameutoa wokovu wake wa kweli kwa waamini wote wanaoiamini injili ya maji na Roho. Kwa kuwa Yesu Kristo alizibeba dhambi zote za ulimwengu huu mara moja na kwa wote kwa kupitia ubatizo wake na kwa kuwa alizipatanisha hizo dhambi pale Msalabani, basi sisi tunaamini kuwa tulikufa pamoja na Yesu Kristo na tulifufuliwa pamoja naye.

Hata hivyo, kuna dhambi moja ambayo haiwezi kuoshelewa mbali. Ni dhambi ya kutoamini katika injili ya maji na Roho. Dhambi hii haiwezi kusamehewa kwa namna yoyote ile na kwa gharama yoyote ile. Kutokana na namna ambavyo Bwana wetu alipanga wakishirikiana na Mungu Baba na Roho Mtakatifu, Yesu alikuja hapa duniani akazichukua dhambi zetu kwa kupitia injili ya maji na Roho, alisulubiwa mara moja, na kwa sababu hiyo ameziosha na kuzitoweshea mbali dhambi zetu zote. Bwana wetu amezitoweshea mbali dhambi za ulimwengu huu, na ameitimiza haki yote ya Mungu mara moja na kwa wote kwa kupitia injili ya maji na Roho. Hivyo, wale wanaouamini wokovu huu uliotimizwa na Bwana wetu wameokolewa milele, lakini wale wanaosimama kinyume na injili ya maji na Roho ni hakika kuwa hawataweza kupokea ondoleo la dhambi milele.

Dhambi isiyosameheka mbele za Mungu ni dhambi ya kutoiamini injili ya maji na Roho, na adhabu ya dhambi hii inayowahusu wale wasioamini imewekwa maalum kwa ajili yao. Katika Injili Nne Bwana wetu alisema hivi, *“Kwa sababu hiyo nawaambia, Kila dhambi na kila neno la kufuru watasamehewa wanadamu, ila kwa kumkufuru Roho hawatasamehewa”* (Mathayo 12:31, Marko 3:28-29). Tunapaswa kutambua kuwa dhambi ya kumkufuru Roho na dhambi inayopelekea mauti ni ile ya kutoiamini injili ya maji na Roho (1 Yohana 5:16). Watu pekee ambao hawawezi kuondolewa dhambi zao ni wale ambao hawamwamini Yesu Kristo aliyekuja kwa maji na Roho kuwa ni Mwokozi wao. Haijalishi hali na mazingira yetu ya kimwili ambayo yanatuzunguka, kwa hakika ni lazima tuamini Ukweli kuwa Bwana amezitoweshea mbali dhambi zetu kwa kupitia injili ya maji na Roho. Ni kwa kufanya hivyo ndipo tutakapoikwepa dhambi ya kumkufuru Roho Mtakatifu.

Dhambi kubwa kuliko zote ni dhambi ya kumkufuru Roho Mtakatifu. Kumkufuru Roho Mtakatifu ni dhambi ya kutoamini katika injili ya ubatizo na damu, yaani imani inayoamini kuwa Bwana wetu ametuokoa toka katika dhambi za ulimwengu mara moja na kwa wote kwa kuutoa mwili wake kwa Mungu Baba (Waebrania 10:26-29). Bwana wetu alikuja hapa duniani, alibatizwa na Yohana, akafa Msalabani, na kisha akafufuka toka kwa wafu ili kuzitoweshea mbali dhambi zetu. Dhambi ya kutomwamini Yesu ambaye amefanyika kuwa Mwokozi wetu, yaani dhambi ya kusimama kinyume na injili ya maji na Roho, basi kwa ujumla wake hiyo ndio dhambi ambayo isiyosameheka, na dhambi nyingine zote zinaweza kuondolewa. Bwana wetu alizichukua dhambi zote kwa ubatizo wake na akazitoweshea mbali kwa kupitia damu yake aliyoimwaga pale Msalabani, alifanya hivyo kwa dhambi zote zinazo onekana

kuwa ni mbaya kuliko zote, na hata kwa dhambi nzito za jinai zinaoonekana kuwa mbaya zaidi katika jamii. Sisi tunaokolewa kwa kuamini injili hii ya maji na Roho.

Hitla aliwaua Wayahudi milioni 6 katika vyumba vya gesi. Na baadhi ya nchi nyingine zilifanya majaribio ya kibailojia kwa wafungwa wa kivita. Lakini Bwana wetu alizichukulia mbali hata hizo dhambi kwa kupitia ubatizo wake na damu yake. Bwana ameziondoa mara moja dhambi zote hata dhambi ambazo hazivumiliki kwa kupitia Ukweli wa injili ya maji na Roho. Kwa kuwa Bwana wetu amezibeba dhambi za watu waovu kabisa, basi ikiwa mtu atabakia na dhambi kwa kuuwekea mashaka upendo huu na kwa kutouamini wokovu wa Yesu, basi hilo litakuwa ni kosa lake binafsi.

Ikiwa mtu yeyote yule hauamini ubatizo wa Bwana wetu na damu yake Msalabani kuwa ni wokovu wake, basi hakuna kitu kingine katika ulimwengu huu kinachoweza kuziondolea mbali dhambi zake, na kwa sababu hiyo dhambi itabakia kuwepo katika moyo wake, mtu huyo hataweza kupokea ondoleo la dhambi milele. Kwa upande mwingine, ikiwa mtu anauamini ubatizo wa Yesu na damu yake Msalabani kuwa ni wokovu wake, basi haijalishi dhambi anazoweza kuwa amezifanya, mtu huyo ataondolewa dhambi zake zote. Hata kama mtu ni dhaifu na anaishi katika kipindi hiki kiovu, ikiwa kwa sasa anauamini Ukweli wa injili ya maji na Roho, basi mtu huyo anaweza kuokolewa toka katika dhambi zake zote. Mimi na wewe tumeokolewa toka katika dhambi zetu kwa kuamini kuwa Bwana amezitoweshea mbali dhambi zetu kwa maji na Roho.

Mnapaswa kusikiliza kwa makini kile ambacho Mtume Paulo anakiongelea hapa. Injili ya maji na Roho ambayo Mtume Paulo anaizungumzia ni Neno lenye nguvu na mamlaka makuu. Bwana wetu ametuokoa toka katika dhambi za ulimwengu ili aweze kutuokoa na dhambi katika kipindi hiki

chenye uovu. Kwa kupitia ubatizo ambao aliupokea katika Mwili wake, Bwana wetu alizichukua dhambi za ulimwengu katika mwili wake, na kwa kusulubiwa kwake na kwa damu yake aliyoimwaga, Bwana aliutoa mwili wake kama sadaka kwa Mungu Baba. Hivi ndivyo Bwana alivyotuokoa toka katika dhambi za ulimwengu.

Siku hizi wapo wale wanaosema kuwa kwa kuwa kipindi hiki kimejaa uovu mwingi sana, basi baadhi ya wale wahalifu wanaotenda matendo ya ukaidi kama vile uuaji hawawezi kuokolewa toka katika dhambi. Lakini hoja hizo si za kweli. Kwa hakika watu kama hao hawawezi kuokolewa kwa sababu hawaifahamu injili ya maji na Roho na ndio maana hawawezi kuiamini. Ni watu wangapi ambao bado wanaishi katika vivuli vya giza huku wakishindwa kupokea ondoleo la dhambi zao ingawa wanadai kuwa wanamwamini Yesu? Ni kwa nini Wakristo wanaomwamini Yesu Kristo bado wanatetemeka kwa hofu? Je, huo si ushahidi kuwa kuna tatizo katika injili wanayoiamini?

Wao wanaliamini fundisho la sala za toba, ambalo ni fundisho walilojiundia na ambalo halina nguvu yoyote ile. Ndio maana wanaishia kutetemeka mbele ya nguvu na mamlaka ya ulimwengu huu na wanashindwa kuonyesha nguvu yoyote ile. Tunachopaswa kukitambua hapa ni kuwa ikiwa tunakiamini kitu kingine ambacho si injili ya maji na Roho, basi hapo tutakuwa tukiiamini injili nyingine, na kwa sababu hiyo tunatenda dhambi mbele za Mungu. Fundisho la sala za toba halina Ukweli wowote ule. Ukweli halisi upo katika injili ya maji na Roho.

Katika ulimwengu huu, mambo ya uongo yanaenea kwa kasi sana kama vile zinavyonunuliwa keki nzuri za bandia kuliko hata kesi halisi. Wakati fulani mambo ya kuigiza yanaonekana kuwa mazuri na yanayong'aa kuliko vitu

vyenyewe halisi. Katika ulimwengu wa wanyama, kuna baadhi ya wanyama na wadudu ambao wanabadili rangi ya miili yao ili ifanane na mazingira ya kiasili wanayoishi ili kutoonekana na kukwepa maadui. Vivyo hivyo, kuna Wakristo wengi sana wanaodai kumwamini Yesu, huku wakiikumbatia imani potofu kana kwamba ndio ukweli. Lakini ikiwa tutajifunza injili halisi ya maji na Roho, ni hakika tunaweza kuzitambua injili za uongo.

Injili ya maji na Roho ambayo wewe na mimi tunaifahamu ni injili halisi ya wokovu, lakini ulimwengu huu umezama katika sala za toba na si katika injili ya maji na Roho. Pamoja na madhaifu hayo, Yesu Kristo ametuokoa toka katika kipindi hiki kiovu toka katika dhambi zetu kwa kuutoa mwili wake wa Mungu Baba. Yesu Kristo ndiye Mwokozi wa kweli ambaye ametukombo toka katika dhambi zetu zote. Injili ya maji na Roho ni injili halisi ambayo imetuokoa kikamilifu toka katika dhambi zote tulizozifanya ikiwemo dhambi za kipindi hiki, na ametuokoa pia na madhaifu yetu yote.

Je, mnaiamini injili ya maji na Roho? Kama ni hivyo, mna dhambi katika mioyo yenu? Kwa hakika hamna dhambi. Ninyi mmefanyika kuwa wasio na dhambi kwa sababu mnaiamini injili ya maji na Roho. Kwa sasa mnapaswa kusimama katika ukweli kuwa ninyi hamna dhambi kwa kuwa mnaiamini injili ya maji na Roho. Dhamiri zetu zinapaswa kuutambua ukweli kuwa Bwana amezitoweshea mbali dhambi zetu na dhambi za ulimwengu pia.

Hata hivyo, ikiwa tutasema kuwa hatuna dhambi pasipo kuwa na imani katika injili ya maji na Roho iliyotolewa na Bwana, basi hapo tutakuwa ni waongo mbele za Mungu. Pasipokuwa na imani katika injili ya maji na Roho ni hakika kuwa hatuwezi kusema kuwa hatuna dhambi (1 Yohana 1:8). Ni lazima tuwe na imani inayouamini Ukweli unaoeleza kuwa

Yesu Kristo alizichukua dhambi za ulimwengu kwa kubatizwa na Yohana kwa ajili yetu, alisulubiwa na aliimwaga damu yake Msalabani, na kwa sababu hiyo ametuokoa toka katika dhambi zetu zote. Ukweli halisi ni kuwa kwa kupitia injili ya maji na Roho, Bwana ametuokoa toka katika dhambi zote zilizofanyika katika kipindi hiki kiovu. Sisi tunaondolewa dhambi zetu kikamilifu kwa kuamini kuwa Bwana amezitoweshea mbali dhambi za kila mtu hapa ulimwenguni kwa kupitia injili ya maji na Roho.

Tunafanyika kuwa watu wa Mungu kwa imani katika injili ya maji na Roho na sisi ni watu ambao tunamshukuru Kristo Yesu. Zaidi ya yote, pamoja na kuwa tunaishi katika kipindi hiki chenye uovu, kwa hakika sisi hatuishi maisha yetu tukiwa tumeanguka katika kipindi hiki kiovu, na wala hatusombwi na kipindi hiki kiovu, bali sisi tunaishi katika nuru ya Ukweli. Mbali na ukweli huo, kama vile samaki wanavyoogelea wakikinzana na mkondo wa maji, vivyo hivyo sisi nasi tunaishi tukikinzana na ulimwengu huu kwa sababu ya kuyasimamia mapenzi ya Bwana. Kwa kuwa Yesu Kristo ametuokoa kikamilifu toka katika dhambi za ulimwengu, kwa kweli inawezekana tukaishi katika Ukweli kwa imani.

Sisi tumeokolewa kwa injili ya maji na Roho ambayo ni karama ya wokovu ambayo Bwana ametupatia, na ni sisi ndio tunaoihubiri injili hiyo ya kweli. Kwa kuwa Bwana ametukomboza toka katika kipindi hiki kiovu, basi kwetu sisi inawezekana kabisa kuishi katika nuru angavu katika kipindi hiki kiovu, na wala hatufungwi wala kufanywa mateka wa dhambi. Bwana wetu ametupatia uwezo wa kuishi katika nuru, hii ina maanisha kuwa kwa kupitia Yesu Kristo Mungu ametupatia injili ya maji na Roho.

Je, mnaiamini injili ya maji na Roho? Je, bado mna dhambi? Hapana, kwa sasa ninyi hamna dhambi. Lakini si

bado mnatenda dhambi kutokana na udhaifu wa miili yenu? Kwa kweli ni hakika kuwa mnatenda dhambi. Hata hivyo, je, Bwana wetu si amezitoweshea mbali dhambi zote mara moja na kwa wote kwa injili ya maji na Roho? Kwa hakika Bwana ameziandaa dhambi zote. Tunapaswa kupata uamsho toka katika Ukweli kwa imani hii: Bwana amezitoweshea mbali dhambi zetu zote kikamilifu kwa injili ya maji na Roho. Kwa hakika sasa tunaweza kuzaliwa tena upya kutokana na imani yetu katika injili ya maji na Roho. Kwa sasa tunaweza kuifanya kazi ya haki ya Mungu kwa imani kila siku kwa kuzitafakari kazi za Bwana ambazo zimezitoweshea mbali dhambi za ulimwengu na hivyo kutuweka huru toka katika kifungo cha udhaifu na dhambi zetu zote.

Hakuna dhambi yoyote ile hapa ulimwenguni inayoweza kuiua mioyo yetu inayoamini katika injili ya maji na Roho. Mtume Paulo alisema aliuliza hivi, *“Ni nani atakayetutenga na upendo wa Kristo? Je! Ni dhiki au shida, au adha, au njaa, au uchi, au hatari, au upanga?”* (Warumi 8:35). Kwa kuwa Bwana ametuokoa wewe na mimi toka katika kipindi hiki kiovu, ni hakika kuwa hatuwezi kuuawa kwa ajili ya dhambi zetu za kila siku na wala hatuwezi kuuawa kwa mambo mengine kama vile majaribu au mateso ya ulimwengu huu. Shetani hawezi kututenga sisi tunaoni imani injili ya kweli toka kwa Bwana kwa jambo lolote lile. Hii ni kwa sababu Bwana amezitoweshea mbali dhambi zetu zote kwa kupitia nguvu ya injili ya maji na Roho, na ametufanya tuyaishi maisha yetu milele kwa imani katika injili hii ya kweli, na hiyo haiajilishi udhaifu na mapungufu tunayoweza kuwa nayo. Bwana amemzuia kabisa Shetani asiweze hata kuzigusa nafsi zetu. Kwa kweli tunaweza kuishi huku tukimfuata Bwana katika ulimwengu huu wenye uovu kwa kuwa hatuna dhambi kutokana na imani yetu katika injili ya maji na Roho. Kwa

kuwa bado tuna mapungufu na tuna udhaifu, basi kuna wakati tunajaribiwa kuufautu ulimwengu huu, lakini hatimaye huwa tunaachana na ulimwengu. Kwa maneno mengine tunapoiamini injili ya maji na Roho basi inakuwa ni jambo jema kwetu sisi kuishi kwa haki kuliko kutenda uovu.

Injili ya Maji na Roho ni Ukweli wa Wokovu Ambao Mungu Ametupatia

Katika injili ya maji na Roho kuna karama ya wokovu inayotuhakikishia kuwa Bwana ametukoa toka katika dhambi za ulimwengu huu. Mungu ametupatia karama ya wokovu. Haijalishi jinsi kipindi hiki cha sasa kinavyoweza kuwa kiovu, ukweli ni kuwa Bwana ametukombo katika dhambi zote ulimwengu huu kwa kupitia nguvu ya injili ya maji na Roho.

Katika siku za Mtume Paulo, watu wa wakati huo walikuwa waovu sana. Kipindi hiki cha sasa ni kovu sana kuliko hata kipindi cha Paulo na kipindi hiki kina uovu sana kuliko wakati wowote ule tangu mwanadamu alipoanza kuishi katika dunia hii. Hata hivyo, je, uovu wa kipindi hiki chenye uovu unaweza kukuu kiroho? Hapana, haiwekani! Hii ni kwa sababu Bwana amekwisha tukombo toka katika uovu huo kwa kupitia injili ya maji na Roho. Ingawa miili yetu bado ina mapungufu na ina udhaifu, je, Yesu si ametuokoa wewe na mimi toka katika uovu wote mara moja na kwa wote? Ni hakika kuwa Yesu ametuokoa toka katika dhambi za kipindi hiki kiovu kwa kuutoa Mwili wake kwa Mungu Baba mara moja na kwa wote. Yesu Kristo ametuokoa sisi sote kwa kubatizwa na Yohana Mbatizaji na kuzichukua dhambi zote za ulimwengu katika mwili wake, kwa kufa Msalabani na kisha kwa kufufuka kwake toka kwa wafu. Imani katika injili hii ya

maji na Roho ndio imani aliyokuwa Mtume Paulo na injili hii ndio Ukweli halisi.

Ninafahamu sawasawa kuwa sisi waamini wa injili ya maji na Roho tumeokolewa toka katika dhambi zetu zote, kwa kuwa Kristo ametuokoa toka katika kipindi hiki kiuvu na toka katika dhambi zetu zetu zote. Kwa kuwa Bwana amezioshelea mbali dhambi zetu kikamilifu kwa ubatizo wake na damu yake aliyoimwaga, basi kila mwamini anaokolewa kikamilifu toka katika dhambi za ulimwengu huu.

Baada ya waamini kuwa wameokolewa toka katika dhambi zao, je hawaendelei tena kutenda dhambi nyingine katika maisha yao? Hapana, wanaendelea kutenda dhambi. Ni kweli kuwa hawatendi dhambi kwa kudhamiria, ukweli ni kuwua hata wenye haki ambao wamekwisha okolewa toka katika dhambi zao bado wana ile miili yenye udhaifu, na kwa sababu hiyo kwa nyakati mbalimbali hujikuta wanatenda dhambi kwa miili yao.

Hata hivyo, kwa kuwa wanao Ukweli wa injili ya maji na Roho katika mioyo yao, basi wanayo imani inayoamini kuwa hata hizo dhambi wanazozitenda zimekwisha ondolewa. Hivyo, Bwana anatuambia hivi, *“Basi nasema, Enendeni kwa Roho, wala hamtazitimiza kamwe tamaa za mwili” (Wagalatia 5:16)*. Tunatafuta kuishi kwa Roho Mtakatifu, huwa pia tunajitahidi tuzitende dhambi kwa miili yetu, hii ni kwa sababu Roho Mtakatifu anayekaa ndani yetu huwa anatuongoza katika njia ya haki. Wale wasiotafakari juu ya yale ambayo Mungu ameyafanya kwa ajili yetu, na wasiofikiria yale yanayompendeza Mungu, ndio wasioweza kuifanya kazi ya haki ya Mungu na badala yake huishia kutenda dhambi nyingi za kimwili. Hii ndio sababu Bwana alitueleza kuishi kwa Roho Mtakatifu.

Tunachopaswa kukitambua hapa ni kuwa ikiwa

hatutaitenda kazi ya Mungu, basi ni hakika tutaishia kuzifuata kazi za miili yetu. Kwa kuwa sisi sote tunaishi katika ulimwengu huu, basi ni ama tutafanya mambo mema au la tutafanya mambo ya dhambi. Ikiwa mtu hataitenda kazi ya haki, basi ni hakika kuwa mtu huyo ataishia kutenda matendo ya dhambi. Kati ya hayo mambo mawili ni mambo gani basi ambayo tunapaswa kuyafanya? Kwa kuwa sisi sote tumepangiwa kufanya jambo fulani, yaani iwe ni jambo jema la haki au dhambi, basi ikiwa tumefanyika wenye wenye haki waliozaliwa tena upya kwa maji na kwa Roho, basi sisi tunatakiwa kuifanya kazi ya Mungu.

Wale waliookolewa wanaoamini katika injili ya maji na Roho wanaifanya kazi ya haki huku wakimtii Roho Mtakatifu. Kwa kawaida ikiwa hatutajitoa kuitumikia injili ya Bwana, basi tutaishia kufanya mambo ya dhambi. Hii ndio sababu tunapaswa kuitoa kikamilifu miili yetu, mawazo yetu, na imani yetu kwa ajili kuitenda kazi ya haki. Kama vile Yesu alivyotuokoa kwa kuutoa Mwili wake kwa Mungu Baba, vivyo hivyo sisi nasi tunatakiwa kuifanya kazi inayowaokoa watu wengine toka katika dhambi zao, na sisi nasi tunatakiwa kuitoa miili yetu kwa Mungu Baba. Hii ndio njia sahihi ya kimaisha na iliyo ya haki ambayo sisi tuliozaliwa tena upya tunapaswa kuipitia.

Hapo zamani za kale, mtu mmoja aliyekuwa kipofu aliniambia kuwa kila anapoamka asubuhi huwa anaianza siku yake kwa kulitafakari Neno la Mungu. Lakini pia alisema kuwa Neno la Mungu ni gumu sana kiasi kwamba hakuna aliyeweza kulifahamu kikamilifu hata kama angelikuwa na akili kiasi gani. Hata hivyo, sababu iliyomfanya huyo mtu asiweza kulitambua Neno la Mungu la Ukweli ni kwa sababu alikuwa haifahamu injili ya maji na Roho, na kwa sababu hiyo alikwa bado hajakombolewa toka katika dhambi zake. Pamoja na kuwa mtu

huyo kipofu alimwamini Mungu, kwa kuwa alikuwa haufahamu Ukweli wa wokovu, ndio maana aliliona Neno la Mungu kuwa ni gumu mno kwa kuweza kulifahamu kikamilifu.

Baada ya kumsikia mtu huyu, kwa kweli niliingiwa na huzuni katika moyo wangu. Roho Mtakatifu aliusukuma moyo wangu ili niweze kumwelezea mtu huyo aliyekuwa na ulemavu wa kutoona. Nilipata wazo ambalo lingelimwezesha kulisikia Neno la injili ya maji na Roho kwenye kompyuta hasa katika kipindi chake cha asubuhi kilichoitwa Q.T. Katika nyakati hizi, kuna watu wengi wanaofahamu namna ya kutumia kompyuta. Ikiwa wale walio na macho na wanaoona vizuri wanatamani sana kulisoma na kulifahamu Neno la Mungu, ni vipi basi kwa vipofu ambao wanatamani kulifahamu na kuliamini Neno la Mungu ili waweze kukombolewa toka katika dhambi zao? Kwa wale ambao walizaliwa na upotofu hawawezi hata kuifahamu rangi nyekundi jinsi ilivyo, kwa kuwa watu hao hawajawahi kuona rangi katika maisha yao yote. Yale ambayo sisi tunadhani ni mambo ya kawaida na yaliyo wazi kwa upande wao ni mambo yasiyowezezana, je, si ingelikwua ni jambo jema ikiwa wangeliveza kujifunza na kufahamu wao wenyewe? Bila shaka si watakuwa na kiu sana ya kulisikia Neno la Mungu?

Ngoja niwaeleze hadithi moja ndogo kuhusu jambo moja lililotokea hapo zamani kidogo wakati ambapo kaka na dada zetu walipokuwa wakijitolea kwenye shule ya watoto wenye ulemavu wa kutoona. Walimu wa Shule ya Jumapili walikuwa wamewakusanya watoto wasiiona kwa ajili ya kuabudu na kusoma Neno la Mungu toka katika Kitabu cha Mwanzo. Basi wakati mwalimu moja aliposoma Mwanzo 1:3 inayosema hivi, “Mungu ni nuru,” mtoto mmoja aliinua mkono wake na kuuliza hivi, “Nuru ni kitu gani?” Mtoto mwinginen aliyekuwa ameketi karibu naye aligugumia akasema, “Je, huifahamu hata hiyo

nuru? Nuru maana yake ni kuwa mwepesi yaani mtu asiwe mzito.” Kwa kuwa watoto hao hawajawahi kuiona nuru angavu tangu siku walipozaliwa hapa ulimwenguni, ndio maana walishindwa kuifahamu wakati walipoambiwa kuwa, “Mungu alisema, ‘Na iwe nuru,’” na kwa sababu hiyo wao walifikiria maana nyingine ya neno nuru wakifikiri kuwa ni kitu chepesi. Kwa wanadamu wote, ufahamu wetu una mipaka iliyo katika milango ya ufahamu wetu, ndio maana tunaweza kuhisi na kutambua kwa miili yetu. Hivyo wakati watu wenye ulemavu wa kuona walipoulizwa kuwa nuru ni kitu gani, basi wao walifikiria neno hilo kwa maana ya uzito mwepesi. Ikiwa mimi na wewe tungeliichukua nafasi yao bila shaka hata sisi tungeliweza kufikiria kwa namna hiyo.

Kwa kweli ninafikiri sisi sote tunatakiwa kuwasaidia watu hao wenye ulemavu wa kutoona, na tunapaswa kuwafikishia injili ya maji na Roho kwa njia nyingine yoyote ile. Kama vile Yesu alipokuja hapa duniani, aliwaponya wagonjwa na akaihubiri injili ya wokovu kwa maskini, basi sisi nasi tunapaswa kuzifanya hizo kazi. Ninapata ujasiri kuwa ikiwa tutatumia vitu vinavyoweza kuwafanya waweze kuisikia injili ya maji na Roho kwa masikio yao, basi kwa kufanya hivyo kila mtu anayeutafuta Ukweli wa injili ya maji na Roho anaweza kuupata.

Sisi sote ni lazima tuishi kwa Roho Mtakatifu na ni lazima waaminifu katika kuieneza injili. Ingawa sisi sote tunataka kuishi katika Roho, kuna wakati ambapo tunashindwa kufanya hivyo. Hivyo, ni lazima tuyaishi maisha yetu huku tukiukumbuka na kuuamini Ukweli unaeleza kuwa Yesu Kristo ametuokoa toka katika kizazi hiki kiovu na toka katika dhambi zetu kwa kuutoa mwili wake binafsi. Kwa kweli hatuwezi kamwe kuishi tukiwa wenye haki ikiwa hatutaifahamu injili ya maji na Roho na kuiamini katika mioyo yetu. Hivyo sisi sote ni

lazima tujifunze kuhusu injili ya maji na Roho, tuifahamu na kisha tuiamini kwa mioyo yetu yote. Hapo zamani, Bwana wetu aliupokea ubatizo katika mwili wake, kisha akafa Msalabani, na akafufuka tena toka kwa wafu na akazitoweshea mbali dhambi zetu zote mara moja na kwa wote; hivyo tunapaswa kuifahamu Ukweli huu wa injili na ni lazima tuamini.

Ikiwa mimi na wewe hatuna imani katika Ukweli huu, yaani kuwa Bwana amekwisha zitoweshea mbali dhambi zetu zote na kuukamilisha wokovu wetu, basi tutawezaje basi kuishi kwa utii katika Roho Mtakatifu? Pasipokuwa na imani katika injili ya maji na Roho, ni hakika kuwa hakuna mtu anayeweza kuishi kwa mujibu wa Roho Mtakatifu. Ikiwa tutaiamini injili ya maji na Roho basi ni hakika kuwa tutawekwa huru toka katika dhambi zetu. Ingawa tunaweza kufikiria kuwa tumepewa wokovu katika wakati huu uliopo, ukweli ni kuwa Bwana wetu amekwisha ukamilisha wokovu wa mwanadamu toka katika dhambi katika wakati mkamilifu uliopita. Kwa kuwa Bwana wetu amekwisha zitoweshea mbali dhambi zetu kwa Ukweli wa injili ya maji na Roho, basi kila mtu katika umri wowote ule na katika nchi yoyote ile anaweza kupokea ondoleo la dhambi zake mara moja na milele kwa kuifahamu na kuiamini injili hii ya kweli ambayo imezitoweshea mbali dhambi za ulimwengu huu. Bwana wetu amekwisha zitoweshea mbali dhambi zetu muda mrefu uliopita mara moja na kwa wote kwa kupitia injili ya maji na Roho.

Kwa kweli huu si ndio Ukweli wa injili unaoshangaza sana? Ili kuzitoweshea mbali dhambi zetu, Bwana wetu alijitoka mwili wake huku akizipokea dhambi za ulimwengu kwa kuupokea ubatizo wake na kwa kuimwaga damu yake hali akisulubiwa Msalabani. Kwa kufanya hivyo, Bwana amezitoweshea mbali dhambi zetu zote kikamilifu na

ameukamilisha wokovu wetu mkamilifu. Kwa kweli hii sio ndio injili ya ajabu? Kwa hakika tunaweza kuona jinsi injili ya maji na Roho ilivyo tofauti na injili nyingine ambazo zimetokana na mawazo ya mwanadamu.

Injili ya Maji na Roho Ni Tofauti na Injili Ambazo Zinaambatana na Sala za Toba

Injili ya maji na Roho ambayo tunaifahamu na kuiamini ipo tofauti sana na injili nyingine zinazoitangaza damu ya Msalaba pekee. Na kwa kuwa Roho Mtakatifu anayekaa ndani yetu ni tofauti na roho zikaazo ndani ya wale wanaoiamini injili ya uongo, basi ndio maana sisi tunaweza kutambua kuwa Bwana amekwisha zitoweshea mbali dhambi zetu mara moja na kwa wote. Ikiwa tunaamini injili ya maji na Roho, basi imani hii tuliyonayo ndio injili halisi inayotuwezesha kupokea ondoleo la dhambi. Ikiwa miongoni mwetu kuna watu ambao bado wanaomba ili dhambi zao ziweze kuoshwa, basi wanatakiwa watambue jinsi ilivyo makosa kujaribu kuoshwa kusafishwa dhambi zao kwa kupitia sala za toba, na badala yake ni lazima waifahamu na kuiamini injili ya maji na Roho ambayo imezitoweshea mbali dhambi zao kikamilifu.

Wakristo wa siku hizi wanaamini damu ya Yesu pekee kuwa ndio wokovu wao. Lakini ukweli ni kuwa dhambi zao haziwezi kuondolewa katika mioyo yao kwa kuiamini injili kama hiyo. Wakristo wa jinsi hiyo hawafahamu kuwa dhambi zao zimekwisha ondolewa mbali kwa kuwa Bwana amekwisha tupatia injili ya maji na Roho. Ndio maana wanashindwa kufanya yaliyo kweli na badala yake wanafanya sala za toba na kufunga kila siku huku wakijaribu kuziosha dhambi zao binafsi kwa njia hiyo. Kwa Wakristo wa jinsi hiyo, sala za toba ni kitu

muhimu sana katika “injili yao iliyo nusu.” Kwa hakika hiyo si ndio injili ya uongo? Ikiwa ukweli ungekuwa ndio hivyo, basi hiyo ingelimaanisha kuwa Bwana wetu angelipaswa kuziondoa dhambi zetu kila siku pasipo kukoma, lakini ni hakika kuwa imani ya jinsi hiyo ina makosa makubwa sana.

Bwana wetu alitumbia hivi “*ameketi mkono wa kuume wa kiti cha enzi cha Mungu*” (Waebrania 12:2). Bwana wetu alisema kuwa hazioshi dhambi za watu kila siku na kila wakati, kwa kuwa Yeye alikuja hapa duniani miaka mingi iliyopita, na kwa kupitia miaka yake 33 hapa duniani Yesu amekwisha zioshelea mbali dhambi zetu zote kwa ubatizo wake, kwa damu yake na kifo chake pale Msalabani, na kwa kufufuka kwake. Kwa kuwa Yesu alikwisha zipokea dhambi zote za ulimwengu huu toka kwa Yohana Mbatizaji kwa kupitia ubatizo wake, na akaimwaga damu yake pale Msalabani, basi kwa msingi huo Yesu amekwisha ziondolea mbali dhambi hizo zote, hivyo wale wote wanaouamini ukweli huu wanafanyika kuwa watu wa Mungu wakati wale wasioamini hivyo wanafanyika kuwa wana wa maangamizi. Kwa lugha tofauti, Ukweli huu ndio kipimo halisi ambacho Bwana atatumia kuwatambua waamini na wale wasioamini wakati atakapotoa hukumu.

Kwa kweli tunapaswa kutambua kwa undani jinsi fundisho la kidini la sala za toba lilivyo la uongo. Hadi wakati huu bado kuna watu wengi ambao wanazililia dhambi zao wakisema hivi: “Bwana, nimekosea. Tafadhali naomba unisamehe.” Ikiwa tutasamehewa kwa kuzifanya sala za toba kama hivyo, basi ni kwa nini Bwana alibatizwa na akaimwaga damu yake Msalabani? Fundisho hilo la kidini ni matokeo ya fikra za kibinadamu. Kile kinachotoka kwa mwanadamu hakiwezi kulingana na Ukweli wa injili ya maji na Roho.

Martini Luther alikuwa ni kasisi wa Kikatoliki na alikuwa ni profesa katika seminari moja ya kitheolojia. Kwa kuwa

alikuwa na uwezo wa kulisoma Agano la Kale na Agano Jipya katika lugha zake za asili yaani Kiebrania na Kiyunani, ndio maana aliweza kutambua kwa kulisoma Neno la Mungu kuwa imani yake haikuwa sahihi. Kabla ya hapo Luther alikuwa anajaribu kuupata wokovu wake kwa kuitegemea toba yake na matendo mema. Luther alikuwa akizitubia dhambi zake alizokuwa amezitenda hapa duniani kwa kupanda na kushuka ngazi kwa magoti, lakini hatimaye alifikia hatua ya kutambua kuwa alikuwa na makosa makubwa katika maisha yake ya kiimani. Mwishowe imani yake ilimfanya aweze kutoka katika dini ya ulimwengu na kisha kuangukia katika dini nyingine aliyokuwa amejitengenezea yeye mwenyewe.

Wakristo wa leo hii pamoja na kumwamini Yesu kuwa ni Mwokozi wao, baso wanaendelea kujaribu kuzisafisha dhambi zao kwa kufanya sala za toba kwa Mungu kila siku. Na baadhi yao wanafikiri kuwa wamepokea msamaha wa dhambi zao kutokana na kufunga kwa ajili ya hizo dhambi. Wanapokuwa wakizifanya sala za toba, basi wanapopata hisia hufikiria hivi, “Bwana amezisamehe dhambi zangu.” Na baada ya kujiaminisha kuwa Bwana ameziondolea mbali dhambi zao, huanza kumsifu Mungu kwa kuimba hivi, “♪ Katika neema ya Yesu! Nimeokolewa, nilipotea dhambini!♪ Nilikuwa kipofu rohoni, bali sasa ninaona.” Hata hivyo, ni hakika kuwa dhambi zao hazikuondolewa bali ni hisia zao binafsi tu ambazo zinawafanya waone kuwa wamesamehewa.

Katika kipindi hiki cha Agano Jipya, kuamini kuwa mtu anaweza kuziosha dhambi zake kwa kufanya sala zake binafsi za toba ni imani yenye makosa makubwa. Imani ya jinsi hiyo ipo tofauti sana na imani inayoamini katika injili ya maji na Roho, na imani ya jinsi hiyo inatokana na mawazo binafsi ya mwanadamu. Kwa kuwa imani ya jinsi hiyo haijatoka kwa wale walio na Roho Mtakatifu, basi ni hakika kuwa imani hiyo

imetoka kwa Ibilisi, na ni imani ya uongo. Tunapaswa kutambua kuwa fikra inayodai kuwa tunaoshwa dhambi zetu kwa kupitia sala zetu binafsi za toba haikutoka kwa Yesu Kristo, bali ilitoka katika fikra na mawazo ya kibinadamu. Pia tunapaswa kutambua kuwa ikiwa watu wanaamini kuwa wanaweza kuziosha dhambi zao kwa kupitia sala zao binafsi za toba, basi ni hakika kuwa watu hao hawataweza kuziosha dhambi zao zote.

Ni mara ngapi Ibilisi anawadanganya watu? Kwa kweli Ibilisi ni mwovu kabisa, kwa kuwa anawaongoza watu kuangukia katika mitego yake miovu ambayo imeundwa kutokana na mawazo potofu ya mwanadamu. Kwa upande mwingine, ni kwa kiasi gani watumishi wa Mungu wamekuhubiria Ukweli wa injili ya maji na Roho, huku wakikusaidia kuuamini Ukweli huo? Hawa watu wanaokuhubiria Ukweli huo ni watumishi wa Mungu wanaoihubiri injili ya maji na Roho, na ni watu wema.

Injili ya maji na Roho ni Ukweli halisi wa wokovu. Injili hii inaeleza kuwa Yesu amezitoweshea mbali dhambi zetu zote mara moja na kwa wote kwa kubatizwa na kwa kufa Msalabani takribani miaka 200 iliyopita. Ni akina nani wanaoamini hivi? Ni sisi ndio tunaoamini hivyo. Kwa kweli tunazipitisha dhambi zetu kwenda katika mwili wa Yesu Kristo kwa imani yetu, pia sisi tumezaliwa tena upya kwa imani. Bwana ameziondolea mbali dhambi zote za ulimwengu mara moja na kwa wote kwa kubatizwa na kwa kuimwaga damu yake kwa ajili ya dhambi zetu—sisi tunaamini hivi.

Ni muhimu sana kwako kuutambua Ukweli wa injili ya maji na Roho. Ndugu waamini wenzangu, je, tumepata uamsho kutokana na injili ya maji na Roho? Je, dhambi zako zinaendelea kutoweshwa hata sasa, au Bwana alikwisha zitoweshea mbali dhambi zenu zamani sana kwa kupitia injili

ya maji na Roho? Bwana wetu alikwisha fanya hivyo muda mrefu uliopita kwa kupitia ubatizo wake na damu yake aliyoimwaga. Kwa kuwa Bwana mwenyewe alikwisha zitoweshea mbali dhambi zetu mara moja na kwa wote waka kupitia Ukweli wa injili ya maji na Roho muda mrefu uliopita, basi sisi tunaweza kupumzika kwa amani. Ikiwa tutapokea ondoleo la dhambi zetu kila siku si tutakuwa ni watu tusio salama?

Hebu uangalie Ukweli wa injili ulivyo mkamilifu. Upendo wenye nguvu wa Bwana wetu uliileta injili hii kwetu: Zaidi ya miaka 2,000 iliyopita, Bwana wetu alikuja hapa duniani; alipofikisha umri wa miaka 30, Yesu alizichukua dhambi za ulimwengu katika mwili wake kwa kubatizwa na Yohana; na alipofikisha umri wa miaka 33 Yesu aliutoa mwili wake kwa Mungu Baba kwa kufa Msalabani; hivyo Yesu amezichukulia mbali dhambi zetu na ametuokoa toka katika dhambi zote sisi tunaoni injili ya maji na Roho.

Kutokana na ukweli huu si dhahiri kuwa Yesu ana nguvu na mamlaka makuu? Injili ya maji na Roho iliyotimizwa kwa nguvu za Yesu Kristo ni wokovu wetu mkamilifu. Hebu angalia jinsi mambo aliyoyafanya Yesu ambavyo bado yana nguvu hadi leo hii—hebu angalia miaka 2000 iliyopita jinsi alivyobatizwa na Yohana katika Mto Yordani na jinsi alivyoimwaga damu yake Msalabani kwa ajili ya kutuokoa. Nguvu ya wokovu ambayo Yesu ameitumia kutuokoa ni injili ya maji na Roho, na nguvu hiyo itabakia kuwa imara na yenye nguvu milele kwa wale wote wanaomwamini.

Neno la Mungu lina nguvu sana na ni la milele. Wakati Bwana alipoziumba mbingu na nchi alisema hivi “Iwe nuru; ikawa nuru.” Kila kitu katika ulimwengu huu kiliumbwa na Neno la Mungu sawasawa na jinsi alivyoamuru. Kila kiumbe kiliumbwa kwa namna hiyo na kikawa nafsi hai na kikaendelea

na majukumu yake kwa mujibu wa Neno la Mungu. Vivyo hivyo, Neno la Mungu lipo hai na lina nguvu (Waebrania 4:12). Kama vile Bwana alivyosema katika Mathayo 5:18, *“Kwa maana, amin, nawaambia, Mpaka mbingu na nchi zitakapoondoka, yodi moja wala nukta moja ya torati haitaondoka, hata yote yatimie,”* kwa hakika nguvu za Mungu hazina ukomo kamwe. Neno la injili linaloeleza uwa Bwana ametuokoa toka katika dhambi zetu lina nguvu sana na linaweza kuzisafisha dhambi za ulimwengu kikamilifu. Nguvu ya Neno la injili ipo hai kwa kila anayeamini, na iko hivyo ili kila anayeumini Ukweli huu wa injili aweze kupokea ondoleo la dhambi zake mara moja.

Kwa kuwa tunataka kulifuata hili Neno lilizungumzwa na Bwana, ndio maana tunawaeleza wengine juu ya injili ya maji na Roho na tunaieleza injili hiyo ulimwenguni kote. Tunaona kuwa baada ya watu wengi kuvisoma vitabu vyetu na kisha kupokea ondoleo la dhambi zao, basi kwa sasa wanataka kufanya kazi pamoja nasi kwa moyo mmoja. Injili ya maji na Roho ya Bwana ina nguvu sana na kitu ambacho tumekuwda tukikifanya ni kuzihubiri kazi za ukombozi ambazo kwa hizo Bwana ametuokoa toka katika dhambi; pia hata wale ambao tumekuwa tukiwahubiria kwa kupitia huduma yetu ya maandiko na ambao hatujaweza kuonana nao uso kwa uso wanaendelea kutushukuru kwa kuwahubiria Ukweli huu ambao umewawezesha kuokolewa. Kwa kweli jambo hili ni la kufurahisha na la ajabu kwetu sisi. Kwa kweli ninapoona jinsi Mungu anavyofanya kazi ndani yetu, kwa kweli ninazifu nguvu zake na kumshukuru zaidi na zaidi.

Kuna nchi nyingi hapa ulimwenguni ambazo hata majina yake hatujawahi kuyasikia. Lakini hata katika nchi kama hizo, kuna watu wengi wanaotutumia shuhuda zao za wokovu wakitueleza kuwa, “Nilivisoma vitabu ulivyonitumia, kwa

kweli ninashukuru sana kwa ajili ya vitabu hivi, nimepokea ondoleo ladhambi zangu zote.” Je, hiyo nguvu ni nani? Ni nguvu zetu? Au ni nguvu ya Kristo? Kwa hakika hiyo ni nguvu ya Kristo. Kwa kuwa Yesu Kristo ana nguvu sana ndio maana karama yake ambayo imezitoweshea mbali dhambi zote takribani miaka 2000 iliyopita bado ina nguvu hadi leo hii. Kama ambavyo nguvu yake iliweza kutufikia wewe na mimi vivyo hivyo nguvu iyo hiyo imeweza kumfikia kila mtu ulimwenguni kote.

Je, Yesu amezitoweshea mbali dhambi zako au la? Kwa hakika Bwana amezitoweshea mbali dhambi zako zote kikamilifu. Hivyo, wakati ninapofikiria jinsi ambavyo dhambi zangu zimetoweka, basi huwa nakosa la kufanya zaidi ya kutabasamu. Ninajisikia furaha sana kila ninapofikiria jinsi ambavyo Bwana amezitoweshea mbali dhambi zangu zote zilizo katika mwili na katika moyo kiasi cha kuzifanya zikawa nyepesi kama pamba, na zikawa nyepesi pia kama mbegu za mti wa sederera zikiwa na uwezo wa kuelea angani ulimwenguni kote. Inapofikia hapo huwa ninajawa na furaha sana katika moyo wangu.

Bwana wetu ametuokoa toka katika dhambi za ulimwengu kikamilifu sana. Ndio maana hatuwezi kuacha kumtukuza Bwana pamoja na ijili yake ya maji na Roho ambayo ametupatia. Kwa hakika sisi sote tunasukumwa kumsifu Bwana na injili ya maji na Roho, na pia tunasukumwa kuihubiri ijili hii ya kweli ambayo imetukomboza toka katika kipindi hiki kiovu.

Wakati wana wa Israeli walipoondoka Misri, kituo chao kikuu walichokuwa wakikiendea ilikuwa ni nchi ya Kanani. Haijalishi namna Waisraeli walivyoweza kufanikiwa katika nchi ya ugeni bado walipaswa kurejea katika nchi yao, na baada ya kuingia katika nchi ya Kanani hawakuweza kurejea tena katika nchi ya ugenini walikokuwa wakiishi. Vivyo hivyo,

sisi wenye haki hatuwezi kuirudia zama ya kale yaani wakati kabla hatujazaliwa tena upya. Kwa kuwa kile ambacho Kristo amekifanya kwa ajili yetu ni kikubwa sana, basi mimi ninaamini kuwa tunapaswa kumfuata Roho Mtakatifu na kuihubiri injili ya maji na Roho ambayo inawaokoa watu walio kipofu kiroho.

Mungu ametupatia uwezo na hekima ya kuitenda kazi yake. Ndugu waamini wenzangu, je, mnaamini kuwa Mungu ametupatia nguvu na hekima? Kwa kuwa Mungu ametupatia nguvu zake, basi ni muhimu sana kwetu sisi kuitumia nguvu hii ya Mungu. Kama vile Mtume Paulo alivyosema kuwa Kristo aliutoa mwili wake ili kutukomboza toka katika kipindi hiki kiovu, ni wazi kuwa bwana wetu alitupatia mwili wake, akazichukua dhambi zetu katika mwiliw ake muda mrefu uliopita kwa kupitia ubatizo wake, kisha akazitoweshea dhambi zetu zote kikamilifu kwa kuimwaga damu yake. Hivyo, ni haki kwetu sisi kuitoa miili yetu kama shukrani kwa kile ambacho Kristo amekifanya kwa ajili yetu na pia tunapaswa kumshukuru Yeye kwa dhati. Kwa kweli tunaushukuru upendo wa Bwana, na tunamshukuru Bwana zaidi kwa kutuwezesha kuueneza upendo huu.

Kama nisingeliipata injili ya maji na Roho, ni hakika kuwa maisha yangu katika ulimwengu huu yangeliishia kwenye utupu. Hata kama ningelikuwa ni mchungaji ninayewahubiria watu kuishi maisha mema, ningewezaje basi kusema kuwa ninaitenda kazi ya Mungu pasipo kuifahamu injili ya maji na Roho? Ikiwa mimi mwenyewe ningelikuwa sijaipata injili ya maji na Roho na hivyo nikashindwa kupokea ondoleo la dhambi zangu, ningeliwezaje basi kulishuhudia Neno la wokovu kwa watu wengine?

Hivyo, nilitafakari juu ya hali yangu binafsi ya kiroho. Swali langu la kwanza lilikuwa, “Je, Mungu ameniita kama

mchungaji na kunikabidhi huduma yake?” Nilipokuwa nikilitafakari swali hili mbele za Mungu na mbele ya dhamiri yangu, nilitambua kuwa Mungu hajaniita mimi kwa namna ile. Kama hali ingekuwa hivyo, ni hakika kuwa msukumo wa mimi kuwa mchungaji ungelikuwa ni kujiinua mimi mwenyewe. Kama vile Biblia inavyosema, “Bwana asipojenga nyumba, waijengao wafanya kazi bure,” kwa sababu hiyo ile fikra ya kuwa nitawafundisha wengine wakati mimi mwenyewe sijapokea ondoleo la dhambi zangu ilikuwa ni sawa na kufanya kazi bure. Na pia ilionekana kwangu mimi kuwa ni ufisadi. Ni kweli kuwa nilikuwa nikimwamini Yesu kuwa ni Mwokozi wangu, lakini nilipofikiria ikiwa Mungu ameniinua kuwa mchungaji, kwa kweli sikuliona hilo ndani yangu.

Baada hapo nikamwomba Mungu huku nikiutafuta Ukweli halisi wa wokovu ili niweze kulishughulikia tatizo la dhambi zangu na dhambi za waumini wenzangu pia, ili hatimaye niweze kuishi kwa mujibu wa mapenzi ya Mungu. Ni wakati huo ndipo Bwana aliponijia kupitia hili Neno la injili ya maji na Roho. Nilipokuwa nikisoma Mathayo 3:13-17, niliamshwa kwa kuufahamu Ukweli. Kwa maneno mengine niliweza kuutambua Ukweli wa injili ya maji na Roho kwa kupitia Neno la Mungu.

Baada ya kuupata ufahamu huo, nilijiona nina nguvu na msukumo wa kuihubiri injili ya maji na Roho kwa kila mtu hapa ulimwenguni. Na nikaamua mbele za Mungu kuieneza injili ya maji na Roho ulimwenguni kote. Nilimwomba Mungu kwa juhudi, “Mungu ninaomba uniruhusu kuieneza injili ya maji na Roho hadi miisho ya ulimwengu. Ninaomba unisaidie Bwana. Sina chochote, lakini ninataka kuihubiri injili yako ya maji na Roho ulimwenguni kote.” Hatimaye Mungu alinisaidia. Nilitaka kuyafuta mapenzi ya Mungu na Mungu akanisaidia kufanya hilo liwezekane na nikaweza kuihubiri Neno la injili

ya maji na Roho kwenu na kwa wengine.

Kuanzia wakati huo nilijitoa kwa kila kitu ili kuieneza injili ya maji na Roho huku nikiyafuta mapenzi ya Mungu. Kwa kweli nimejaribu kwa jitihada zangu zote kuyatii mapenzi ya Mungu hadi Mungu akanitia nguvu. Lakini katika zile ziku za kale, sikuwa na kitu lakini pamoja na hayo niliendelea kuihubiri injili ya maji na Roho kwa kila mtu niliyekutana naye. Kama ningelikutana na wewe katika mitaa wakati huo, basi ningekuandikia jambo fulani kwenye ardhi ili kukuhubiria injili ya maji na Roho kwako.

Ndugu waamini wenzangu, wakati nilipokuwa nikiihubiri injili wakati huo, ukweli ni kuwa kama ungelikuwa katika hali niliyokuwa nayo mimi wakati huo, ni hakika kuwa hata wewe ungelinihubiria injili kama mimi nilivyokuwa nikifanya. Sasa, sisi sote ni lazima tuungane pamoja ili kuieneza injili ya maji na Roho kwa watu ulimwenguni kote. Tunawezaje kumfuata Bwana ikiwa hatutaiweka imani yetu katika injili ya maji na Roho? Kwa kweli sisi sote tunaweza kumfuata Bwana kwa kuwa tunaamini katika injili ya maji na Roho. Pia sisi tunaishi kwa ajili ya mema ya kila mtu hapa ulimwenguni kwa sababu ya injili ya maji na Roho.

Mungu ametufanya sisi waamini wa injili ya maji na Roho tuweze kuihubiri injili yake ulimwenguni kote, tunawezeshwa kufanya hivyo kwa nguvu ya injili hii. Ikiwa hatutaihubiri injili ya maji na Roho wakati huu, basi ni hakika kuwa hatutaweza kuishi kwa haki. Ikiwa hautaamini kuwa Kristo amezitoweshea mbali dhambi zetu zote, je, si itakuwa vigumu kwako wewe kuishi kwa ajili ya manufaa ya watu wengine?

Kwa hakika, Mungu ameturuhusu kuamini injili ya maji na Roho na kuitenda kazi yake, hivyo ninamshukuru sana Mungu kwa jambo hili. Kwa kweli sisi sote tunamshukuru sana Mungu. Mungu ametupatia furaha hii ya kuitenda kazi yake ya

haki kila siku na kisha kuishi maisha yetu milele kwa manufaa ya watu wengine. Je, mnafurahia kumtumikia Bwana? Kwa kweli ni raha isiyo ya kawaida.

Ndugu waamini wenzangu, ingawa kuitenda kazi hii kunaweza kuwa ni kugumu, je, si jambo la kufurahisha kumtumikia Bwana? Hii ndio sababu tunazitumikia kazi zinazoieneza injili ya maji na Roho kwa hiari yetu. Je, si ni jambo la kufurahisha kuona watu wakiusikia Ukweli wa injili kupitia sisi na wakipata faida kutokana na juhudi yetu ya kuifuata injili ya maji na Roho. Je, hali haiko hivyo? Kwa kweli hali iko hivyo. Kwa kuwa tunawaleta watu furaha katika injili ya maji na Roho, basi sisi nasi tunapata furaha zaidi. Sisi tunaifanya kazi ya Mungu hapa duniani. Hatuifanyi kazi yetu binafsi itokanayo na matendo yetu ya kimwili, bali tunaitenda kazi ya Bwana, na tunafanya yale ambayo yanaziokoa nafsi za watu wengine, na ndio maana tuna furaha sana kwa kuwa kazi yetu ni yenye thamani sana.

Kwa kuwa Bwana wetu alizitenda kazi zinazowakoa watu, sisi wanafunzi wake pia tunaifanya kazi ambayo inawasaidia watu wengine kuokolewa. Tunapojitoa kwa ajili ya kazi ya Mungu, hapo ndipo furaha ya kiroho inapomiminika kwa wingi katika maisha yetu. Kwa kweli ni jambo jema sana kwetu sisi kuitumikia injili ya maji na Roho. Ingawa si rahisi sana kuitumikia injili ya maji na Roho, ukweli ni kuwa kuna furaha sana tunayoipata kutokana na kazi hii.

Nina furaha sana. Ninafurahia sana kila ninapoitafakari kazi ya Mungu ambayo tunaitekeleza. Mungu ameturuhusu wanadamu wenye mapungufu kama sisi kuitumikia injili ya maji na Roho, na Mungu anayatekeleza mapenzi yake kupitia sisi. Basi tunapoyaona haya yote tunakuwa hatuna kitu cha kufanya zaidi ya kutoa shukrani zetu za dhati kwa Mungu.

Kila ninapomwona mtu yeyote yule aliyepokea ondoleo la

dhambi zake, basi huwa ninapata furaha sana. Nina furaha sana kwa sababu ninaona ni kana kwamba tumepata kitu chenye radha nzuri katika mioyo yetu, ni kama vile tunda zuri lenye radha linavyoning'inia katika mti wenye hewa nzuri huku likiimba kwa furaha. Nina hakika kuwa hata ninyi mna furaha kama hiyo.

Wale wanaomwamini Yesu Kristo kuwa ni Mwokozi wako na wanaomfuata Kristo wanaishi kwa furaha kwa ajli ya kuzitumikia nafsi za watu wengine. Na kitendo cha kumtumikia Bwana kwa namna hiyo ndicho kiletacho furaha. Kwa kweli ni jambo linalotia moyo kumtumikia Bwana, na kwa kuwa tunafanya kile ambacho ni chenye haki, basi sisi sote tuna furaha sana. Tulipokuwa tukikua toka utotoni, mtakumbuka jinsi tulivyokuwa tukielezwa kutokuwa wabinafsi bali tuwe waungwana, mimi ninaamini kuwa haya maisha ya kiroho tunayoishi kwa ajili ya Bwana na kwa ajili ya nafsi za watu wengine ndio maisha yanayoonyesha roho ya kiungwana.

Yeyote yule aliyezaliwa tena upya ni lazima aishi maisha yanayowanufaisha wengine hadi siku ile kila mtu atakapoiamini injili ya maji na Roho. Kwa kweli sisi tunaitoa miili yetu kwa Mungu Baba na kwa ajili ya injili ya maji na Roho, na tunaishi maisha yetu huku tukieneza nguvu ya injili ambayo imetuokoa sisi toka katika dhambi zetu zote. Kwa hakika tunaishi maisha yenye thamani sana mbele za Mungu.

Ndio maana tunataka kumwambia Mungu jinsi tulivyo na furaha na jinsi tunavyomshukuru Mungu. Mungu ameturuhusu kuishi aina ya maisha yanayoitumikia injili ya maji na Roho.

Sisi waamini wa Neno la injili ya maji na Roho tunamshukuru Mungu kwa kutupatia imani inayoweza kuzishinda dhambi za ulimwengu huu.

Haleluya! ☒

Hakuna Injili Nyingine Zaidi ya Injili ya Maji na Roho

< Wagalatia 1:6-10 >

“Nastaajabu kwa kuwa mnamwacha upesi hivi yeye aliyewaita katika neema ya Kristo, na kugeukia injili ya namna nyingine. Wala si nyingine; lakini wapo watu wawataabishao na kutaka kuigeuza injili ya Kristo. Lakini iwapokuwa sisi au malaika wa mbinguni atawahubiri ninyi injili yo yote isipokuwa hiyo tuliyowahubiri, na alaaniwe. Kama tulivyotangulia kusema, na sasa, nasema tena, mtu awaye yote akiwahubiri ninyi injili yo yote isipokuwa hiyo mliyoipokea, na alaaniwe.

Maana, sasa je! Ni wanadamu ninaowashawishi, au Mungu? Au nataka kuwapendeza wanadamu? Kama ningekuwa hata sasa nawapendeza wanadamu, singekuwa mtumwa wa Kristo.”

Katika kifungu cha leo cha Maandiko, Mtume Paulo aliwaambia watakatifu wa makanisa ya Galatia kuwa aliwashangaa jinsi walivyokuwa wakigeuka na kuiacha injili ya maji na Roho, injili ambayo iliwaongoza kuipata neema ya Kristo, huku wakiifuata injili nyingine iliyo tofauti. Pia alitaja kuwa hakuna injili nyingine zaidi ya injili ya maji na Roho, na akasema kuwa yeyote anayeifuata injili nyingine mbali na injili

hii ya kweli atalaaniwa. Injili nyingine ambayo Mtume Paulo aliingolea ilikuwa ni mafundisho ya uongo yaliyokuwa yakipigiwa debe na kutetewa na wanatohara wakati huo, mafundisho haya yalidai kuwa yeyote anayekuwa mtu wa Mungu ni lazima kwanza atahiriwe kimwili.

Ni hakika kuwa mtu anaweza kupokea ondoleo la kweli la dhambi ikiwa tu anaifahamu vizuri na anaiamini kwa moyo wake wote injili ya maji na Roho ambayo Mungu ametupatia. Hata hivyo, katika kipindi cha Kanisa la Mwanzo, Wayahudi Wakristo ambao walikuwa wameongoka kutoka katika imani ya Kiyahudi walijaribu kuieneza imani ya kisheria katika Kanisa la Mungu. Kwa maneno mengine, walidai kuwa hata kama watu wanamwamini Yesu, ni lazima pia watahiriwe kimwili ili waweze kuwa watu wa Mungu. Kwa matokeo hayo, watakatifu wetu waliiacha injili ya maji na Roho na wakayafuata hayo mafundisho potofu ambayo hatimaye yaliwafanya waangukie katika kifo cha kiroho.

Hali kama hiyo ya kuhuzunisha imekua ikijirudia katika Ukristo wa leo. Desturi ya imani ya kisheria ya wanatohara wa kipindi cha Kanisa la Mwanzo imeendelea kupokezana hadi leo hii, na imewafanya watu wengi wajikwae kwa injili nyingine iliyotofauti inayoitwa fundisho la toba. Katika Ukristo wa leo hii, injili nyingine mbali na injili ya maji na Roho ambayo Paulo aliihubiri, ni fundisho la kidini la sala za toba ambalo limewafanya watu wengi waangukie katika kifo cha kiroho.

Je, fundisho la sala za toba, ambalo ni moja kati ya mafundisho ya kiothodoksi katika mkondo mkuu wa Ukristo linasemaje? Fundisho hili linadai kuwa “Yeyote anayeiamini damu ya Yesu pale Msalabani amekwisha ondolewa dhambi zake zilizopita, lakini dhambi anazozifanya baada ya kuwa ameshamwamini Yesu zinasamehewa kila anapozifanya sala za toba.” Hata hivyo, mafundisho kama hayo si kitu bali ndo ile

“injili nyingine” ambayo ipo kinyume na mbali na ukweli wa injili ya kweli iliyoandikwa katika Biblia, yaani injili ya maji na Roho.

Lakini pamoja na ukweli huu, kwa kuwa injili hii nyingine imekwisha hamasishwa sana na Ukristo ulimwenguni kote, Wakristo wengi wanaiamini kuwa ni injili ya kweli, na wanaendelea kuishi maisha yao ya kiimani hali wakiwa wanazitegemea sala zao za toba za kila siku. Lakini jambo la kuzingatia hapa ni kuwa, kwa kuwa watu hao hajaisikia injili halisi ya maji na Roho, basi ndio maana hawafahamu kuwa ile injili wanayoiamini—yaani injili ya damu ya Msalaba pekee na fundisho la toba—kuwa ndio injili nyingine na iliyo tofauti. Hata hivyo, injili yoyote ile inayouacha ubatizo wa Yesu ambao aliupokea toka kwa Yohana na inayohamasisha juu ya damu ya Msalaba pekee kuwa ndio tendo la wokovu, basi hiyo ndiyo injili nyingine na iliyotofauti.

Je, inawezekana kuna injili ya kweli zaidi ya moja ambayo Bwana amewapatia wanadamu? Kama kungelikuwa na injili nyingine kadhaa ambazo tumepewa, basi hapo ingelikuwa sahihi kwetu sisi kuiamini injili kamilifu ya maji na Roho au hizo injili nyingine. Hata hivyo, haiwezekani kukawepo na injili zaidi ya moja ambazo zimewaokoa wanadamu. Hakuna injili nyingine iliyotolewa na Mungu kupitia Neno lake zaidi ya injili ya maji na Roho.

Hata hivyo, watu wamekuwa wakiamini kwa muda mrefu pasipo kuutambua ukweli huu, huku wakifikiri kuwa injili nyingine pia in injili ya kweli, na ndio maana wanapokutana na injili ya kweli, yaani injili ya maji na Roho wanaishangaa na kuiona kuwa ni ya ajabu na hivyo wanashindwa kuipokea. Pamoja na hayo ukweli ni kuwa Mungu hajatupatia wanadamu injili nyingine zaidi ya injili ya maji na Roho. Hivyo, ni lazima ukumbuke kuwa injili nyingine zote mbali na injili ya maji na

Roho ni injili za uongo. Pia ni lazima mtambue kuwa mnaweza kupokea ondoleo la dhambi zenu zote na kisha kufanyika wana wa Mungu ikiwa tu mtaifahamu na kuiamini injili hii ya kweli. Kwa hakika hakuna injili nyingine ya kweli zaidi ya injili ya maji na Roho.

Unawaza Nini Kuhusiana na Jambo Hili?

Katika kipindi cha Mtume Paulo, kulikuwa na baadhi ya makundi ya waamini walioitwa wanatohara. Watu hawa walidai kuwa hata kama watu wangempokea Yesu kuwa ni Mwokozi wao, watu hayo wangeliveza kuwa watu wa Mungu wakamilifu ikiwa tu wangelipokea pia tohara ya kimwili.

Imani kama hiyo ya kisheria bado inapatikana katika Ukristo wa leo, na inajidhihirisha kwa wale ambao bado wanalishikilia fundisho la toba. Wao wanaamini kuwa ingawa wamempokea Yesu kuwa ni Mwokozi wao, dhambi zao za kila siku zinaweza kuondolewa ikiwa watafanya sala za toba. Kwa kweli watu wote wa jinsi hiyo wanaamini injili nyingine iliyo tofauti.

Je, unawaza nini kuhusiana na jambo hili? Wakristo siku hizi wanasema kuwa wanaoshwa dhambi zao kwa kufanya sala zao za toba, je, unaweza kusema kuwa wale wanaoliamini fundisho hili wana imani ya kweli? Je, ni kweli kuwa dhambi zako zinaoshelewa mbali ikiwa utafanya sala za toba? Hapana, kwa kweli hilo haliwezekani! Wale wote ambao wamempokea Yesu kuwa ni Mwokozi wao kwa kuiamini damu ya Msalaba pekee, na ambao wamekuwa wakizifanya sala za toba kwa muda mrefu itafikia wakati watatambua kuwa dhambi zao hazikuondolewa kwa kupitia sala zao zatoba.

Kwa upande mwingine, ikiwa mtu anaiamini injili ya maji

na Roho ambayo Mungu ametupatia, basi ni hakika kuwa mtu huyo ataondolewa dhambi zake mara moja, hii ni kwa sababu Ukweli huu wa injili umejazwa na kazi kamilifu ya wokovu ya Yesu Kristo. Yesu, ambaye ni Mwana pekee wa Mungu alikuja hapa duniani kwa ajili ya wokovu wetu; alizipokea dhambi zote za ulimwengu kwa kubatizwa na Yohana; akazibeba hizo dhambi hadi Msalabani ambapo aliimwaga damu yake ya ukombozi; na kwa sababu hiyo amewaokoa wale wote wanaoziamini kazi zake toka katika dhambi zao mara moja na kwa wote. Hii ndio injili halisi ya maji na Roho. Hivyo ikiwa mtu yeyote yule anaiamini injili hii halisi, basi mtu huyo ataondolewa dhambi zake zote, atafanywa kuwa mwenye haki, na atafanyika kuwa mwana wa Mungu. Kwa hiyo, ikiwa umempokea Yesu kuwa ni Mwokozi wako kwa kuamini damu ya Msalaba pekee, na ikiwa unajaribu kusamehewa dhambi zako za kila siku kwa kupitia sala zako binafsi za toba, basi unapaswa kutambua kuwa imani yako ni imani potofu.

Je, Umekufa Pamoja na Yesu Kristo na Kufufuliwa Toka Kwa Wafu Pamoja na Yesu Kristo?

Katika Wagalatia 3:27 Mtume Paulo anasema hivi, *“Maana ninyi nyote mliobatizwa katika Kristo mmemvaa Kristo.”* Pia Mtume Paulo aliikiri imani yake kwa kusema hivi, *“Nimesulibiwa pamoja na Kristo; lakini ni hai; wala si mimi tena, bali Kristo yu hai ndani yangu; na uhai nilio nao sasa katika mwili, ninao katika imani ya Mwana wa Mungu, ambaye alinipenda, akajitoa nafsi yake kwa ajili yangu”* (Wagalatia 2:20).

Vifungu hivi vinaonyesha kuwa Paulo aliamini injili ya maji na Roho, injili ambayo inaeleza kuwa wakati Yesu

alipokuja hapa duniani, alizichukua dhambi katika mwili wake dhambi zote za mwanadamu kwa kubatizwa na Yohana Mbatizaji, alisulubiwa hadi kifo, kisha akafufuka toka kwa wafu, na kwa sababu hiyo ametuokoa sisi sote mara moja toka katika dhambi zetu na adhabu ya dhambi. Kwa kuwa Paulo alikuwa anauamini ubatizo wa Yesu ndio maana nafsi yake ya kale iliweza kufa pamoja na Yesu na hivyo akaweza kuzaliwa tena upya kama kiumbe kipya. Mtume Paulo aliweza kubatizwa na Yesu Kristo na kisha kufa pamoja naye kwa kupitia imani yake. Na kwa imani hiyo hiyo Paulo aliweza kufufuliwa pamoja na Yesu.

Mtume Paulo aliweza kuungana na Kristo kutokana na imani yake iliyoamini kile ambacho Yesu Kristo alikuwa amekifanya hapa duniani kwa ukamilifu wake. Hivyo, ni lazima ninyi nanyi muwe na imani aliyokuwa nayo Mtume Paulo. Sisi nasi, ni lazima tukumbuke kuwa tunapouamini ubatizo wa Yesu alioupokea toka kwa Yohana Mbatizaji katika Mto Yordani kuwa ndio ubatizo ambao ulimwezesha Kristo kuzibeba dhambi zetu zote na madhaifu yetu, basi hapo ndipo nafsi zetu za kale zinapokufa Msalabani na kuzikwa zikiwa zimeunganishwa na Yesu. Kwa lugha tofauti, ikiwa hauuamini ubatizo wa Yesu, basi ni hakika kuwa kifo cha Yesu Msalabani kitakuwa hakina manufaa yoyote kwako.

Mtume Paulo aliweza kuungana na Yesu Kristo na kisha kuihubiri injili hii ulimwenguni kote kwa kuwa aliamini injili ya maji na Roho. Imani ya jinsi hii haikuwa tu kwa Mtume Paulo bali hata Mtume Yohana aliikiri imani ya jinsi hii. Mtume Yohana alisema Yesu Kristo alikuja hapa duniani kwa maji, damu, na kwa Roho. Yohana alisema hivi, *“Kwa maana wako watatu washuhudiao mbinguni, Baba, na Neno, na Roho Mtakatifu, na watatu hawa ni umoja”* (1 Yohana 5:8). Yohana aliamini kuwa ingawa Yesu Mwenyewe alikuwa ni Mungu wa

kweli, Yesu alikuja hapa duniani akafanyika mwili wa mwanadamu kwa ajili ya wokovu wetu (ambao ni ushuhuda wa Roho Mtakatifu), akazichukua dhambi zetu katika mwili wake wakati alipobatizwa (ushuhuda wa maji), na akazipatanisha hizo dhambi zetu zote kwa damu yake Msalabani (ushuhuda wa damu).

Mtume Petro pia aliuamini ubatizo wa Yesu kuwa ni mfano wa wokovu (1 Petro 3:21). Vivyo hivyo, mitume wote na wanafunzi wake waliiamini injili ya maji na Roho, ambayo ni injili ya Ukweli halisi. Hata hivyo, wakat wale waliokuwa wanaihubiri injili nyingine walipokuja katika makanisa ya Galatia, basi ilimbidi Paulo ailinde imani ya watakatifu waliokuwa wakiiamini injili ya kweli.

Hata Sasa Ni Lazima Uiamini Injili ya Maji na Roho

Kwa sasa Wakristo wengi wanaiamini injili nyingine. Hawaifahamu injili ya maji na Roho kuwa ndio injili pekee ya kweli. Wao wanafikiria kuwa damu ya Yesu pale Msalabani pekee ndio injili ya kweli. Lakini injili hiyo wanayoiamini ni injili nusu, na ni injili nyingine. Ikiwa wanaitegemea injili kama hiyo ni hakika kuwa hawawezi kubatizwa katika Yesu Kristo, na wala hawawezi kuyavaa mavazi ya haki ya Bwana. Imani inayoamini kuwa watu wanaweza kwa kiasi fulani kupokea ondoleo la dhambi zao ikiwa watamwamini Yesu na kisha kufanya sala za toba si imani inayowawezesha kuungana na Yesu Kristo. Aina hii ya imani ni ile inayowaunganisha watu na injili isiyo sahihi na uongo ambayo ni tofauti na injili ya maji na Roho iliyofunuliwa katika Biblia.

Imani inayoungana na Yesu Kristo ni ile inayoamini kuwa

dhambi zote za mwanadamu zilipitishwa kwenda kwa Yesu na kisha akazitoweshea mbali hizo dhambi mara moja na kwa wote wakati alipobatizwa na Yohana Mbatizaji. Imani hii pia inaamini kuwa kwa kuwa Yesu alikuwa amezibeba dhambi zote za ulimwengu huu mara moja na kwa wote kwa kupitia ubatizo aliupokea toka kwa Yohana ndio maana aliweza kuimwaga damu yake na kufa Msalabani mara moja, na kwamba baada ya hapo Yesu akafufuka toka kwa wafu na hivyo kuwa Mwokozi aliyetukomboza toka katika adhabu ya dhambi zote. Bwana amewapatia ondoleo kamilifu la dhambi na ametoa uzima wa milele mara moja na kwa wote wanaoiamini injili ya maji na Roho kwa mioyo yao yote huku wakiwa wameungana naye.

Hata hivyo, wale wasioiamini injili ya maji na Roho, na badala yake wameiunganisha mioyo yao na injili nyingine watakutana na adhabu ya dhambi zao na wataadhibiwa kutokana na dhambi zao zote. Kwa hiyo, sisi sote ni lazima tuamini katika mambo muhimu ya injili halisi ambayo ni: Ubatizo wa Yesu, kifo chake, na ufufuo wake. Ni kwa kufanya hivyo ndipo tunapoweza kuokolewa toka katika dhambi zetu zote na kisha kufurahia uzima wa milele. Tunaweza kuwa watu wa Mungu ikiwa tu tutaamini injili ya maji na Roho. Na hapo ndipo tunapoweza kumtumikia Bwana katika upya wa Roho (Warumi 7:6), tukiwa wale tuliofufuliwa na kisha kuungana pamoja na Yesu Kristo.

Kwa Sasa Imani Yako Ikoje?

Wiki hii ni Wiki ya Mateso. Hivyo Wakristo wanatumia muda wao kuyakumbuka mateso ambayo Yesu aliyabeba pale Msalabani huku wakitubu kwa machozi kuhusiana na dhambi

ambazo wamezifanya katika maisha yao. Lakini wanaweza kupokea ondoleo la dhambi zao kwa kuiamini damu ya Msalaba pekee? Ingawa Wakristo wengi wanaamini kuwa wameokolewa kwa kuiamini damu ya Yesu ya msalaba pekee, ukweli ni kuwa Wakristo hao wote bado wanateseka, maana kusema kweli wokovu wao si kitu bali ni wokovu wako wa kinadharia tu, na kwa sababu hiyo dhambi bado ipo katika mioyo yao. Ondoleo la kweli la dhambi halipatikani kwa roho yoyote ile inayoamini ondoleo la dhambi kw akupitia damu ya Msalaba pekee.

Kwa hakika, kwa kuwa wanadamu ni viumbe wenye hisia, basi inawezekana wakajisikia vizuri kisaikolojia baada ya kuwa wamemwomba Mungu ili awasamehe dhambi zao kwa machozi, na wanaweza kujisikia vizuri kwa kuwa wakati wanaomba msamaha walikuwa wakiyafikiria mateso yote ambayo Yesu aliyapitia na kuyavumilia hadi wakati aliposulubiwa hadi kifo. Hata hivyo, hayo ni matokeo ya kipozauongo, na matokeo hayo yanawapotosha kiasi cha kuamini kuwa sala zao zinaweza kuwa ni kitu cha kufidia jambo fulani huku wakifikiria kuwa, “Kwa kuwa nimemwomba Mungu sana, basi nina hakika kuwa Mungu atanisamehe.”

Lakini ni kweli kuwa dhambi zako zilitoweka wakati ulipozifanya sala zako za toba, huku ukiitumainia damu pekee ya Yesu Msalabani? Bila shaka uliyaanza maisha yako ya kiimani kwa kuiamini injili nusu inayodai kuwa Yesu alisulubiwa hadi kifo ili kuzitoweshea mbali dhambi zako. Na pengine tangu wakati huo umekuwa ukiyaaishi maisha yako ya kiimani huku ukifanya sala za toba kwa nguvu kwa nia ya kujaribu kuziosha dhambi zako binafsi. Je, matokeo ya kufanya hivyo yalikuwa ni yapi? Je, mioyo yenu haijabakia kuwa na dhambi ndani yake, yaani kama ilivyokuwa kabla

hujamwamini Yesu?

Kwa kuwa watu wanaiamini damu ya Yesu ya Msalaba pekee badala ya kumwamini Yesu aliyebatizwa na Yohana, basi ndio maana wameshindwa kuupata ushuhuda wa Neno linaloeleza bayana kuwa dhambi zao zilipitishwa kwenda kwa Yesu, na kwa sababu hiyo watu hao wanaendelea kumwamini Yesu bure. Ikiwa unaiamini damu ya Yesu pekee na kisha kuudharau ubatizo, basi uhalisia wa wokovu hauwezi kupatikana.

Wakati Wakristo wa leo hii wanapofanya dhambi, wanajaribu kuziosha dhambi zao kwa kufanya sala za toba, na wanafanya hivyo kwa kuwa wanaiamini injili nyingine. Mtu yeyote anayeiamini injili nyingine badala ya injili ya maji na Roho ni hakika kuwa mtu huyo atalaaniwa na Mungu. Mnapaswa kutambua jinsi imani hiyo ya injili nyingine ilivyo hatari. Bila shaka ninyi wenyewe mnatambua kuwa kitendo cha kuiamini damu ya Msalaba pekee, hakiwezi kumfanya mtu apokee ondoleo la dhambi katika moyo wake. Wale wote walio na imani potofu kama hiyo ni lazima waachane na imani kama hiyo inayoiamini damu ya Msalaba pekee, na badala yake wanapaswa kuipokea katika injili ya maji na Roho iliyotolewa na Bwana katika mioyo yao.

Leo, nilipokuwa nikielekea kanisani kwangu, niliona bango linalosema, “Kanisa la Presbyterian Linalotoa.” Kwa kweli sifahamu kanisa hilo linatoa nini, lakini inawezekana ikaonekana sawa kwa wachungaji kutoa kitu fulani hata kama kitu hicho ni cha kimwili kuliko kuwanyonya waumini wao. Hata hivyo, ni jambo jema kwa Kanisa la Mungu kuwasaidia watu katika masuala ya kimwili kwa muda mfupi. Watumishi wa kweli wa Mungu hawawasaidii watu kuyafikia mahitaji yao ya kimwili tu. Bali wanajaribu kuwaongoza watu ili waweze kufikia hatua ya kuzipata baraka za kiroho.

Kwa upande mwingine, wakati wale wanaoiamini injili ya uongo wanapojitoa kwa ajili ya kazi za kusaidia watu, mara nyingi hufanya hivyo ili waonekane na ili waweze kuihalalisha imani yao potofu. Ndio maana Biblia inasema, *“Wala si ajabu. Maana Shetani mwenyewe hujigeuza awe mfano wa malaika wa nuru. Basi si neno kubwa watumishi wake nao wakijigeuza wawe mfano wa watumishi wa haki, ambao mwisho wao utakuwa sawasawa na kazi zao”* (2 Wakorintho 11:14-15), na inatuonya kuwa makini na matendo mema yaliyojaa unafiki ya manabii wa uongo.

Kwa hiyo, injili ya maji na Roho ni zawadi bora ambayo tunaweza kumpatia kila mwanadamu. Ni lazima tumsaidie kila mtu ili aweze kupokea ondoleo la dhambi kwa imani katika injili ya maji na Roho. Injili iliyoaminiwa na mitume kama vile Paulo na watenda kazi wenzake ilikuwa ni injili halisi ya maji na Roho. Kila mtu ni lazima apokee ondoleo kamilifu la dhambi kwa kuiamini injili ya maji na Roho ambayo ni karama ambayo Bwana wetu ametupatia. Wale ambao walizaliwa tena upya kabla ya wengine wanapaswa kuihubiri injili hii ya kweli kwa wale wasioifahamu na wanapaswa kuendelea kuitumainia injili ya maji na Roho. Kwa kufanya hivyo ndipo watu wengine watakapoiamini injili hii kwa mioyo yao yote na kisha wafanyika kuwa watu wa Mungu. Hivyo, wale ambao wamefanyika kuwa watu wa Mungu kwa kuiamini injili ya maji na Roho ni hakika kuwa wamebarikiwa kimwili na kiroho.

Kumbukumbu la Torati 11:14 inasema hivi, *“Ndipo nitakapowapa mvua ya nchi yenu kwa wakati wake, mvua ya masika, na mvua ya vuli, upate kuvuna nafaka yako, na divai yako, na mafuta yako.”* Kwa kuwa injili ya maji na Roho ilihubiriwa kwa nguvu katika kipindi cha Kanisa la Mwanzo, basi wakati huo Mungu alikuwa ameshaleta mvua za vuli, na

sasa katika kipindi hiki cha mwisho Mungu anatuletea mvua ya masika na anatufanya sisi tuweze kuieneza injili hii ya kweli ulimwenguni kote. Sasa, kila mtu ni lazima aupokee katika moyo wake na auamini Ukweli wa injili ya maji na Roho ambao Mungu ametupatia.

Mtume Paulo alisema kuwa ikiwa mtu yeyote yule ataihubiri injili nyingine zaidi ya injili aliyoihubiri, basi mtu huyo atalaaniwa na Mungu. Haijalishi kuwa mtu huyo ni nani, yeyote anayeihubiri injili nyingine mbali na injili ya maji na Roho basi mtu huyo atalaaniwa na Mungu. Kati ya wachungaji wa siku hizi hapa ulimwenguni, kuna baadhi yao ambao wanasifiwa sana na watu wengi. Hata hivyo, ingawa wachungaji hao wanaweza kuheshimiwa na watu, ukweli ni kuwa ikiwa wanaihubiri injili nyingine mbali na injili ya maji na Roho ambayo Mungu amewapatia wanadamu, basi ni hakika kuwa watalaaniwa na Mungu.

Mchungaji fulani ambaye nilikuwa ninamfahamu alikuwa anakaribia kufa akiwa na miaka 80 na alikuwa ametumia muda mwingi wa maisha yake katika huduma, nikasikia kuwa kutokana na dhambi zilizokuwemo katika moyo wake aliendelea kufanya sala za toba hadi muda wake wa mwisho, na hata wakati alipokuwa akifariki alikuwa akisali hivi, “Bwana nimefanya makosa mengi sana. Tafadhali naomba uzisamehe dhambi zangu zote na umpokee mwenye dhambi huyu.” Je, ni kweli kuwa Bwana aliipokea nafsi yake? Hapana, kwa kweli hapana. Bwana anawaadhibu wale wasioamini katika injili ya maji na Roho na anawatupa katika ziwa la moto la kuzimu.

Bwana anawaeleza watu wa jinsi hiyo kuwa: “Wakati mlipokuwa hai, hamkuwa na jambo la kuhofia na mliishi maisha ya anasa, mliishi kama yule mtu tajiri katika mfano wa Lazaro. Ingawa mioyo yenu ilikuwa na dhambi, ninyi mlikuwa

matajiri kwa kuitegemea haki yenu wenyewe, hamkuitafuta injili ya kweli ambayo ingeliwawezesha kuondolewa dhambi zenu zote, na badala ya kuiamini injili hiyo ya kweli ninyi mliikataa. Sasa mtaulipa mshahara wa dhambi. Na mtaishi milele katika moto huu unaochoma.”

Kwa kuwa watu hawa waliikataa injili ya maji na Roho na wakaendelea kuishi huku wakizitumaini sala za binafsi za toba kuwa ndio ukweli unaoweza kuziosha dhambi zao, basi ni hakika kuwa wanastahili kulaaniwa na Mungu. Haijalishi ikiwa walifanya juhudi kubwa katika kujenga tabia na mwenendo wao, ukweli ni kuwa mioyo yao haikuwa na imani katika injili ya maji na Roho, na ndio maana Mungu amehakikisha kuwa hawapatia chochote kile zaidi ya adhabu ya moto wa kuzimu.

Je, Mliweza Kuzioshelea Mbali Dhambi Zenu Kwa Sala Zenu Binafsi za Toba?

Wakristo ulimwenguni kote hawaifahamu injili ya maji na Roho, na kwa matokeo hayo wanawahubiri watu injili nyingine iliyo tofauti—yaani wanahubiri juu ya fundisho la sala ya toba. Wao wanaamini kuwa ingawa mtu anakuwa ameondolewa ile dhambi ya asili kwa kuiamini damu ya Msalaba, basi dhambi nyingine ambazo zitatendwa baada ya hapo zinaondolewa mbali kwa kupitia sala za toba. Kwa kuwa hawafikirii kuwa imani yao ni potofu, basi wanapoisikia injili ya maji na Roho wanaiona kuwa ni injili ngeni kabisa, hatimaye wanakataa kuiamini na pia wanawaambia wengine kuwa injili ya maji na Roho haina Ukweli wowote.

Hata hivyo, watu hawa wanapoendelea kuamini na kuihubiri damu ya Msalaba pekee, ni hakika kuwa wanaieneza injili ya uongo ambayo ni tofauti kabisa na injili ya maji na

Roho. Yesu alimwambia hivi Nikodemo, *“Amin, amin, nakuambia, Mtu asipozaliwa kwa maji na kwa Roho, hawezi kuuingia ufalme wa Mungu”* (Yohana 3:5). Kwa maneno mengine, Yesu alieleza bayana kuwa mtu yeyote asiyeamini kuwa Yesu alizichukua dhambi za wanadamu wote wakati alipobatizwa na Yohana Mbatizaji, na kwamba Yesu amewaokoa wanadamu toka katika dhambi kwa kufa Msalabani na kwa kufufuka toka kwa wafu, ni hakika kuwa mtu huyo atakabiliana na adhabu ya dhambi.

Kinyume chake, yeyote anayeamini katika injili ya maji na Roho anaweza kujionea yeye mwenyewe jinsi alivyoondolewa dhambi zake mara moja na jinsi alivyofanyika kuwa mwana wa Mungu. Kwa kuwa injili ya maji na Roho iliyotolewa na Mungu ni Ukweli wa wokovu, basi wale wanaoiamini injili hii ya kweli watafanyika kuwa wana wa Mungu na watenda kazi wake. Injili hii iliyotolewa na Mungu ndio Ukweli unaoleta wokovu halisi. Kwa upande mwingine, fundisho la kidini la sala toba lililoundwa kwa fikra za kibinadamu ni injili potofu, na kwa sababu hiyo hakuna mtu anayeweza kuoshwa dhambi zake kwa kuliadini fundisho hili potofu.

Hakuna injili nyingine zaidi ya injili ya maji na Roho ambayo Biblia inaizungumzia. Watu wanafikiri kuwa wakati mtu anapokwenda kwenye seminari ili kujifunza juu ya mafundisho ya kidini ya Kikristo na fikra nyingine za kitheologia basi mtu huyo atakuwa anaifahamu Biblia vizuri, lakini kwa kweli uhalisia hauko hivyo. Haijalishi mtu amesoma theolojia kwa nguvu, ukweli ni kuwa mtu huyo hawezi kujifunza juu ya injili halisi kutoka kwa wanatheolojia.

Hivyo, fundisho la kidini la sala za toba ambayo limefundishwa na wanatheolojia ni fundisho lenye makosa makubwa sana. Fundisho hili la sala za toba haliwezi kuleta

faida yoyote ile kwa wale wanaoamini kuwa wanaokolewa toka katika dhambi zao kwa kufanya sala zao binafsi za toba kila siku.

Injili ya kweli ya ondoleo la dhambi ambayo Bwana ametupatia ni injili ya maji na Roho. Hata hivyo, wanatheolojia wengi hapa ulimwenguni hawaifahamu injili hii, na badala yake wamewachanganya watu kwa fundisho la sala za toba na fundisho la utakaso unaoongezeka. Wakati Shetani alipowaeleza watu kuliunda fundisho la sala za toba na kuliadini, Bwana aliweka bayana kupitia Kitabu cha Wagalatia kuwa injili hiyo ni injili tofauti na injili ya maji na Roho.

Hivyo, ikiwa hauiamini injili ya maji na Roho hadi wakati huu, basi hiyo ina maanisha kuwa imani uliyonayo haihusiani kwa lolote lile na wokovu wa kweli wa Mungu. Kama ilivyokuwa kwa Mtume Paulo, ninyi nanyi ni lazima muamini injili ya maji na Roho ili muweze kuwa na imani inayowawezesha kubatizwa katika Yesu Kristo, kufa pale Msalabani, na kisha kufufuka pamoja na Kristo. Ni kwa kufanya hivyo ndipo mnapoweza kuivaa haki kama ile aliyonayo Yesu Kristo.

Mungu aliupenda ulimwengu sana kiasi cha kumtoa Mwana wake pekee kwa ajili yetu, na baada ya Yesu kuja hapa duniani, alizipokea dhambi zote za wanadamu kwa kubatizwa na Yohana Mbatizaji. Yesu amefanyika kuwa Mwokozi wa wale wote wanaomwamini maana alizibeba dhambi zote hadi pale Msalabani na kisha akafa, na akafufuka tena toka kwa wafu, na kwa sababu hiyo amezitoweshea mbali dhambi zetu zote. Kwa kuwa Mungu ameitimiza wokovu wetu kwa kupitia Mwana wake kwa injili ya maji na Roho, na kwa kuwa Mungu ametufanya tuiadini injili hii, basi hakuna sababu ya msingi inayotuzuia tusiadini Ukweli huu.

Injili ya wokovu ambayo kwa hiyo Bwana ametuokoa

toka katika dhambi ni injili ya maji na Roho. Tunaweza kuungana Yesu Kristo pale tunapoamini katika injili ya maji na Roho ambayo Mungu ametupatia kupitia Mwana wake. Hivyo, ni wale tu wanaoamini katika injili ya maji na Roho ndio wanaofanywa kuwa watu wa Mungu. Hatuwezi kamwe kuwa watu wa Mungu kwa kuziamini injili nyingine. Ikiwa tungelimtumikia Yesu kwa matendo yetu, tungewezaje basi kumtumikia ipasavyo na kwa usahihi? Hata kama tungelikuwa tumejitoa kiasi kikubwa kwa ajili ya Bwana, ukweli ni kuwa yeyote yule kati yetu asiyeamini katika injili ya maji na Roho hawezi kamwe kuokolewa.

Bwana ametuokoa toka katika dhambi zote kwa kupitia injili ya maji na Roho. Kwa kweli hakuna kitu tunachoweza kufanya vizuri mbele za Bwana, jambo pekee tunaloweza kulifanya vizuri ni kuliadini Neno la Ukweli na kushukuru kuwa Bwana ametupatia wokovu kwa kuja kwake kwa maji, damu, na Roho. Kwa hakika hatuwezi kuoshwa dhambi zetu kwa kutenda matendo mema mbele za Mungu au kufanya sala za toba. Tunaweza kupokea ondoleo la dhambi zetu na kisha kuupata uzima wa milele kwa kuiadini injili ya maji na Roho pekee ambayo Mungu ameikamilisha kwa ajili yetu kutokana na upendo wake usio na masharti. Bwana aliifanya hii injili ya kweli na akatupatia bure huku akisema, “Aminini na muokolewe.”

Sasa, ikiwa mtu yeyote yule anaipokea karama ya wokovu iliyotolewa na Mungu kwa imani, basi mtu huyo atakuwa ni mmoja kati ya watu wa Mungu. Kwa kuwa injili ya maji na Roho tuliyopewa na Mungu ni Ukweli wa wokovu mkamilifu, basi kila anayeumini Ukweli huo anafanywa kuwa mwana wa Mungu na mtenda kazi wa Mungu, na mtu huyo ataingia Mbinguni na kuupata uzima wa milele.

Bwana wetu ametuokoa tokak katika dhambi zetu zote

kwa kupitia injili ya maji na Roho. Kwa sasa hakuna Ukweli mwingine wa wokovu zaidi ya hii injili ya kweli. Kwa kuwa Wakristo wengi wanaamini kuwa injili ya damu ya Msalaba ndio Ukweli halisi, wao wanadhani kuwa “injili nyingine” iliyotajwa katika kifungu cha leo cha Maandiko inahusu mafundisho potofu ya wazushi, lakini kwa hakika wanapaswa kutambua kuwa injili nyingine inayotajwa ni kile wanachokiamini wao wenyewe. Injili ya damu pekee ya Msalaba na fundisho la sala za toba ni injili tofauti ambazo zinawaongoza watu kuelekea katika kifo cha kiroho.

Ninadikiri kuwaeleza wale waanaoamini katika damu ya Msalaba pekee kama sehemu ya wokovu wao kuwa, “Mmeiamini injili nyingine, na si injili ya maji na Roho.” Na ninawasihi nyote “Mgeuka hivi sasa na kuiamini injili ya maji na Roho.”

Huku nikishirikiana na watenda kazi wenzangu, nitaendelea kuihubiri injili ya maji na Roho ulimwenguni kote. Nitafanya kazi kwa juhudi zaidi, na nitayatoa maisha yangu kwa ajili ya kazi hii. Hii ni kwa sababu siku ya Bwana i karibu. Kwa sasa, wale ambao wameisikia injili ya maji na Roho kwa masikio yao ni lazima waweze kubainisha ikwia Neno hili lipo sahihi au la, na wanapaswa kuliadini hili Neno na hivyo kuokolewa toka katika dhambi zao. Kwa sasa tutaendelea kuishuhudia injili ya maji na Roho kwa uwazi zaidi, na tutaonyesha mstari halisi wa wokovu usio na shaka katika mioyo ya watu. Tutawaongoza na kuwasaidia wale wanaomwamini Yesu kwa usahihi ili waweze kufanikiwa, lakini kwa wale wasioamini injili ya maji na Roho hadi mwisho, ni hakika kuwa itatulazimu kuwaacha kama walivyo. Hata hivyo, tutaendelea kuieneza injili ya maji na Roho kwa juhudi kwa kadri tutakavyoweza.

Muda unakwenda haraka kama vile maji yanavyotiririka.

Yeyote yule aliyezaliwa hapa ulimwenguni ni lazima ajue kuwa atakuja kusimama mbele za Mungu. Hatujui kile kinachoweza kutukuta sisi binafsi, na wala hatufahamu nini kitaipata sayari hii hapo baadae. Bila shaka mnafahamu jinsi sunami iliyotokana na tetemeko la ardhi chini ya bahari huko Indonesia ilivyoleta majanga makubwa ambayo hayakutarajiwa. Iliripotiwa kuwa hili lilikuwa ni moja kati ya matetemeko makuu katika rekodi duniani. Watu maelfu kwa maelfu walikufa kutokana hili janga moja pekee.

Taasisi ya NASA itwayo Goddard inayojishughulisha na uchunguzi wa anga la juu ilitanga hivi karibuni kuwa mwaka huu utakuwa ndio mwaka wenye joto zaidi kuliko miaka 100 iliyopita. Ni nani anayejua ikiwa kutatokea mafuriko makubwa ambayo hayajawahi kutokea katika historia ya mwanadamu na ambayo yanaweza kutuangamiza sisi sote? Ikiwa tulikuwa tunavuka mto kisha tukazolewa na mafuriko je hilo si litakuwa ni kosa letu? Ni nani ajuaye kuwa mambo haya yanaweza yasitokee kwenu? Hakuna anayeweza kuona mambo ya mbele hata kwa urefu wa nchi moja tu. Hivyo sisi sote ni lazima tufanya maandalizi ya msingi ya kiroho, ili wakati wowote ule ikitokea Mungu mtakatifu ametuita tuweze kwenda na kusimama kwa ujasiri mbele ya uwepo wake. Maandalizi hayo kiroho yanafanywa kwa kuiamini injili ya maji na Roho na kwa kupokea ondoleo la dhambi zetu.

Pamoja na ukweli huo, Wakristo wengi katika kipindi hiki wanamwamini Yesu hali wakiwa katika hali yao ya dhambi, hii ni kwa sababu ingawa wamemwamini Yesu kwa miaka mingi, ukweli ni kuwa wamekuwa wakiiamini damu ya Msalaba pekee. Wakristo hao hawafahamu uwepo wa injili ya maji na Roho, injili ambayo inaweza kuzitoweshea mbali dhambi zao zote kikamilifu. Kwa sasa, kila mtu ni lazima aifahamu injili ya maji na Roho na ni lazima aiadini. Kwa ulimwengu huu

hauwezi kukwepa kuangamizwa, je huu si ndio wakati muafaka wa sisi kuiamini injili ya maji na Roho ili tuweze kuwa watu wa Mungu?

Kwa kweli kuishi hapa ulimwenguni kunahusisha mapambano ya moja kwa moja na kwa kweli hakuna tumaini. Watu wengi katika Nchi za Tatu wanashindwa hata kupata chakula, na kwa sababu hiyo si jambo la ajabu kuona familia nzima ikiamua kujiua kwa kujinyonga, na wala si ajabu kukuta wazazi wakiwatelekeza watoto wao. Kwa kweli, katika kipindi hiki na wakatu huu, ni vigumu sana kuishi katika ulimwengu huu pasipo kuwa na imani katika injili ya maji na Roho. Kuna tumaini gani hapa ulimwenguni? Lakini kwa upande kwa kweli ninawaonea sana huruma wale wanaomwamini Yesu pasipo kuifahamu injili ya maji na Roho. Kutokana na ukweli kuwa yeyote aliyezaliwa hapa duniani ni lazima afe wakati fulani, na kutokana na ukweli kuwa mwanadamu huyo ni lazima awe sehemu ya ulimwengu ambao ni kama ziwa la mateso, basi inapofikia hapo si inakuwa jambo busara kuiamini injili ya maji na Roho ili tuweze kuipata furaha katika ulimwengu ujao?

Ilitokeaje Watu Wakaicha Mapema Injili ya Maji na Roho Iliyotolewa na Mungu!

Mtume Paulo alisema kuwa hakuelewa ni kwa nini watakatifu wa makanisa ya Galatia waligeuka mapema na kuiacha injili iliyotolea na Mungu na kuifuata injili nyingine. Walimu wa uongo waliotoka katika jamii ya Wayahudi waliingia katika makanisa ya Galatia, na wakawadanganya watakatifu wakisema, “Sisi nasi tunaamini injili ya maji na Roho, lakini hata hivyo tunaweza kuwa watu wa Mungu ikiwa tu tutapokea tohara ya kimwili.” Walianza kuziyumbisha imani

za watakatifu wa makanisa ya Galatia wakisema, “Je, tohara si agano ambalo Mungu alilianzisha kwa Ibrahimu na baba zetu wa imani waliotutangulia? Kama ninyi ni wazawa wa Ibrahimu, kwa nini basi hamtahiriwi miili yenu? Zaidi ya yote, ikiwa mtatahiriwa, hilo litasaidia sana katika kuwahubiria Wayahudi. Kwa nini basi mnasita?”

Waliposikia hivyo, waamini wa Galatia waliona kuwa hoja hizo zina mashiko, na kwa haraka kabisa waliacha injili ya maji na Roho na wakatafuta kutahiriwa mapema kadri walivyoweza. Kwa kweli Mtume Paulo alishangazwa sana kuwa waliipokea injili nyingine kwa urahisi sana, na alikuwa na hasira sana na akawaambia hivi bayana: “Hakuna injili nyingine. Ikiwa mtu yeyote yule anaihubiri injili nyingine zaidi ya ile niliyowahubiria mimi, basi mtu huyo na alaaniwe.”

Je, kuna mchungaji yeyote yule anayeweza kudiriki kuwaambia waumini wake kuwa “Mlaaniwe”? Pamoja na hayo Mtume Paulo aliwaambia watakatifu wa makanisa ya Galatia kuwa ikiwa mtu yeyote kati yao anaihubiri injili nyingine mbali na injili ya kweli ambayo Paulo aliihubiri, basi mtu huyo na alaaniwe. Alichokifanya Mtume Paulo ilikuwa ni kulirejea Neno la Mungu kwa wale ambao wanastahili kulaaniwa. Kwa lugha nyingine alikuwa akiwaeleza hivi, “Ikiwa hamtageuka hadi mwisho na ikiwa mtaiamini tohara ya kimwili, basi ni hakika mtalaaniwa. Lakini kama mtageuka hata sasa, basi ni hakika mtaepukana na balaa ambalo lingewatumbukiza katika moto wa milele wa kuzimu.”

Kwa hakika hakuna injili nyingine mbali na injili ya maji na Roho ambayo Mungu amewapatia wanadamu. Baadhi ya watu wanaamini kuwa wameokolewa toka katika dhambi kwa kuiamini damu ya Msalaba peke yake. Pamoja na kuwa mtu hawezi kuikwepa dhambi kwa kuiamini damu ya Msalaba pekee, watu hao wanaendelea kuamini kuwa imani ya jinsi

hiyo ipo sahihi. Kwa hakika kuna watu wengi sana ambao wanajisulubisha kwa ajili ya kuifuata injili nyingine kwa namna hiyo, wamejitoa kikamilifu maisha yao yote na mali zao kwa ajili ya injili hiyo nyingine. Sisi sote ni lazima tutambue kuwa injili ya maji na Roho ndio injili ya kweli, na kwamba hakuna injili nyingine zaidi ya hii.

Tunafahamu kuwa wale wanaoiamini damu pekee ya Msalaba huku wakiitafuta hali ya utauwa ni kwamba hawaifahamu injili ya maji na Roho (2 Timotheo 3:5). Wao hufikiria kuwa kwa kuwa wanayaishi maisha yao ya kiimani kwa usahihi, wanadhani ni hakika kuwa wataepukana na ghadhabu ya Mungu.

Lakini kwa kufikiria hivyo, ni hakika kuwa wanajidanganya wenyewe na wala hawamdinganyi mtu mwingine. Yeyote yule asiyeuamini Ukweli wa injili ya maji na Roho ni hakika kuwa ana dhambi katika moyo wake. Kati ya watu kama hao wapo wanaoweza kusema kwa ujasiri kuwa, “Ingawa ninaiamini damu pekee ya Msalabani, kwa kuwa Yesu amezioshelea mbali dhambi zangu zilizopita, zilizopo, na zitakazokuja kwa damu yake, ni hakika kuwa hakuna dhambi katika moyo wangu!” Hata hivyo, ni dhahiri kuwa watu hao wanajidanganya hivi sasa. Mtu yeyote yule anayedai kuwa hana dhambi kwa kuamini damu ya Msalaba pekee, huku akiwa haamini kuwa injili ya maji na Roho ndio injili pekee ya kweli, basi ni hakika kuwa mtu huyo anajidanganya mwenyewe na wala Ukweli haumo ndani yake (1 Yohana 1:8).

Ni jambo gani litatokea kwako ikiwa hauiamini injili ya maji na Roho, ambayo ni Ukweli wa wokovu hadi mwishoni? Kwa kweli bila shaka utaadhibiwa na Mungu kwa sababu ya dhambi zako. Hivyo, ni lazima uiamini injili ya maji na Roho ambayo imemwoko kila mtu toka katika dhambi, vinginevyo hutaweza kabisa kupokea ondoleo la dhambi zako. Kutoiamini

injili ya maji na Roho ndio njia pekee inayoweza kuyafanya yale aliyotupatia Bwana kuwa hayana maana.

Bwana ni Mwana wa Mungu, ni Muumbaji, ni Mungu wetu, Mwokozi wetu, na Mkuu wetu. Bwana wetu alizaliwa kutoka mwili wa mwanamke kwa kitambo, alibatizwa na Yohana Mbatizaji, akafa Msalabani, akafufuka toka kwa wafu na kwa sababu hiyo ametukomboha sisi sote toka katika dhambi zetu zote. Ikiwa mioyo yenu haiamini katika injili ya maji na Roho pamoja na kuwa mnaielewa, basi hali hiyo itamaanisha kuwa unaamini injili nyingine. Watu wengi siku hizi hawana uelewa wa kiroho, na kwa sababu hiyo katika hali ya ujinga wanaamini injili ambayo si injili ya maji na Roho.

Sisi sote ni wapitaji tu katika ulimwengu huu na tutadumu kwa muda mfupi. Kwa kuwa Mungu ameikamilisha injili ya maji na Roho ili kwamba kila mtu hapa duniani aweze kuingia Mbinguni, basi yeyote yule aliyepokea uzima wa milele huko Mbinguni kwa imani ni mtu aliyefanikiwa kuliko wale wote waliozaliwa hapa duniani. Kutokana na ukweli kuwa maisha yetu hapa duniani ni kama watu tunaopita tu, basi ni lazima tuitafute injili ya kweli ya maji na Roho wakati tukiwa hai hapa ulimwenguni, kisha tunatakiwa tukombolewe toka katika dhambi zetu zote.

Si itakuwa ni jambo la kupendekeza ikiwa watu wengi watatambua na kuamini kuwa injili ya maji na Roho ndio Ukweli? Na si ingekuwa ni jambo kupendeza zaidi ikiwa kila mtu hapa ulimwenguni angeamini hii injili halisi na kisha kupokea wokovu wakati akiwa hapa duniani?

Ninaitarajia siku moja ambapo kila mtu ulimwenguni kote ataifahamu injili ya maji na Roho kwa usahihi na kisha kuiamini. Vinginevyo, wakati ulimwengu huu utakapoangamizwa, basi wale wote wasioamini injili ya maji na Roho wataangamizwa pia pamoja na ulimwengu huu. Ndio

maana Biblia inasema, *“Mwanadamu mwenye heshima, iwapo hana akili, Amefanana na wanyama wapoteao”* (Zaburi 49:20).

Vipi kuhusu wale ambao wamekuwa wakiishi maisha mema na ya kimungu mbele za Mungu? Je, wataokolewa hata ikiwa hawaiamini injili ya maji na Roho? Hapana, kwa kweli si hivyo. Kwa kweli hakuna njia nyingine hapa duniani inayomwezesha mtu kuokolewa na kuondolewa dhambi zake zaidi ya kuiamini injili ya maji na Roho. Sasa ni lazima utambue kuwa hakuna injili nyingine zaidi ya injili ya maji na Roho, na ni lazima uiamini injili hii bila shaka yoyote. Pia ni lazima mkumbuke kuwa yeyote yule anayehubiri injili nyigine zaidi ya injili ya maji na Roho, hata kama atakuwa ni malaika toka Mbinguni, ni hakika kuwa atalaaniwa.

Wakatihuu ambapo Ukristo umejipanga kama dini namba moja duniani, ukweli ni kuwa Ukristo umejawa na wale wanaoiamini injili nyingine ambayo ni tofauti na injili halisi ya maji na Roho. Ndio maana kuna baadhi ya Wakristo wanaofikiri kimakosa kuwa Yesu ni mwanzilishi tu wa Ukristo. Ingawa wanasema kuwa wanamwamini Yesu kuwa ni Mwokozi wao, ukweli ni kuwa hawamwamini Yesu kuwa ni Bwana wa wokovu aliyefunuliwa katika injili ya maji na Roho.

Sasa, yeyote yule anayeamini katika Neno la Mungu ni lazima aifahamu injili iliyonenwa na Mungu yaani injili ya maji na Roho, na kisha ni lazima apokee ondoleo la dhambi zake kwa kupitia injili hii. Ni lazima tutambue kuwa injili ya kweli iliyofundishwa na Mungu ni injili ya maji na Roho. Injili iliyoaminiwa na kuhubiriwa na Mtume Paulo ndiyo injili hii tunayoieleza. Hakuna injili nyingine halisi zaidi ya injili ya maji na Roho. Injili nyingine zozote zile mbali na injili ya maji na Roho ni injili bandia.

Agano la Kale na Agano Jipya yameundwa na vifungu mbalimbali vinavyoielezea injili ya maji na Roho. Injili zote

Nne zinaielezea kazi ya Bwana ya wokovu kuanzia ule ubatizo ambao aliupokea. Yesu Mwenyewe alimwambia Nikodemo kuwa mtu anaweza kuuona Ufalme wa Mungu na kuuingia ikiwa tu atazaliwa tena upya kwa maji na kwa Roho. Wakati mtume wa kumbadili Yuda Iskariote alipochaguliwa, tunaona kuwa kanisa la mwanzo pale Yerusalemu lilizingatia sifa za wale waliokuwa pamoja na mitume tangu wakati ambapo Yesu alibatizwa hadi wakati Yesu alipopaa kwenda Mbinguni (Matendo ya Mitume 1:21-22).

Vivyo hivyo, mitume na watakatifu wa Kanisa la Mwanzo wote kwa pamoja waliamini injili ya maji na Roho. Wote walivikwa haki ya Mungu kwa kubatizwa katika Yesu kwa imani yao katika injili ya maji na Roho. Ikiwa tunaiamini injili ya maji na Roho huku tukiunganisha mioyo yetu pamoja na injili hii ambayo Bwana ameitumia kutuokoa toka katika dhambi za ulimwengu huu, basi hiyo ni uhakika kuwa sisi nasi tumemvaa Yesu Kristo. Yeyote yule aliyebatizwa katika Kristo ni mtu aliyeokolewa mbele za Mungu kwa kuamini kwa moyo wake juu ya kazi za Yesu Kristo ambazo zimetuokoa toka katika dhambi. Watu wote wa jinsi hiyo wanaoamini katika injili ya maji na Roho ni wana wateule wa Mungu. Je, unaiamini injili ya maji na Roho? Mimi pia ninaiamini injili hii.

Kwa kweli kwa kiwango fulani mtu anatakiwa kuiangalia nafsi yake. Ni nani mwingine anayeweza kuziangalia nafsi zenu? Ni nani mwingine anayeweza kuadhibiwa kwa ajili ya dhambi za nafsi zenu? Je, wazazi wanaweza kubeba adhabu ya dhambi ya watoto wao? Hapana, hilo haliwezekani. Watu hawaendi kuzimu eti kwa kuwa tu wanapenda kwenda kuzimu, na wala hawawezi kukwepa kwenda kuzimu kwa kuwa tu hawapendi kwenda huko. Mtu hawezi kuokolewa toka katika dhambi zake na kisha kwenda Mbinguni eti kwa sababu tu amefanya matendo mema mbele za Mungu. Hakuna anayeweza

kuikwepa adhabu ya kuzimu ikiwa mtu huyo atakuwa haiamini injili ya maji na Roho ambayo Mungu ametupatia.

Hivyo, ni lazima tuamini injili ya maji na Roho kwa mioyo yetu yote ili tuweze kuwa na imani inayotuunganisha na Kristo. Kwa kweli ili tuweze kuokolewa toka katika dhambi zetu, ni hakika kuwa hakuna njia nyingine ya kuweza kufanya hivyo zaidi ya kuipokea injili ya maji na Roho katika mioyo yetu na kuamini. Mbele za Mungu hakuna namna nyingine zaidi ya kusema “ndiyo” mbele ya Neno la Mungu. Tuna nini sisi za cha ziada mbele za Mungu? Hatuna chochote kile.

Ni nani anayemwemini Yesu kwa usahihi? Ni yule ambaye Bwana akisema kuwa injili ya maji na Roho ndio Ukweli yeye atajibu “ndiyo” na ataamini hivyo. Yeyote yule anayemwamini Yesu kuwa ni Mwokozi wake bila kujalisha kile ambacho Neno la Mungu kinasema basi huyo atakuwa ni mtu mjinga. Lakini ikiwa mtu anamwamini Mwokozi aliyekuja kwa injili ya maji na Roho, basi huyo atakombolewa toka katika dhambi zake zote na atafanyika kuwa mtu asiye na dhambi.

Baadhi ya watu wanasema, “Kwa kuwa siamini injili ya maji na Roho hadi wakati huu, basi siwezi kwa sasa kuamini tena injili hii.” Kwa kweli watu wa jinsi hiyo ni wajinga na ambao mioyo yao imejaa ukaidi na ambao hawazijali hata nafsi zao. Kwa bahati mbaya kuna watu wengi sana wa aina hii.

Haijalishi jinsi tulivyokuwa tukimwamini Yesu hapo kabla. Bwana alisema hivi, *“Bali maneno yenu yawe Ndiyo, ndiyo; Siyo, siyo; kwa kuwa yazidiyo hayo yatoka kwa yule mwovu”* (Mathayo 5:37). Ikiwa Neno la Mungu linasema kuwa injili ya maji na Roho ndio Ukweli, basi kuanzia wakati huu na kuendelea tunachotakiwa kukifanya ni kusema “ndiyo” kwa injili hii na kuamini kikamilifu kwa mujibu wa Neno. Ikiwa tutatambua kuwa kile ambacho tumekuwa tukikiamini kwa

muda mrefu ni injili nyingine, basi tunachotakiwa kukifanya ni kukiri kwa Mungu kuwa tuliamini vibaya, na kwamba sasa tunaamini injili ya maji na Roho—inawezekanaje basi jambo hili likayaumiza majivuno yetu? Kama tungeliweza kwa namna yoyote ile kulinganishwa na Mungu, basi ni hakika tungejivuna, lakini kwa kuwa Mungu halinganishwi kamwe na sisi maana yuko juu sana kuliko sisi na ni mtakatifu sana kuliko sisi, basi ni jambo gani tunaweza kulifikia kutokana na majivuno yetu mbele za Mungu aliye mkuu? Je, tuna namna nyingine ya kufanya zaidi ya kuamini katika injili ya maji na Roho?

Injili iliyohubiriwa na Mtume Paulo ni injili ya maji na Roho. Paulo alisema, *“Maana ninyi nyote mliobatizwa katika Kristo mmemvaa Kristo.”* Mtume Paulo aliamini kuwa Yesu Kristo alibatizwa ili kuzipokea dhambi za wanadamu, akafa Msalabani, akafufuka tena toka kwa wafu, na kwa sababu hiyo alimwokoia sio Paulo peke yake bali wanadamu wote toka katika dhambi. Hakuna injili nyingine zaidi ya injili ya maji na Roho. Ikiwa mtu yeyote yule anaifuata injili nyingine mbali na injili ya maji na Roho, basi ni hakika kuwa mtu huyo atalaaniwa. Kwangu mimi ninaamini injili ya maji na Roho kama vile Mtume Paulo alivyosema. Vipi kuhusu wewe? Je, unaiamini injili hii?

Baadhi ya watu wanaweza kuwa na nia ya dhati ya kumtumikia Mungu, lakini hawaifahamu haki ya Mungu ya injili ya maji na Roho ambayo Mungu ameitimiza kwa ajili yetu, na kwa sababu hiyo wanajaribu kuitengeneza haki yao wenyewe huku wakiikataa injili ya kweli (Warumi 10:1-3). Watu wa jini hiyo ni wakaidi sana mbele za Mungu. Mtu anatakiwa kuwa mkaidi kwa mwanadamu mwingine anayeweza kumlazimisha; inawezekanaje mtu akawa mkaidi mbele za Yesu Kristo?

Yesu Kristo ni nani? Yeye ni Mfalme wa wafalme na

Muumbaji aliyeuumba ulimwengu. Ni nani basi anayeweza kudiriki kusema kuwa hawezi kuamini injili ya maji na Roho ambayo Kristo ameitimiza kwa kujitoa mwenyewe na kisha kuitoa injili hiyo kama karama? Wale walio wakaidi mbele za Mungu wataishia kuanguka katika shimo la maangamizi kwa sababu ya dhambi yao ya kuikaidi haki ya Mungu.

Ni lazima ujangalie wewe mwenyewe ili kuona ikiwa haupo miongoni mwa hao wajinga, na ikiwa utagundua kuwa unaiamini injili nyingine, basi hapo unapaswa kugeuka mara moja na kisha uamini injili ya kweli ya maji na Roho. Injili yoyote ile mbali na injili ya maji na Roho si lolote ni kitu kilichoundwa kutokana na mafundisho ya kidini ya mwanadamu, na kwa sababu hiyo ni injili inayopaswa kushtakiwa. Ikiwa tuna imani potofu mbele za Mungu basi si itakuwa vizuri ikiwa tutazitupilia mbali imani hizo?

Asili ya Ukristo inatoka katika Ukweli kuwa Yesu Kristo ametuokoa wanadamu kupitia injili ya maji na Roho. Lakini pamoja na ukweli huo, Wakristo wengi ulimwenguni kote wanaamini injili ipi? Kuanzia kipindi cha Kanisa la Mwanzo hadi leo hii injili nyingine imekuwa ikiuharibu Ukristo. Baada ya mitume wa Kanisa la Mwanzo kupita, kilifuata kipindi baada ya mitume ambacho kilikuwa ni kipindi cha Mababa wa Kanisa, lakini katika kipindi hicho tayari injili nyingine ambayo ni tofauti na injili ya maji na Roho ilikuwa imeshaanza kuichafua imani ya kweli katika Kanisa. Baada ya kipindi hiki, wakati fulani Tamko la Milan lilitangazwa mwaka 313 BK, na hapo ndipo injili ya maji na Roho ilipopotea moja kwa moja katika Kanisa, na kuanzia wakati huo hadi sasa sehemu kubwa ya Ukristo imekuwa ikiamini injili nyingine.

Hata hivyo, katika kipindi hiki cha mwisho, Mungu kwa mara nyingine tena ameirudisha tena injili ya kweli ya maji na Roho, na ameruhusu kuinuka kwa kazi ambayo inaziokoa nafsi

za watu. Hivyo, ni makosa kwa Wakristo kutoiamini injili yenye Ukweli na kung'ang'ania njia zao wenyewe. Ikiwa Neno la Mungu linasema kuwa injili ya maji na Roho ndio Ukweli, basi tunapaswa kuamini hivyo, na tunapaswa kuachana na mafundisho mengine yote ambayo yanatofautiana na injili hii. Hakuna sababu yoyote ile inayotufanya tuendele kuamini katika mafundisho ya kidini ya Kikristo. Haijalishi hata kama mafundisho haya yatakuwa yametolewa na mtheolojia mashuhuri, na wala haijalishi yale ambayo Wakristo waliotutangulia waliyaamini, kwa kuwua Neno la Mungu linasema kuwa injili pekee ya kweli ni injili ya maji na Roho, basi ni lazima tuiamini injili hii na tuihubiri.

Hivi karibuni mwandishi wa habari katika Shirika la Habari la Washirika toka Vietnam alinitumia barua-pepe. Aliandika kuwa ingawa anaamini kuwa injili ya maji na Roho ipo sahihi, lakini kwa kuwa watu wengi hawaiamini injili hii ya kweli, basi wao wanavichukia sana vitabu vyetu ambavyo vinaonyesha dhahiri makosa yao ya kiimani. Kwa kweli ninamshukuru sana Mungu, kwa kuwa mtu huyu anaamini katika injili ya maji na Roho na anauunga mkono Ukweli unaoelezwa katika vitabu vyetu. Kuna baadhi ya watu ambao hawawezi kuiamini injili ya kweli hata kama itaelezwa kwa kina, na hali hiyo inaendana kile kilichoandikwa katika Mathayo 11:17,

*“Tuliwapigia filimbi,
Wala hamkucheza;
Tuliomboleza,
Wala hamkulia.”*

Hata hivyo, kwa upande wake, Mungu anaieneza injili hii ya maji na Roho ulimwenguni kote, na anaendelea kuonyesha jinsi isivyofaa kuziamini injili nyingine badala ya injili hii. Hivyo, wale walioisikia injili ya maji na Roho watatambua

kuwa kile walichokuwa wakikiamini hadi wakati huu kilikuwa ni makosa matupu, kisha watalirudia Kanisa la Mungu ambapo injili ya maji na Roho inahubiriwa. Na watakapokuwa ndani ya Kanisa la Mungu watajifunza Biblia, na baada ya hapo watasimama imara katika Neno la kweli la Mungu.

Mungu ametufanya tuihubiri injili ya maji na Roho ili kwa sababu hiyo tuweze kuitumikia haki yake. Mungu ametuamuru kuutangaza Ukweli wa maji na Roho ili kwamba kila mtu ulimwenguni aweze kuusikia ukweli huo. Ndio maana tunavitawanya vitabu vyetu vilivyo na injili ya maji na Roho sio tu hapa Korea bali hadi ulimwenguni kote. Mwaka jana pekee, tulitawanya zaidi ya vitabu 400,000 ulimwenguni kote bure. Tulivituma vitubu vyetu kwa yeyote yule aliyevihitaji bila kujalisha mahali anapoishi. Kwa msingi huo, watu wengi wanashindwa kuokolea si kwa sababu hakuna anayehubiri injili ya maji na Roho bali ni kwa sababu ya ugumu wao binafsi. Pia ni kwa sababu hawazipendi nafsi zao ndio maana wanashindwa kuufikia wokovu.

Tunazitoa shukrani zetu zote kwa Mungu. Zaidi ya yote, tunashukuru kwa kuwa Mungu ametupatia injili ya maji na Roho na tunashukuru kwa sababu Mungu ametufanya tuweze kuihubiri injili hii ya kweli. Ni lazima tuendeleo kuieneza injili hii hadi pale wale wanaoamini katika injili nyingine watakapotambua makosa yao, wakayatubia, wakageuka, na kisha kumrudia Mungu.

Kazi hii ya kuitangaza injili ya maji na Roho itaendelea bila kukoma hadi siku Bwana atakapotuita kwenda nyumbani mbinguni. Halleluya! ☒

Wale Ambao Mioyo Yao Imeandaliwa Kama Watumishi wa Mungu

< Wagalatia 1:10-12 >

“Maana, sasa je! Ni wanadamu ninaowashawishi, au Mungu? Au nataka kuwapendeza wanadamu? Kama ningekuwa hata sasa nawapendeza wanadamu, singekuwa mtumwa wa Kristo.

Kwa maana, ndugu zangu, injili hiyo niliyowahubiri, nawajulisha ya kuwa siyo ya namna ya kibinadamu. Kwa kuwa sikuipokea kwa mwanadamu wala sikufundishwa na mwanadamu, bali kwa ufunuo wa Yesu Kristo.”

Leo hii kupitia imani ya Mtume Paulo nitaelezea juu ya aina ya moyo ambao mtumishi wa Mungu anapaswa kuwa nao.

Paulo anafahamika na kila mtu duniani kote kuwa ni Mtumishi wa Mungu. Ni kweli yeye ni mtumishi wa Mungu kwa sababu hakulenga kumfurahisha mwanadamu wala yeye binafsi, badala yake yeye aliihubiri injili ya maji na Roho kwa mujibu wa mapenzi ya Mungu Baba na Yesu Kristo, na akaishika imani yake katika injili katika hali zote.

Katika Wagalatia 1:10 imeandikwa hivi, *“Maana, sasa je! Ni wanadamu ninaowashawishi, au Mungu? Au nataka kuwapendeza wanadamu? Kama ningekuwa hata sasa nawapendeza wanadamu, singekuwa mtumwa wa Kristo.”*

Mtume Paulo alisema kuwa kama angelikuwa anataka kuwapendeza wanadamu kuliko kuyafuata mapenzi ya Mungu, basi bila shaka asingelikuwa mtumishi wa Mungu.

Mtume Paulo aliyaishi maisha yake kwa imani akiwa kama mtumishi wa Mungu, huku akihubiri injili ya maji na Roho kwa mujibu wa mapenzi ya Mungu. Kwa kuwa Paulo alikuwa ameishi kama mtumishi wa Mungu ndio maana injili ya kweli na ambayo haijachakachuliwa imeweza kutufikia. Hivyo ni muhimu sana kwetu sisi ambao tumezaliwa tena upya kwa kuamini katika injili hii ya kweli kuishi kama watumishi wa Mungu kama vile Paulo alivyoona ni muhimu kwake yeye kuihubiri na kuilinda injili ya maji na Roho akiwa mtumishi wa Mungu.

Hivyo, tunahitaji kujichunguza sisi wenyewe ili kuona ikiwa sisi ni watumishi wa Mungu au la. Kama ilivyokuwa kwa Paulo, sisi nasi tumepokea ondoleo la dhambi zetu toka kwa Mungu kwa kuamini katika injili ya maji na Roho. Lakini ni kweli kuwa tunaishi kama watumishi wa Mungu? Au tunaishi kama watumishi wa miili yetu wenyewe? Je, wewe unaishi maisha yako kama mtumishi wa nani?

Injili Iliyoaminiwa na Mtume Paulo Pamoja na Imani Yake

Mtume Paulo alituhubiria injili ya maji na Roho kwa imani, alituhubiria injili ambayo ina haki ya Mungu, na ili aweze kuyatimiza mapenzi ya Mungu Mtume Paulo kwa imani alijitoa kwa Mungu kuwa mtumishi wake. Mtumishi ni yule ambaye hana maamuzi yake binafsi, na wala si yule anayetafuta mambo yake binafsi, bali ni yule anayeishi kwa ajili ya mapenzi ya mkuu wake.

Mtume Paulo alisema, *“Nimesulibiwa pamoja na Kristo;*

lakini ni hai; wala si mimi tena, bali Kristo yu hai ndani yangu” (Wagalatia 2:20). Paulo alikiri mbele za Mungu alikuwa ni mwenye dhambi mkuu, na kwamba alistahili kufa mbele za Mungu kutokana na dhambi zake. Pia Paulo aliamini kuwa Yesu Kristo alikuwa amezichukua dhambi zote za mwanadamu mara moja na kwa wote kwa ubatizo alioupokea toka kwa Yohana, na kwamba alikuwa amempatia uzima kwa kufa kwake Msalabani na kwa kufufuka tena toka kwa wafu. Mtume Paulo alikuwa ni mtu aliyekuwa amekufa kwa ajili ya dhambi zake; ndio maana aliziamini katika moyo wake kazi ambazo Bwana alikuwa amezifanya ili kuwaokoa wanadamu wote toka katika dhambi, Paulo aliizika nafsi yake ya kale, kisha akajitoa maisha yake yote yaliyosalia kama mtumishi wa Mungu na akamtumikia Mungu kwa uaminifu, Paulo alifanya hivyo ili mapenzi ya Mungu yaweze kutimizwa.

“Nimesulubiwa Pamoja na Kristo”

Mtume Paulo alisema, *“Nimesulubiwa pamoja na Kristo; lakini ni hai; wala si mimi tena, bali Kristo yu hai ndani yangu”* (Wagalatia 2:20). Kwa kweli Paulo alikiri yale ambayo Mungu alikuwa ameyafanya kwa ajili yake. Kwa kuwa Sheria ya Mungu inasema, *“Mshahara wa dhambi ni mauti,”* Paulo aliamini kuwa alikuwa amekwisha kufa pamoja na Kristo kwa ajili ya dhambi zake, pia aliamini kuwa alikuwa amefufuka pamoja na Kristo.

Paulo aliitambua Sheria yote ya Mungu. Kwa kuwa Paulo aliliamini Neno linalosema *“Sheria ndiyo ifanyayo hasira”* (Warumi 4:15), basi Paulo alitambua hivi *“Aaah! Mimi ni mwenye dhambi ambaye siwezi kukwepa mbele za Mungu kwa kuwa nilizaliwa katika hali ya dhambi. Ninapojiangalia*

katika Sheira ya Mungu mimi ni mwenye dhambi. Ndio maana mimi ni mwenye dhambi!” Paulo alikiri akisema, “Kwa kuwa mimi ni mwenye dhambi mbele ya Sheria ya Mungu, basi ni haki kwangu kufa kwa ajili ya dhambi zangu kwa mujibu wa Sheria hii ya Mungu.”

Pia Paulo aliuamini Ukweli unaoeleza kuwa Yesu alizipokea nafsi yake ya kale iliyopaswa kufa kwa kupitia ubatizo wake, kisha akafa Msalabani pamoja naye. Kwa maneno mengine, Paulo aliamini kazi ya maji na damu ya Yesu Kristo. Na kadiri alivyoamini ndipo na yeye alipokufa katika Kristo, pia Paulo aliamini kuwa alifufuka pamoja na Kristo. Imani ya jinsi hiyo ilipatikana wakati Paulo alipoungana na Yesu kwa kuuamini ubatizo wa Yesu. Imani hii ya Mtume Paulo ilikuwa ni imani iliyofuata Ukweli halisi.

Sisi sote tunatamani kuishi kama watumishi wa Mungu. Ingawa kuna mambo mengi katika miili yetu yanayoweza kutufanya tuonekane kuwa tuna mapungufu mengi kiasi cha kuweza kuwa watumishi wa Mungu, ukweli ni kuwa hilo si tatizo hasa katika imani inayoamini katika injili ya maji na Roho. Jambo la muhimu ni ikiwa mioyo yetu inatamani kuishi kama watumishi wa Mungu. Hili ni jambo muhimu sana kwetu sisi sote. Nia kama hiyo na imani kama hiyo hailetwi kwako na mtu mwingine, bali unaweza kuvipata vitu hivyo unapokuwau umeamua mbele za Mungu huku ukiuamini Ukweli wake. Sisi sote tunahitaji kujichunguza kwa umakini na kuhakikisha ikiwa sisini watumishi wa kweli wa Mungu katika injili ya maji na Roho.

Je, unaishi kama mtumishi wa Mungu? Au je unaishi kama mtumwa wa mwili wako? Je, wewe ni mfalme na mkuu kwako wewe binafsi kiasi cha kutoweza kumtumikia Yesu Kristo kama Mfalme wako? Je, bado unakataa kujitoa kwa Mungu kama mtumishi wa Mungu?

Sisi sote ni lazima tuvikane viti vyetu vya enzi katika

mioyo yetu. Na ni lazima tumvishe Mungu taji na kumtumikia Yeye kama Mfalme wetu. Ni lazima tupige magoti mbele kiti cha enzi cha Mfalme, na tujitoe kumtumikia Bwana hata kama tuna mapungufu, na kisha tuishi kwa imani yetu katika bwana huku tukiifuata haki ya Mungu. Kimsingi, sisi tunaweza kuwa watumishi wa Mungu wenye thamani au tunaweza kuwa watu tusioweza kumtumikia Bwana, na hii inatokana na namna tunavyoziweka akili na imani yetu mbele za Mungu.

Kwanza Kabisa, Ni Lazima Tuziandae Akili Zetu Kuishi Kama Watumishi wa Mungu

Sisi sote ni lazima sasa tuchague ikiwa tutaishi kama watumishi wa Mungu kama watumishi wa wanadamu. Tunapaswa kutambua kuwa ikiwa hatutaishi kama watumishi wa Mungu, basi ni hakika kuwa tutaishi tukiwa maadui wa Mungu.

Ilinichukua takribani miaka kumi tangu nilipomwamini Yesu kwa mara ya kwanza kuweza kuutambua Ukweli wa injili ya maji na Roho uliofunuliwa katika Mathayo 3:13-17, na pia ilichukua muda huo kuweza kupokea ondoleo la dhambi zangu. Nilitambua kuwa hakukuwa na mtu yeyote hapa ulimwenguni aliyekuwa akihubiri injili ya maji na Roho, ndipo nikafikia hatua ya kuyakana maisha yangu yaliyopita ambayo nilikuwa nikiishi kwa ajili yangu binafsi, kisha nikauandaa moyo wangu kuishi kwa ajili ya Yesu Kristo. Ili niweze kuieneza injili ya maji na Roho ulimwenguni kote, basi niliamua kuachana na maisha binafsi na kisha kuishi kama mtumishi wa Mungu.

Huku nikifahamu kuwa hakukuwa na mtu yeyote yule ulimwenguni aliyekuwa akihubiri injili ya maji na Roho, basi niliamu kutokifunga kinywa changu. Kisha nikakumbuka kile

ambacho Bwana alikisema: *“Na yule asiyejua, naye amefanya yastahiliyo mapigo, atapigwa kidogo. Na kila aliyepewa vingi, kwake huyo vitatakwa vingi; naye waliyemwekea amana vitu vingi, kwake huyo watataka na zaidi”* (Luka 12:48).

Hivyo nikaamua kuielekeza akili yangu kuihubiri injili ya kweli, lakini nilikuwa na tatizo kwa kuwa sikuwa na nguvu na mbinu za kuweza kufanya hivyo. Hivyo nikamwomba Mungu: “Mungu Baba, ingawa historia ya Ukirsto ina zaidi ya miaka 200, ukweli ni kuwa kuna watu wachache sana hapa ulimwenguni ambao wanaihubiri injili ya maji na Roho. Bwana, ingawa mimi sina ufahamu wa kutosha, ninaamini kuwa ukoo wa wahubiri wa injili ya maji na Roho hauwezi kupatikana sehemu nyingine hapa duniani. Ni lazima nihubiri injili hii ya kweli, hivyo ninakuomba unipatie nguvu na watenda kazi ili niweze kulikamilisha zoezi hili. Bwana wangu, tafadhali naomba unipatie nguvu ili niweze kuihubiri injili ya maji na Roho ulimwenguni kote. Ninakuomba Bwana unipatie nguvu, ili niweze kueneza imani hii inayokuamini Wewe na niweze kueneza Ukweli huu wa injili.”

Mungu aliyajibu maombi yanguyote, kwa kweli Mungu ni mwaminifu. Mungu alinipatia watenda kazi wenzangu na Kanisa Lake, na akanipatia kila nilichohitaji ili niweze kueneza injili ya maji na Roho ulimwenguni kote. Bwana aliniwezesha kuishi maisha mapya kama mtumishi wa Mungu mwenye haki.

Sasa, injili ambayo mimi na ndugu zangu tunapaswa kuihubiri ni hii: Wakati Yesu alipobatizwa katika Mto Yordani na Yohana Mbatizaji, aliitimiza haki yote yay Mungu kwa kuzichukua dhambi zote za ulimwengu katika mwili wake. Kwa kuwa dhambi zetu zote zilipitishwa kwenda kwa Yesu kwa kupitia ubatizo wake ambao aliupokea toka kwa Yohana, basi ndio maana aliweza kuzibeba dhambi za ulimwengu

kwenda nazo Msalabani mara moja na kwa wote kisha akasulubiwa hadi kifo, kisha alifufuka siku ya tatu na kwa sababu hiyo amefanyika kuwa Mwokozi wetu mara moja na kwa wote. Hivyo Bwana ameitimiza haki yote ya Mungu. Sasa, ingawa matendo yetu yanaweza kuwa na mapungufu, ukweli ni kuwa kama tutaia mini haki ya Mungu iliyotimizwa na Yesu kwa namna hii, basi ni wazi kuwa tutaoshwa dhambi zetu zote na kuufikia wokovu wetu.

Wakati nilipoamini katika injili ya maji na Roho, Bwana alinipatia moyo wa kuishi kama mtumishi wa Mungu anayeifuata haki yake. Tangu wakati huo nimekuwa nikitii kitu chochote ambacho ni mapenzi ya Mungu. Nilijifunza kuwa haya ndiyo maisha ambayo kila mtumishi wa Mungu anapaswa kuishi hivyo, na nikaamua kujikana mimi binafsi na kisha kuishi kwa ajili ya kuupania Ufalme wa Mungu. Kitu ambacho sikukifahamu ilikuwa ni vikwazo kwa jukumu hili, na kwa kweli nadhani ilikuwa sahihi pengine ninaweza kujifunza kuanzia sasa na kuendelea kuhusu vikwazo hivyo; na kwa msingi huo nilianza kufanya kazi kwa ajili ya haki ya Mungu huku nikiwa na uamuzi thabiti katika kina cha moyo wangu kuwa nitadumu kuenenda kwa mujibu wa mapenzi ya Mungu. Ndio maana hivi sasa ninamtumikia Bwana, ninaitumikia injili, na watu wa Mungu kwa moyo wangu wote nikiwa mtumishi wa Mungu.

Bwana alitaka tuieneze injili ya maji na Roho ulimwenguni kote hali tukiwa tumeiweka imani yetu kwake. Kwa kweli sikuliona neno uinjilisti kuwa ni neno gumu. Watumishi wa Mungu walipaswa kupewa majukumu muhimu kwa watumishi na watakatifu wenye karama mbalimbali. Na ikiwa wale ambao walikuwa wamepewa majukumu hayo ya kazi ya Mungu walijiona kuwa wana mapungufu, basi walichopaswa kukifanya ilikuwa ni kumtumainia Bwana na

kuendelea kumwomba Bwana, na kisha kuishi kwa imani. Hivi ndivyo tulivyoweza kuieneza injili ulimwenguni kote kwa kupitia huduma zetu za maandiko ya Kikristo hadi leo hii.

Sasa, kwa jambo lolote lile ambalo linaweza kumpendeza Mungu, basi tunapaswa kulifanya jambo hilo kwa imani. Inapofikia hatua ya kuiamini na kuitumikia injili ya maji na Roho, na inapofikia hatua ya kuishi kama watumishi wa Mungu, basi tunachotakiwa kukifanya katika mambo hayo ni kuishi kwa namna ambayo Bwana atafurahishwa na kazi zetu. Ikiwa Bwana atafurahishwa na kazi zetu, basi nitaendelea kuifanya kazi hiyo pamoja wenzangu.

Kila kitu ambacho tumekifanya hivi sasa kimefanywa na Mungu Mwenyewe. Ni Mungu ndiye atakayetushika kwa nguvu zake na kufanya kazi kupitia kwetu. Sasa tunafanya kazi ya kuieneza injili ya maji na Roho, lakini kazi hii si kazi ambayo ilikuja toka katika mawazo au tamaa za wanadamu. Ikiwa kazi hii tunayoifanya ingelikuwa ilitokana na tamaa za mwanadamu, basi ni hakika kuwa tungelikuwa tumeiacha muda mrefu uliopita. Ikiwa tungelikuwa tunaitenda kazi hii kwa msingi wa haki yetu yenyewe, basi ni hakika kuwa tungeliisha iachilia hii kazi katikati. Na kama tungelikuwa tumejivunia kazi zetu binafsi, basi mioyo yetu ingelikuwa imejawa na kiburi kiasi cha kuweza kujivuna hivi, “Kama kuna mtu yeyote yule mahali popote pale ulimwenguni aliyefanya kazi ya Mungu kama tulivyofanya sisi asimame ajitokeze.” Na kwa msingi huo tusingelikuwa hai hadi hivi leo kwa imani katika Bwana.

Sisi sote tulikuwa na mapungufu mengi sana na ndio maana hatukuweza kujivunia yale ambayo tulikuwa tumeyafanya katika maisha yetu. Na ndio maana sisi sote tulimtegemea sana Bwana na tuliomba msaada wake kwa nguvu sana. Kama tulingelikuwa na majivuno na kiburi, na ikiwa tungeliweza kufanya jambo lolote lile kwa urahisi kwa

kuzitegemea nguvu zetu wenyewe, basi kungelikuwa na haja gani basi ya kumtegemea Bwana hata katika mambo madogo?

Wale ambao wanajivunia matendo yao mema na ambao wanazitegemea nguvu zao binafsi kwa hakika hawezi kuishi karibu na Bwana na wala hawawezi kumtumainia. Kwa kuwa kila mtu ana mapungufu na si mkamilifu, basi wanadamu wanaweza kuishi kama wenye haki ikiwa tu watasaidiwa na Bwana. Kwa kweli hatupaswi kabisa kujitathmaini kuzidi uhalisia wetu, maana bado kuna kazi nyingi zaidi ambazo zimebaki zinahitaji kufanywa. Kwa kweli tunatoa shukrani kwa nguvu ambazo Mungu ametupatia na baraka zake ambazo zimetuwezesha kuitumikia injili ya maji na Roho hadi hivi sasa. Ni lazima tutambue kuwa kila kitu tulichoweza kukifanya kiliwezekana kwa sababu ya msaada wa Bwana.

Sisi Sote ni Lazima Tuishike Imani Yetu Kama Watumishi wa Mungu

Ni sahihi sana kwa wale ambao wamepokea ondoleo la dhambi zao kuiweka mioyo yao kama watumishi wa Mungu. Utofauti wa kiimani unaamuliwa kutokana na ikiwa akili zetu zimejipanga kama watumishi wa Mungu au la. Kuziweka akili zetu ili ziweze kutufanya tuishi kama watumishi wa Mungu ni jambo la muhimu zaidi kuliko hata kuwa na ufahamu wa vifungu vya maandiko au uwezo wa kulihubiri Neno la Mungu. Ni lazima tuiweke sawasawa mioyo yetu ili tuweze kuishi kama watumishi mbele za Bwana, na ni lazima tuishi kama watumishi wa Mungu. Ni lazima tujifunze kuiweka mioyo yetu mbele za Mungu kama watumishi wake kwa imani.

Wakati watu wanapooana, kiongozi wa ndoa atauliza hivi, “Je, unamchukua mchumba huyu kuwa mke wako halali, wa

kuambatana naye, kuanzia leo hii na kuendelea, kwa mema, kwa mabaya, katika ugonjwa, na katika afya, na katika upendo na furaha hadi kifo kitakapowatenganisha?” Basi Bwana harusi atasema, “Ndio namchukua.” Vivyo hivyo, tukiwa kama watumishi wa Mungu tunaoyafuata mapenzi yake, basi inatupasa sisi kuishi kwa ajili ya mapenzi ya Mungu tu iwe ni katika nyakati za mafaniko au shida.

Tunapaswa kujifunza toka kwa Mtume Paulo juu ya namna ya kuiweka mioyo yetu kama watumishi wa Mungu. Tunapaswa kujifunza kuona jinsi ambavyo watumishi waliotutangulia walivyoitafsiri Biblia, walivyohubiri, na jinsi walivyozitekeleza huduma zao. Kusema kweli, mambo hayo si ya muhimu sana ukilinganisha na umuhimu wa kuishi kama mtumishi wa Mungu. Kwetu sisi tunaoamini katika injili ya maji na Roho, Mungu ameifanya mioyo yetu kuwa ni vyombo vyake ya kuitenda kazi ya Mungu. Hivyo, tunachopaswa kukifanya ni kumtumikia Bwana kwa namna ambayo Mungu ametufanya sisi kuwa vyombo vyake.

Ninapowaangalia watenda kazi wenzangu na akina kaka na akina dada, basi huwa ninaangalia ikiwa mioyo yao imejitoa kwanza kama watumishi wa Mungu. Ikiwa tunataka kuishi mbele za Mungu tukiwa watumishi wa Mungu, basi wema au ubaya wa miili yetu ni kitu kisicho na maana kabisa. Haki yetu binafsi ni kitu kisicho na maana kabisa mbele za Mungu. Haki ya mwanadamu inapigwa ngumi moja tu mbele za Mungu. Mungu anaikubali au kuikataa imani yetu kutokana na namna tunavyoiamini haki yake.

Kwa hiyo, yafuatayo ni mambo ambayo tunapaswa kujichunguza ili tuweze kuwa watumishi sahihi wa Mungu: “Je, sisi sote tuna imani katika injili ya maji na Roho? Je, tumeiunganisha mioyo yetu pamoja na Yesu Kristo? Je, sisi watumishi wa Mungu au watumishi wa wanadamu? Ingawa

tuna mapungufu, je tunaishi kwa imani yetu katika Neno la Mungu, je, tumeiweka mioyo yetu kama watumishi wa Mungu?”

Hivi karibuni Kanisa la Deagu Magharibi lilikumbwa na janga. Mtumishi wa Mungu wa kike alifariki kwa ajili ya gari wakati alipokuwa akimtumikia Bwana. Kwa kweli lilikuwa ni janga ambalo lilivunja sana mioyo ya watu na ni janga ambalo sijawahi kukutana nalo katika miaka ya huduma yangu mbele za Mungu. Kwa kweli tukio kama lile ninaomba lisitokee tena kwetu. Kwa kweli kadri tunavyoendelea kumtumikia Bwana hadi siku atakaporudi, basi inapendeza sana tuzimpoteze yeyote yule ambaye Mungu ametupatia kwa ajili ya kuitumikia injili. Ikiwa tukio kama hilo lilitokea pengine kwa sababu tulikuwa wazembe mbele za Mungu au wanadamu, wakati ambapo tungelipaswa kuwa makini zaidi, basi hilo litakuwa ni kosa letu kabisa. Na kwa sababu hiyo, tunapolijadili tukio hili hatupaswi kusema kuwa Mungu amemchukua mtumishi wake. Hiyo ni kutokana na ukweli kuwa Mungu ameipokea roho ya mtumishi wake, lakini Mungu hakumchukua mtumishi wake huyo kwa makusudi. Hii ni kutokana na ukweli kuwa kwa sehemu fulani tulishindwa kuiweka mioyo yetu kama watumishi wa Mungu na tulikuwa na uzembe wakati tukimtumikia Bwana.

Ndugu waamini wenzangu, ni aina gani ya watu ambao ni watumishi wa Mungu? Ikiwa kweli sisi ni watumishi wa Mungu, basi tunapaswa kuyafuata mapenzi yake. Na ikiwa baadhi yetu tungeliacha kumfuata Bwana ati kwa sababu tu tunakabiliana na mambo magumu, basi ni hakika kuwa tusingelikuwa wanyoofu mbele za Mungu. Je, watu wenye kuacha kumfuata Bwana kwa sababu ya ugumu wa jambo ni watumishi wa Mungu? Hapana, kwa kweli hapana!

Ikiwa kweli sisini watumishi wa Mungu, basi hata kama

tuna mapungufu na hata kama hatuwezi kuwa wakamilifu katika matendo yetu, basi jambo muhimu kwetu ni kuendelea kumfuata Bwana hadi siku ya mwisho. Yaani ikiwa mtu ameuweka moyo wake kama mtumishi wa Mungu basi anatakiwa kuyafuata mapenzi ya Bwana wakati wote. Ingawa mtu yeyote anaweza kuokolewa toka katika dhambi kwa kuiamini injili ya maji na Roho, ukweli ni kuwa si kila mtu anaweza kuuweka moyo wake kama mtumishi wa Mungu.

Na ndio maana watumishi wa Mungu wanatajwa kama nuru ing'aayo inayowaongoza watu wengi kwenda kwa Yesu Kristo. Ikiwa watakatifu au watumishi wasaidizi wanaposhughulika na watumishi wao walio viongozi, na ikiwa watafikiria hivi, "Ndio, wao na sisi tupo sawa," basi watakatifu hao wanapaswa kutambua kuwa hawana macho ya kuweza kuwatambua watumishi wa Mungu na viongozi. Ule ukweli kuwa viongozi-watumishi wameweza kukaa katika Kanisa la Mungu kwa muda mrefu na wameweza kumtumikia Bwana kwa uaminifu katika nyakati za amani na nyakati za majaribu, hilo tu linatosha kuwatambulisha kuwa wao ni wenye thamani. Kwa kweli litakuwa ni jambo baya ikiwa tutawadharau wale ambao walitutangulia katika safari ya kiimani kabla yetu. Watangulizi wenu wa kiimani wamezikana tamaa za miili yao na wamemtumikia na kumfuata Bwana kwa uaminifu, na wamefanya hivyo bila kujali mapito na mateso yote waliyoyapitia. Tunachopaswa kukiona toka kwa watumishi wa Mungu ni jinsi walivyoiweka mioyo yao kama watumishi. Hilo ni jambo muhimu sana la kujifunza kwao.

Baada ya kuwa nimekutana na Bwana, na wakati nilipokuwa nikimfuata, kwa kweli kulikuwa na nyakati ambapo nilipitia magumu kutokana na kutokuwa na vitu na vifaa mbalimbali. Pamoja na hali hiyo bado sikumlaumu Mungu kwa mazingira kama hayo. Badala yake, nilimshukuru Mungu kwa

baraka zake huku nikijisemea, “Bwana aliishi hapa duniani hakuwa hata na mahali pa kupumzisha kichwa chake, lakini mimi walau nina chakula cha kula na mahali pa kulala. Kwa kweli hii ni baraka kubwa kwangu!” Wakati nilipokuwa nikimfuata Bwana nimepitia majaribu mengi na mateso, na nimelia sana na kumwaga machozi mengi. Hata hivyo, niliweza kuyashinda magumu na huzuni hizo zote, na niliendelea kufurahi kwa kuwa injili iliendelea kuenezwa. Katika jambo lolote linaloweza kuwatokea watumishi wa Mungu, ni hakika kuwa wao wataridhishwa ikiwa tu mapenzi ya Mungu yanatimizwa.

Ikiwa watu wangelifikiria tu namna ya kuishi, basi bila shaka wangelikuwa matajiri na maskini vile vile. Kitu kinacholeta tofauti ni kiwango cha maisha, lakini nje ya hapo kila mtu anaweza kufanya mambo yaende sawa kwa namna moja au nyingine. Kwa lugha nyingine, mazingira ya kimwili si tatizo kubwa.

Kama kuna jambo ambalo linawaudhi sana watumishi wa Mungu, ni wakati watu wanapoikataa injili na kukataa kuiamini injili. Pamoja na kuwa Bwana ametueleza kuwa wale wanaoona njaa na kiu ya haki yake wamebarikiwa, ukweli ni kuwa watu wanaoikataa injili maana yake hawana njaa wala kiu ya haki ya Mungu, na ndio maana ikifikia hapo watumishi wa Mungu wanapata ile hasira yenye haki. Ukweli ni kuwa sio tu kwamba watu hawawezi kula vitu vya kimwili kiasi cha kuwafanya wapitie nyakati ngumu, bali ni kwa sababu watu wa jinsi hiyo wanashindwa kujitoa ili watembe kwa imani katika haki ya Mungu, kwa kweli wanachopaswa kukifanya ni kuishi kwa kuiamini hii haki ya Mungu.

Niniwasihi ninyi nyote watumishi na wake zenu kuwa na imani ya watumishi wa Mungu na kisha kuishi kwa imani hiyo katika mioyo yao. Sisi sote tunaishi hivyo, lakini ninawasihi

kwa mara nyingine kuendelea kuishi maisha yanayowastahilisha kuwa watumishi wa Mungu. Tunachopaswa kukikumbuka ni kuwa ni muhimu sana kwetu sisi kuiweka imani yetu na mioyo yetu kama watumishi wa Mungu katika maisha yetu. Tunapaswa kuendelea kuishi kwa mujibu wa haki ya Mungu bila kujalisha matoeko ya huduma yetu, yaani ikiwa ni matokeo mazuri au mabaya. Hiyo ndiyo imani sahihi.

Kwa sasa tunaieneza injili ya maji na Roho ulimwenguni kote. Je, injili hii ilitoka wapi?

Katika Wagalatia 1:11-12 Mtume Paulo alisema, “*Kwa maana, ndugu zangu, injili hiyo niliyowahubiri, nawajulisha ya kuwa siyo ya namna ya kibinadamu. Kwa kuwa sikuipokea kwa mwanadamu wala sikufundishwa na mwanadamu, bali kwa ufunuo wa Yesu Kristo.*” Paulo aliweka wazi kuwa injili ya maji na Roho aliyoipokea haikuwa ya kujifunza toka kwa mwanadamu. Bali alikuwa ameipata toka kwa Yesu Kristo aliyemwonyesha injili hiyo, na ndio maana Paulo aliamini injili hiyo na kuihubiri kwa wengine.

Wakati tunapoihubiri injili ya maji na Roho ulimwenguni kote, baadhi ya watu wanatuuliza “Je, injili hii ni sehemu ya mafundisho yenu ya kidini ya kipeee yanayopatikana katika dhehebu lenu tu? Je, msingi wa kibiblia wa injili hii ni upi?” Watu hawa wanafikiri kuwa injili ya maji na Roho inaweza kuwa ilitoka kwa mwanadamu, kwa kweli huo sio ukweli. Injili ya maji na Roho si injili iliyoundwa na mwanadamu. Injili ya maji na Roho ni injili ya kibiblia (1 Wakorintho 15:3-4), na ni injili halisi ambayo imeitimiza mpango wa Mungu wa wokovu uliokuwa umeundwa katika Yesu Kristo hata kabla ya kuwekwa kwa misingi ya ulimwengu.

Wakati Yesu Kristo Mwenyewe alipokuja hapa duniani, alizichukua katika mwili wake dhambi zote za mwanadamu

kwa kubatizwa na Yohana Mbatizaji alipokuwa na umri wa miaka 30, alikufa Msalabani, kisha akafufuka toka kwa wafu, na kwa sababu hiyo ametuokoa, inawezekanaje basi injili hii ikalinganishwa na mafundisho ya kidini ya toba yaliyotengenezwa na mwanadamu? Mungu alituwezesha kuufahamu Ukweli wa injili ya maji na Roho kwa kutupatia Neno lake, na baada ya kuwa tumeokolewa toka katika dhambi zetu kwa kuiamini injili hii tunaendelea kuihubiri injili hii kwa watu wengine. Injili ya maji na Roho ambayo tunaiamini ilikuja ikitokea kwa Mungu Mwenyewe. Je, wewe nawe unaamini hivi?

Tunaihubiri injili ya maji na Roho ambayo imeshuhudiwa katika Agano la Kale na katika Agano Jipya. Kama vile Mtume Paulo alivyoamini katika injili ya maji na Roho, akailinda, na kuihubiri, basi vivyo hivyo nasi tunaiamini injili hii, tunailinda, na kuieneza kwa imani. Injili ya maji na Roho ambayo tumeipokea kwa imani si kitu kilichokuja toka kwa mwanadamu. Injili hiyo ilitoka kwa Mungu Mwenyewe. Injili ya maji na Roho tuliopewa kwahakika imetufikia kupitia Yesu. Na ndio maana tunaieneza injili hii ulimwenguni kote hali tukiwa tumeiweka imani yetu katika injili hiyo. Hata kama watu wengi watatukataa na kutukana, ukweli ni kuwa sisi hatutasinzia hata kidogo.

Mtume Paulo aliihubiri injili ya maji na Roho hadi siku alipokuja na aliweza kufanya hivyo kwa sababu alikuwa ni mtumishi wa Mungu. Kwa kuwa hakuna mafundisho mengine yaliyo makuu kuliko injili hii, basi ndio maana Paulo hakutafuta mambo mengine. Chochote alichokifanya, yaani ikiwa alikula au alikula alifanya hivyo kwa utukufu wa Mungu (1 Wakorintho 10:31). Kitendo cha kuitangaza injili ya maji na Roho ulimwenguni kote ni kuishi kwa utukufu wa Mungu. Kama tungeliishi kwa lengo la kuieneza injili ya maji na Roho,

basi ni hakika kuwa tutakuwa tukiishi kwa ajili ya utukufu wa Mungu. Kwetu sisi hakuna maisha ya kiimani ambayo ni thamani kuliko haya.

Je, Ninyi ni Watumishi wa Mungu?

Mtume Paulo ni mtumishi wa Mungu. Wewe na mimi pia ni watumishi wa Mungu. Ikiwa wewe na mimi tumefanyika kuwa watumishi wa Mungu kwa kuiamini injili ya maji na Roho, basi ni hakika kuwa tutakuwa waaminifu kuitenda kazi ambayo ametupatia. Hivi karibuni nilisikia kuwa mtenda kazi fulani alikuwa hajaridhishwa katika moyo wake kiasi akasema hivi, “Ningelikuwa mwaminifu sana kama ningepewa nafasi ya kuwa mchungaji kiongozi katika kanisa, lakini kwa bahati mbaya hawajanipa nafasi hiyo,” na kwa sababu hiyo alikuwa akiyapuuzia majukumu yake ya kihuduma kama mchungaji mwanafunzi.

Ikiwa nafasi yake si mchungaji kiongozi, je, majukumu yake anayoyatenda akiwa kama mchungaji mwanafunzi hayana maana? Hapana, kwa kweli si hivyo. Chochote ambacho Mungu ametupatia kukifanya kupitia Kanisa lake ni kitu chenye thamani sana. Kwa kweli mimi huwa sibagui mtu kwa msingi wa nafasi aliyo nayo ikiwa ni mchungaji kiongozi au mchungaji mwanafunzi. Kaka zetu na dada zetu wanaomtumikia Bwana wote ni wenye thamani sana. Katika Kanisa la Mungu hakuna ambaye ni wachini kuliko mwingine wote ni sawa tu.

Ndio maana inanitia huzuni sana ninapowaona baadhi ya watu wanaposhindwa kuzingatia vizuri yale majukumu ambayo wamekabidhiwa. Mnafahamu kuwa kuyatekeleza majukumu ambayo tumekabidhiwa hali tukiwa tumeiweka imani yetu kwa

Bwana ni jambo gumu, kama ni hivyo ni kwa nini basi tunaiinua mioyo yetu binafsi namna hiyo? Mambo kama hayo ni kutafuta utukufu binafsi.

Je, si jambo la thamani sana kwetu sisi kuitumikia injili ya maji na Roho? Tunapoifanya kazi ya Mungu ni muhimu sana kwetu kujitoa kikamilifu kwa jukumu lolote lile ambalo tutakuwa tumekabidhiwa, maana kufanya hivyo ni hazina kwetu sisi. Tendo la kulihubiri Neno la Mungu ni jambo lenye thamani kabisa. Kwa hakika jambo lolote lile tunalolifanya katika kuihubiri injili ya maji na Roho ni jambo lenye kusifiwa sana. Ikiwa Mungu angekuwa amenikabidhi kufanya kazi nyingine badala ya kulihubiri Neno lake, basi ni hakika kuwa ningelikuwa nimeutoa uhai wangu kwa ajili ya hiyo kazi.

Mtumishi wa Mungu ni yule ambaye akikabidhiwa jukumu fulani na Bwana kulitenda analitenda kwa uaminifu. Jambo lolote ambao watumishi wa Mungu wanalifanya, iwe ni kula au kunywa wanapaswa kulifanya kwa utukufu wa Mungu, na kutokana na ukweli huo, ni kwa nini basi wengine wapendelewe kuliko wengine? Je, tunakuwa watumishi wema wa Mungu wakati tunapofanya jambo la heshima, na kwamba hatuwi watumishi wema pale tunapofanya jambo ambalo watu wanalionga kuwa ni la chini? Kama ni hivyo, ni nani aliyeanzisha viwango na utaratibu huo wa kutenganisha kati ya jambo jema la kihuduma na jambo la kawaida la kihuduma? Katika utawala wa Mungu, tunapokuwa waaminifu kuyafanya yale ambayo Mungu amekabidhi basi hilo pekee linakuwa ni jambo lenye thamani sana; na kama tutakuwa waaminifu kuyafuata mawazo yetu ya kimwili, basi tutakuwa tukitenda mambo ambayo yanastahili kudharauliwa. Mnapaswa kuyafahamu haya na kuyaamini.

Kwa kweli nina matumaini na ninaomba ili kwamba ninyi nyote muweze kuwa watumishi wa Mungu kwa kuiweka imani

yenu katika injili ya maji na Roho na kisha kuisha maisha yenu yote yaliyosalia kwa thamani. Kwa wale ambao tumezaliwa tena upya kwa maji na Roho ni hakika kuwa hakuna jambo jingine lenye thamani kuliko hili. Kile ambacho mmekabidhiwa kukifanya ni jambo lenye thamani sana, na siku ya Bwana itakapowadia, ni hakika kuwa Mungu naye atawapongeza kwa kuitenda hiyo kazi kwa uaminifu, atawaambia hivi, “Safi sana, watumishi wangu wazuri na wema!”

Kwa sasa, mnapaswa kuichunguza mioyo yenu kwa uangalifu ili kuona ikiwa mnafanya kazi na kutumika kwa usahihi kama watumishi wa Mungu. Ikiwa tunaishi maisha yetu ya kiimani hali tukiwa tumeyaweka mawazo yetu kama watumishi wa Mungu, basi ni hakika kuwa tutawakuwa tukifanya yale ambayo tunapaswa kuyafanya. Kwa kweli hakuna kitu chochote kile cha kujivunia mbele za Bwana. Kwa kweli mara nyingi hatuna kitu cha maana cha kuweza kumpata Mungu zaidi ya mapungufu yetu. Kwa kuwa kwa asili sisi tuna mapungufu, basi ndio maana hatuwezi kumtumikia Bwana kwa ukamilifu, na ndio maana tuna mapungufu mengi sana na tuna visingizio vingi sana. Lakini pamoja na hayo, Mungu anataeleza kuwa waaminifu hadi kifo, na kwa sababu hiyo Mungu anataeleza kuitenda kazi mbele zake hali tukiwa tumeiweka mioyo yetu kama watumishi wake.

Mtumishi wa Mungu ni yule ambaye anayatii mapenzi ya Mkuu wake kiasi cha kuweza kuutoa uhai wake. Ikiwa hatutaweza kuyatoa maisha yetu kwa ajili ya kazi ya Mungu, basi kwa kweli tunapaswa kulifurahia hilo kwa mioyo hiyo, maana hayo ndio mapenzi ya Mungu. Watumishi wa Mungu ni lazima wawe na aina ya imani inayozifurahia kazi za Mungu Mkuu wao. Watumishi wa Mungu ni lazima waawe na aina ya imani ambayo inatekeleza yale ambao Mungu Mkuu amewapatia, na wanapaswa kufanya hivyo bila kujali kuwa

wengine wanafanya nini. Ingawa sina ufahamu sana katika kuandika insha za ufahamu, ukweli ni kuwa kama nitakabidhiwa jukumu hilo nitajitahidi sana kufanya kile nilichokabidhiwa nikifanye.

Je, mnafahamu kuwa tumekuwepo kwenye huduma hii ya maandiko tangu wakati gani? Tulianza huduma hii mapema kabisa tulipoanza huduma hii ya Utume. Je, mnafahamu mkazo na maono yetu tuliuelekeza wapi tulipoanza huduma hii? Tulianza huduma hii kwa kuweka mkazo katika kuieneza injili ya maji na Roho ulimwenguni kote. Kuanzia wakati huo niliyatunza mahubiri yangu na kuyaanda ili yaweze kuchapishwa, na nilifanya hivyo nikiamini kuwa tutaweza kuieneza injili ya maji na Roho na kuzitunza nafsi za wale waliozalitea tena upya ulimwenguni kote kwa kupitia huduma ya maandiko, na kusema kweli matarajio yangu yalifikiwa.

Kusema kweli, kitu chochote ambacho Mungu ametukabidhi ni cha thamani sana, na ndio maana tunazifanya hizi kazi zote kwa imani. Kwa kweli, mimi na wewe ambao tunaotumikia injili ya maji na Roho ndio tunaoitenda kazi yenye thamani sana hapa ulimwenguni. Kwa mfano, baadhi ya kaka zetu wanashughulika kuangalia mfumo wa kupasha joto uwe vizuri ili watakatifu wanaomwabudu Mungu waweze kupata joto. Majukumu kama haya ni majukumu mema kwa sababu yote ni sehemu ya kazi za Mungu. Kusema kweli, hakuna kitu ambacho tunaona aibu kukifanya, hii ni kwa sababu sisi tumeokolewa toka katika dhambi zetu zote. Kwa kuwa tumeokolewa toka katika dhambi zetu zote na kwa kuwa tunaifanya kazi ya Mungu, basi mahali popote pale tutakapokuwa tukifanya kazi tutakuwa na ujasiri, na haijailishi tunalolifanya kama litaonekana kuwa ni jambo lisilo na heshima kwa watu we ulimwenguni, sisi tutaendelea kulifanya jambo hilo pasipo aibu yoyote ile. Kwa upande mwingine, kwa

kweli tunawaonea huruma watu wa ulimwenguni. Wanatia huruma kwa sababu hawajaweza kuonana na Bwana.

Wahudumu wetu wote, kaka na akina dada, na watenda kazi wetu ni wenye thamani sana. Na kati ya hao wale ambao wameiweka mioyo yao kama watumishi wa Mungu ni wenye thamani zaidi. Tunapoitumikia injili ya maji na Roho, basi mioyo yetu itawekwa na kuwa kama watumishi wa Mungu, na tunapomfuata Bwana, basi katika kipindi fulani imani yetu itakua na kuwa ile ya watumishi wa Mungu na kwa sababu hiyo tutafikia hatua ya kuishi kwa imani. Na ndio maana tunamtumikia Bwana; kwa kweli kama tungelimfuata Bwana pasipo mapenzi yetu na pasipo moyo wa kujitoa, basi ni hakika kuwa tusingeliweza kumfuata Bwana hadi mwisho.

Kwa kweli ni vigumu sana kumtumikia Bwana kwa unyenyekevu katika Kanisa la Mungu pasipo kuwa na imani. Wakati Kanisa linapokukabidhi jukumu fulani ulifanye, wakati mwingine sera zake zinaweza kubadilika mara kwa mara, na wakati mwingine jukumu lako linaweza kusimamishwa hata kama unafanya kazi kwa juhudi sana. Hivyo, kutokana na mazingira hayo, na kama ulikuwa haufanyi kazi kwa imani, basi unaweza kukasirishwa na hivyo ukashindwa kutii hadi mwisho. Hata hivyo, ikiwa ninyi ni watumishi wa Mungu, basi mnaweza kuyatupilia mbali mawazo ya uasi kama hayo na kisha kujitoa kwa ajili ya mapenzi ya Bwana. Kama ambavyo Mtume Paulo aliishi katika maisha yake kwa moyo wake na kwa imani yake akiwa kama mtumishi wa Mungu, basi ni matarajio yangu kuwa Mungu atatupatia nasi moyo kama huo aliokuwa nao mtumishi wa Mungu.

Ninapowaangalia wahudumu wetu pamoja na akina kaka na akina dada, basi mara nyingi huwa ninatamani sana kuiangalia mioyo yao. Ninapowaangalia watumishi hao ninaweza kufahamu hali ya mioyo yao pasipo kuongea nao

maneno mengi. Huwa ninawaambia kuwa ikiwa wao ni watumishi wa Mungu basi kwa hakika ni watu wenye thamani kuliko watu wengine, na hata kama wamepokea tu ondoleo la dhambi zao na bado hawajaiweka mioyo yao kama watumishi wa Mungu, mimi huwa ninatumia nafasi yangu kuwatia moyo. Huwa ninawashauri baadhi ya watu kuendelea kuhudhuria katika Kanisa la Mungu kwa uaminifu. Nitakapoifahamu hali ya moyo wa mtu basi hapo ninakuwa na nafasi nzuri ya kumweza kumwongoza mtu huyo kulingana na nyakati zilivyo.

Sisi sote tunatakiwa kukubaliana na jinsi moyo wa Mtume Paulo ulivyokuwa ukitamani. Ikiwa tungelikuwa tunataka kuwapendeza wanadamu, basi hii ingelimaanisha kuwa sisi si watumishi wa Mungu. Pia tunapaswa kutambua kile ambacho moyo wa Mungu unataka. Je, mtumishi wa Mungu anatakiwa kumfurahisha nani? Anapaswa kumfurahisha Mungu Mwenye na si mtu mwingine yeyote yule. Yeye anayempendeza Mungu ndiye mtumishi wa kweli wa Mungu.

Katika Kanisa la Mungu kuna aina fulani ya utaratibu wa kiimani. Wakati kila mmoja wetu anapoutii utaratibu wa kiimani ndani ya Kanisa la Mungu, basi jambo hilo halijalishi umri wa miili yetu. Paulo alimwambia Timotheo, *“Mtu awaye yote asiudharau ujana wako” (1 Timotheo 4:12)*. Haijalishi watangulizi wenu wa kiimani wana umri gani, yaani ikiwa ni vijana au wazee, ikiwa mnaamini kuwa Bwana anatenda kazi ndani yao, na ikiwa mnawatii, basi kwa hakika hiyo ndiyo imani kuu. Tunapaswa kumwendea Mungu tukiwa na imani katika mioyo yetu, tunapaswa kutenda kazi kwa imani, tunapaswa kuwashughulikia kaka na dada zetu kwa imani, pia tunapaswa kuwaheshimu watumishi wa Mungu kwa imani, na vivyo hivyo tunapaswa kuwajali watu wote waume kwa wake kwa imani. Bila kufanya hivyo sisi sote tutakuwa ni wanafiki. Kwa hakika, tunapojaliana kwa imani, ni hakika kuwa

hatutaweza kuwa na upweke, bali tutasimama kama familia moja pamoja na Mungu.

Watumishi wa Mungu wanafurahia wanapoiona injili ikienezwa, na wao hufurahia kuona Ufalme wa Mungu ukipewa nafasi kubwa. Ikiwa tunaia mini injili ya maji na Roho na ikiwa tuna nia ya kuieneza injili hii, basi ni hakika kuwa tutaishi hali mioyo yetu ikiwa imejipanga kama watumishi wa Mungu. Na ikiwa tumeiweka mioyo yetu kama watumishi wa Mungu, basi ni hakika tunapaswa kutozingatia mambo madogo madogo na bahati mbaya katika Kanisa la Mungu. Ikiwa jambo hili linaweza kuwau na manufaa kwa kazi ya Mungu, basi tunapaswa kulifanya jambo hilo kwa imani. Mara nyingi watu wanafikiri kuwa mtumishi wa Mungu ni lazima aishi katika Kanisa la Mungu akiwa na maisha safi yenye uaminifu wa hali ya juu kuliko maelezo, yaani maisha ya umaskini wa nia, na utakatifu; lakini ni vema kufahamu kuwa mtumishi ni mtu anayetenda kazi kwa lengo la kutimiza mapenzi ya Mkuu wake. Lengo la watumishi wa Mungu ni kufanya kile kinachopaswa kufanywa ili kuyatimiza mapenzi ya Bwana hata kama jambo hilo halikubaliki katika mawazo yao binafsi.

Tunapomtumikia Bwana, wakati mwingine matukio ya bahati mbaya huwa yanajitokeza, lakini ifahamike kuwa Mungu anafanya kazi na watu wenye mapungufu kama sisi. Na ndio maana tunakuwa watu wa shukrani sana. Hakuna kati yetu anayeweza kuitenda kazi ya Mungu pasipo kuwa na mawaa. Pia Bwana Mwenyewe analifahamu jambo hili kwa kina. Yeye anachoangalia ni ikiwa mioyo yetu imejipanga kama watumishi wa Mungu, na ikiwa tutakuwa na moyo na imani kama hiyo ya kiutumishi, basi hapo ndipo Mungu atakapotupatia mahitaji yetu yote ili tuendelee kuifanya kazi ya Mungu. Kwa kuwa hivi ndivyo mapenzi ya Mungu yanavyotimizwa, basi ni hakika kuwa watumishi wake

wanafurahishwa na hali hii.

Kila siku ninapata taarifa toka katika kitengo cha utume wakinitumia shuhuda za wokovu na maelezo toka kwa watenda kazi toka ulimwenguni kote. Kila wakati ninapozisikia habari kama hizo ninamshukuru sana Bwana kwa kunipata nafasi ya kuweza kumtumikia. Nikifikia hapo ndipo ninapotambua kuwa “Hata tunapokuwa tumelala, Bwana bado anatenda kazi. Hivyo watu wengi sana wamevisoma vitabu vyetu na wamepokea ondoleo la dhambi zao, na sasa wanatutumia shuhuda zao za wokovu. Kama vile Bwana alivyosema kuwa yeye hasinzii wala halali, kwa hakika Bwana anatenda kazi bila kuchoka.” Kila ninapofikiria kuhusu hili, kwa kweli ninajikuta nikimshukuru Bwana zaidi na zaidi, na huwa ninapiga magoti na kumwomba Mungu ili aweze kunitumia zaidi na zaidi katika hii kazi ya Bwana yenye thamani. Wakati mwingine tunamshukuru sana Mungu kwa kutufanya tuweze kuzaa matunda kuliko vile tulivyotegemea. Ingawa katika nyakati mbalimbali tunajikuta tukiwa na mahangaiko fulani, ukweli ni kuwa tumepokea baraka nyingi kuliko hata tulivyofanya kazi, na ndio maana tunamshukuru sana Mungu kuliko kawaida.

Mtumishi ni yule anayetafuta faida ya mkuu wake na si faida yake binafsi. Ninyi na mimi ni lazima tuiweke mioyo yetu kama watumishi wa Mungu na kisha tuishi maisha yetu kwa ajili ya faida ya Bwana. Kwa hakika kuna akina dada na akina kaka ambao wamejitoa kwa Mungu ili kuishi kama watumishi wake. Watumishi wa jinsi hiyo na ambao ni watenda kazi pia waume kwa wake ni wenye thamani sana. Kwa kweli kila nafsi ni ya thamani. Hakuna hata mmoja kati ya wale waliozaliwa tena upya kwa maji na Roho ambaye hapendwi na Mungu. Hao wote ni kaka na akina dada, na ni watenda kazi wa Ufalme wa Mungu, na jamaa wa Yesu Kristo. Yeyote anayejidai yeye mwenyewe, kana kwamba yeye ni

samaki mkubwa katika bwawa, basi mtu wa jinsi hiyo kwa hakika hafahamu mahali ambapo moyo wa mtumishi wa Mungu unapaswa uwepo.

Wahudumu wetu mara nyingine hukusanyika na kutaka ushauri toka kwa viongozi wakongwe wa kanisa huku wakiwauliza hivi, “Kanisa kwangu limetokea jambo hili na hili. Nifanye nini?” Sisi pia huwa tunaulizana kuhusiana na uinjilisti ulimwenguni kote, na huwa tunagawana majukumu tuli yokubaliana miongoni mwetu pia. Kwa hakika ni jambo la kushukuru unapoona kuwa umekabidhiwa jukumu lolote katika yale yaliyokuwepo. Mambo haya yote yanafanywa hivyo ili kupata njia bora kabisa ya kuweza kuitumikia injili. Hii haijalishi yale yanayoweza kutokea kwetu, jambo la muhimu zaidi kwetu sisi ni kuieneza injili kwa uaminifu. Kanisa la Mungu mara nyingi huwa linatazama mbele, huwa linatoa maono, na linaunda sera maalum zitakasaidia kutenda kazi. Hata hivyo, kabla ya hizo kazi zote hazijatekelezwa, Kanisa ni lazima kwanza libainishe ikiwa kazi hizo zinafanyika kwa mujibu wa mapenzi ya Mungu. Inapofikia hatua ya kuzitekeleza hizo kazo, basi mara zote huwa tunamtegemea Mungu, na huwa tunazifanya hizo kazi kwa maombi yasiyokoma.

Ikiwa watumishi wa Mungu watakutwa sana na masuala ya mali na vitu, basi ni hakika kuwa hawataweza kuishi kama watumishi wa Mungu. Mtumishi wa Mungu atabaki kuwa mtumishi tu bila kujalisha kuwa ni tajiri au maskini. Mawakili wanatakiwa kusimamia kila kitu vizuri na kisha kuacha mambo yote. Moyo wa mtumishi unavutiwa zaidi na kuieneza injili tu.

Hebu basi tuishi maisha yetu yote yaliyosalia tukiwa watumishi wa Mungu, hali tukiwa tumeiweka imani yetu katika injili ya maji na Roho, na kisha twende na kusimama mbele za uwepo wa Mungu. Nina kina ujasiri kwamba kadri ulivyoweza kuishi kwa imani hadi wakati huu, vivyo hivyo

utaendelea kuishi kwa imani hadi hapo baadaye. Siku zijazo, hatupaswi kamwe kuupoteza msisitizo wetu kama watumishi wa Mungu, na wala hatupaswi kutafuta faida zetu binafsi au utukufu wetu binafsi, bali tunapaswa kujitoa kwa ajili ya kazi ya Mungu na kisha kuishi maisha yetu kwa imani kwa ajili ya haki ya Mungu. Ni hapo ndipo tutakapoweza kutembea pamoja na Kristo na kisha kuishi maisha yetu tukiwa tumeungana na Bwana.

Kuna mambo mengi sana ambayo siyafahamu. Si kwamba mimi ni bora kuliko wengine kiasi cha kuweza kuwasilihi ninyi kama hivi ninavyofanya. Ninafanya hivyo kwa sababu Mungu amewaiteni ninyi kuwa watumishi wake na amewakabidhi kazi yake. Ninaamini kuwa mtayatekeleza majukumu ambayo mmepewa kwa uaminifu. Mimi ninaamini kuwa mtatenda hivyo kwa kuwa ninyi na mimi sote tuna Roho Mtakatifu katika mioyo yetu.

Ninafuraha kuishi kama mtumishi wa Mungu. Ninafuraha kuona kuwa chochote ninachokifanya ikiwa ni kula au kunywa ninafanya hivyo kwa utufukufu wa Mungu. Sasa, baada ya ibada hii ya sifa kuishia, basi sisi sote tutaumega mkate pamoja. Kila mmoja wetu atakula na kufurahi kwa pamoja. Mungu alitueleza kuwa chochote tunachokifanya, ikiwa ni kula au kunywa, basi tufanye hayo yote kwa utukufu wa Mungu (1 Wakorintho 10:31). Ndio maana nina furaha. Je, na ninyi mna furaha?

Ingawa tuna mapungufu, ni hakika kuwa bado tuna furaha, kwa kuwa tunaweza kuishi kwa ajili ya Bwana huku mioyo yetu ikiwa imeandaliwa kama watumishi wa Mungu. Hivyo, hebu sisi sote tuishi kwa furaha hali tukiwa na imani katika Bwana. Ninaamini kuwa Mungu ametupatia imani ambayo imetuokoa toka katika dhambi na kwamba ametupatia nguvu na baraka ya kuweza kuzitenda kazi zake ili kulitimiza jukumu hili.

Ninatoa shukrani zangu zote kwa Mungu. Halleluya! ☒

Imani ya Mtume Paulo na Maonyo Yake Kwa Wanatohara

< Wagalatia 1:1-17 >

“Paulo, mtume, (si mtume wa wanadamu, wala kutumwa na mwanadamu, bali na Yesu Kristo, na Mungu Baba aliyemfufua kutoka kwa wafu), na ndugu wote walio pamoja nami, kwa makanisa ya Galatia; Neema na iwe kwenu, na amani, zitokazo kwa Mungu Baba, na kwa Bwana wetu Yesu Kristo; ambaye alijitoa nafsi yake kwa ajili ya dhambi zetu, ili atuokoe na dunia hii mbovu iliyopo sasa, kama alivyopenda Mungu, Baba yetu. Utukufu una yeye milele na milele, Amina. Nastaajabu kwa kuwa mnamwacha upesi hivi yeye aliyewaita katika neema ya Kristo, na kugeukia injili ya namna nyingine. Wala si nyingine; lakini wapo watu wawataabishao na kutaka kuigeuza injili ya Kristo. Lakini ijapokuwa sisi au malaika wa mbinguni atawahubiri ninyi injili yo yote isipokuwa hiyo tuliyowahubiri, na alaaniwe. Kama tulivyotangulia kusema, na sasa, nasema tena, mtu awaye yote akiwahubiri ninyi injili yo yote isipokuwa hiyo mliyoipokea, na alaaniwe. Maana, sasa je! Ni wanadamu ninaowashawishi, au Mungu? Au nataka kuwapendeza wanadamu? Kama ningekuwa hata sasa nawapendeza wanadamu, singekuwa mtumwa wa Kristo. Kwa maana, ndugu zangu, injili hiyo niliyowahubiri, nawajulisha ya kuwa siyo ya namna ya

kibinadamu. Kwa kuwa sikuipokea kwa mwanadamu wala sikufundishwa na mwanadamu, bali kwa ufunuo wa Yesu Kristo. Maana mmesikia habari za mwenendo wangu zamani katika dini ya Kiyahudi, kwamba naliliudhi kanisa la Mungu kupita kiasi, nikaliharibu. Nami naliendelea katika dini ya Kiyahudi kuliko wengi walio hirimu zangu katika kabila yangu, nikajitahidi sana katika kuyashika mapokeo ya baba zangu. Lakini Mungu, aliyenitenga tangu tumboni mwa mama yangu, akaniita kwa neema yake, alipoona vema kumdhihirisha Mwanawe ndani yangu, ili niwahubiri Mataifa habari zake; mara sikufanya shauri na watu wenye mwili na damu; wala sikupanda kwenda Yerusalemu kwa hao waliokuwa mitume kabla yangu; bali nalikwenda zangu Arabuni, kisha nikarudi tena Dameski.”

Maelezo ya Utangulizi Kuhusu Waraka wa Mtume Paulo kwa Makanisa ya Galatia

Wakati Mtume Paulo alipouandika waraka wake kwa makanisa ya Galatia, wanatohara walikuwa wamesababisha matatizo mengi sana kiasi kuwa makanisa yalikaibia kufungwa. Hivyo, katika hali ya kawaida, moyo wa Paulo ulikuwa na mashaka kwamba watu hao hawakupaswa kuachwa kama walivyo. Makanisa ya Galatia yalikuwa ni kusanyiko la wale ambao walikuw wameokolewa toka katika dhambi zao kwa kupitia injili ya maji na Roho ambayo Paulo alikuwa amehubiri. Mtume Paulo pamoja na watakatifu wa makanisa ya Galatia waliweza kuokolewa toka katika dhambi zao kwa sababu ya imani ya katika injili ya maji na Roho. Injili hii ya maji na Roho ni injili inayoeleza kuwa Yesu amewaokoa wenye dhambi wote toka katika dhambi za ulimwengu kwa

kupitia ubatizo wake alioupokea toka kwa Yohana na damu yake aliyoimwaga Msalabani. Ubatizo wake ulikuwa ni kwa ajili ya kuzichukua dhambi za ulimwengu katikamwili wake na kisha kulipa mshahara wa hizo dhambi kwa niaba ya wenye dhambi wote, kwa kuwa mshahara wa dhambi ni mauti.

Alichokuwa akikihofia Mtume Paulo kuhusu makanisa ya Galatia ilikuwa ni hilo ongezeko la ushawishi wa wanatohara. Imani ya hawa wanatohara ilikuwa kama ifuatavyo: Ili watu waweze kuwa watu wa Mungu, basi iliwapasa kumwamini Yesu na pia iliwapasa kutahiriwa. Wanatoahra katika makanisa ya Galatia waliona kuwa injili ya maji na Roho iliyotolewa na Mungu ilikuwa na mapungufu, na kwa sababu hiyo walitoa hojaj kuwa waamini wote ni lazima watahiriwe kimwili. Kwa hiyo, imani ya wanatohara ilikuwa ni ya kisheria, na ilikuwa ni tofauti kabisa na imani inayomwezesha kila mtu kupokea woovu kwa kuamini injili ya maji na Roho.

Katika macho ya Paulo, watakatifu wa makanisa ya Galatia walikuwa wakiangukia katika ushawishi wa imani ya kisheria. Kwa matokeo hayo, katika makanisa ya Galatia watu wengi sana walifikia hatua ya kuyapokea mafundisho potofu ya wanatohara. Paulo hakuwawacha wanatohara waendeleo na upotofu wao. Hivyo akawaambia hivi, *“Kama tulivyotangulia kusema, na sasa, nasema tena, mtu awaye yote akiwahubiri ninyi injili yo yote isipokuwa hiyo mliyoipokea, na alaaniwe”* (Wagalatia 1:9).

Mtume Paulo alifikia hatua ya kuikemea imani ya wanatohara kuwa ina makosa kwa kuwa yeye aliuamini Ukweli wa injili ya maji na Roho. Kwa maneno mengine, injili ambayo Mtume Paulo aliihubiri kwa makanisa ya Galatia ilikuwa ni injili ya maji na Roho, na wala haikuwa imani katika tohara ya kimwili. Katika Wagalatia 3:27-28, tunaweza kuona kuwa imani ya Mtume Paulo ilikuwa ni ile iliyoamini katika injili ya

maji na Roho kama inavyodhihirishwa katika Biblia: *“Maana ninyi nyote mliobatizwa katika Kristo mmemvaa Kristo. Hapana Myahudi wala Myunani. Hapana mtumwa wala huru. Hapana mtu mume wala mtu mke. Maana ninyi nyote mmekuwa mmoja katika Kristo Yesu.”*

Kwa kuwa injili ambayo Paulo aliiamini na kuihubiri kwa watu ilikuwa ni injili ya maji na Roho, ndio maana alionya kuwa wanatohara watalaaniwa na Mungu. Pia aliweka bayana kuwa injili yake haikuwa ya kujifunza toka kwa wanadamu na wala haikutoka kwa wanadamu, na wala haikuhusiana na tohara ya Agano la Kale. Bali injili ya maji na Roho ambayo Paulo aliiamini ilikuwa ni injili ya wokovu ambayo ilikuwa imeshuhudiwa katika Agano la Kale na Agano Jipya. Imani ya Paulo ilikuwa ni ile iliyoamini katika wokovu ambao ulikuwa umeangaziwa na ufunuo wa Yesu Kristo.

Kwa hiyo, Imani ya Paulo ilikuwa ni ya kipekee na yenye utofauti mkubwa na imani ya Wakristo wa siku hizi ambao wanaamini kuwa wanaweza kuziosha dhambi zao kwa kupitia sala zao za toba. Wakristo wa leo wanafikiria kimakosa kuwa wanaweza kuzioshelea mbali dhambi zao za kila siku kwa kufanya sala za toba kwa Yesu. Ni lazima tutambue kuwa imani hizi zote za kisheria, yaani imani ya wanatohara na imani ya sala za toba ni imani potofu ambazo zinaweza kuturudisha tena katika utumwa wa Sheria.

Katika kipindi cha Kanisa la Mwanzo, wanatohara walikuwa makini sana katika makanisa ya Galatia, na wanatohara hao walikuwa ni sawa na Wakristo wa siku hizi ambao wanaamini kuwa wanaweza kuziosha dhambi zao kwa kupitia sala za toba. Lakini ni lazima tutambue kuwa imani ya sala za toba ni imani potofu. Hata hivyo kwa kuwa Wakristo wengi sana siku hizi wanaishikilia imani hii kuwa wanaweza kwa kiwango fulani kuziosha dhambi kwa kupitia sala za toba,

ni hakika kuwa waamini hawa wamegeuka na kuwa waamini wajinga. Kwa hiyo, imani katika sala za toba ni upotofu mkubwa wenye majanga. Hivyo, ni muhimu kwa kila Mkristo kutambua kuwa mkazo katika sala za toba ni makosa makubwa na ni upotoshaji. Aina hii ya imani ni imani yenye makosa na inasimama kinyume na upendo wa haki wa Mungu.

Pamoja na hayo, hadi wakati huu hiyo imani ya kuwa mtu anaweza kuziosha dhambi zake kwa kufanya sala za toba bado ipo miongoni mwa mawazo ya Wakristo wengi. Madai ya watu wanaoamini hivyo ni kuwau watu ni lazima wamwamini Yesu na kazi zake alizozifanya, na kisha ni muhimu waamini pia katika sala za toba. Kwa hakika madai hayo yanafanana sana imani isiyo na msingi ya wanatohara ambao walitetea na kusema kuwa mtu anaweza kuwa mtu wa Mungu ikiwa tu atatahiriwa kimwili na ikiwa atamwamini Yesu kuwa ni Mwokozi wake. Tatizo ni kuwa aina hii ya imani bado ipo katika Ukristo leo hii. Kanisa la Mwanzo lilikabiliana na tatizo linalofanana na hili maana walikuwepo ndani ya Kanisa waliosisitiza juu ya tohara ya kimwili.

Kati ya Wakristo wa leo, ni wepi walio sahihi yaani kati ya wale wanaosisitiza juu ya sala za toba na wale wanaoiamini injili ya maji na Roho? Imani iliyo sahihi ni ile ya wale wanaoamini katika injili ya maji na Roho, injili ambayo kwa hiyo Yesu ametuokoa sisi sote. Bwana wetu ametuletea wokovu kwa kupitia injili ya maji na Roho na ametukomboa toka katika dhambi za ulimwengu. Injili hii ya kibiblia ambayo sasa tunaihubiri kwenu ina tofauti kubwa kimsingi na injili inayodai kuwa dhambi zenu zinaweza kuoshwa kwa kupitia sala za toba.

Ni lazima tuufahamu Ukweli wa wokovu kwa usahihi. Injili ya maji na Roho inaeleza kuwa Bwana wetu ametukomboa toka katika dhambi zetu zote kwa kuzibeba

dhambi za ulimwengu huu mara moja na kwa wote kwa kupitia ubatizo alioupokea toka kwa Yohana, na kwa kuimwaga damu yake Msalabani, na kisha kwa kufufuka toka kwa wafu. Hivyo, ni lazima tutambue kuwa injili ya maji na Roho ni Ukweli mkamilifu wa wokovu uliotolewa na Mungu, na tunapaswa kuuamini. Hii ndio injili pekee iliyo kamilifu ambayo haipungukiwi nakitu chochote, na kwa sababu hiyo ina utofauti mkubwa na injili zilizopo ambazo ni injili potofu zinazodai mtu anaweza kuziosha dhambi zake kwa kupitia sala za toba.

Injili ya maji na Roho ni mfano mkamilifu wa utaratibu wa sadaka ya kuteketezwa ulioanzishwa katika Sheria: Katika kipindi cha Agano la Kale, Waisraeli walipokea ondoleo la dhambi zao kwa kuiweka mikono yao katika kichwa cha mnyama wa sadaka ya kuteketezwa na kwa kumchinja mnyama huyo. Katika kipindi hiki cha Agano Jipya, wenye dhambi wote wanaweza kuokolewa bila masharti yoyote yale kwa kuuamini ubatizo ambao Yesu Kristo aliupokea toka kwa Yohana Mbatizaji na damu yake aliyoimwaga. Hivyo, kusesitiza tohara ya kimwili ya Agano la Kale badala ya kuamini injili ya maji na Roho, au kusesitiza juu ya sala za toba katika kipindi hiki cha Agano Jipya ni ushahidi wa imani isiyo ya kweli.

Kwa hakika, tunapaswa kutambua kuwa wale wanaosisitiza juu ya sala za toba asili yao inatokana na wanatohara wa kipindi cha Kanisa la Mwanzo. Wakati huo, baadhi yao waliokuwemo katika makanisa ya Galatia hawakuyategemea matendo makamilifu ya Yesu Kristo aliyekuwa amezitoweshea mbali dhambi zao zote kwa kupitia ubatizo wake na damu yake aliyoimwaga Msalabani, bali walitoa hoja kuwa wangeluweza kuwa watu wa Mungu ikiwa tu watatahiriwa kimwili mara baada ya kuwa wamemwamini Yesu kuwa ni Mwokozi wao.

Katika Ukrisot wa siku hizi, watu wengi wanaamini

kimakosa kuwa Wakristo wanapaswa kufanya sala za toba kila siku ili kuziosha dhambi zao. Kwa bahati mbaya huu ndio ukweli usio na mashaka kuhusu Ukristo siku hizi. Kwa sasa, mafundisho ya kidini ya utakaso unaoongezeka na lile la sala za toba yamejikita sana katika mioyo ya Wakristo wengi. Mafundisho hayo ya toba na lile la utakaso unaoongezeka yanafanya kazi katika mioyo ya Wakristo wengi siku hizi, na hivyo yanawazuia wasiweze kufungua macho yao ya kiroho. Lakini mnapaswa kutambua kuwa mafundisho haya yote ya kidini ni ya kinadharia tu na yanatokana na mawazo ya kibinadamu. Ni mafundisho potofu na yaliyojaa uovu.

Hivyo, fundisho la sala za toba ambalo lipo sana katika Ukristo wa leo hii ni fundisho potofu ambalo limeondolewa mbali na injili ya maji na Roho iliyofunuliwa katika Biblia. Hata hivyo, kama ilivyokuwa kwa wanatohara, Wakristo wa siku hizi wameangukia katika upotofu, lakini hakuna hata mmoja anayeweza kuuonyesha upotofu wa mafundisho hayo ya kidini yaliyoundwa na mwanadamu na kisha kuufundish ukweli kwa usahihi. Kwa kuwa watu wamekuwa wakiamini kwa muda mrefu kuwa wanaweza kuziosha dhambi zao kwa kufanya sala za toba, wengi wao hawafikirii kuwa kuna makisa katika fundisho hili la toba lenye asili ya “kiothodoksi.”

Hata hivyo, injili ya maji na Roho iliyotolewa na Mungu ni injili ile ile ambayo Mtume Petro na Paulo waliiamini (1 Petro 3:21; Wagalatia 3:27). Hivyo, injili ya maji na Roho ni Ukweli halisi wa injili. Kuanzia sasa na kuendelea, sisi sote ni lazima tujifunze kuhusu injili ya maji na Roho katika hali ya usafi, tunatakiwa kuifahamu, na kisha kuiamini kwa moyo yetu, kwa kuwa hii ndio injili pekee ya kweli iliyodhihiriwa kwa kupitia ufunuo wa Yesu Kristo. Kwa maneno mengine, kwa kuwa injili ya maji na Roho ni Ukweli ambao unajumuisha ubatizo ambao Yesu aliupokea toka kwa Yohana Mbatizaji na

damu yake aliyoimwaga Msalabani, basi tunapaswa kujifunza na kuifahamu injili hii. Pia tunapaswa kujifunza injili hii kwa kwia injili ya maji na Roho ni Ukweli ambapo haki ya Mungu na upendo wake vinafuliwa.

Wokovu Mkamilifu Ambao Ulikuwa Hapa Duniani Kwa Injili ya Maji na Roho

Bwana wetu alijitwika dhambi za ulimwengu kwa kupitia ubatizo wake na akazibeba hizo dhambi kwa miaka mitatu, alisulubiwa na kisha akaimwaga damu yake hadi kifo, kisha akafufuka baada ya siku tatu, na sasa ameketi mkono wa kuume wa Mungu Baba. Hata sasa anaendelea kuwa Mwokozi wa milele kwa waamini wanaoiamini injili ya maji na Roho. Kwa hiyo, wale wanaotaka kukombolewa toka katika dhambi zao wanaweza kuzioshelea mbali hizo dhambi zao mara moja na kwa wote kwa kuuamini Ukweli wa injili. Hivyo, yeyote anayetaka kuziosha dhambi zake anaweza kuokolewa milele toka katika dhambi zake kwa kuamini injili ya maji na Roho katika moyo wake.

Hata kwa Wakristo wengine wasioiamini injili ya kweli, dhambi zao haziwezi kuondoka kamwe, kwa kuwa fundisho la sala za toba lipo tofauti na injili ya maji na Roho, basi fundisho hilo ni potofu ambalo haliwezi kumkomboa mtu toka katika dhambi za ulimwengu, hiyo haijalishi hata kama Wakristo wa leo hii watafanya sala za toba kwa nguvu, ukweli ni kuwa dhambi zao haziwezi kutoweka. Ni lazima ifahamike kuwa kitendo cha kujaribu kuzioshelea dhambi zao kwa kupitia imani yao katika damu ya Yesu aliyoimwaga pale Msalabani pekee, na kupitia sala zao za toba ni mambo ambayo yanaleta imani potofu. Ndio maana Wakristo wa siku hizi wanaojaribu

kuziosha dhambi zao kwa kupitia sala zao za toba hawawezi kulifikia lengo lao.

Mtume Paulo alikabiliana na magumu mengi wakati alipokuwa akihubiri injili ya maji na Roho iliyotolewa na Mungu kwa waamini wa siku zake. Hii ni kwa sababu waamini hao walikuwa wameshaharibiwa na mafundisho ya wanatohara. Kwa sasa, kwa kuwa Wakristo wengi hawaufahamu Ukweli wa injili ya maji na Roho tangu mwanzo, ndio maana bado wanaamini mafundisho potofu na yasiyo na maana yanayotokana na mawazo ya mwanadamu. Pamoja na kuwa kwa sasa injili ya maji na Roho inahubiriwa kwao, ni ajabu kuwa Wakristo wengi wanashindwa kuupokea Ukweli huo. Pia ni vigumu kwetu sisi kuihubiri injili ya kweli ya maji na Roho kwa Wakristo wote ambao bado wanateseka kutokana dhambi zilizo katika mioyo yao.

Kwa hakika, ninafahamu kuwa kwa kuwa wamekuwa wakielewa fundisho lisilo sahihi la toba hadi hivi sasa, basi ni hakika kuwa itachukua muda mrefu kwa mioyo yao kuyaondoa mawazo kama hayo. Kwa kuwa wamejifunza na kuliadini fundisho la toba kama njia ya kuzioshelea mbali dhambi zao binafsi, basi kwa hakika ni lazima wataishangaa injili ya maji na Roho hasa kwa mara ya kwanza watakapoisikia. Wale ambao bado wanaliadini fundisho la sala za toba ni lazima waisafishe mioyo yao kwanza, ingawa si rahisi kufanya hivyo kwa upande wao kwa kuwa wamelishikilia fundisho hilo potofu la kidini la sala za toba kwa muda mrefu.

Imani ya Paulo kama inavyoelezwa katika Wagalatia 3:27 ilikuwa inalenga kuamini hivi, *“Maana ninyi nyote mliobatizwa katika Kristo mmemvaa Kristo.”* Imani ya Paulo ilikuwa imewekwa katika Ukweli kuwa Yesu alizioshelea mbali dhambi kwa kupitia ubatizo wake alioupokea toka kwa Yohana na damu yake aliyoimwaga Msalabani. Kwa lugha

tofauti, Paulo aliamini katika injili ya maji na Roho na aliamini kuwa Yesu anaweza kuziosha dhambi zake mara moja na kumfanya kuwa mmoja kati ya watu wa Mungu. Sisi nasi ni lazima tuwe na imani hii aliyokuwa nayo Paulo.

Imani ya Mtume Paulo ilijikita katika ukweli kuwa Yesu Kristo alizaliwa hapa duniani, akazichukua katika mwili wake dhambi za Paulo pamoja na dhambi za ulimwegu mzima mara moja na kwa wote wakati alipobatizwa na Yohana, kisha Yesu akaimwaga damu yake kwa ajili yake. Kutokana na imani hii, Paulo aliweza kukiri kuwa alikuwa amebatizwa pamoja na Yesu Kristo, na akafa na Yesu Kristo, na kisha akafufuliwa pamoja na Yesu Kristo. Kama ilivyokuwa kwa Paulo, sisi pia tunaamini kuwa Yesu alizibeba dhambi za ulimwengu huu mara moja na kwa wote kwa kupitia ubatizo wake, kisha akazibeba hizo dhambi hadi Msalabani, kisha akasulubiwa na kuimwaga damu yake na kufa ili kulipa mshahara wa dhambi zetu zote, na hatimaye akafufuka toka kwa wafu. Hii ndio imani pekee ya kibiblia ambayo inastahilishwa na Mungu. Hivyo, imani yako haipaswi kuwa imani ya kisheria, bali mnapaswa kuiweka imani yetu katika injili ya maji na Roho.

Ni Jambo Gani Ambalo Tunatakiwa Kulizingatia Kwa Mara Nyingine Tena?

Hapa kuna kuna jambo ambalo tunapaswa kulizingatia kwa mara nyingine tena kabla ya kusonga mbele. Jambo hilo ni swali ikiwa ni kweli kuwa Mungu ametuokoa toka katika dhambi zetu zote kwa kutupatia injili ya maji na Roho, au ikiwa Mungu amedhamiria kuwa dhambi zetu zitaoshwa kwa kupitia sala zetu binafsi za toba. Kwa maneno mengine, swali la msingi ni ikiwa tunapaswa kuishikilia injili ya maji na Roho

au ikiwa tuzishikilie sala zetu binafsi za toba?

Bwana wetu ametuokoaje mimi na wewe toka katika dhambi zetu? Ni muhimu tujiangalie wakati wote ikiwa tunamwamini Yesu kwa mujibu wa Neno la injili ya maji na Roho. Ninawaomba kwanza mrejee katika ile ya mioyo yenu kabla hamjaiamini injili ya maji na Roho, na mjichunguze. Bila shaka kabla hatujaifahamu injili ya maji na Roho tulikuwa tukijiuliza ikiwa tuna dhambi au la. Je, ni kweli kuwa Bwana amezitoweshea mbali dhambi zetu kwa kutupatia injili ya maji na Roho? Au tunaziosha dhambi zetu kwa kupitia sala za toba? Ikiwa tunaoshwa dhambi zetu kwa kuitegemea hiyo njia ya pili, basi tuna maanisha kuwa wokovu wa Mungu hautokani na neema ya Mungu, bali ni kitu kinachopatikana kutokana na matendo yetu binafsi. Lakini wokovu wa Mungu unapatikana kwa neema Yake kwa wale wanaoamini katika injili ya maji na Roho.

Je, imani yako imejengwa katika injili ya maji na Roho? Au je unaziamini sala zako binafsi za toba? Kwa hakika kati ya injili hizi mbili, injili ya maji na Roho ndio injili kamilifu ambayo inazisafisha dhambi zetu zote mara moja tunapoiamini. Bwana wetu alizichukua katika mwili wake dhambi zote za ulimwengu kwa kubatizwa na Yohana, kisha akaimwaga damu yake Msalabani, na kwa sababu hiyo ametuokoa toka katika dhambi zetu zote. Tunapaswa kuutafakari Ukweli wa injili ya maji na Roho na kisha kuufahamu kabla ya kuuamini. Ni injili gani ambayo unaiamini? Ni injili ya maji na Roho? Bwana amezitoweshea mbali dhambi zetu zote mara moja na kwa wote kwa kupitia Ukweli wa injili ya maji na Roho.

Kwa kuwa sasa tunaamini injili ya maji na Roho tuliopewa, ndio maana tumeweza kuoshwa dhambi zetu toka katika dhambi. Sisi sote ni lazima tuweze kuwa na imani hii inayoamini katika Neno la injili ya maji na Roho. Hatupaswi kuziamini sala za toba ambazo zinaamiwa na Wakristo wengi

sana siku hizi, wala hatupaswi kulihubiri fundisho hilo. Kama kweli tungelikuwa tunaweza kuoshwa dhambi zetu kwa kupitia sala za toba, basi ni hakika kusingelikuwa na haja ya sisi kuiamini injili ya maji na Roho. Lakini huwezi kuupinga ukweli kuwa kabla haujaiamini injili ya maji na Roho kulikuwa na dhambi katika moyo wako, na ilikuwa hivyo pamoja na jitihada zako katika kufanya sala za toba kila siku.

Lakini mimi na wewe sasa tunaamini injili ya maji na Roho, na tunaoshwa dhambi zetu kwa kuiamini injili hiyo. Je, injili ya maji na Roho ambayo unaamini hivi sasa ulijifunza toka kwa watu wa hapa ulimwenguni? Au injili hiyo ilitoka kwa Mungu? Injili hii tuliyonayo hivi sasa haikutoka kwa wanadamu, bali ilitoka kwa Mungu. Injili ya maji na Roho ambayo tunayo hivi sasa ni Ukweli wa injili ya wokovu ambayo Mungu ametupatia. Hivyo, tkiongea kimsingi, injili ya maji na Roho haikutoka kwa wanadamu, bali ni injili ya wokovu ambayo imetoka kwa Mungu. Leo hii, tunaweza kuwa na ile imani halisi inayotufanya tuweze kuokolewa toka katika dhambi zetu kwa kupitia imani yetu katika injili ya maji na Roho.

Mungu ametuwezesha sisi sote ili kumfahamisha kila mtu aweze kuifahamu injili ya maji na Roho. Kwa maneno mengine, Mungu ametupatia huduma ya upatanishi (2 Wakorintho 5:18). Tunamshukuru Mungu ambaye ametufanya tuweze kuieneza injili ya maji na Roho ulimwenguni kote pasipo kuiharibu. Nina hakika kuwa ninyi nani mtafurahi kutokana na ukweli kuwa mmefanyika wahubiri wa injili ya maji na Roho.

Ninamshukuru Bwana wakati wote kwa kunipatia wokovu wa kweli kwa kupitia injili ya maji na Roho. Tangu tulipokutana na Bwana wetu kwa kupitia Ukweli wa injili, tumeweza kuendelea kuihubiri injili ya kweli. Hata hivyo kulikuwa na baadhi ya watu ambao waliniambia hivi, “Ninatamani kama mngeliuacha ubatizo wa Yesu mnapoihubiri

injili.” Lakini sikuweza kukubaliana na maombi yao. Hivyo, tumeweza kuihubiri injili ya maji na Roho iliyotolewa na Mungu kama ilivyo kwa usahihi.

Ninyi nanyi mnapaswa kuwa na shukrani kwa Mungu kwa kuwaruhusu kuifahamu injili ya maji na Roho injili ambayo ina haki ya Mungu. Injili ya maji na Roho ambayo tunaamini siku hizi haikutoka kwa wanadamu. Bali ilitoka kwa Mungu, na kwa sababu hiyo ni Ukweli usiobadilika milele. Wale wote ambao wamekutana na injili ya maji na Roho na kuamini ni watu waliopokea baraka nyingi toka kwa Mungu.

Hata hivyo, mbali na injili y akweli, injili za kisheria zimetoka kwa wanadamu na zimewafanya Wakristo wengi kuwa wenye dhambi na zinawasumbua. Wale wanaoamini kuwa sala za toba ni njia ya kuweza kuzioshelea mbali dhambi zao kwa sasa wanaeneza mkanganyiko kwa watu wengi wasiomfahamu Yesu sawasawa. Wao wanadai kuwa dhambi zao za asili ziliondolewa wakati walipomwamini Yesu Kristo, lakini ni lazima waendeleo kutoa sala za toba kila siku ili kuziosha dhambi binafsi wanazozifanya kila siku. Wanafikiri kuwa maisha sahihi ya kiimani yanawataka wawe wanaomba usiku kucha, wafunge, wafanye kazi nyingi za kujitolea, na kisha kutoa sadaka nyingi. Lakini hiyo imani yao yenye mkanganyiko inafanana sana kimsingi na imani ya wanatohara kwa kuwa aina hizo mbili za imani zinahitaji aina fulani ya matendo ya mwanadamu kama nyongeza katika wokovu wao. Kwa kweli aina hii ya imani ni imani ya kisheria, kwa kuwa wao wanadai kuwa sala za toba ni za muhimu katika kuziosha dhambi zao.

Hata hivyo, wale wanaoamini injili ya maji na Roho iliyotoka kwa Mungu wameweza kuokolewa mara moja kwa kupitia imani yao katika injili hii ya kweli. Sisi tuliweza kuokolewa toka katika dhambi zetu zote kikamilifu kwa sababu

tuliamini katika injili ya maji na Roho iliyotoka kwa Mungu. Pia sisi tunao ushuhuda kuwa tumeokoelwa kikamilifu katika mioyo yetu, na pia tunaweza kushuhudia juu ya wokovu wetu kwa uhakika zaidi. Kwa kuwa injili ya maji na Roho ni Ukweli mkamilifu unaotuwezesha kupokea ondoleo la dhambi zetu, basi tunaweza kukiri kwa uhakika mkubwa kuwa hatuna dhambi tena katika dhamiri zetu.

Ninamshukuru Bwana kwa kutupatia injili hii kamilifu ya maji na Roho, na kwa kutuwezesha kuihubiri injili hii leo hii na kesho. Ni baraka kubwa na ni utukufu mkuu toka kwa Mungu kuwa sasa tunaweza kuuhubiri Ukweli huu wa injili ulimwenguni kote. Kama tungeliacha kuihubiri injili ya maji na Roho, halafu tukaihubiri injili nyingine ya kisheria hapa ulimwenguni, basi ni hakika hakuna hata mtu mmoja hapa ulimwenguni ambaye angeliweza kuokolewa toka katika dhambi zake. Kama tungelikuwa tunaihubiri injili ya kisheria badala ya injili ya maji na Roho ulimwenguni kote, ni hakika kuwa tungechekwa. Tungelidharauliwa na kuambiwa hivi, “Wajinga nyie! Tumeyafahamu mambo haya kwa miaka mingi iliyopita halafu nyie ndo mnahubiri hivi sasa. Ni nani anayemhubiria mwingine kati yetu?”

Hata hivyo, tunapokea barua nyingi za shukrani na za zenye shuhuda mbalimbali toka kwa wasomaji wetu ulimwenguni kote, wanashuhudia jinsi walivyoisikia injili ya maji na Roho, na jinsi wanavyoshukuru kwa sababu ya injili hiyo, na wanaeleza jinsi walivyookolewa. Kwa sasa tunaieneza injili ya maji na Roho ambayo tumeipokea toka kwa Mungu ulimwenguni. Kwa kuwa sasa tunaihubiri injili ya maji na Roho iliyotoka kwa Mungu Mwenyewe, basi ndio maana tunaweza kuihubiri injili hii kwa kila mtu.

Injili ya Maji na Roho ni Chanzo cha Matengenezo kwa Imani Zilizoshindwa

Injili ya maji na Roho inajumuisha maana ambayo ni kubwa sana kuliko hata maana ya Matengenezo ya karne ya 16 ambayo yalimfanya Luther atoe wito wa kuirudia Biblia. Matengenezo halisi ya imani yanapatikana katika nguvu ya Mungu, ambayo ni injili ya maji na Roho. Matengenezo haya ni makubwa sana kiasi kuwa mafanikio ambayo Luther aliyapata hayawezi kulinganishwa na ya injili hii.

Injili ya maji na Roho ni kubwa kuliko na ina nguvu kuliko kitu chochote kile. Luther aligongelea mashutumu 95 kwenye Basilika ya Mtakatifu Petro akipinga wachungaji waliokuwa wakiuza vyeti vya kuingia mbinguni kwa ajili ya kugharimia ujenzi wa Basilika ya Mtakatifu Petro, Luther alibandika hayo mashutumu 95 kama sehemu y akupinga utaratibu huo. Kutokana na matendo hayo, Luther akawa kiongozi wa Matengenezo hata bila kukusudia.

Hata hivyo, Luther aliamini kuwa wokovu unapatikana katika damu ya Msalaba pekee na kwamba wokovu unaweza kupatikana kwa kupitia sala za toba. Pia aliyahifadhi baadhi ya mafundisho ya kidini ya Kikatoliki kama vile ubatizo wa watoto wadogo na fundisho la kidini la transubstantiation. Hata hivyo, injili ya kweli ambayo Mitume waliamini ilikuwa ni injili ya maji na Roho, na kwamba mafundisho ya Wanamatengenezo wengi yalitofautiana sana na ukweli wa injili hii ya kweli. Wanamatengenezo waliiondoa sakramenti ya Kikatoliki ya kitubio na kuweka fundisho la sala za toba. Mafundisho hayo yote mawili yalikuwa tofauti kabisa na imani ya injili ya maji na Roho.

Injili ya maji na Roho haikuundwa na mwanadamu, bali inatoka kwa Mungu. Hivyo, injili hii ya kweli haiwezi

kubadilishwa milele. Kwa upande mwingine, imani katika sala za toka inatoka katika mawazo ya mwanadamu huku ikidai kuwa dhambi ya asili inaondolewa wakati mtu anapomwamini Yesu kwa mara ya kwanza kuwa ni Mwokozi wake, na kwamba dhambi binafsi zinaweza kuondolewa wakati mtu anapofanya sala za toba. Hii ni injili potofu kwa wale wanaotafuta haki ya mwanadamu, na ina utofauti mkubwa sana na injili ya kweli ambayo Mitume waliiamini na kuihubiri.

Wale wanaoiamini injili ya kisheria kama hiyo bila shaka walifikiria kuwa wangeliveza kuoshwa dhambi zao kwa kupitia uaminifu wa kidini, lakini matokeo ya hiyo imani yao yamekuwa ni bure. Watu wa jinsi hiyo wanabakia kuwa wenye dhambi hata kama watasali sala za toba kwa nguvu. Sababu inayowafanya hao watu wasiweze kuoshwa dhambi zao ni kwa kuwa wanalishikilia fundisho la kidini la sala za toba lisilo na msingi wowote huku wakiwa hawaifahamu injili ya maji na Roho. inawezekanaje kwa wanadini wanasheria kuoshwa dhambi zao kwa kutegemea imani isiyo na msingi? Kwa lugha tofauti, watu wanapofanya dhambi nyingi kwa siku moja kuliko hata nywele zao, wanawezaje basi kuziosha dhambi hizo mara moja na daima? Ni jambo lisilowezekana kwa mtu kuziosha dhambi zake kwa kutegemea mafundisho ya kidini yaliyoundwa na mwanadamu. Kwa hakika, injili za kisheria kama hizo zinaiinua bendera ya uasi dhidi ya Ukweli ambao kwa huo Bwana ameutumia kuzitoweshea mbali za ulimwengu huu mara moja na kwa wote.

Mtume Paulo alitaka kuihubiri injili ya maji na Roho kwa kila mtu, pia alitaka kuisahihisha imani ya wanatohara. Hivyo, sisi nasi tunafurahi kuihubiri injili ya maji na Roho ulimwenguni kote. Kwa kweli ninashukuru sana kwamba mimi pamoja na ninyi watenda kazi wenzangu tunaihubiri injili ulimwenguni kote tukitokea katika Kanisa la Mungu.

Tunalieneza Neno la injili ya maji na Roho ulimwenguni kote kwa kuchapisha vitabu kwa lugha mbalimbali. Injili hii ya maji na Roho ambayo tunaihubiri hivi sasa imewaonyesha wasomaji wetu juu ya wokovu mkamilifu ulivyo. Kwa matokeo hayo, shuhuda za wokovu zinatufikia toka katika kila kona ya ulimwengu, tokea magerezani, mahospitalini, na mashuleni, na kutoka kwa watu binafsi wengi. Watu ulimwenguni kote wanatueleza jinsi walivyobarikiwa kwa kuisoma injili ya maji na Roho. Mmoja kati ya watu hao alitutumia ushuhuda huu: “Ninakubaliana na injili ya maji na Roho ambayo mnaihubiri, ninakubaliana na njia mnayoitumia katika kuieneza injili hii. Injili inayohubiriwa nanyi ni rahisi sana, imejaa uhalisia na ipo wazi.”

Kwa nini watu wanatutumia shuhuda za wokovu? Wao wanatueleza kuwa hawajawahi injili ya kweli ya maji na Roho hadi wakati huu pamoja na kuwa wamekuwa ni Wakristo kwa muda mrefu. Watu hao wameweza kuamini kwa kuwa hawajawahi kuisikia injili ya maji na Roho na wala hawajawahi kuona ikihubiriwa.

Injili ambayo walikuwa wameisikia hadi wakati huo haikuwa injili ya maji na Roho. Kwa kuwa watu walikuwa hawezi kuifahamu na hivyo kuamini injili ya maji na Roho, ndio maana waliendelea kuishi hali wakiwa na dhambi zao kama zilivyo katika mioyo yao hadi leo hii. Hakuna hata mmoja wao ambaye dhambi zake zilisafishwa kupitia imani ya kisheria ambayo ipo tofauti kabisa na injili ya maji na Roho.

Baadhi ya watheolojia wanasema hivi, “Tumeokolewa toka katika dhambi zetu zote, na sasa tupo katika mchakato wa wokovu wetu, na hapo baadaye tutaokolewa kikamilifu.” Je, imani hii si inajichanganya na ni matokeo ya fundisho la kidini la utakaso unaoongezeka? Kwa miaka mingi tangu wakati wa Matengenezo, wanatheolojia wamekuwa wakifundisha upuuzi

na kuhubiri injili isiyo na uhakika.

Pamoja na hayo, ilifikia mahali watu waliweza kuelewa jinsi walivyo kiuhalisia, kisha wakafahamu juu ya injili ya maji na Roho ilivyo. Ndio maana wanasema, “Ninakubaliana na hii injili ya maji na Roho ambayo mnaihubiri.” Baadhiya watu walisema hivi, “Ninataka kuvitumia vitabu vyenu vilivyo na injili ya maji na Roho kama vitabu vya kiada vya kufundishia wanafunzi wa biblia katika kanisa langu.” Wengine wameshuhudia wakisema, “Kitabu hiki kipo wazi sana na kwamba kinatoa matumaini makubwa kwa watu walio kifungoni. Ukweli huu wa injili unawawezesha kupokea karama halisi ya wokovu, na inawafanya waweze kuingia katika Ufalme wa Mbinguni. Ninamshukuru Mungu kwa kutupatia injili hii ya maji na Roho, ambayo ni Ukweli wa injili ambao umetufanya sisi kuwa wana wa Mungu pasipo shaka.”

Je, Bado Unazitegemea Sala Zako za Toba?

Katika Ukristo wa leo hakutakiwi kuwepo na wanatohara, lakini bado kuna Wakristo wengi sana ambao bado wanazitegemea sala zao binafsi za toba. Je, imani ya hao wanaosisitiza juu ya sala za toba wakati huu ni imani ya kijinga? Ndiyo. Imani ya jinsi hiyo imejikita katika fundisho la kidini la sala za toba, na imani hiyo haiwezi kuwakomboa watu toka katika dhambi zao. Tunapoilinganisha injili ya Wakristo wengi waliopo hivi sasa na injili ya maji na Roho, tunaweza kuona wazi injili ambayo ni ya kweli na ile ambayo ni ya uongo. Vivyo hivyo, injili ya maji na Roho ni injili inayotofautishwa bila shaka na injili nyingine zilizopo ambazo haziwezi kusimama peke yake bila kuongezewa kitu kinachoitwa sala za toba.

Tunawezaje basi kuifahamu na kuitambua injili ya kweli na injili ambayo ni ya uongo? Tunaweza kuzitambua injili hizo kwa kuzitenganisha na kisha kuzilinganisha. Tunapoifahamu na kuiamini injili ya kweli ya maji na Roho, yaani injili isiyo sisitizia juu ya sala za toba, basi hapo ndipo tunapoweza kuona dhambi zetu zinavyotoweshwa toka katika mioyo yetu. Kinyume na hapo, kwa hakika, sala za toba zinawafunga Wakristo katika dhambi huku wakiwa wanamwamini Yesu, na kwa sababu hiyo sala hizo zinawafanya hao Wakristo waendeleo kuishi kama wenye dhambi muda wao wote. Hivyo, ni wazi kuwa watu wanahitaji injili ya maji na Roho, injili ambayo inaweza kuzitoweshea mbali dhambi zao zote mara moja na kwa wote. Ikiwa tunaamini injili ya maji na Roho hivi sasa, basi sisi sote tunaweza kupokea ondoleo la dhambi zetu, na kwa matokeo hayo tutapokea karama ya Roho Mtakatifu na kisha kuishi kwa ujasiri mbele za Mungu tukiwa wenye haki.

Kwa upande mwingine, ikiwa utaiweka imani yako katika fundisho la sala za toba, basi ingawa mwanzoni inaweza kuonekana kuwa ni sawa, basi kadri muda unavyozidi kwenda ndivyo utakavyozidi kufungwa na dhambi zako, na hatimaye utaishia kuwa na dhambi nyingi zaidi kuliko ulizokuwa nazo kabla hujamwamini Yesu. Ikiwa hauiamini injili ya maji na Roho, na kisha ukazishikilia sala za toba, ni hakika kuwa utaendelea kuwa mwenye dhambi.

Je, kuna yeyote yule miongoni mwenu ambaye alimpokea Roho Mtakatifu kama karama toka kwa Mungu kabla ya kuiamini injili ya maji na Roho? Je, kuna wakati kabla hujaiamini injili ya maji na Roho ambapo uliupoke ule moto unaochoma wa Roho Mtakatifu? Je, umeshawahi kunena kwa lugha na kuongea maneno ambayo watu wengine hawayafahamu?

Unaweza kufikiria kuwa uliyapata hayo mambo, lakini

unapaswa kukumbuka kuwa mambo haya yote yalitokea kabla hujapokea injili ya maji na Roho. Unaweza kuwa ulipitia mambo kama hayo kabla hujaifahamu na kuiamini injili ya maji na Roho. lakini unatakiwa kufahamu kuwa unaweza kuyapitia mambo kama hayo hata katika dini nyingine za kipagani hapa duniani. Hivyo, hupaswi kuyafikiria mambo kama hayo kuwa ni ushahidi wa wokovu wako.

Kwa upande mwingine, nilifikia hatua ya kuliona ondoleo langu halisi la dhambi na baraka ya kufanyika mwana wa Mungu wakati nilipouamini Ukweli wa injili ya maji na Roho katika moyo angu. Kwa sasa katika moyo wangu Roho Mtakatifu amenishukia kama vile hua. Roho Mtakatifu anakaa katika mioyo ya waamini pamoja na injili ya maji na Roho, na yupo pamoja nao wakati wote. Huyu Roho Mtakatifu aliye ndani ya moyo wangu na aliyekuja kwangu kwa kupitia injili ya maji na Roho, ameufanya moyo wangu uweze kuihubiri injili ya maji na Roho ulimwenguni kote, na hata sasa ndiye anayenifanya niweze kuifanya kazi ya Mungu. Injili ya maji na Roho ni Ukweli halisi unaowawezesha watu kumpokea Roho Mtakatifu. Sisi tuliweza kuoshwa dhambi zetu na kisha kumpokea Roho Mtakatifu kama karama yetu toka kwa Mungu kutokana na imani yetu katika injili ya kweli.

Ndugu waamini wenzangu, ni lazima tuweze kuufahamu moyo wa Mtume Paulo. Ni lazima tuweze kukishukuru kile ambacho Mtume Paulo alikuwa nacho katika akili zake hasa wakati alipoyaambia makanisa ya Galatia kuwa walaaniwa ikiwa wataihubiri injili nyingine, na ni lazima tutambue kuwa hatuwezi kuoshwa dhambi zetu kwa kupitia sala zetu za toba. Tunaweza kuoshwa dhambi zetu pale tu tunapoiamini injili ya maji na Roho.

Kwa bahati nzuri, mimi na wewe tulifikia hatua ya kukutana na Ukweli wa injili ya maji na Roho iliyotolewa na

Mungu, tukaisikia kwa masikio yetu, na tukafikia hatua ya kuuamini Ukweli huu halisi. Hata hivyo, baadhi ya watu wanasema kuwa wanaamini injili ya maji na Roho, lakini bado wanazitegemea sala zao za toba kila siku. Imani ya jinsi hiyo ni imani yenye mchanganyiko na haina maana yoyote ile. Hakuna Ukweli mwingine zaidi ya injili ya maji na Roho ambayo kwa hiyo Bwana wetu ametuokomboa toka katika dhambi zetu zote. Ikiwa hatutaihubiri injili ya kweli ya maji na Roho, basi ni hakika tutalaaniwa na Mungu.

Moyo wangu unamshukuru sana Bwana. Maana wale ambao kwa sasa ninahudumu nao ni waamini katika injili ya maji na Roho. Ninamshukuru Mungu kwa kuniwezesha kuitumikia injili ya maji na Roho katika Kanisa lake.

Hivi punde injili ya maji na Roho itakuwa ikihubiriwa hadi katika miisho ya dunia. Kwa sasa, kila mwenye kuutafuta ukweli atapokea ondoleo kamilifu la dhambi kwa kuamini katika injili ya maji na Roho kwa moyo wake wote. Tunamshukuru Mungu kwa kutupatia injili ya maji na Roho, na tunaomba ili injili hii iweze kuenea ulimwenguni kote. Inawezekanaje sisi tukaikumbatia injili ya maji na Roho sisi wenyewe? Hali tukiyatii mapenzi ya Mungu, tunataka kuuhubiri Ukweli wa injili ulimwenguni kote. Haijalishi kile kinachoweza kutokea kwetu, sisini lazima tuihifadhi injili ya maji na Roho ili isije ikapotoshwa. Pia nina hakika kuwa tutaweza kuieneza injili ya maji na Roho ulimwengu kote hadi siku Bwana atakaporejea. Haya ndiyo mapenzi ya Mungu. Hivyo, ni matumaini yangu na maombi yangu kuwa sisi sote tutaendelea kuyafikiria mapenzi ya Mungu kwa upana wake, na kwamba tutaangalia mbali zaidi wakati tunapoendelea kuieneza injili ya maji na Roho ambayo inaifunua haki ya Mungu, na pia tunapaswa kuwa shukrani. Kwa kweli sina namna ya kutosha kuweza kumshukuru Mungu kwa kutupatia

injili ya maji na Roho.

Wakristo wengi hivi sasa wanaamini katika nadharia ya kunyakuliwa kabla ya mateso. Lakini nadharia ya kunyakuliwa kabla ya mateso ni fundisho ambalo limeliacha Neno la Mungu. Wafuasi wa nadharia hiyo wanaamini kuwa Bwana atakuja na kuwachukua kabla ya yale Mateso Makuu hayajaanza, na kwamba ni baada ya hapo ndipo Mateso yataanza kwa nguvu zote. Kwa kuwa wanaamini hivi, basi muda wote wao wana furaha bila kujalisha ikiwa ulimwengu unaingia katika giza au la, na wanaendelea kumsifu Mungu, huku wakidhani kuwa wataingia katika Ufalme wa Mbinguni. Hivyo wao humsifu Mungu kwa sauti za juu kana kwamba wanapiga yowe.

Ninafikiria kuwa wanaimba kwa namna hiyo pengine kwa sababu wanaona ni vigumu kuamini nadharia ya kunyakuliwa kabla ya mateso, lakini wakati huo huo bado wanataka kuamini hiyo nadharia kwa nguvu zao zote. Hata hivyo, Bwana wetu hakuitaja nadharia ya kunyakuliwa kabla ya mateso katika Ufunuo. Mnapaswa kutambua kuwa nadharia hii ya kunyakuliwa kabla ya mateso ni uongo.

Mungu Ameizungumzia Injili ya Maji na Roho Tangu Mwanzo

Hali wakiwa wanaliamini Neno la Mungu katika hali ya upofu, Wakristo wengi siku hizi wanazema hivi: “Maandiko yanasema nini? ‘Ibrahimu alimwamini Mungu, na akahesabiwa kuwa mwenye haki.’ Mambo haya yalitendeka miaka 400 kabla Mungu hajatoa maelezo yake kuhusu utaratibu wa sadaka ya kuteketezwa kupitia kwa Musa. Je, Ibrahimu hakuhesabiwa haki kwa sababu ya kuliamini Neno la Mungu bila masharti?”

Hali wakihoji ikiwa ni muhimu kwa wao kuuamini

ubatizo wa Yesu, watu hao wanaendelea kukazia kwa ukaidi wao kumwamini Yesu aliyesulubiwa tu. Lakini madai hayo ni kama misemo ya wajinga ambao hawana ufahamu kuhusu majaliwa ya Mungu ya wokovu. Injili inazungumzia juu injili ya maji na Roho tangu mwanzoni na mwishoni inazungumzia kwa uwazi zaidi. Tangu siku za Ibrahimu na Hawa, Mungu alisema kuwa ikiwa mtu yeyote anatenda dhambi, basi mtu huyo ni lazima atoke sadaka kwa Mungu ili kulipa mshahara wa dhambi hizo kwa kifo na damu. Hali akiyatii mapenzi ya Mungu, Habili alitoa sadaka yake ya dhambi kwa kutoa wanyama wake wazaliwa wa kwanza walionona. Naye Bwana alimheshimu Habili na sadaka yake, lakini hakumheshimu Kaini na sadaka yake. Kwa nini? Kwa sababu Kaini alitaka kwenda mbele za Mungu kwa namna ambayo aliitaka yeye mwenyewe, huku Habili akimtii Mungu. Baadaye kidogo, Mungu aliutoa utaratibu wa sadaka ya kuteketezwa wa Hema Takatifu la Kukutania. Katika kipindi cha Hema Takatifu la Kukutania, Mungu alisema kuwa kabla mwenye dhambi hajatoa sadaka yake ya kuteketezwa kwa Mungu, ni lazima kwanza aiweke mikono yake juu ya kichwa cha huyo mnyama wa sadaka ili kuzipitisha dhambi zake kwenda kwa huyo mnyama wa sadaka (Mambo ya Walawi 1:4).

Wakati Mungu alipomwahidi Ibrahimu kuwa, “Nitawafanya wazawa wako kuwa wengi kama nyota za angani. Na nitawapatia nchi ya Kanaani,” ili kuweka ishara kwa ahadi hizo mbili, Mungu alimwambia Ibrahimu kutoa fahari wa ng’ombe wa miaka mitatu, mbuzi mke wa miaka mitatu, kondoo dume wa miaka mitatu, hua, na njiwa kama sadaka kwa Mungu. Hii ina maanisha kuwa Mungu alikuwa akidai sadaka kwa ajili ya dhambi. Hivyo, kwa kupitia tendo la kuiweka mikono, kila mtu alipaswa kuzipitisha dhambi zao kwenda katika mnyama wa sadaka ya kuteketezwa aliyetumika

kwa sadaka ya dhambi, au sadaka ya kuteketezwa, au sadaka ya amani, na kisha alipaswa kuitoa damu ya wanyama hao wa sadaka kwa Mungu. Wakati Mungu alipowapatia watu wake utaratibu wa sadaka ya kuteketezwa, Mungu alitoa maelezo ya kina namna hizo dhambi zitakavyoweza kupatanishwa: Mwenye dhambi alipaswa kuzipitisha dhambi zake kwa kuiweka mikono yake katika kichwa cha mnyama wa sadaka ya kuteketezwa asiye na mawaa na kisha mwenye dhambi huyo alipaswa kuitoa hiyo damu na nyama kama sadaka yake kwa Mungu, na sadaka hiyo ilipaswa kutolewa katika Hema Takatifu la Kukutania. Hii inatueleza kuwa katika kipindi cha Agano la Kale, watu wa Israeli waliondolewa dhambi zao kwa imani, yaani kwa kuiweka mikono yao juu ya mwanasadaka wa kuteketezwa na kwa kuimwaga damu ya mwanasadaka huyo.

Kwa maneno mengine, Mungu alikuwa anatueleza kuwa wale watu wote wanaoishi katika kipindi hiki cha Agano Jipya hawapaswi kuudharau ubatizo ambao Yesu aliupokea toka kwa Yohana hasa wakati wanapokiri kumwamini Yesu kuwa ni Mwokozi. Kwa kweli, ni hakika kuwa wanapaswa pia kuiamini damu ya Yesu aliyoimwaga pale Msalabani. Ikiwa utaiamini damu ya Msalaba peke yake pasipo kuufahamu ukweli kuwa Yesu alizipokea na kuzibeba dhambi za umwanadamu mara moja na kwa wote kwa kubatizwa na Yohana, basi hapo imani yako itakuwa ni kama bondia anayerusha ngumi hewani. Imani ya jinsi hiyo haiwezi kuwaongoza watu kuwa na imani sahihi kwa Yesu na katika kulipokea ondoleo kamili la dhambi zao, kwa kuwa dhambi itakuwa bado imebaki katika mioyo yao.

Wakristo wengi siku hizi wanaiamini injili ambayo si Ukweli wa wokovu halisi. Watu wa jinsi hiyo wapo nje ya Yesu Kristo kuwa hawauamini Ukweli wa maji na Roho bali wanaiamini injili nyingine. Baadhi yao wanaamini kuwa wameondolewa dhambi zao zote kwa kuiamini damu pekee ya

Yesu pale Msalabani. Lakini kusema kweli, watu hao hawawezi kuukwepa ukweli kuwa dhambi bado ipo ndani ya mioyo yao kama ilivyo. Mungu alisema kuwa ametuokoa toka katika kizazi hiki kiovu kwa injili yake kamilifu. Waamini wa kweli leo hii hawaamini kuwa Yesu alikuja kwa injili iliyo nusu, ambayo ni injili ya damu ya Msalaba tu. Kinyume chake, wao wanaamini kuwa Bwana alikuja hapa ulimwenguni kwa kupitia maji, damu, na Roho (1 Yohana 5:4-7). Ni lazima tufanyike waamini wanaoiamini injili ya maji na Roho.

Ikiwa Bwana ametuokoa kikamilifu toka katika kizazi hiki chenye uovu, basi ni hakika kuwa ametuokoa toka katika dhambi zetu zote kwa kupitia sala zetu binafsi za toba, bali kwa kupitia injili ya maji na Roho. Ikiwa kuna mtu mwingine yeyote anayetafuta njia nyingine zaidi ya injili ya maji na Roho, basi mtu huyo ni sharti atambue kuwa anafanya kosa kubwa. Yesu Kristo alikuja hapa duniani kuwaokoa wenye dhambi wa ulimwengu huu toka katika dhambi zao, na amefanya hivyo mara moja na kwa wote kwa kupitia injili ya maji na Roho. Yesu ametupatia wokovu wa kweli kwa kuupokea ubatizo wake, kwa kuutoa mwili wake kwa ajili ya dhambi zetu, kwa kufa Msalabani, na kisha kwa kufufuka tena toka kwa wafu. Sasa, tumefikia hatua ya kupokea karama ya Roho Mtakatifu na kukombolewa toka katika dhambi zetu na adhabu ya dhambi hizo kwa kuiamini injili ya maji na Roho. Kwa hiyo, ni lazima tutambue bayana bila mashaka yoyote kuwa tumefanyika wana wa Mungu wa kuiamini injili ya maji na Roho.

Katika Warumi 2:28-29 imeandikwa hivi, *“Maana yeye si Myahudi aliye Myahudi kwa nje tu, wala tohara siyo ile ya nje tu katika mwili; bali yeye ni Myahudi aliye Myahudi kwa ndani, na tohara ni ya moyo, katika roho, si katika andiko; ambaye sifa yake haitoki kwa wanadamu bali kwa Mungu.”* Hii ina maanisha kuwa ili tuweze kuwa watu wa Mungu basi

tunapaswa kutahiriwa kiroho.

Kama ni hivyo, ni aina gani ya imani inayotuwezesha kutahiriwa kiroho mbele za Mungu? Ni imani inayoamini kuwa Bwana alibatizwa na Yohana Mbatizaji ili kuzichukua dhambi zetu katika mwili wake mara moja na kwa wote, aliimwaga damu yake, na kwa sababu hiyo ametuokoa. Wakati Bwana wetu alipobatizwa na Yohana, dhambi zetu zote zilipitishwa kwenda kwa Yesu. Kwa hiyo tunaweza kutahiriwa kiroho kwa kuuamini Ukweli huu. Tunapoamini kuwa Yesu Kristo alizipokea dhambi zetu zote kwa kupitia ubatizo alioupokea toka kwa Yohana, basi ni hakika kuwa tunaweza kutahiriwa kiroho na kufanyika wana wa Ibrahimu. Ni lazima tutahiriwe kiroho kwa kuiweka imani yetu katika Neno la Mungu. Kwa hakika tunaweza kuwa watu wa Mungu kwa kuamini injili ya maji na Roho.

Wakristo wengi siku hizi hawaifahamu ahadi ya tohara ya kiroho, kwa sababu hiyo wanajitoa zaidi kuzifanya sala za toba ilhali wanamwamini Yesu. Wakristo hao wapo hivyo kwa kuwa imani yao inajumuisha imani ya kisheria. Imani sahihi ya kiroho ambayo Mungu ametupatia ni ile inayoamini kuwa Yesu amezitoweshea mbali dhambi zetu kwa ukweli wa nyuzi za bluu, zambarau, nyekundu, na kitani safi ya kusokotwa ambavyo vilionekana katika mpangilio wa Hema Takatifu la Kukutania. Katika kipindi cha Agano Jipya, Bwana wetu ametufunulia Ukweli wa wokovu kwa kupitia injili ya maji na Roho. Yesu alizichukua dhambi zetu katika mwili wake na akazitoweshea mbali mara moja na kwa wote. Hivyo, kwa sasa yeyote anayeumini Ukweli huu wa injili anaweza kwa hakika kuupata wokovu toka kwa Mungu.

Ni lazima tujiweke mbali na wale wanaojaribu kuzitimiza tamaa zao binafsi za mwili kwa kutumia Neno la Mungu. Kwa kuwa wamejawa na matamanio ya kimwili, ndio maana

wanaendelea kuzing'ang'ania sala zao za toba, na wanafanya hivyo wakati injili ya maji na Roho ipo mbele yao. Baadhi ya watu wanataka kuwatawala wengine kwa kutumia jina la Mungu. Mungu amezipofusha akili za kiroho za watu kama hao ambao ni wenye tamaa na wasio waaminifu mbele za Mungu, na amefanya hivyo ili wasiweze kuupata Ukweli wa wokovu kwa urahisi. Injili ya Mungu ni kama hazina iliyofichwa katika shamba. Mungu hapendi kuwa na wale ambao wanaidharau injili ya maji na Roho. Kwa kupitia Ukweli wa wokovu, Mungu anapenda kukutana nasi tunaolikubali Neno lake linalosema hivi, "Mwana alibatizwa na kisha akaimwaga damu yake Msalabani kwa ajili ya wokovu wako."

Tohara ya Kweli ya Kiroho ni Ipi?

Ilipofikia hatua ya kutoa sadaka ya kiroho kwa Mungu kwa ajili ya dhambi za Waisraeli, jambo la kwanza ambalo walilifanya ilikuwa ni kuiweka mikono yao juu ya sadaka ili kuzipitisha dhambi zao kwenda kwa huyo mnyama wa sadaka. Kwa kufanya hivyo waliweza kuzikata dhambi zao toka katika mioyo yao. Vivyo hivyo, kuufahamu na kuuamini Ukweli wa injili ya maji na Roho hiyo ndiyo tohara ya kiimani. Mungu alimwambia Ibrahimu kutahiriwa kimwili, akasema hivi, "Wewe pamoja na wana wako wa kiume watatahiriwa siku ya 8 baada ya kuzaliwa." Mtoto ambaye ana siku 8 tu ni mchanga sana kiasi kuwa govil lake bado ni laini. Mtoto wa jinsi hiyo alichukuliwa na akatahiriwa, akaondolewa govi lake. Ikiwa mtu yeyote yule kati ya watu wa Israeli hakutahiriwa, basi mtu huyo hakuwa sehemu ya watu wa Mungu. Hivyo, kila Mwisraeli, hata watoto wa watumwa wake aliowanunua toka

mbali walipaswa kutahiriwa siku ya 8 tangu kuzaliwa. Pia tunaona katika Biblia kuwa Yesu alipelekwa Hekaruni na kutahiriwa siku ya 8 tangu alipozaliwa.

Kama Biblia inavyosema, “*Na tohara ni ya moyo,*” (*Warumi 2:29*), tohara ya kweli ya kiroho ni kule kupokea ondoleo la dhambi zilizo moyoni, na si kupokea tohara ya kimwili. “Dhambi zetu zilipitishwa kwenda kwa Yesu Kristo. Yesu Kristo alizichukua dhambi za ulimwengu katika mwili wake mara moja na kwa toe kwa kubatizwa na Yohana”—kuamini hivi ndiko kutahiriwa kiroho. Hatuwezi kamwe kuwa watu wa Mungu ikiwa hatutaiamini injili ya maji na Roho katika mioyo yetu (*Yohana 3:1-7*). Yeyote aliye na ushahidi wa imani yake katika injili ya maji na Roho basi huyo ni mwana wa Mungu, ni mwana wa Mungu sawasawa na ahadi ambayo Mungu alimpatia Ibrahimu alipompatia maagizo ya tohara. Mungu alieleza kuwa, “Yeyote ambaye hajatahiriwa kimwili huyo hatakuwa kati ya watu wa Mungu, lakini kwa yule ambaye atatahiriwa, hata kama ni mtuishi aliyenunuliwa toka kwa wamataifa, basi hiyo tohara itakuwa ushahidi kuwa yeye yumo kati ya watu wa Mungu.”

Hivyo, ikiwa mioyo yetu imetahiriwa kiroho—yaani ikiwa tuna imani katika injili ya maji na Roho—basi sisi ni watu wa Mungu; na ikiwa hatuna imani katika injili ya maji na Roho, basi sisi si watu wa Mungu. Hivyo wakati Mungu anapotuangalia ikiwa tumetahiriwa au hatujatahiriwa kimwili, anachofanya Mungu ni kuangalia ikiwa tuna imani katika injili ya maji na Roho au la, Mungu anatumia kigezo hiki kuangalia ikiwa sisi ni watu wa Mungu au la. Mungu hatuhukumu kwa msingi wa matendo yetu, bali anatuhukumu kutokana aina ya imani tuliyo nayo. Ndio maana tunapaswa kuiamini injili ya maji na Roho ili tuweze kuwa wana wa Mungu. Tuliweza kupokea karama ya wokovu kwa kuiamini injili ya maji na

Roho.

Hata hivyo, watu wengi siku hizi bado hawafahamu juu ya ukweli wa tohara ya kiroho, na badala yake wanaamini kuwa wanaweza kuoshwa dhambi zao kwa kupitia sala zao za toba. Na wanadai kuwa wanapokea ondoleo la dhambi zao na kufanya upya kila siku kwa kupitia sala za toba, hali wakiwa na imani katika damu ya Yesu Msalabani. Lakini aina hii ya imani ni imani ya matapeli wa kiroho ambao lengo lao ni kutimiza tamaa zao tu.

Je, unaamini kuwa Yesu alizichukua dhambi zako katika mwili wake mara moja na kwa wote wakati alipobatizwa? Kwa kuwa Yesu alizibeba dhambi zetu zote mara moja na kwa wote kwa kubatizwa na Yohana ndio maana tuliweza kuoshwa dhambi zetu kwa kuuamini Ukweli huu wa injili; kama Yesu angelikuwa hajazichukua dhambi zetu kwa kupitia ubatizo wake, basi ni hakika kuwa dhambi zetu zisingeliweza kutoweshwa. Ikiwa hatuiamini injili ya maji na Roho, basi hata kama tutamwamini Yesu kuwa ni Mwokozi kwa nguvu zote, ni hakika kuwa dhambi zetu haziwezi kutoweka.

Ule ukweli kuwa Yesu aliupokea ubatizo toka kwa Yohana Mbatizaji ni ushahidi kuwa dhambi zetu zote zimetoweshwa. Yesu aliweza kusulubiwa na kuibeba adhabu ya dhambi kwa sababu alikuwa amezibeba dhambi zetu kwa kupitia ubatizo wake. Mungu anataka kulikuta hilo Neno la ushuhuda katika mioyo yetu.

Bwana wetu amesema nini katika injili ya Yohana sura ya 6? Bwana alisema hivi, *“Mimi ndimi chakula cha uzima; yeye ajaye kwangu hataona njaa kabisa, naye aniaminiye hataona kiu kamwe”* (Yohana 6:35). Kisha akasema hivi tena, *“Kwa maana mwili wangu ni chakula cha kweli, na damu yangu ni kinywaji cha kweli. Aulaye mwili wangu na kuinywa damu yangu hukaa ndani yangu, nami hukaa ndani yake”* (Yohana 6:55-56). Bwana

wetu alibatizwa na Yohana Mbatizaji, kisha akaimwaga damu yake ili aweze kuwa chakula na kinywaji chetu halisi, na kwa sababu hiyo ametupatia wokovu wa kweli kwetu sisi sote tunaouamini Ukweli huu. Kama vile Yesu alivyotuambia, *“Aulaye mwili wangu na kuinywa damu yangu hukaa ndani yangu, nami hukaa ndani yake,”* basi ni muhimu sana tuviamini hivyo vitu muhimu vya injili ya maji na Roho ambayo ni ubatizo wa Yesu na damu yake aliyoimwaga Msalabani.

Yesu alizichukua dhambi zetu katika mwili wake kwa kubatizwa na Yohana. Hivyo dhambi zetu zilipitishwa kwenda kwa Yesu (Mathayo 3:15; Yohana 1:29; 1 Petro 3:21). Naye Yesu ametuokoa wewe na mii toka katika adhabu ya dhambi kwa kujitwika dhambi zetu na kufa Msalabani kwa niaba yetu na kwa ajili ya dhambi zetu. Kwa hiyo, sisi tumeokolewa toka katika dhambi zetu zote kwa kupitia imani yetu katika Yesu Kristo na katika injili ya maji na Roho.

Ndugu waamini wenzangu, sifikiri kama ni sahihi kuwaacha kama walivyo wale wanaosisitiza kuwa wanaweza kuoshwa dhambi zao kwa kufanya sala zao za toba. Hii ni kwa sababu ikiwa utaawacha kama walivyo, ni hakika kuwa wataadhibiwa kwa sababu ya dhamiri zao binafsi na kwa sababu ya kutomtii Mungu Mwenyewe. Wakristo wanaosisitizia juu ya sala za toba wanasimama kinyume na waamini wa injili ya maji na Roho na kwa sababu hiyo watahukumiwa na Mungu kwa sababu ya dhambi zao. Lakini mini sitaki kugombana nao. Ninachotaka kuwaambia ni kuwa, *“Anhaa? Kwa hiyo mnaziamini sala zenu za toba? Mna hakika kuwa dhambi zenu zinasamehewa kupitia sala hizo? Basi endeleeni kukiamini kile mnachokitaka! Lakini nataka mtambue kuwa mioyo yenu itabakia kuwa na dhambi, si ndivyo? Ikiwa mna dhambi katika mioyo yenu ni hakika hamtaweza kukwepa kwenda kuzimu hata kama mtajitahidi*

kiasi gani kumwamini Yesu kuwa ni Mwokozi wenu.”

Wakristo wengi wanakaidi kuupokea upendo wa ungu usio na masharti ambao unapatikana katika injili ya maji na Roho. Lakini tumeshawafundisha wote namna wanavyoweza kuokolewa toka katika dhambi za ulimwengu kwa kupitia Ukweli wa injili ya maji na Roho. Ni jambo gani basi tunalopaswa kulifanya kwao? Tunapaswa kuwaongojea ili waweze kugeuka na kuirudia injili ya kweli!

Mungu hakusema kuwa ni sawa ikiwa tutaiamini au kutoiamini injili ya maji na Roho. Kuna njia moja pekee inayotuwezesha kupokea ondoleo la dhambi na kisha kuingia katika Ufalme wa Mbinguni: njia hiyo ni imani. Njia hii ni njia ambayo mtu anaweza kuipitia kwa kuiweka imani yake katika wokovu wa Mungu ambao Yesu ametuletea—yaani kwa kuamini kuwa Yesu alizichukua katika mwili wake dhambi zetu zote kwa kubatizwa na Yohana, na kwamba akaimwaga damu yake pale Msalabani, na kwamba alifufuka toka kwa wafu, na kwamba kwa sababu hiyo ametuokoa sisi sote tunaoamini toka katika dhambi zote za ulimwengu. Bwana wetu ana nguvu ya kuweza kuwafanya waamini wa injili ya maji na Roho kuwa wasio na dhambi katika mioyo yao. Hivi ndivyo Mungu anavyowapeleka waamini wa injili ya maji na Roho katika Ufalme wa Mbinguni.

Nje na imani hii katika injili ya maji na Roho, au kwa kupitia imani nyinginezo kama vile kuziamini sala binafsi za toba, ni hakika kuwa haiwezekani kupokea ondoleo la dhambi zetu na kisha kuingia katika Ufalme wa Mbinguni. Tunaweza kuwa watu wa Mungu na kisha kuingia Mbinguni ikiwa tu tutaiweka imani yetu katika injili ya maji na Roho kwa mioyo yetu yote. Kwa na hapo, wale wasioiamini injili ya maji na Roho, na badala yake wanazitegemea sala zao binafsi za toba, ni hakika kuwa hawawezi kuingia katika Ufalme wa Mbinguni.

Hebu fikiria kuwa unajaribu kuziosha dhambi zako kwa kupitia sala za toba badala ya injili ya maji na Roho. Unaweza kufanya kile unachokitaka, lakini ni hakika kuwa dhambi zako zitabakia kama zilivyo, na mtu yeyote aliye na dhambi hawezi kuingia Mbinguni.

Wewe na mimi kwa sasa tunaiaimini injili ya maji na Roho na tunaihubiri injili hii. Ndani ya injili ya maji na Roho, tunafarijiana sisi kwa sisi na kupeana shukrani. Kuwemo ndani ya Kanisa la Mungu ni jambo ambalo tunapaswa kuwa na shukrani nalo, na tunatakiwa kuiweka imani yetu katika injili ya maji na Roho, na kwa sababu hiyo ni hakika kuwa sisi tunaishi maisha ya haki katika nyakati hizi za mwisho. Kwa kuwa Bwana amekuoka wewe na mimi toka katika dhambi zetu zote katika kizazi hiki kiovu, basi ni hakika kuwa tunaweza kuushinda uovu wa ulimwengu huu kwa kuuamini Ukweli na kisha kusonga mbele katika maisha yetu ya ushindi kama wenye haki. Kwa kuwa tumeokolewa toka katika dhambi zetu zote kwa kuiamini injili ya maji na Roho, basi ni hakika kuwa hatuwezi kuyaishi maisha yetu kwa namna yoyote ile tunayotaka, yaani kuishi kwa kuufuata ulimwengu hali tukiwa nje ya Kanisa la Mungu. Tukiwa waamini wa kweli katika injili ya maji na Roho, imani yetu haipaswi kuzikumbatia imani za waongo wanaodai kuwa wanaweza kuzioshelea mbali dhambi zao kwa kupitia sala za toba.

Ulimwengu unabadilika kwa haraka sana siku hizi. Mungu alitueleza juu ya nyakati za mwisho akasema hivi, *“Wengi wataenda mbio huko na huko, na maarifa yataongezeka”* (Danieli 12:4). Je, kifungu hiki si kinaeleza uhalisia wa kipindi hiki? Katika kipindi hiki cha mwisho, ni lazima tuweze kuibanisha vizuri injili ya maji na Roho, ambayo ni mstari halisi wa imani, na ni lazima tuishi kila siku kwa imani katika Neno la Mungu. Kama vile makuhani wa

Agano la Kale walivyoutunza ule mwanga ndani ya Hema Takatifu la Kukutania kwa kuuwasha wakati wote, vivyo hivyo, sisi nasi ni lazima tuzifanye nafsi zetu zidumu katika nuru ya Yesu kwa kuiweka imani yetu katika injili ya maji na Roho kila siku.

Ni lazima tuvipige vita vyetu vya kiroho kwa imani ili tuweze kudumu kama wana wa Mungu, na ili tusije tukachafuliwa na kizazi hiki kiovu. Pia ni lazima tuendeleo kumshukuru Mungu kwa kuturuhusu kuwa wana wake na kwa kutufanya tuishi maisha ya kiimani hali tukiwa tumeiweka imani yetu katika injili ya Bwana ya maji na Roho ambayo ni karama ya wokovu. Ingawa nyakati zinakwenda kasi kama vile mto huku miili yetu ikizidi kuwa minyonge na yenye kuzeeka, ukweli ni kuwa nia yetu ya kuitumikia injili ya maji na Roho haiwezi kuondoka; bali tunatarajia kuwa watenda kazi wengine waliopokea ondoleo la dhambi zao watainuka ulimwenguni kote.

Imendikwa hivi, *“Kwa maana haki ya Mungu inadhihirishwa ndani yake, toka imani hata imani; kama ilivyoandikwa, Mwenye haki ataishi kwa imani” (Warumi 1:17).* Tunaweza kupokea ondoleo la dhambi zetu kwa kuiamini injili ya maji na Roho, na pia tunaweza kukua na kuwa watu wa imani kwa kuitafakari hii injili ya kweli. Kwa kuwa siku ya kurudi Bwana haiko mbali, basi ni lazima tuishi kwa kuiamini injili ya maji na Roho kwa nguvu zaidi.

Katika kipindi hiki kiovu, Mungu amekuokoa wewe na mimi toka katika dhambi za ulimwengu, na ametufanya sisi kuwa wana wake. Kwa kweli tunazitoa shukrani zetu zote kwa Mungu. ☒

Maisha ya Kiimani ya Kisheria Huleta Laana Tu

< Wagalatia 1:1-24 >

“Paulo, mtume, (si mtume wa wanadamu, wala kutumwa na mwanadamu, bali na Yesu Kristo, na Mungu Baba aliyemfufua kutoka kwa wafu), na ndugu wote walio pamoja nami, kwa makanisa ya Galatia; Neema na iwe kwenu, na amani, zitokazo kwa Mungu Baba, na kwa Bwana wetu Yesu Kristo; ambaye alijitoa nafsi yake kwa ajili ya dhambi zetu, ili atuokoe na dunia hii mbovu iliyopo sasa, kama alivyopenda Mungu, Baba yetu. Utukufu una yeye milele na milele, Amina. Nastaajabu kwa kuwa mnamwacha upesi hivi yeye aliyewaita katika neema ya Kristo, na kugeukia injili ya namna nyingine. Wala si nyingine; lakini wapo watu wawataabishao na kutaka kuigeuza injili ya Kristo. Lakini ijapokuwa sisi au malaika wa mbinguni atawahubiri ninyi injili yo yote isipokuwa hiyo tuliyowahubiri, na alaaniwe. Kama tulivyotangulia kusema, na sasa, nasema tena, mtu awaye yote akiwahubiri ninyi injili yo yote isipokuwa hiyo mliyoipokea, na alaaniwe. Maana, sasa je! Ni wanadamu ninaowashawishi, au Mungu? Au nataka kuwapendeza wanadamu? Kama ningekuwa hata sasa nawapendeza wanadamu, singekuwa mtumwa wa Kristo. Kwa maana, ndugu zangu, injili hiyo niliyowahubiri, nawajulisha ya kuwa siyo ya namna ya kibinadamu. Kwa kuwa sikuipokea kwa mwanadamu wala sikufundishwa na mwanadamu, bali kwa ufunuo wa Yesu Kristo. Maana mmesikia habari za mwenendo wangu

zamani katika dini ya Kiyahudi, kwamba naliliudhi kanisa la Mungu kupita kiasi, nikaliharibu. Nami naliendelea katika dini ya Kiyahudi kuliko wengi walio hirimu zangu katika kabila yangu, nikajitahidi sana katika kuyashika mapokeo ya baba zangu. Lakini Mungu, aliyenitenga tangu tumboni mwa mama yangu, akaniita kwa neema yake, alipoona vema kumdhihirisha Mwanawe ndani yangu, ili niwahubiri Mataifa habari zake; mara sikufanya shauri na watu wenye mwili na damu; wala sikupanda kwenda Yerusalemu kwa hao waliokuwa mitume kabla yangu; bali nalikwenda zangu Arabuni, kisha nikarudi tena Dameski. Kisha, baada ya miaka mitatu, nalipanda kwenda Yerusalemu ili nionane na Kefa, nikakaa kwake siku kumi na tano. Lakini sikumwona mtume mwingine, ila Yakobo, ndugu yake Bwana. Na hayo ninayowaandikia, angalieni, mbele za Mungu, sisemi uongo. Baadaye nalikwenda pande za Shamu na Kilikia. Lakini sikujulikana uso wangu na makanisa ya Uyahudi yaliyokuwa katika Kristo; ila wamesikia tu ya kwamba huyo aliyetuudhi hapo kwanza, sasa anaihubiri imani ile aliyoiharibu zamani. Wakamtukuza Mungu kwa ajili yangu.”

Idadi ya wageni kwenye tovuti yetu inazidi kuongezeka. Kwa wastani huwa tunapokea wageni 4000 kwa siku, na tunatarajia idadi hii kuzidi kuongezeka muda si mrefu. Siku za hivi karibuni tumekuwa tukipata wageni sio tu kutoka nchi zinazo zungumza Kiingereza, bali kutoka katika nchi zinazo zungumza lugha tofauti duniani kote, ikiwemo nchi za Dunia ya Tatu kutoka Asia, Afrika, na Marekeni ya Kusini. Hivyo ninamshukuru sana Mungu. Ingawa kwa nyakati fulani kulikuwa na mambo ya kukatisha tamaa, kwa kweli bado

ninamshukuru Mungu kwa namna alivyoruhusu matunda ya uinjilisti na alivyo tubariki.

Pia vitabu vipya ambavyo vimelenga kuwalea waamini wenzentu vinaendelea kuchapishwa. Hivi sasa, mahubiri toka katika mfululizo wa Kitabu cha Mwanzo yanakaribia kuwekwa katika mfum wa vitabu-pepe, na ninatumaini kuwa vitabu vingi zaidi vitachapishwa hivi karibuni. Ninaamini kuwa tutaendelea kuwa karibu zaidi na siku ambapo watu wote ulimwenguni wataipata injili ya maji na Roho kwa kupitia tovuti yetu.

Dhumuni Lililomfanya Paulo Kuuandika Waraka Huu

Paulo aliutuma waraka wake kwenda kwa watakatifu katika mkoa wa Galatia ili kuisahihisha imani yao. Katika waraka huu, Paulo ameandika kuhusiana na imani yake, na ameielezea jinsi hiyo imani yake ilivyokuwa.

Katika Wagalatia 1:1, Paulo ameandika, *“Paulo, mtume, (si mtume wa wanadamu, wala kutumwa na mwanadamu, bali na Yesu Kristo, na Mungu Baba aliyemfufua kutoka kwa wafu),”* na kisha chini yake kwenye aya ya 12 Paulo aliandika hivi, *“Kwa kuwa sikuipokea kwa mwanadamu wala sikufundishwa na mwanadamu, bali kwa ufunuo wa Yesu Kristo.”*

Mtume Paulo aliandika waraka huu ili kuonya dhidi ya mafundisho ya wanatohara ambao waliyafanya makanisa ya Galatia kuingia katika machafuko kwa wakati huo. Badala ya kuamini injili ya maji na Roho, injili ambayo ilihubiriwa na Mtume Paulo, wanatohara walizingatia zaidi—tohara ya kimwili na wakaiona kuwa ni ya maana sana kuliko injili halisi. Kwa maneno mengine, kulikuwa na baadhi ya watu

katika makanisa ya Galatia ambao walifundisha kuwa waamini wangeloweza kuwa watu wa Mungu kwa kuishika Sheria ya Mungu na kwa kutahiriwa kimwili kuliko kuwa na imani katika ubatizo wa Yesu Kristo na damu yake aliyoimwaga Msalabani.

Ndio maana Mtume Paulo alisema, *“Nastaajabu kwa kuwa mnamwacha upesi hivi yeye aliyewaita katika neema ya Kristo, na kugeukia injili ya namna nyingine” (Wagalatia 1:6).* Kisha akaikemea mipango ya wanatohara akisema, *“Wala si nyingine; lakini wapo watu wawataabishao na kutaka kuigeuza injili ya Kristo.”*

Kwa hakika hakuna injili nyingine hapa ulimwnegu zaidi ya ile iliyotolewa na Mungu ambayo ni injili ya maji na Roho. Lakini pamoja na ukweli huu, Wakristo wa Galatia walifurahia zaidi tohara ya kimwili na wakawa wakiitamani. Hivyo tunaweza kuhitimisha kuwa wakristo hao waliishia kuzifuata tamaa za miili yao huku wakiwa na imani hiyo ya kisheria.

Mtume Paulo alikasirishwa sana na wanatohara na ndio maana aliwaambia hivi, *“Lakini ijapokuwa sisi au malaika wa mbinguni atawahubiri ninyi injili yo yote isipokuwa hiyo tuliyowahubiri, na alaaniwe” (Wagalatia 1:8).* Kwanza kabisa, tunapaswa kufahamu yaliyokuwemo katika injili iliyokuwa ikihubiriwa na wanasheria kiasi cha kuweza kumfanya Mtume Paulo kusema kuwa ikiwa mtu awaye yote *“atawahubiri ninyi injili yo yote isipokuwa hiyo tuliyowahubiri, na alaaniwe.”*

Neno ambalo linatisha sana katika kauli hiyo ya Mtume Paulo ni kuhusu kulaaniwa na Mungu, na ni neno ambalo watakatifu wa Galatia walilisikia toka kwa Mtume Paulo. Sababu iliyomfanya Mtume Paulo kusema hivyo ni kwa sababu walikuwa wameiacha injili ya maji na Roho na badala yake wakawekea mkazo tohara ya kimwili. Ndio maana moyo wa Paulo ulikasirishwa na hivyo kujawa na hasira yenye haki.

Neno linalosema “injili nyingine” halimaanisha kuwa kuna injili nyingine zaidi ya injili ya maji na Roho, bali lina maanisha ni injili ya uongo iliyokuwa ikidai kuwa tunaweza kuwa watu wa Mungu ikiwa tu tutaishika Sheria. Kwa maneno mengine, injili hiyo ilikuwa ikidai watakatifu wa Galatia wawe na imani ya kisheria.

Sasa, hii imani ya kisheria mbele za Mungu ilikuwa ni imani gani? Ilikuwa ni imani iliyokuwa ikikazia umuhimu wa Sabato na pia ilidai kuwa ni muhimu waamini watahiriwe kimwili. Kwa matokeo hayo, watakatifu katika makanisa ya Galatia yakafikia hatua ya kusesitiza hiyo imani ya kisheria kuliko imanikatika injili ya maji na Roho. “Ikiwa unataka kumwamini Yesu na unataka kuokolewa ni lazima pia utahiriwe kimwili kama walivyotahiriwa wana wengine wa Ibrahimu, ni lazima uishike Sabato, na uishi kwa kuifuata Sheria. Na pia hutapaswa kula mnyama ambaye hana kwato zilizopasuka, na wala usile mnyama yoyote ambaye ni kibudu, na wala usile mnyama yoyote ambaye amekufa kutokana na kifo cha kawaida pasipo kuchinjwa, bali utapaswa kula vyakula vyote ukichagua kama vile inavyoelekeza Sheria.” Hii ndio aina ya imani ambayo walikuwa wakiipigia debe na kuitetea.

Kiuhalisia, ikiwa wewe na mimi tungeliacha injili ya maji na Roho na kisha kuishi maisha ya kisheria kiimani, basi hata sisi tungelilaumiwa na Mungu. Je, tunaweza kuwa wana wa Mungu kwa kupitia imani yetu ya kisheria? Hapana, hata kwetu sisi tunaoamini katika injili ya maji na Roho ikiwa tutaishia kuyarudia tena maisha ya kiimani ya kisheria, basi ni hakika kwamba hata sisi tutakufa kiroho.

Je, hii ina maanisha kuwa ni makosa kwa mtu kuishika na kuitekeleza Sheria? Mtu anapaswa kuwa makini kuufahamu Ukweli halisi na kuutumikia huo Ukweli; ikiwa mtu atajitoa kwa ajili ya jambo fulani ilhali haufahamu Ukweli wa injili ya

maji na Roho, basi mtu huyo ni lazima atambue kuwa anatenda jambo baya zaidi.

Hakuna imani ya kisheria inayoweza kukubaliwa na kuthibitishwa na Mungu. Wale walio na imani kama hiyo huitafsiri Biblia kwa kuangalia zaidi uandishi wake—kwa mfano, pale ambao Neno linatuamuru kutokufanya kazi katika siku ya Sabato, wao huamini kama ilivyoandikwa na kwa sababu hiyo wao huwa hawawezi hata kupika kuanzia jioni ya Ijumaa hadi jua litakapozama siku ya Jumamosi, katika kipindi hicho wao hula kile ambacho walikwisha kiandaa. Watu wenye imani ya jinsi hiyo hawawezi hata kusafiri siku ya Sabato maana ndivyo ilivyoandikwa katika Sheria, hawapaswi kwenda mbali na nyumba zao kupita hatua fulani. Wao huamini kuwa wanapofanya hivyo huwa wanaonyesha utii mkubwa kwa Sheria na hivyo kitendo hicho kwao huwa ni haki yao binafsi. Kitendo cha kujaribu kuiunda haki binafsi kwa kuishika na kuitii Sheria na desturi nyingine ambazo walirithishwa na watangulizi wao, kwa hakika ni kitendo cha kuishi maisha ya kiimani yanayozikataa baraka za Mungu zilizotolewa kwa neema yake, na kwa sababu hiyo wanajirundikia hasira ya Mungu vichwani mwao.

Kusanyiko ambalo limejaribu kuishika na kuifuata Sheria ni Kanisa la Waadventista Wasabato. Waadventista wakati wote hutetea suala la kuishika kwanza Sabato. Wao hudai kuwa Sabato inaanzia siku ya Ijumaa jua linapozama na inaishia siku ya Jumamosi jua linapozama, na kwamba mtu anapaswa kuzishika na kuzitii siku na masaa hayo kikamilifu. Pia, kwa kuwa hakuna mtu anayepaswa kufanya kazi siku ya Sabato, inasemekana kuwa wasabato wenyewe walikuwa na mabishano makubwa sana ikiwa wawashe taa wakati wa ibada zao katika siku ya Sabato. Hii ni kwa sababu kulikuwa na watu ambao walidai kuwa kitendo cha kuwasha taa kilihusiana na

moja kwa moja na kuwafanya watu wanaofanya kazi kwenye mitambo ya umeme kuendelea kufanya kazi, na kwamba njia pekee ya kuwafanya wafanyakazi wa mitambo ya umeme kutofanya kazi ilikuwa ni kuzima taa wakati wa ibada ya Sabato. Kama ukweli ndio huu, basi walipaswa kutotumia umeme pia katika siku hiyo, na wangelipaswa pia kutotumia maji, na kwamba walipaswa kutumia kila kitu ambacho walikuwa wamekihifadhi. Kwa kweli ni jambo la kuchekesha kabisa.

Imani inayoamini katika Ukweli halisi haishughuliki na mambo ya kisheria na si imani ya kisheria, bali ni imani inayoamini katika injili ya maji na Roho. Pamoja na ukweli huo kuna madhehebu mengi sana ya Kikristo ambayo hayautambui ukweli huu. Na hii ndio sababu wafuasi wao wana ule moyo wa kujitoa sana kuishika Sheria. Pamoja na hayo, ukweli ni kuwa hata sasa wanapaswa kuamini kwa mioyo yao kuwa Mwana wa Mungu amewaokoa kikamilifu toka katika dhambi zao zote kwa kupitia injili ya maji na Roho. Ni lazima wamwamini Mungu Baba, ni lazima wauamini wokovu wa upendo unaotoka kwa Mwana wa Mungu, na kwa sababu hiyo ni lazima wapokee baraka za Mungu na kisha waweze kumtukuza Mungu.

Sababu Iliyomfanya Mungu Akatupatia Sheria ya Haki

Ndugu waamini wenzangu, kwa nini Mungu alitupatia Sheria? Mungu alitupatia Sheria ili tuweze kuzifahamu na kuzitambua dhambi zetu (Warumi 3:19-20). Ikumbukwe kuwa wa watakatifu wa Kigalatia, kwa upande wao kuishika Sheria kila siku haikuwa jambo linalojitosheleza, na kwa wao ili mtu

aweze kuwa mtu wa Mungu ilimpasa awe ametahiriwa kimwili. Hivyo watu walipoingia katika makanisa ya Galatia ili kumpokea Yesu kuwa ni Mwokozi wao, walifundishwa kuwa walipaswa kwanza kutahiriwa kimwili.

Manabii hawa wa uongo waliwakana waamini wowote wale ambao walikuwa hawajatahiriwa kimwili, walisisitiza kuwa waamini hao wasingeliweza kuwa watu wa Mungu ikiwa watakuwa hawajatahiriwa kimwili. Waliwakemea waamini wapya huku wakisema, “Mungu aliwaamuru watu wote wa Ibrahimu kutahiriwa. Kwa nini ninyi mnakataa kutahiriwa ati kwa kuwa mnamwamini Yesu? Je, ninyi ni wakuu kuliko Ibrahimu?” Kutokana na hali hii ndio maana imani ya watakatifu wa Galatia iliweza kuharibiwa. Kwa matokeo hayo, walijikuta wakiimarisha injili nyingine iliyokuwa ikisisitizia juu ya umuhimu wa kutahiriwa, na kwa sababu hiyo suala la kuamini injili ya maji na Roho likawa halina mashiko tena ingawa hapo mwanzo walikuwa wameiamini injili hii ya maji na Roho.

Je, ni kweli kuwa tunakuwa watu wa Mungu na kisha kuokolewa toka katika dhambi zetu zote kwa kuishika na kuitekeleza Sheria? Kuna amri na kanuni 613 katika Sheria ya Mungu. Na ukweli ni kuwa Wayahudi sio tu wanazifuata hizo sheria 613 bali pia wanazo taratibu na desturi nyingine ambazo wamerithishwa toka kwa mababa zao. Lakini, kuna mtu anayeweza kuzishika hizo sheria zote? Hapana, hakuna mtu anayeweza kuishi kwa kuitii Sheria kikamilifu. Mwanadamu hana uwezo wa kuishika na kuifuata Sheria. Na ndio maana Biblia inasema hivi, “*Basi je! Torati haipatani na ahadi za Mungu? Hasha! Kwa kuwa, kama ingalitolewa sheria iwezayo kuhuisha, yakini haki ingalipatikana kwa sheria*” (Wagalatia 3:21). Hivyo, kutokana na ukweli kuwa waamini wa makanisa ya Galatia walikuwa wakigombana kuhusiana na hoja ikiwa mwamini ni

lazima atahiriwe au la ni ushuhuda kuwa makanisa hayo yalikuwa hayaufuati Ukweli halisi. Hivyo unaweza kufikiria na kuona yaliyokuwa yakiendelea katika makanisa ya Galatia.

Mtume Paulo aliliona hitaji muhimu sana na kuirejesha upya imani sahihi katika Neno la Ukweli kwa watakatifu wa Galatia. Hivyo ili aweze kuwakumbusha aina ya imani ambayo aliwafikishia, Mtume Paulo alisema haya, *“Paulo, mtume, (si mtume wa wanadamu, wala kutumwa na mwanadamu, bali na Yesu Kristo, na Mungu Baba aliyemfufua kutoka kwa wafu)”* (Wagalatia 1:1). Hapa Paulo alisema kuwa injili aliyowahubiri haikutoka kwa wanadamu. Ni kweli kuwa injili hii haikuwafikia ikitoka kwa mwanadamu, bali ilikuwa ni injili ya maji na Roho iliyotoka kwa Bwana.

Injili iliyoaminiwa na kuhubiriwa na Mtume Paulo haikuwa ya kujifunza toka kwa mwanadamu. Yohana 1:17 inasema hivi, *“Kwa kuwa torati ilitolewa kwa mkono wa Musa; neema na kweli zilikuja kwa mkono wa Yesu Kristo.”* Je, Sheria ilitolewa kupitia nani? Mungu aliitoa Sheria kwa kupitia Musa naye Musa akaifikisha kwa watu wa Israeli. Hii Sheria ya Mungu ilitolewa kwa watu ili waweze kuzitambua dhambi zao (Warumi 3:19-20).

Kwa upande mwingine, neema na kweli zilikuja kupitia Yesu Kristo. Neema ya Mungu inayotajwa hapa ina maanisha ni karama ya Mungu inayoonyesha kuwa Ukweli wa wokovu halisi ulitufikia sisi kama karama kupitia kwa Yesu Kristo. Ndio maana Mtume Paulo alisema hivi, *“Kwa maana, ndugu zangu, injili hiyo niliyowahubiri, nawajulisha ya kuwa siyo ya namna ya kibinadamu. Kwa kuwa sikuipokea kwa mwanadamu wala sikufundishwa na mwanadamu, bali kwa ufunuo wa Yesu Kristo.”* Paulo aliweka wazi hapa kuwa kwa kuwa Yesu alikuwa amemtokea na kuongea naye ndio maana aliweza kuifahamu injili hiyo na kuiamini. Kwa maneno mengine,

Paulo alipokea ondoleo la dhambi zake kwa kuamini kuwa Yesu Kristo alikuwa amemwoko kwa kubatizwa, kwa kufa Msalabani, na kisha kwa kufufuka toka kwa wafu kwa ajili yake.

Hivyo, aliwasihi na kuwatia moyo watakatifu wa Galatia akisema, “Ndio maana ninalihubiri Neno la injili ya maji na Roho kwa watu. Kwa nini ninyi mnaihubiri injili tofauti na injili ya maji na Roho ambayo niliihubiri kwenu? Je, mnafahamu jinsi inavyopotosha kusema kuwa mtu anaweza kuokolewa toka katika dhambi ikiwa mtu huyo atamwamini Yesu na kuishika Sheria kikamilifu? Kwa nini mnaihubiri injili tofauti badala ya injili ya maji na Roho? Ni hakika mtalaaniwa na Mungu. Hampaswi kuihubiri injili nyingine yoyote ile zaidi ya injili ya kweli.” Paulo aliyasema haya kwa sababu aliwaonea huruma waamini wa Galatia, kwa kuwa walikuwa wakijielekeza wao wenyewe kwenda kuzimu.

Hata kwa wale ambao wanaamini katika injili ya maji na Roho, ikiwa wataangukia katika imani ya kisheria, basi na wao pia wataangamia kiroho. Katika jambo hili hakuna mbadala. Je, unafikiri kuna sababu nyingine inayoweza kuwafanya Wakristo kufa kiroho? Ni hakika kuwa mtu ataangamia ikiwa atajaribu kuokolewa kwa kuyaamini mafundisho mengine zaidi ya injili ya maji na Roho. Kwa kweli hoja zipo wazi na wala hakuna mkanganyo hapa. Ikiwa mtu atasisitizia juu ya Sheria na kisha kuegemea kwenye imani ya kisheria, basi tendo hili pekee lita maanisha kuwa mtu huyo anaiamini injili nyingine, na kwa sababu hiyo mwisho wake utakuwa ni kifo.

Katika ulimwengu huu hakuna injili nyingine. Injili ya kweli ni injili ya maji na Roho, na kwa sababu hiyo hakuna injili nyingine yoyote ile zaidi ya injili hii. Kwa upande mwingine, injili nyingine zote zaidi ya injili ya maji na Roho ni mafundisho ambayo yanahitaji uwepo wa matendo ya

mwanadamu kama sharti mojawapo la wokovu. Je, hivi ndivyo unavyoamini: “Pamoja na kuwa nimepokea ondoleo la dhambi kwa kuamini injili ya maji na Roho, ni dhahiri kuwa ninatakiwa pia kuishika Sheria, na pia ninatakuwa kujitahidi kutotenda dhambi. Ikitokea kwa bahati mbaya nimetenda dhambi, basi nitatakiwa kuziosha dhambi hizo kwa kupitia sala zangu za toba”? Kwa kweli ikiwa unaamini hivi basi huku ndiko kuamini injili nyingine. Yeyote yule anayeamini hivi ni hakika kuwa atakabiliana na kifo cha kiroho.

Ikiwa ni kweli kuwa tunapaswa kuishika na kuitii Sheria, basi ni hakika kuwa tungelipaswa pia kuzishika na kufuata taratibu zote za Pasaka. Ingelitupasa kila mwaka mara moja kumchinja mwanakondoo na kisha kuipaka damu yake katika fremu za milango. Na kwamba kila wakati tulipotenda dhambi ingelitupasa kutoa sadaka ya dhambi, na kwa sababu hiyo ingelitupasa pia kile ambacho Sheria imeruhusu. Maelezo haya yote niliyoyatoa ni sehemu kidogo tu ya Sheria nzima; kuna kanuni na sheria nyingine nyingi sana ambazo tungelipaswa kuzishika na kuzitii. Sasa, tungeliwezaje kuzishika hizo sheria na kanuni zote? Kwa kweli ni kitu ambacho hakiwezekani, na ndio maana Bwana wetu alisema, *“Kwa kuwa torati ilitolewa kwa mkono wa Musa; neema na kweli zilikuja kwa mkono wa Yesu Kristo”* (Yohana 1:17).

Mtume Paulo alisema kuwa injili yake haikuwa injili “iliyotokwa kwa wanadamu wala kupitia kwa mwanadamu.” Kwa maneno mengine Paulo alikuwa akisema hivi: “Injili yangu si injili ya kutoka kwa wanadamu na wala si ya kupitia kwa mwanadamu. Mimi sijaokolewa kwa sababu ya kuishika Sheria iliyotolewa na Musa. Kama ningeliweza kuupata wokovu kwa kuishika Sheria, basi ningelikuwa nilishapata wokovu muda mrefu uliopita. Baba zangu waliotangulia waliipokea Sheria iliyotolewa na Musa, na mimi mwenyewe

kwa asili nilikuwa ni mwanasheria. Na nilifundishwa kwa kina chini ya Gamalieli aliyekuwa mwalimu mkuu sana wa Sheria. Sasa hebu muamue ninyi wenyewe, mnafikiri ufahamu wenu wa Sheria unaweza kulinganishwa na ufahamu niliokuwa nao mimi? Sasa cha kushangaza ni kuwa mimi sijahesabiwa kuwa mwenye haki kwa sababu ya kuishika na kuitii Sheria. Mimi nimeufikia wokovu wangu kwa sababu ya kukutana na Yesu na kwa kwa kuamini kuwa Yesu Kristo ameniokoa kwa kupitia injili ya maji na Roho. Na mimi nimewahubiri juu ya ukweli huo. Hivyo, hampaswi kuangukia katika maisha ya kiimani ya kisheria, vinginevyo mtalaaniwa na Mungu.” Hivi ndivyo Mtume Paulo alivyokuwa akisema.

Injili ya maji na Roho ni injili ambayo Paulo aliamini. Paulo aliikiri imani yake kwa kusema hivi, *“Nimesulibiwa pamoja na Kristo; lakini ni hai; wala si mimi tena, bali Kristo yu hai ndani yangu”* (Wagalatia 2:20). Aliwezaje basi Paulo kusulubiwa pamoja na Kristo? Pauli aliweza kusulubiwa pamoja na Yesu kwa sababu alikuwa ameungana pamoja na Kristo kwa kupitia ubatizo wa Yesu. Kwa hiyo, kifo cha Yesu pale Msalabani kimsingi kina maanisha kuwa ni kifo cha nafsi yako yenye dhambi na nafsi yangu yenye dhambi.

Yesu aliweza kuzibeba dhambi zako zote na zangu kwa kupitia ubatizo; na kwa kusulubiwa na kuimwaga damu yake hadi kifo, Yesu aliibeba adhabu yote ya dhambi zetu; Yesu ametupatia maisha mapya kwa kitendo chake cha kufufuka toka kwa wafu. Je, huwezi kuona ni jinsi gani ilivyo makosa kabisa kufikiri kuwa haitoshi kumwamini Yesu Kristo ambaye ametuokoa kwa kupitia injili ya maji na Roho, na kwamba tunatakiwa kuishika Sheria, na kisha kupokea tohara ya kimwili, na kuishika Sabato kwa uaminifu? Kwa hakika tusipokuwa makini tunaweza kuishia kuwa kama Wakristo wa makanisa ya Galatia, ambao waliitupa injili ya maji na Roho na

kisha wakajaribu kuwa wakamilifu mbele za Mungu kwa kutegemea jitihada zao binafsi.

Kanuni hiyo hiyo inatumika hata kwetu sisi leo hii. Sisi nasi tunaondolewa dhambi zetu zote na tunaufikia wokovu wetu kwa kuamini katika injili ya maji na Roho. Kwa hakika kuna kitu kingine tunachoweza kukifanya zaidi ya kuuamini Ukweli wa injili na kuushukuru. Na tunapolipokea ondoleo la dhambi zetu, basi tunapaswa kuyatenda majukumu yetu yote kwa imani tukiwa vyombo vya Mungu, yaani huku tukiihubiri injili hii ambayo Mungu ametupatia kwa uaminifu na shukrani. Kwa maneno mengine, hatupaswi kujaribu kuishika Sheria ili tuweze kuupata wokovu. Bali, sasa tunaishi maisha yetu ya kiimani hali tukiwa tumeunganishwa na Kanisa ili tuweze kulilinda Neno la injili ya Kweli na kulihubiri kwa watu wengine kwa imani, hii ni kwa sababu sisi tumekwisha okolewa kwa kuamini katika injili ya maji na Roho. Je, injili ya maji na Roho kwa kiasi fulani ina mapungufu kiasi cha kukutaka wewe uiongezee kwa kuishika Sheria? Hapana, ni dhahiri kuwa yeyote anayejaribu kuwa mkamilifu kimatendo basi mtu huyo hajazaliwa tena upya, na mtu wa jinsi hiyo bado yupo chini ya laana.

Vipi kuhusu Wakristo wa leo hii? Ingawa wanaamini kuwa Yesu amewaokoa kwa kupitia damu yake Msalabani, bado wanadai kuwa inawapasa kufanya sala za toba kwa juhudi ili waweze kutakaswa. Fikra hii inayomtaka mtu aonyeshe juhudi katika jambo fulani ili aweze kuokolewa hiyo ndiyo imani ya kisheria. Watu wenye imani ya jinsi hiyo husema inampasa mtu kukesha usiku kucha akiomba, au aende kuomba mlimani na huku akiwa amefunga.

Je, ni kweli kuwa Mungu hawezi kutujibu hadi tuwe tumefunga na kuomba? Je, Mungu hawezi kutusikia hadi tuwe tumekesha usiku kucha tukiomba? Kwa kweli kama mtu

anaokolewa toka katika dhambi kwa kuishika Sheria na kuishi maisha matakatifu, basi ni nani anayeweza kuokolewa toka katika dhambi zake? Kwa kweli hakuna hata mmoja anayeweza kuokolewa kwa namna hii. Njia pekee ya kuweza kuufikia wokovu ni kuamini katika injili ya maji na Roho; nje ya hapo hakuna kabisa njia nyingine. Neema na Kweli vilikuja kutoka kwa Yesu Kristo. Hii ndio maana maisha yetu ya kiimani ni lazima yaongozwe kwa kuitumainia injili ya maji na Roho. Ni lazima tuyaongoze maisha yetu ya kiimani kwa kuamini katika injili ya maji na Roho hali tukiwa na imani katika Neno la Mungu la Kweli.

Makanisa ya Galatia yalichanganyikiwa kiroho, yaligubikwa na wabadhirifu wa kiroho waliokuwa maeneo hayo. Je, unafikiri kuwa Kanisa la Mungu lina kinga dhidi ya wapotoshaji wa kiroho? Hapana, kwa kweli hata Kanisa la Mungu lina matapeli. Huku wakiwa wamejaa upotofu wakifikiri kuwa wokovu ulipatikana kwa kuishika Sheria, basi watu hao wasio waaminifu katika makanisa ya Galatia waliwafundisha kuwa mtu ni lazima atahiriwe kiroho kama nyongeza kwa imani aliyonayo kwa injili. Mtume Paulo alipitia mateso mengi alipokuwa akiwahubiria injili, lakini hata baada ya kuwa wameipokea injili ya maji na Roho, waamini hao walimsaliti Paulo kwa kuipokea injili tofauti na ile aliyoihubiri huku wakidai kuwa ni lazima waishike Sheria.

Neema na Kweli Vilikuja Kupitia Yesu Kristo

Yesu ametuokoa wewe na mimi toka katika dhambi kwa kupitia injili ya maji na Roho. Yesu amezitoweshea mbali dahmbi zetu na ametupatia karama ya wokovu. Kwa kweli ni Ukweli usio na shaka kuwa Yesu ametuokoa kwa kuja kwake

hapa duniani, kwa kubatizwa, kwa kufa Msalabani, na kwa kwa kufufuka kwake toka kwa wafu. Kwa kweli huo si uongo. Kwa kweli hakuna sheria nyingine ya wokovu zaidi ya hii inayosema kuwa, Yesu Kristo ametuokoa kwa kupitia injili ya maji na Roho.

Hakuna mwanadamu anayeweza anayeweza kumwokoa mwanadamu mwenzangu toka katika dhambi zake. Yesu Kristo ni Mwana wa Mungu na Mungu Mwenyewe. Kwa kuwa ni Mungu Mwenyewe ndiye aliyetuokoa kwa kufanyika kiumbe kwa muda fulani, basi kazi zote alizozitimiza ni kamilifu. Kitendo cha kuukataa uungu wa Yesu na kisha kusema kuwa yeye ni Mwana wa Mwanadamu tu ni madai yanayotolewa na matapeli wa kiroho. Hii ni kwa sababu hakuna mwanadamu anayeweza kumwokoa mwanadamu mwingine toka katika dhambi zake zote.

Kwa kupitia hili Neno la Wagalatia tunapaswa kuitambua injili ya kweli ilivyo, na tunapaswa kuishi kwa kuifuata hiyo injili ya kweli. Injili ya maji na Roho ndio Ukweli halisi, hivyo mbali na kuifuata injili hii kwa imani inapaswa ifahamike kuwa kitu chochote kile kinachosisitiza kuhusu matendo mema ya mtu binafsi au Sheria ni upotofu. Kwa hakika kitendo cha cha kuiamini injili ya maji na Roho, kuitumikia injili, na kisha kuishi kwa ajili ya injili hii ni jambo lililo sahihi. Ikiwa hatutaishi kwa kuishika injili ya maji na Roho, basi maisha yetu yatakua hayana thamani na maana yoyote ile.

Kwa kweli tunaweza kuupokea upendo wa Mungu na baraka zake ikiwa tu tutaamini na kuifuata injili ya maji na Roho kwa mioyo yetu yote. Ukweli ni kuwa ikiwa mioyo yetu itakuwa haina imani katika injili ya maji na Roho, basi matendo yetu yote hata yakiwa mema kiasi gani yatakuwa hayana maana na utakuwa ndio mwisho wetu. Mungu anawapenda wale wanaoamini katika injili ya maji na Roho

kwa mioyo yao yote, na anawapenda wale wanaoishi kwa mujibu wa injili hii ya maji na Roho. Kwa kupitia Wagalatia sura ya kwanza tumeweza kuona jinsi injili hii ya maji na Roho ilivyo ya thamani, na pia tumeona jinsi imani ya kisheria ilivyolaaniwa.

Watu wengi sana wanaangukia katika imani ya kisheria kwa sababu hawaiamini injili ya kweli kwa mioyo yao, lakini ninyi msiwe kama wao, ni lazima muitoe mioyo yenu na nia zenu na kuiweka imani yetu katika injili ya maji na Roho. Ni lazima uamini kuwa imani ya kisheria hatimaye itakuletea laana.

Ninamshukuru Bwana kwa neema yake ambayo imeturuhusu kuishi maisha ya kubarikiwa huku mioyo yetu ikiwa imezamishwa katika injili ya kweli ya Mungu. ☒

SURA YA 2



Unaweza Kupakua Vitabu vya Kikristo vya Mchungaji Paul C. Jong
katika Kompyuta, Kompyuta-Kibao, au kwenye Simu-Mahiri

Ni Kwa Nini Mtume Paulo Aliwapuuza Waishio Kisheria?

< Wagalatia 2:1-10 >

“Kisha, baada ya miaka kumi na minne, nalipanda tena kwenda Yerusalemu pamoja na Barnaba, nikamchukua na Tito pamoja nami. Nami nalikwenda kwa kuwa nalifunuliwa, nikawaeleza injili ile nihubiriyo katika Mataifa, lakini kwa faragha kwa hao walio wenye sifa, isiwe labda napiga mbio bure, au nalipiga mbio bure. Lakini Tito aliyekuwa pamoja nami, naye ni Myunani, hakulazimishwa kutahiriwa. Bali kwa ajili ya ndugu za uongo walioingizwa kwa siri; ambao waliingia kwa siri ili kuupeleleza uhuru wetu tulio nao katika Kristo Yesu, ili watutie utumwani; ambao hata saa moja hatukujitia chini yao, ili kwamba kweli ya Injili ikae pamoja nanyi. Lakini wale wenye sifa ya kuwa wana cheo; (walivyokuwa vyo vyote ni mamoja kwangu; Mungu hapokei uso wa mwanadamu); nasema, hao wenye sifa hawakuniongezea kitu; bali, kinyume cha hayo, walipoona ya kuwa nimekabidhiwa injili ya wasiotahiriwa, kama vile Petro ya waliotahiriwa; (maana yeye aliyemwezesha Petro kuwa mtume wa waliotahiriwa ndiye aliyeniwezesha mimi kwenda kwa Mataifa); tena walipokwisha kuijua ile neema niliyopewa; Yakobo, na Kefa, na Yohana, wenye sifa kuwa ni nguzo, walinipa mimi na Barnaba mkono wa kuume wa

shirika; ili sisi tuende kwa Mataifa, na wao waende kwa watu wa tohara; ila neno moja tu walitutakia, tuwakumbuke maskini; nami neno lilo hilo nalikuwa na bidii kulifanya.”

Kwa Nini Wakristo Wengi Wanaishi Maisha ya Kiimani Pasipo Kuwekwa Huru Mbali na Dhambi Zao?

Sisi sote ni lazima tutambue kuwa Wakristo wengi wanadanganywa na wale wajiitao kuwa ni viongozi mashuhuri katika Ukristo. Siku hizi kuna idadi kubwa sana ya watu ambao wanaishi maisha ya kidini, hali wakiwa wamedanganywa kiroho na wale ambao ni mashuhuri. Hivyo tunapaswa kutowazingatia walimu wa uongo. Katika Ukristo wa hivi sasa, hao watu mashuhuri wanaidharau na hawaifahamu injili ya maji na Roho na kwa sababu hiyo imani yao haina maana kabisa. Na ndio maana imani ya wanatheolojia wa Kikristo ni yenye upotofu mkubwa.

Imani ya watu mashuhuri katika Ukristo wa sasa ipo kama ifuatavyo: Wanasisitiza kuwa watu wanapaswa kuzioshelea mbali dhambi zao za kila siku kwa kupitia sala za toba na wanapaswa kufanya hivyo baada ya kuwa wamemwamini Yesu kuwa ni Mwokozi. Kwa matokeo hayo, imani yao ni imani yenye makosa ya uongo. Ni makosa makubwa kusema kuwa Wakristo wanaweza kuziosha dhambi zao za kila siku kwa kufanya sala za toba. Kwa kuwa Wakristo wa leo wanajaribu kuziosha dhambi zao kwa kupitia sala za toba, hali wakiwa hawaifahamu injili ya kweli ya maji na Roho basi wamefikia hatua ya kumfahamu na kumwamini Mwokozi kwa namna yenye makosa.

Hivyo, ni lazima tuwafikishie injili ya maji na Roho. Ni lazima tutambue kuwa hakuna njia nyingine inayomwezesha mtu kuziosha dhambi zake pasipo kuwa na imani katika injili ya maji na Roho. Watu wote wanaweza kuoshwa dhambi zao kikamilifu kwa kuamini katika injili ya maji na Roho. Ni muhimu kufahamu kuwa ni makosa makubwa watu wanapofikiri kuwa wanaweza kuzioshelea mbali dhambi zao kwa kutumia sala za toba. Imani inayowaeleza watu kuwa wanaweza kuziosha dhambi zao kwa kupitia sala za toba ni imani isiyo na msingi. Maisha ya kiimani ya watu walio na imani kama hiyo ni sawa na mtu mfu na yameiacha mbali neema ya Yesu Kristo, na kwa matokeo hayo wanabakia na ujinga na wanasimama kinyume na Ukweli wa Mungu wa Wokovu. Kwa kuwa hawaiamini injili ya maji na Roho, ndio maana basi wamejiundia mafundisho ya kidini ya toba ambayo yanasisitiza kuwa waamini wanaweza kuzioshelea mbali dhambi zao binafsi kwa kufanya sala za toba.

Ni lazima watambue kuwa imani yao ina makosa makubwa maana wao wanasisitiza kuwa fundisho la kidini la toba ndio njia pekee ya kuweza kuzioshelea mbali dhambi zao binafsi. Lakini watu wa jinsi hiyo hawezi kujiweka huru mbali na dhambi zao. Hivyo, ni lazima wajaribu kulipokea ondoleo lao la dhambi zao kwa kuamini katika injili ya maji na Roho badala ya kufanya sala za toba. Pia ni lazima watambue kwamba ni wale tu wanaozaliwa tena upya kwa kuamini katika injili ya maji na Roho ndio wale wanaoweza kuihubiri injili ya kweli kwa kila mwenye dhambi hapa duniani. Kitu cha muhimu zaidi ambacho Biblia inatueleza nikuhusu Neno la injili ya maji na Roho. Yesu ametukomboa toka katika dhambi zetu kwa kuja kwake hapa duniani, kwa kuupokea ubatizo toka kwa Yohana Mbatizaji ili kuzichukua dhambi zote za ulimwengu, na kwa kufa kwake pale Msalabani. Ni lazima

tumwamini Mwokozi aliyekuja kwa injili ya maji na Roho katika mioyo yetu.

Viongozi wa Ukristo wa leo wanajaribu kuzioshelea mbali dhambi zao kwa kufanya sala za toba. Wao wanalenga zaidi kupata baraka za kimwili kuliko kuamini katika maji na Roho. Katika waraka kwa Wagalatia imeonyeshwa dhahiri kuwa imani yao ni potofu.

Wao ni vipofu wa kiroho na ambao hawatambui kuwa wao ni vipofu. Yesu alisema, *“Waacheni; hao ni viongozi vipofu wa vipofu. Na kipofu akimwongoza kipofu mwenzake, watatumbukia shimoni wote wawili”* (Mathayo 15:14). Wao wanajaribu kuwafundisha wafuasi wao kwa namna yao pasipo hata kuufahamu Ukweli wa injili ya maji na Roho. Ili waweze kuwafundisha watu, basi wanapaswa kwanza kuamini katika injili ya maji na Roho.

Wale watu wanaoitetea fundisho la kidini la toba ni lazima kwanza wawe na msingi wa ufahamu kuhusiana na kanuni za msingi za Kristo (Waebrania 6:1). Hata hivyo, wao wanaamini damu ya Yesu tu, na wanamwamini Yesu kuwa ni Mwana wa Mungu na wanauamini Ufalme wake. Kwa lugha nyingine, wanamwamini Yesu kuwa ni Mwokozi wao huku wakiusahau ubatizo wake. Wanamwamini Yesu kwa namna ambayo ni potofu na kwa sababu hiyo hawamfahamu kiusahihi Yesu Kristo aliyekuja kwa injili ya maji na Roho. Kwa sababu hii, imani yao dhaifu haiwezi kujitetea zaidi ya kuvunjika.

Watu hao hawafahamu kile ambacho Biblia inasema, maana wao ni vipofu kiroho. Kwa mfano, hawazifahamu maana ya zile rangi nne katika ua wa Hema Takatifu la Kukutania. Lango la ua wa Hema Takatifu la Kukutania lilifumwa kwa nyuzi za bluu, zambarau, nyekundu, na kitani safi ya kusokotwa (Kutoka 27:16). Ukweli ulioonyeshwa katika hizi rangi nne unaidhihirisha injili ya maji na Roho.

Hata hivyo, katika Wakristo wengi wanaomwamini Yesu kuwa ni Mwokozi wengi wao hawana ufahamu kuhusiana na Ukweli wa injili ya maji na Roho. Kwa matokeo hayo wameuelewa vibaya wokovu mkamilifu wa Yesu ambao umetuokoa sisi sote toka katika dhambi zetu mara moja na kwa wote. Na ndio maana kwa muda mrefu wamekuwa wakiwapotosha watu kwa kuwaeleza ujumbe ambao ni potofu.

Kitendo cha kumwamini Yesu kuwa ni Mwokozi wetu pasipo kuufahamu undani wa injili ya maji na Roho ni sawa na kipofu kujaribu kumwelezea tembo alivyo hali akiwa anaishika miguu yake tu. Katika maandiko imeandikwa hivi, *“Na kwa lile lango la ua patakuwa na kisitiri cha dhiraa ishirini, kitakuwa cha nguo ya rangi ya samawi, na ya rangi ya zambarau, na nyekundu, na kitani nzuri yenye kusokotwa, kazi ya mshona taraza.”* Nimechapisha vitabu viwili kuhusiana na Hema Takatifu la Kukutania vinavyoitwa *“Hema Takatifu la Kukutania: Taswira ya Wazi na ya Kina ya Yesu Kristo.”* Kila muundo na mfumo wa vifaa katika Hema Takatifu la Kukutania vinadhihirisha fumbo la kiimani kuhusu Yesu Kristo na huduma yake kamilifu ya wokovu. Pazia la lango la ua wa Hema Takatifu la Kukutania pia lilikuwa likiionyesha injili ya maji na Roho, ambayo ni haki ya Mungu. Kwa kifupi, ukweli kuhusiana na rangi nne katika lango la Hema Takatifu la Kukutania ulikuwa ni kivuli kinachoihusu injili ya maji na Roho ambayo imedhihirishwa kwa wazi katika Agano Jipya.

Watu wanashindwa kuupokea ukweli halisi kwa kuwa wanapenda zaidi mambo ya kidunia kuliko ukweli wa Mungu ambao unaonyeshwa kupitia rangi za bluu, zambarau, nyekundu, na kitani safi ya kusokotwa. Na kwa sababu hiyo wanajaribu kuiharibu injili ya maji na Roho ambayo ndio Ukweli halisi wa wokovu. Watu wengi wanafanya makosa ya kumwamini Yesu kuwa ni Mwokozi wao kwa lengo ka kupata

matamaniao yao ya kidunia. Kwa hakika Mungu anawataka waufahamu upendo wake halisi na wokovu wake halisi kwa kupitia rangi zinazoonyeshwa katika lango la Hema Takatifu la Kukutania; lakini ukweli hapa ulimwenguni upo tofauti sana.

Kwa upande mwingine, watu wa jinsi hiyo wamejiundia mafundisho ya kidini ya Kikristo ambayo ni potofu yanayowafanya wawe mbali na Ukweli wa injili ya maji na Roho. Na kwa msingi huo hawana namna nyingine zaidi ya kuendelea kuyaamini hayo mafundisho potofu ya kidini kwa kuwa hawaifahamu injili ya kweli ambayo inaweza kuwa mbadala sahihi wa hayo mafundisho ya kidini. Maana hapo zamani wao waliamini kuwa Mungu alilifanya lango la Hema Takatifu la Kukutania lifumwe kwa aina nne ya nyuzi ili kutuficha siri ya wokovu. Hata hivyo, Mungu alitaka kuonyesha na kuieneza injili ya maji na Roho kwa namna bora zaidi, alitaka kuuonyesha ukweli wa wokovu kwa kutuonyesha mwanga wa kiroho katika lango la Hema Takatifu la Kukutania ambalo lilikuwa limefumwa kwa aina nne ya nyuzi ambazo ni bluu, zambarau, nyekundu, na kitani safi ya kusokotwa. Kwa hakika mapenzi ya Mungu yanalenga kumwokoza mwanadamu toka katika dhambi kwa kupitia injili ya maji na Roho. Hivyo, Mungu anapenda kutuonyesha ukweli mkamilifu wa wokovu kupitia hizo nyuzi zenye rangi nne katika lango la Hema Takatifu la Kukutania.

Siku hizi, viongozi wa Kikristo wamepotoshwa kuhusiana na nyuzi za bluu, zambarau, nyekundu, na kitani safi ya kusokotwa ambavyo vilitumika katika lango la Hema Takatifu la Kukutania. Wao wanafikiri kuwa mapenzi ya Mungu yalilenga kuuficha ukweli wa wokovu ili watu wasije wakaipata haki ya Mungu kwa urahisi. Kwa matokeo hayo, Wakristo wanaamini kimakosa kuwa mtu hawezi kufahamu ikiwa ameokolewa au la, na kwamba ni Mungu tu ndiye

anayeujua wokovu wa mtu. Mafundisho potofu ya kidini kama vile fundisho la kidini la kuchaguliwa kabla na fundisho la kidini la toba yametokana na muktadha huu.

Kuna watu wengi sana hasa kati ya hao viongozi wa Kikristo ambao wamelichanganya Neno la injili ya maji na Roho na fundisho la kidini la toba. Tunachopaswa kukitambua hapa kwa wazi ni kuwa Mungu anatutaka tufahamu kwa kina juu ya injili ya maji na Roho kupitia aina nne za nyuzi ambazo zilitumika katika lango la Hema Takatifu la Kukutania, na wala halengi kutuficha ukweli huo. Yesu aliupokea ubatizo toka kwa Yohana Mbatizaji na kisha akafa Msalabani ili kutuokoa na kutuonyesha maana ya wokovu. Ni lazima tutambue kuwa muundo wa zile nyuzi nne zilizotumika kulifuma lango la Hema Takatifu la Kukutania ulilenga kuwafanya watu waufahamu wokovu toka katika dhambi kwa kupitia injili ya maji na Roho. Ni lazima tutambue kuwa muundo wa lango ulikuwa ni kivuli cha injili ya maji na Roho.

Vivyo hivyo, Mungu aliionyesha injili ya maji na Roho katika mlango wa Hema Takatifu la Kukutania katika nyakati za Agano la Kale, lakini watu wa kawaida hawakuweza kuutambua wokovu huo kiurahisi. Mungu aliwatumia wale walioamini katika injili ya maji na Roho kuwa mashahidi wa Ukweli wa ondoleo la dhambi kwa wanadamu ambao ulionyesha katika lango la Hema Takatifu la Kukutania.

Hadi wakati huu kuna watu wengi ambao wanasisitizia juu ya sala za toba kuwa ndio njia pekee ya kuweza kuupata wokovu, kusema kweli hii ni imani potofu. Wao wanasisitiza juu ya toba kwa sababu hawaufahamu Ukweli ambao unaonyeshwa katika zile rangi nne. Hivyo, wao wanapoionyesha picha ya Hema Takatifu la Kukutania huionyesha katika rangi nyekundu tu. Na huwa wanazisahau kabisa rangi nyingine. Hii ni kwa sababu wanaamini kuwa ni

damu ya Yesu tu ndio iliyoziyosha dhambi zao. Wao wanakazia zaidi juu ya damu ya Yesu, na kibaya zaidi ni kuwa wameongeza na fundisho la kidini la toba katika imani ambayo tayari ina makosa. Kwa msingi huo, ni Wakristo wachache sana wanaofahamu kuwa fundisho la kidini la toba lina makosa. Wanasisitizia juu ya fundisho la kidini liliundwa na mwanadamu kuwa watu wanaweza kuzioshelea mbali dhambi zao kwa kupitia sala za toba. Kutokana na fundisho hilo potofu la Kikristo, nafsi nyingi sana zinakufa na kupotea katika mkanganyiko wa kiroho na katika dhambi.

Hata hivyo, Mungu aliitoa injili ya maji na Roho kwa watu wote ili waweze kuokolewa toka katika dhambi zao na ili waweze kufanyika wana wa Mungu. Nilipokuwa nikitengeneza jalada la kitabu kinachoelezea juu ya Hema Takatifu la Kukutania nilimwomba mmoja wa madikoni wetu wa kike kufuma mfano wa pazia la lango la Hema Takatifu la Kukutania kwa kutumia nyuzi za rangi ya bluu, zambarau, nyekundu, na kitani safi ya kusokotwa. Kwa nini nilifanya hivyo? Ni kwa sababu hizo rangi nne zinazoonyeshwa katika pazia la lango la Hema Takatifu la Kukutania zinaonyesha Ukweli wa injili ya maji na Roho. Hivyo, nilitaka kuzishuhudia huduma ambazo Yesu amezifanya ili kutuokoa sisi sote toka katika dhambi kwa kupitia hizo rangi nne.

Katika Biblia imeandikwa kuwa Yesu alikuja hapa duniani kwa kupitia injili ya maji na Roho (1 Yohana 5:3-7). Yesu alikuwa akiuonyesha Ukweli wa wokovu wa milele kwa kupitia rangi nne katika lile lango la Hema Takatifu la Kukutania. Kwa lugha tofauti, tungeliweza kuufahamu wokovu wetu kwa kuzitambua huduma za Yesu zilizodhihirishwa kupitia zile rangi nne katika lango la Hema Takatifu la Kukutania.

Sasa, kila rangi ina maanisha nini? Nyuzi za bluu

zinauonyesha ukweli kuhusu ubatizo wa Yesu alioupokea toka kwa Yohana Mbatizaji, ambapo kwa kupitia ubatizo huo Yesu alizibeba dhambi zote za ulimwengu katika mwili wake mara moja na kwa wote. Nyuzi za zambarau zinaonyesha kuwa Yesu ni Mfalme wa wafalme na ni Mwana wa Mungu. Nyuzi nyekundu zinaudhihirisha Ukweli kuwa Yesu alizichukua dhambi zote za mwanadamu kwa kuupokea ubatizo toka kwa Yohana, alijitoa mwenyewe kama sadaka kwa ajili ya dhambi zetu kwa kuimwaga damu yake Msalabani. Kitani safi ya kusokotwa inauonyesha ukweli kuwa Yesu amezisafishilia mbali dhambi zetu zote na kuzifanya kuwa nyeupe kama theluji mara moja na kwa wote kwa kupitia nyuzi za bluu, zambarau, na nyekundu. Vivyo hivyo, tulifikia hatua ya kutambua kuwa Mungu aliufunua wokovu wake wa kweli kuhusiana na injili ya maji na Roho kupitia hizo rangi nne za lango la Hema Takatifu la Kukutania. Kwa sasa, watu wanweza kupokea ondoleo la kweli la dhambi kupitia injili ya maji na Roho ambayo tunaihubiri.

Kuanzia sasa na kuendelea, watu wengi sana wataweza kuufahamu ukweli kupitia Ukweli wa injili ya maji na Roho. Hata hivyo, kuna Wakristo wengi sana ambao pamoja na kutoifahamu injili ya maji na Roho bado wanasisitiza kuwa wanaweza kupokea ondoleo la dhambi zao kwa kufanya sala za toba. Huku wakimkiri Yesu kuwa ni Mwokozi wao, watu hao wana imani yao binafsi ambayo imejikita katika sala za toba. Hata hivyo, ni hakika kuwa imani yao itaanguka kwa kuwa haina msingi wowote ule katika Neno la Mungu. Ni watu ambao wanazingatia na kuyafuata maneno ya wanatheolojia fulani kuliko Neno la Mungu. Watu wa jinsi hiyo wanajaribu kuziridhisha tamaa zao za kimwili kwa kuyategemea mafundisho ya viongozi wa Kikristo.

Hata hivyo, mafundisho ya jinsi hiyo hayana uhusiano

kabisa na injili ya maji na Roho, na kwa msingi huo hayo ni sawa na maneo yasiyo na maana. Sisi sote ni lazima tuifahamu injili ya maji na Roho. Pia ni lazima tutambue kuwa imani ya wale wanaoamini katika sala za toba kuwa ndio njia ya kuweza kuziosha dhambi zao ni imani potofu. Kwa kweli inahuzunisha sana tunapowaona watu wa jinsi hiyo. Huku wakishindwa kuifahamu Ukweli wa injili ya maji na Roho, watu hao wanajidanganya wenyewe wakiadini katika fundisho la kidini la toba ambalo limeundwa kutokana na mawazo ya kibinadamu.

Paulo Aliiwasilisha Injili Ambayo Aliamini

Katika Wagalatia 2:2, inaeleza kuwa Mtume Paulo alikwenda Yerusalemu kisha akaiwasilisha kwa watu injili ambayo alikuwa akiamani. Paulo alifanya hivyo kwa sababu kulikuwa na watu walioyaamini mafundisho yao binafsi ya kidini kuliko kuamini injili ya maji na Roho ambayo Paulo alikuwa akiamini.

Kulikuwa na baadhi ambao walijaribu kulitumia Neno la Mungu kama sehemu ya kubishaniwa. Kwa hakika tunapaswa kuwa makini sana katika kuifikisha injili ya maji na Roho kwa wale viongozi mashuhuri wa Kikristo. Ni watu walio na mamlaka makubwa katika jamii za Wakristo. Ni lazima tusikilize kwa makini maana maneno yao ni ya hila. Bwana alitueleza kuwa, *“Angalieni, jilindeni na chachu ya Mafarisayo na Masadukayo” (Mathayo 16:6)*. Lakini kwa bahati mbaya, chachu hiyo bado ipo katika Ukristo duniani kote. Ni lazima tuihubiri injili ya maji na Roho ili tuweze kuzivuta hizo na nafsi kwa kuiondoa hiyo chachu. Hapo ndipo wenye dhambi wanapoweza kupokea ondoleo la dhambi zao na kuisikia na kuamini injili ya kweli.

Watu wote ulimwenguni kote watakapovisoma vitabu vyangu kuhusiana na Hema Takatifu la Kukutania watafikia hatua ya kuweza kuifahamu kikamilifu injili ya maji na Roho na yale yaliyomo ndani yake. Katika vitabu hivi, nimeeleza kwa wazi jinsi Mungu alivyofunua wokovu wake wa kweli kwa kupitia nyuzi za rangi ya bluu, zambarau, nyekundu, na kitani safi ya kusokotwa zilizotumika katika Hema Takatifu la Kukutania. Katika vitabu hivyo nimejaribu kuweka vielelezo vya Hema Takatifu la Kukutania na vyombo vyake ili kuelezea uhalali wa Ukweli wa injili ya maji na Roho, nimefanya hivyo kwa kuwa wakati mwingine ni vigumu kuuelewa ukweli huo unapokuwa umeelezwa kwa maneno tu. Mnapaswa kufahamu kuwa ukweli ulioonyeshwa katika nyuzi za rangi ya bluu, zambarau, nyekundu, na kitani safi ya kusokotwa ulikuwa ni kivuli cha injili ya maji na Roho. Pia mnapaswa kutambua kuwa injili hii ya kweli inatuonyesha jinsi ondoleo la dhambi lilivyotimizwa.

Watu wengi ambao walimsumbua Mtume Paulo wakati alipokuwa akihubiri injili ya maji na Roho walikuwa ni wale waliokuwa na imani binafsi ya kujiridhisha. Walikuwa ni watu walioiamini tohara ya kimwili. Watu hao waliikubali sana hiyo tohara ya kimwili kuliko hata Neno la Mungu, na wakaamini hivyo.

Wanaume wote wa Kiyahudi wa wakati huo walipaswa kutahiriwa kwa kuwa walikuwa wanatoka katika ukoo wa Ibrahimu. Tohara ya kimwili ilikuwa ni desturi ya kisheria katika Uyahudi. Hata hivyo, ni lazima tukumbuke kuwa wakati huu tulionao ni wakati wa Agano Jipya na ni kipindi cha kuieneza injili ya maji na Roho, na si kipindi cha tohara ya kimwili. Mara kadhaa Mtume Paulo aliwaonya wana-tohara kuhusiana na imani yao kwa kuwa imani yao ilikuwa ni potofu: Pamoja na maonyo hayo wana-tohara walidharau na kuutupilia

mbali Ukweli wa injili ya maji na Roho huku wakiendelea kuishikilia tohara ya kimwili.

Kwa hakika watu hao walikuwa ni ndugu wa uongo waliokuwa wamejiunga katika Kanisa la Mungu kwa siri ili waweze kupeleleza uhuru wetu tulionao katika Kristo Yesu. Na ndio maana waliwatahiri kimwili waamini waliokuwa wameokoka toka katika dhambi zao. Wao walitamani kuyafikia matamania yao ya kimwili kwa kuuchukua uhubiri wa waamini ambao walikuwa wamepokea ondoleo la dhambi zao. Ndio maana Paulo alisema hivi, *“Bali kwa ajili ya ndugu za uongo walioingizwa kwa siri; ambao waliingia kwa siri ili kupeleleza uhuru wetu tulio nao katika Kristo Yesu, ili watutie utumwani; ambao hata saa moja hatukujitia chini yao, ili kwamba kweli ya Injili ikae pamoja nanyi”* (Wagalatia 2:4-5).

Imani ya wanatohara ilikuwa kama ifuatavyo: Walimwamini Yesu kuwa ni Mwokozi wao, lakini wakafikiria kuwa ikiwa mtu atakuwa hajatahiriwa kimwili, basi huyo anaweza asiwe mtu wa Mungu na anaweza asiwe mtu wa ukoo wa Ibrahimu. Hivyo, waamini dhaifu katika Kanisa la Galatia wakawakaribisha watu wenye imani ya jinsi hiyo. Tunapaswa kutambua kuwa hata sasa, wale walio na imani ya jinsi hiyo, yaani imani ya kisheria wanaonekana kuwa ndio walimu wazuri ndani ya Kanisa.

Lakini imani ya Mtume Paulo, ambaye aliihubiri injili ya maji na Roho ilikuwa kama ifuatavyo: Mtume Paulo aliuamini ubatizo wa Yesu alioupokea toka kwa Yohana Mbatizaji na damu yake aliyoimwaga pale Msalabani. Mtume Paulo aliihubiri Ukweli wa injili ili kwamba ukweli huo wa injili uweze kuendelea ndani ya waamini wa Galatia.

Mtume Paulo alieleza kuwa wale walioonekana kuwa ni watu wenye maana hawakumwongezea kitu chochote. Bado kuna watu wengi sana ambao bado wanaishikilia imani zao za

kisheria. Watu wa jinsi hiyo hupenda kufundisha juu ya fundisho la kidini la toba, na hawawasaidii watu wanaoamini katika injili ya maji na Roho. Ndio maana Mtume Paulo aliwaambia waamini wa Galatia waweze kuifahamu kwa kina injili ya maji na Roho. Pia Mtume Paulo alisema kuwa waamini wanapaswa kujilinda na ndugo wa uongo wanaokuja katika katika la Mungu kwa hila huku wakiwa hawana imani katika injili ya maji na Roho.

Katika Kanisa la Mwanzo, Waamini wa Galatia Waliamini Kimakosa Kuwa Walipaswa Kutahiriwa Kimwili

Imani katika fundisho la toba ni sawa na imani potofu ya wana-tohara wa kipindi cha Kanisa la Mwanzo kwa kuwa fundisho la toba ni fundisho ovu lenye chachu linalotokana na mawazo ya kibinadamu. Tunapaswa kuutambua mkanganyiko uliopo katika sala ya toba.

Tunaweza kuzioshelea mbali dhambi zetu zote kwa kuamini katika Injili ya maji na Roho hali kwa mioyo yetu yote. Ni lazima tuiamini injili ya maji na Roho kwa usahihi na usafi kama ilivyo. Hatupaswi kuongeza kitu chochote juu yake na wala hatupaswi kupunguza kitu chochote katika injili hiyo. Hata hivyo, siku hizi Wakristo wengi wana imani potofu kama ile iliyokuwepo katika Agano la Kale, yaani imani inayoamini katika tohara ya kimwili, imani hii inaeleza kuwa mtu anaweza kuziosha dhambi zake kwa kufanya sala za toba.

Hivyo, tunapaswa kuifahamu uthamani wa Ukweli wa wokovu uliomo katika injili ya maji na Roho, na tunapaswa kuihubiri injili hiyo kwa watu wote. Kanisa la Mungu linapaswa kueneza Ukweli wa injili. Tunapaswa kuwasaidia

Wakristo waliopotoshwa ambao bado wanalishikili fundisho la toba ili na wao waweze kukombolewa toka katika dhambi zao zote. Ndio maana tunapaswa kuihubiri ya kweli ulimwenguni kote. Huu ni wakati wako kuifahamu na kuiamini injili ya maji na Roho, na hii ni muhimu sana hasa ikiwa hauifahamu Biblia kuhusiana na injili ya kweli.

Hata sisi ambao tunaamini katika injili ya maji na Roho tunapata madhara zaidi kuliko kupata usaidizi toka kwa watu wenye imani ya kisheria. Watu walio na imani ya kisheria hawawezi kutoa msaada wa kiroho kwa watu wanaoamini katika injili ya maji na Roho ambayo Bwana amewapatia. Imani ya Wakristo wa leo wanaojaribu kuzioshelea mbali dhambi zao kwa kupitia sala za toba ni sawa na imani ya wanatohara wa kipindi cha Kanisa la Mwanzo, imani ambayo iliishia kuleta mkanganyiko wa kiroho kwa watu wengi.

Fundisho la kiimani la toba halitokani na Biblia. Ni fundisho potofu linalotokana na mawazo ya kibinadamu. Yeyote anayemwamini Yesu pasipo kuufahamu Ukweli wa injili ya maji na Roho hawezi kufanya lolote zaidi ya kuishia kuwa mwanatohara. Tunawaona watu wengi wakiwa wameduwazwa katika mfumo wa mafundisho ya kidini ya Kikristo, hasa baada ya kuwa wamejifunza kuhusiana na sala ya toba. Kwa mfano, wanaotheolojia ya ukombozi wanaifafanua Biblia kama ifuatavyo: “Kama vile Musa alivyowakomboa Waisraeli walipokuwa katika utumwa chini ya Mfalme wa Misri, vivyo hivyo viongozi wa Kikristo wanapaswa kuwaweka huru wanaoonewa kutokana na hali mbaya inayowakabili.” Fundisho hili halina maana kabisa!

Ikiwa mtu haufahamu Ukweli wa injili, basi ni hakika kuwa mtu huyo atabaki kuyashikilia mafundisho yale yale ya kidini. Ikumbukwe kuwa hata wakati wa Mtume Paulo, wanatohara walikuwa makini kuonyesha haki yao binafsi kwa

mujibu wa Sheria kuliko hata kumpokea Mwana wa Mungu kuwa ni Mwokozi wao. Katika kipindi hiki na wakati huu, viongozi mashuhuri wa Kikristo wanaweka mkazo sana katika sala za toba, jambo ambalo ni sawa na tohara ya kimwili. Wao wanaifahamu Sheria ya Mungu tu, huku wakiwa hawamfahamu vizuri Yesu Kristo kuwa ni Mwokozi wa kweli aliyekuja hapa ulimwenguni kwa injili ya maji na Roho. Wao wanasimama kinyume na Ukweli, na hufanya hivyo kila wanapokutana na injili ya maji na Roho. Lakini ukweli ni kuwa ni muhimu sana kwa wao kumwamini Yesu kama Mwokozi wao aliyekuja hapa ulimwenguni na kutuokoa sisi sote toka katika dhambi kwa kutupatia Ukweli wa injili ya maji na Roho.

Mtume Paulo alituonya ili tukae mbali na imani ya wanatohara. Tunapaswa kuifahamu maana ya onyo lake. Jambo la muhimu sana ni kweli sisi sote kuweza kuupata Ukweli wa wokovu kwa kujifunza injili ya maji na Roho kama inavyodhihirishwa katika Biblia. Ufahamu mwingine wa aina yoyote utakuwa hauna maana hasa ikiwa ufahamu huo hauendani na injili ya maji na Roho. Tunapaswa kuwa wainjilisti ambao tunawaongoza wenye dhambi kwenda kwa Mungu kwa imani inayoamini katika injili ya maji na Roho.

Hakuna sababu ya kuwaangalia viongozi wa Kikristo ikiwa wanamwamini Yesu Kristo aliyekuja kwa injili ya maji na Roho. Mara nyingi mimi huwa ninawauliza viongozi hao, “Je, unaifahamu kwa uhakika injili ya maji na Roho? Je, unaiamini injili ya maji na Roho? Au mnaiamini damu ya Msalaba au sala za toba?” Sasa, tunapaswa kudhamiria kuieneza injili ya maji na Roho kwa watu wengi zaidi.

Hata Viongozi wa Kikristo Hawaifahamu Injili ya Maji na Roho

Nitawaeleza tukio moja ambalo nilikutana nalo.

Hapo zamani kidogo, mmishenari mmoja anayeheshimika sana alinitembelea. Alikuwa ni mtu aliyekuwa haufahamu Ukweli wa injili ya maji na Roho. Nikamuuliza, “Nikusaidieje?” akaniambia kuwa alikuwa na ujumbe wa kunieleza. Akanieleza kuwa alikuwa amesikia kitu kibaya kuhusiana na injili niliyokuwa nikiihubiri. Hivyo nikamshauri kuwa tuwe na faragha ya Neno ili niweze kuyaondoa mashaka yake. Na hapo ndipo tulipoanza kuwa na mdaharo wa kibiblia.

Akaanza kwanza kwa kuuliza swali linalosema hivi, “Unawezaje kusema kuwa hauna dhambi katika moyo wako?” Basi nikamjibu nikwambia kuwa sisi tumefanyika kuwa tusio na dhambi kwa kuamini katika injili ya maji na Roho. Kisha yule mmishenari akasisitiza kuwa imani yangu ni potofu na akanukuu kifungu cha Maandiko kutoka 1 Yohana 1:9, *“Tukiziungama dhambi zetu, Yeye ni mwaminifu na wa haki hata atuondolee dhambi zetu, na kutusafisha na udhalimu wote.”* Kisha akasema, “Inawezekanaje kwa mtu kusema kuwa hana dhambi wakati Biblia inatusisitiza kuziungama dhambi zetu? Je, Mungu hakusema kuwa kuwa atazisamehe dhambi zetu ikiwa tutaziungama dhambi zetu?”

Basi nikamjibu kwa kunukuu kifungu cha Maandiko kinachosema: “Ndiyo, Mungu anasema, *‘Tukiziungama dhambi zetu, Yeye ni mwaminifu na wa haki hata atuondolee dhambi zetu, na kutusafisha na udhalimu wote.’* Je, kifungu hiki kina maanisha kuwa Mungu anatusamehe kidogo kidogo kwa namna ya mwendelezo kuanzia pale tunapoomba msamaha? Au kwa kupitia kifungu hiki Mungu ana maanisha kuwa atazioshelea mbali dhambi zetu zote zikiwemo dhambi

tulizoziungama, na hasa ikiwa tumeziungama dhambi zetu zote kwa kuamini katika Ukweli wa injili ya maji na Roho, kwa kuwa injili ya maji na Roho imekwisha zitoweshea mbali dhambi zetu zote?” Nikamweleza kuwa ni wale tu walio na imani katika injili ya maji na Roho ndio wanaoweza kuungama mbele za Mungu kwa usahihi kwa kuwa wana ujasiri kutokana na Ukweli kuwa Bwana amekwisha zitoweshea mbali dhambi zao zote mara moja na kwa wote kwa kutumia injili ya maji na Roho.

Kisha huyo mmishenari akanishambulia akisema, “Ni kwa nini basi Mtume Paulo anasema kuwa yeye alikuwa ni mwenye dhambi zaidi kuliko wenye dhambi wote?” Nikamjibu hivi: “Haupaswi kuitafsiri Biblia pasipo kuangalia muktadha wa uandishi. Wakati Paulo aliposema hivi, *‘Ni neno la kuaminiwa, tena lastahili kukubalika kabisa, ya kwamba Kristo Yesu alikuja ulimwenguni awaokoe wenye dhambi; ambao wa kwanza wao ni mimi’ (1 Timotheo 1:15)*, alisema hivyo kwa lengo la kusahihisha tabia yake ya zamani ambapo alikuwa ametenda dhambi nyingi sana kiasi kuwa mbaya kuliko wenye dhambi wote, na alifanya hivyo hali akiwa anasimama kinyume na Bwana Yesu kutokana na ujinga wake. Paulo alisema hivyo kwa kuwa alikuwa anamshukuru Mungu kwa kumwokoia toka katika dhambi na kwa kumfanya kuwa mmoja kati ya watenda kazi wa Mungu. Paulo alisema haya wakati akiusahihisha mwenendo wake wa zamani na huku akimshukuru Mungu.” Nikamweleza yule mmishenari kuwa Paulo alisema kuwa alikuwa ni mbaya zaidi kati ya wenye dhambi kwa kuwa alikuwa akiisahihisha tabia yake ya kusimama kinyume na Yesu Kristo hapo zamani.

Basi tuliendelea na mdaharo huo kwa karibu masaa mawili. Alijaribu kusimama kinyume na Mungu lakini hakuweza kulishinda Neno la Ukweli. Mshindi wa kweli katika

mdaharo huo alikuwa ni yule aliyekuwa anaamini katika injili ya maji na Roho. Nilimjibu maswali yake yote kwa kupitia Neno la Mungu lakini kadri mdaharo ulivyozidi kuendelea hakuweza kuufahamu ujinga wake. Mwisho wa siku mmishenari huyo aliishia kuniita mimi kuwa ni mzushi kutokana na maneno mabaya aliyokuwa ameyasikia kuhusu mimi, lakini kwa hivi sasa hafikirii hivyo. Mmishenari huyo alikuwa ni mmoja kati ya viongozi mashuhuri wa shirika moja la kimataifa la kimishenari.

Kuna watu wengi sana miongoni mwa viongozi wa Kikristo ambao hawaifahamu injili ya maji na Roho. Viongozi hao hawapendi kusalimu amri mbele ya injili ya maji na roho kwa kuwa wao ni mashuhuri sana katika jamii ya Kikristo. Wao wanafikiria kuwa maisha yao ya kiimani ya kisheria yapo sahihi. Lakini kusema kweli imani yao si lolote. Akili zao zimejaa upotoshaji mkubwa wa kiroho kwa kuwa bado hawajakutana na watumishi wa Mungu wa kweli wanaoamini katika injili ya maji na Roho.

Hata hivyo, watu hao nao wanapaswa kupokea ondoleo la dhambi kwa kuikubali injili ya maji na Roho. Unawezaje kumfundisha mtu mwingine wakati wewe bado una dhambi katika moyo wako? Sisi ni watu ambao tunaweza kuufikisha ujumbe wa injili ya maji na Roho hata kama tutakutana na watu wanaofahamika sana katika jamii ya Wakristo. Hatuna sababu yoyote ile ya kuwaogopawatu hao wasiofahamu hali inayowafanya waende kinyume na injili ya maji na Roho. Ni kweli kuwa wao ni mashuhuri sana nje ya injili ya maji na Roho ambayo Bwana wetu ametupatia. Haijalishi kuwa wao ni mashuhuri kiasi gani, ukweli ni kuwa wanahitaji kusalimu amri mbele za Mungu na kwa injili ya maji na Roho haraka sana kwa kuwa majivuno yao hayana maana mbele ya hukumu ya Mungu kwa dhambi zao. Sisemi kuwa mimi ni bora kuliko wao,

lakini ninajaribu kuwaeleza ukweli: Imani ya kisheria iliyopo hivi sasa katika Ukristo wa siku hizi ina makosa makubwa. Viongozi wa imani kama hizo si nuru ya ulimwengu, hii ni kwa sababu hawaifahamu injili ya maji na Roho. Kwa sababu hiyo, imani ya siku hizi ya Kikristo imekosa ushawishi kwa jamii.

Kiroho viongozi hao hajatupatia kitu chochote cha maana, ni sawa na Paulo alivyosema kuwa wale walioonekana kuwa ni watu mashuhuri hawakuwa wamemwongezea kitu chochote. Watu hao wanatuletea mikanganyiko tu. Ndio maana Mtume Paulo alishuhudia kuwa imani ya kisheria ilikuwa na makosa makubwa sana. Mtume Paulo alitaka kuifikisha injili ya maji na Roho kwa watu wote. Paulo hakusalimu amri kwa waliokuwa na imani ya kisheria bali alihakikisha kuwa amewafikishia injili ya kweli.

Mtume Paulo aliitangaza injili ya wokovu kwa usahihi kabisa kwa watu wote wa wakati wake. Wakati huo huo aliwalaumu wale waliokuwa wanaiamini tohara ya kwimili. Baadhi yenu mnaweza kufikiri hivi, “Kulikuwa na haja gani ya kuwafikishia injili ya maji na Roho wakati walikuwa tayari wakimwamini Yesu kuwa ni Mwokozi wao” Hata hivyo, tatizo lilikuwepo katika makanisa ya Galatia ni kuwa waamini wengi wa Kanisa la Mwanzo walikuwa na imani ya tohara ya kimwili. Imani hiyo ilikuwa ni tofauti kabisa na ile aliyokuwa nayo Paulo. Hata hivyo, mnapaswa kutambua kuwa ni wale tu wanaoamini katika injili ya maji na Roho ndio wana wa Mungu. Watu ambao wanashikilia tohara ya kimwili ni sawa na wale wanaosema kuwa wanaweza kuzioshelea mbali dhambi zao kwa sala za toba.

Mtume Paulo alikuwa ni mtu aliyekutana kabisa na Yesu na akafanyika kuwa mwanafunzi wake. Alikuwa ni mtu mwenye elimu na alikuwa na ufahamu mkubwa sana wa Maandiko ya Agano la Kale. Kwa hakika alikuwa ni kati ya

wanafunzi waliokuwa na ufahamu mkubwa sana wa maandiko kwa kuwa alikuwa amefundishwa na mwalimu Rabi mashuhuri aliyeitwa Gamalieli. Kwa lugha nyingine, alikuwa ni bingwa aliyebolea katika Sheria ya Mungu, na ndio maana alikuwa akifahamu madhara ya tohara ya kimwili. Ndio maana aliweza kuwaeleza Wamataifa kuhusu uhusiano kati ya imani ya kisheria na imani katika injili ya maji na Roho.

Paulo alionyesha kuwa tatizo la waamini wa Galatia ni kwamba waliweka mkazo mkubwa kwenye tohara ya kimwili na kwenye kushika na kufuata tarehe na miezi maalumu. Imani ya kisheria ilikuwa imegubikwa na mambo kama hayo. Kama ilivyokuwa kwa wanatohara, Wakristo wa siku hizi hawakubaliani na makosa yaliyomo katika sala ya toba. Hata hivyo, kwa sasa tunafahamu jinsi isivyofaa kuwa na imani ya kisheria ambayo inasisitiza juu ya sala ya toba.

Biblia inasema kuwa imani ya kisheria ilianza kuenea kuanzia katika makanisa ya Yerusalelem na katika makanisa ya Galatia hasa miongoni mwa watu ambao walidhani kuwa walipaswa kuishika sheria ya tohara ya kimwili na siku ya Sabato. Siku ya Sabato inaanzia jioni ya siku ya Ijumaa na inamalizika jioni ya siku ya Jumamosi. Walionekana kuwa wao ni waamini wazuri hasa wakati walipokuwa wakiishika na kuifuata siku ya Sabato. Sio tu kwamba walipaswa kuishika Sabato pekee yake, bali walipaswa pia kuzishika na kuziheshimu sikukuu nyingine za Agano la Kale.

Katika waraka kwa Wagalatia sura ya 2 kuna sehemu Paulo alimkemea Petro kwa kuwa na imani ya kisheria.

Hata sasa, Waisraeli wanafikiri na wanaamini kuwa ni lazima watahiriwe kimwili ndipo waweze kuwa wana wa Ibrahimu na watu wa Mungu. Ndio maana wanaendelea kufanya tohara. Huu ndio uliokuwa msingi wa imani ya kisheria. Wanatohara walisitiza juu ya kuzishika sikukuu zote

za Agano la Kale na kwamba Wamataifa wote waliokuwa wameongoka walipaswa kutahiriwa na kuishika Sabato kikamilifu, pia walipaswa kuzishika siku muhimu kama vile Sikukuu ya Mikate Isiyotiwa Chachu, Sikukuu ya Majuma, na Sikuu Kuu ya Hema Takatifu la Kukutania. Mambo haya yaliwafanya waamini wa Kanisa la Mwanzo kuupoteza Ukweli wa injili ambao ndio kiini cha wokovu. Kwa sababu hiyo Mtume Paulo aliona kuwa imani ya kisheria itakuwa ni kikwazo kikubwa katika kuieneza injili ya maji na Roho.

Kanisa la Mwanzo la Yerusalemu lilipata nini kutokana na kuzingatia sheria na sikukuu? Kama alivyohofia Mtume Paulo, Kanisa la Mwanzo la Yerusalemu liliishia kuipoteza injili ya maji na Roho. Mtume Paulo alijaribu kuisahihisha imani yao ya kisheria kwa kuwa ilikuwa ni upotoshaji, lakini ilikuwa ni vigumu kwa kuwa waamini wengi wa Kanisa la Mwanzo waliing'ang'ania imani hiyo. Paulo alitaka wakati wote Ukweli wa injili uweze kuendelea ndani yao. Lakini yale mambo ambayo Paulo aliyahofia yanatokea sasa katika makanisa mengi hapa ulimwenguni. Katika Ukristo wa siku hizi, imani ya kisheria inazidi kuendelea na kukua wakati Ukweli wa injili ya maji na Roho ukizidi kufifia.

Hivyo, tunatakiwa kuiamini injili ya maji na Roho na kisha kuihubiri injili hii ambayo inatuokoa toka katika dhambi zetu zote. Mtume Paulo aliwashirikisha wale waliokuwa ni watu wa kuaminika ili kwamba injili iweze kuenea na isiweze kuingiliwa na kuharibiwa. Ni muhimu kuzingatia utaratibu huu kwa ajili ya kazi ya Mungu. Sisi nasi tunapaswa kuwapuuza wanasheria ili kwamba juhudi zetu za kuieneza injili ya maji na Roho isije kuishia hewani. Tunapaswa kukumbuka kuwa fundisho la sala ya toba ni jambo lililoundwa kutokana na mawazo ya mwanadamu na fundisho hilo ndio chanzo cha imani potofu.

Mafundisho yote ya kidini ya Kikristo, ambayo yanatofautiana na injili ya maji na Roho yanaleta mkanganyiko katika akili za watu. Sasa, ninyi nyote ni lazima mfahamu kuwa si vizuri kujifunza mafundisho hayo ya kidini ya Kikristo. Ni lazima tujifunze Neno la Mungu kwa usahihi toka kwa wale wanaoifahamu injili ya maji na Roho. Kwa kufanya hivyo tutapata faida kubwa sana kwenye nafsi zetu. Ni lazima tukumbuke kuwa kitendo cha kuyaamini mafundisho ya kidini ya Kikristo yaliyoundwa na mwanadamu kinatuletea madhara katika nafsi zetu.

Kwa sasa kuna watu wengi sana wanaoishi pasipo kuifahamu injili ya maji na Roho. Kama wangeliiifahamu na kuiamini kiusahihi hii injili ya kweli, basi ni hakika kuwa wangelikuwa wamepokea ondoleo la dhambi na wangelikuwa wamewaongoza watu wengi wengine ili nao waweze kuokolewa toka katika dhambi zao. Tunapofikia hatua ya kujifunza na kuuelewa Ukweli wa injili ya maji na Roho, basi ni lazima tuitupilie mbali imani ya kisheria ambayo tulijifunza kimakosa. Je, hilo si jambo la kawaida ambalo ni sawa na kutupilia mbali vitu ambavyo havina maana ndani ya nyumba ili kupata nafasi ya kuweka vitu vingine vipya? Vivyo hivyo, ni lazima tuutupilie mbali ufahamu potofu na kisha tujifunze ufahamu ulio sahihi ambao unahusiana na Ukweli wa injili ya maji na Roho. Ni lazima tufahamu jinsi ambavyo watu wengi wameweza kulaaniwa na Mungu kutokana na imani zao kisheria.

Wakati Mtume Paulo alipolitembelea Kanisa la Yerusalemu alihitimisha maelezo yake kama ifuatavyo: “Mungu aliwakabidhi Mitume wa Kanisa la Yerusalemu jukumu la kuihubiri injili kwa Wayahudi, wakati huo mimi na Tito tulipewa jukumu la kuihubiri injili kwa Wamataifa.” Ilikuwa ni sahihi kwa Petro au Yakobo au Yohana kuihubiri injili kwa

Wayahudi, hii ni kwa sababu mitume hao walikuwa ni Wayahudi. Ndio maana Paulo alihitimisha kuwa ilikuwa ni sahihi kwao kuieneza injili kwa Wayahudi na kwa upande wake Paulo na wafuasi wake kuieneza injili kwa Wamataifa.

Sisi tunaoamini katika injili ya maji na Roho tunaweza kuisahihisha imani ya kisheria kwa watu wanaoiamini sala ya toba. Je, tunaweza kuibadili desturi ya Israeli? Kwa kweli haiwezekani. Hata hivyo, ni jambo jema ikiwa watafikia hatua ya kuiamini injili ya maji na Roho. Tunachotakiwa kukifanya ni kuwafikishia injili ya maji na Roho huku tukiachana na desturi zao. Watafikia hatua ya kupokea ondoleo la dhambi ikiwa watamfahamu na kumwamini Yesu kwa kupitia injili ya maji na Roho. Mara baada ya kuwa wamepokea ondoleo la dhambi zao, basi tutakachotakiwa kukifanya ni kuwaongoza ili waweze kuishi kwa imani kwa kushirikiana nao katika faragha na huku wakiziacha njia zao mbaya ili kuiimarisha imani yao.

Ninayahitimiza mahubiri haya kwa kusema hivi.

Wale wasioamini katika injili ya maji na Roho hawana kitu chochote chenye faida kwetu sisi, na hiyo haijalishi hata kama wana umashuhuri kiasi gani. Ni lazima tuishi maisha ya kiimani kwa kuamini katika injili ya kweli. Pia mkumbuke kuwa ni wale tu wanaoiamini na kuihubiri injili ya maji na Roho hao ndio wanafunzi wa kweli wa Yesu Kristo. Ni lazima tuwaheshimu wale wanaoutumikia Ukweli wa injili unaoeleza kuwa Yesu amezitoweshea mbali dhambi zetu kwa ubatizo wake na damu yake Msalabani. Ni lazima tuwapuuzie wale walio na imani ya kisheria, na badala yake tunapaswa kuwaheshimu na kuyaamini yale ambayo tunaelezwa na wale walio na imani katika injili ya maji na Roho mahali popote na katika hali yoyote ile. ☒

Kiini cha Imani ya Paulo

< Wagalatia 2:20 >

“Nimesulibiwa pamoja na Kristo; lakini ni hai; wala si mimi tena, bali Kristo yu hai ndani yangu; na uhai nilio nao sasa katika mwili, ninao katika imani ya Mwana wa Mungu, ambaye alinipenda, akajitoa nafsi yake kwa ajili yangu.”

Katika kifungu cha leo cha Maandiko, tunaweza kukiona kiini cha imani ya Mtume Paulo: Imani yake iliamini kuwa Yesu Kristo ni Mwana wa Mungu, na kwamba alikuja hapa duniani akazichuku dhambi zote za mwanadamu katika mwili wake kwa kubatizwa na Yohana Mbatizaji, na kwamba alizibeba hizo dhambi za ulimwengu kwenda nazo Msalabani ambapo aliimwaga damu yake na kufa, kisha alifufuka toka kwa wafu, na kwamba kwa sababu hiyo ameukamilisha wokovu.

Ndio maana Paulo alisema hivi, *“Nimesulibiwa pamoja na Kristo; lakini ni hai; wala si mimi tena, bali Kristo yu hai ndani yangu” (Wagalatia 2:20)*. Paulo anaeleza hapa kuwa nafsi yake ya kale ilikufa pamoja na Kristo, na kwamba kwa sasa Kristo ndiye anayeishi ndani yake. Akaendelea kusema, “Na uhai nilio nao sasa katika mwili, ninao katika imani ya Kristo aliye ndani yangu.”

Imani hii sio tu ni ungamo la Paulo bali ni imani yetu pia. Mtume Paulo aliamini kuwa dhambi zake zilipitishwa kwenda kwa Yesu Kristo kwa ubatizo ambao aliupokea toka kwa Yohana, na ni kwa imani hii Paulo alikuwa amekufa pamoja na

Yesu na kisha akafufuka tena pamoja na Yesu. Kama ambavyo Paulo alifanya kwa imani, sisi nasi tunaweza kufa pamoja na Yesu Kristo na kisha kuishi naye ikiwa tu tutakuwa na imani katika injili ya maji na Roho.

Mungu ametuokoa toka katika dhambi zetu zote mara moja na kwa wote kwa kupitia injili ya maji na Roho. Kwa kuwa Yesu ametuokoa toka katika dhambi za ulimwengu kwa kupitia injili ya maji na Roho, basi kwa sasa sisi tunaishi kwa imani katika Yesu Kristo Mwokozi wetu. Hivyo, haijailishi jinsi tunavyoonekana kwa sasa katika miili yetu, ukweli ni kuwa katika Yesu Kristo tumefanyika kuwa wale waliokufa pamoja Naye na waliofufuliwa pamoja Naye. Kwa sasa tunaishi maisha mapya kwa imani katika Bwana anayeishi milele.

Mtume Paulo aliweza kuishi maisha mapya ya jinsi hiyo kwa kuwa Yesu Kristo alikuwa amebatizwa na kuimwaga damu yake kwa ajili ya dhambi zake. Paulo alisema kuwa hilo liliwezekana si kwa sababu ya jambo jema ambalo alikuwa amelifanya kwa mwili wake, bali aliweza kuishi tena kwa sababu ya imani katika Mwana wa Mungu. Kwa maneno mengine, kwa kuwa Mtume Paulo alimaini kuwa Yesu Kristo alikuwa amemwokoza kwa kubatizwa kwa ajili yake, basi ndio maana Yesu aliweza kumwokoza toka katika dhambi za ulimwengu na kumpatia upya uzima, ndio maana Paulo aliamini kuwau alikuwa amekufa pamoja na Yesu Kristo na kufufuka pamoja naye. Imani hiyo ndiyo iliyomwezesha Paulo kuyaishi maisha yake ya imani katika Mwana wa Mungu, na katika wokovu ambao Mwana wa Mungu alikuwa ameutimiza kwa kumkomboa toka katika dhambi zake. Imani ya jinsi hiyo haipo kwa Paulo peke yake, bali ipo kwa wote ambao wamepokea ondoleo la dhambi zao katika Yesu Kristo kwa kuamini injili ya maji na Roho.

Imani ya Paulo Iliamini Kuwa Alikuwa Amekufa Pamoja na Yesu Kristo na Kufufuka Pamoja Naye

Sababu iliyomfanya Mtume Paulo akakiri hivi ni kwa sababu katika moyo wake alikuwa na imani katika injili ya kweli akiamini kuwa alikuwa amekufa pamoja na Yesu Kristo na kisha kufufuka pamoja Naye: “Kutokana na dhambi zetu tulikuwa hatuwezi kuikwepa laana na kukabiliana na mauti ya milele; hata hivyo, wakati Yesu Kristo alipokuja hapa duniani na kuzichukua katika mwili wake dhambi za mwanadamu mara moja na kwa wote kwa kubatizwa na Yohana Mbatizaji, dhambi zetu zote zilipitishwa kwenda kwa Yesu wakati huo, hivyo Yesu ametuokoa kwa kusulubiwa na kwa kuimwaga damu yake na kwa kufufuka kwake toka kwa wafu. Hivyo, wale wanaoiamini injili ya maji na Roho wanaishi kuishi milele kwa imani.”

Kwa hakika ukweli uliopo ya kwamba nafsi zetu zipo hai, bila kujalisha ikiwa miili yetu ina wema au ubaya inatokana na na injili ya maji na Roho. Kwa hakika sisi sote tunaweza kuokolewa kwa imani ikiwa tutamwamini Mwana wa Mungu kuwa ni Mwokozi wetu ambaye ametukomboa toka katika dhambi zetu zote. Zaidi ya yote, kwa kuwa Mwana wa Mungu ametukomboa mara moja toka katika dhambi zetu zote wakati tulipokuwa tumefungwa na dhambi hizo, basi kwa sasa tunaweza kuishi maisha ya haki kwa kuiweka imani yetu katika injili ya maji na Roho. Bwana ametuwezesha kuisha maisha yaliyobarikiwa milele, na ametuwezesha sisi waamini kuishi kama watenda kazi wa Mungu kwa kuwa Bwana amezitoweshea mbali dhambi zetu zote mara moja na kwa wote kwa kupitia injili ya maji na Roho. Yeyote anayeamini katika injili ya maji na Roho anaweza kuikiri imani ya kweli ya wokovu kuanzia sasa na kuendelea.

Kwa kuwa bado tunaishi tukiwa na miili, basi ni wazi kuwa kuna nyakati ambapo huwa tunafanya makosa. Wakati fulani, huwa tunajaribiwa kuzirudia tabia zetu za zamani. Ikiwa hatutaitegemea imani yetu katika injili ya kweli, basi ni hakika kuwa tunaweza kufa kutokana na kiwango kikubwa cha makosa yetu. Mtume Paulo pia hakuwa na tofauti sana na sisi, kuna wakati pia aliweza kuirudia nafsi yake ya kale katika mwili, ndio maana ilifikia hatua aliamii kuwa nafsi yake ya kale imesulubiwa pamoja na Yesu Kristo, na kwa sababu hiyo aliweza kuishi maisha mapya katika Yesu Kristo kwa imani. Mtume Paulo alikuwa akikiri kwa imani kuwa Yesu Kristo amemfufua na kumfanya kuwa hai kwa kupitia injili ya maji na Roho. Kama vile Mtume Paulo alivyoikiri imani yake, sisi nasi tunaweza kuishi milele kwa kupitia imani yetu inayoamini kuwau tumekufa pmao na Yesu Kristo na kisha tumefufuliwa pamoja naye.

Hii ni imani muhimu sana ambayo ina msingi wake katika injili ya maji na Roho. Sasa, wale ambao wameoshelewa mbali dhambi zao kwa kuamini katika injili ya maji na Roho hao ndio wenye imani inayowafanya waweze kuishi maisha mapya pamoja na Yesu Kristo. Pamoja na hayo yote kati ya watu wengi wanaoishi hapa ulimwenguni, kuna Wakristo wachache sana walio na ufahamu na wanaoiamini injili ya maji na Roho. Kila ninapofikiria kuhusu hili ninamshukuru sana Mungu kwa kunipatia wokovu wenye thamani. Ingawa sisi tuna mapungufu, ukweli ni kuwa tunaweza kumfuata Bwana wetu kutokana na imani yetu kwa Mwana wa Mungu.

Kadri tunavyoendelea kuishi katika maisha yetu ya kiimani, kuna wakati tumekuwa tukiwafanya mambo mema, lakini ni hakika kuwa kuna wakati tumefanya pia makosa. Ninaiona hali hii kuwa haikwepeki hata hapo baadaye, yaani ninaona kuwa kadri tutakavyoendelea kuishi katika maisha

yetu ya kiimani ni hakika kuwa tutaendelea kufanya makosa. Je, unafikiri kuwa utakuwa mwema katika kila kitu?

Baadhi ya watu wanaweza kuwa na hofu kuhusu namna wanavyoweza kumtumikia Bwana hadi mwisho maana wanafikiria jinsi walivyo na uovu na udhaifu pamoja na kuwa wamezaliwa tena upya kwa kuliadini Neno la injili ya maji na Roho. Hata hivyo, kwa kweli tendo la kumtumikia Bwana halitokani na nguvu zetu binafsi, ukweli ni kuwa tunaweza kumtumikia Bwana kwa imani yetu na kwa nguvu itokayo kwa Bwana. Ni lazima tutambue wakati wote kuwa Bwana ndiye mwenye kutupatia nguvu sisi.

Tunapojifikiria sisi wenyewe na kisha kuwa na mashaka kuhusu siku za usoni, basi hiyo inaonyesha dhahiri kuwa hatuna imani kuwa tumekufa pamoja na Yesu Kristo na kisha kufufuliwa pamoja naye. Kwa nyongeza, sababu nyingine inayotufanya tuzidi kuwa na hofu kuhusu namna tutakavyoishi katika ulimwengu huu ni kwa sababu tunaendelea kuyaangalia mapungufu yetu. Wakati mwingine huwa tunafikiria hivi, “Kwa kweli sipaswi kuwa mtu wa aina hii,” na hali tukijua mapungufu tuliyonayo basi tunazidi kuwa na hofu kuhusu namna tutakavyoendelea kuishi maisha yetu ya kiimani. Inafikia hatua ya kuona ni kama muujiza kuwa tumeweza kuifikia siku ya leo hali tukiwa katika maisha yetu ya kiimani. Lakini mashaka hayo yote yanaweza kuondolewa mbali mara moja kwa imani yetu kwamba tulikufa pmao na Yesu Kristo na kwamba sasa tunaishi pamoja naye.

Aina hii ya imani inatuwezesha kumfuata Bwana kila siku kwa imani. Ni hakika kuwa mbele za Bwana tumetenda mambo mazuri baadhi kwa imani yetu, lakini pia tumefanya makosa. Lakini pamoja na ukweli huo, sisi tunaendelea kuishi kwa imani katika Bwana. Kwa kweli tutajitahidi kufanya mambo vizuri kadri tuwezavyo, lakini tunapoyaangalia maisha

yetu kwa wakati uliopita, ni wazi kuwa kulikuwa na makosa kadha wa kadha tuliyoyatenda, na kwa msingi huo ni wazi kuwa kuna nyakati ambapo udhaifu wetu utainuka. Katika nyakati kama hizi, tunahitaji sana kuwa na imani zaidi, tunahitaji kuwa na imani kama aliyokuwa nayo Mtume Paulo ambaye aliishi kwa imani katika injili ya maji na Roho.

“Nimesulibiwa pamoja na Kristo; lakini ni hai; wala si mimi tena, bali Kristo yu hai ndani yangu; na uhai nilio nao sasa katika mwili, ninao katika imani ya Mwana wa Mungu, ambaye alinipenda, akajitoa nafsi yake kwa ajili yangu” (Wagalatia 2:20).

Paulo alikiri kuwa aliweza kuishi maisha mapya kwa sababu ya Kristo, na kwamba ndio maana aliweza kuishi kwa imani katika Mwana wa Mungu. Paulo alisema kuwa kwa kuwa Mwana wa Mungu alizichukua katika mwili wake dhambi zetu zote mara moja na kwa wote kwa kupitia ubatizo wake aliupokea kwa ajili yetu, na kwa kuwa Yesu alisulubiwa na kufa Msalabani, basi ni hakika kuwa tunaweza kuishi na kuwa hai kwa kuuamini ukweli huu. Bwana ametupatia ondoleo kamilifu la dhambi na ametupatia maisha mapya sisi sote tunaouamini Ukweli wa injili ya maji na Roho. Kwa kuwa Mungu ametuokoa mara moja, basi sisi nasi tumefanyika watu wanaoishi milele kwa kuuamini ubatizo ambao Mwana wa Mungu aliupokea na damu yake aliyoimwaga. Mwana wa Mungu ametuokoa toka katika dhambi zetu zote kwa kupitia Ukweli wa injili ya maji na Roho na kwa sababu hiyo tunaweza kuishi milele kwa imani hii.

Kina inapotokea kuwa udhaifu wetu unafunuliwa, basi hapo ndipo tunapopaswa kukumbuka kiini cha imani ya Paulo. Wewe na mimi hatuwezi kuishi kwa kuiangalia miili yetu peke yetu. Ikiwa tutaingalia miili yetu tu kadri tunavyoendelea kuishi, basi kitakachokuwa kinatungojea sisi ni kifo. Tunaweza

kushinda na kisha kupokea uzima wa milele kwa imani katika Mwana wa Mungu ambaye ametuokoa sisi kikamilifu. Hivyo, ni muhimu sana kwetu sisi kutambua kuwa nafsi zetu za kale zimekufa katika Yesu Kristo, na wakati huo huo sisi ni viumbe vipya ambao tutaishi milele kwa kuwa Mwana wa Mungu ametuokoa sisi ambao tulikuwa wenye dhambi, na tunamwamini Yesu kuwa ni Mwokozi wetu. Sisi tumefufuliwa toka katika mauti kwa imani yetu katika injili ya maji na Roho tuliyopeaw na Mwana wa Mungu. Kwa sasa sisi tunaishi milele kwa sababu ya imani yetu katika Ukweli kuwa Mwana wa Mungu ametuokoa.

Katika mioyo yenu kwa sasa ni lazima kuwe na imani inayoamini kuwa Mwana wa Mungu ametuokoa toka katika dhambi zetu zote na ametupatia uzima wa milele. Je, mnayo imani hii? Je, kwa kupitia injili ya maji na Roho mnaamini kuwa Yesu Kristo amekwisha zitoweshea mbali dhambi zetu zote, na kwamba ameibeba adhabu ya dhambi zote, na kwamba amefufuka toka kwa wafu? Ninatamani ninyi nyote muweze kuamini katika injili ya maji na Roho, na ninatamani muweze kuwa na imani kama aliyokuwa nayo Paulo. Bwana wetu hakupungukiwa kitu chochote cha kuweza kuzitoweshea mbali dhambi zetu zote kupitia injili ya maji na Roho, na wala hakupungukiwa kitu cha kuweza kutufanya sisi kuwa watu wa Mungu na kutubadilisha kuwa watenda kazi wa haki ya Mungu. Ni hakika kuwa sisi tutaishi milele kwa imani yetu inayoamini kuwa Mungu ametufanya sisi kuwa wana wake. Tunaamini kuwa Bwana wetu Yesu Kristo ni Mwana wa Mungu, na kwamba ametuokoa kupitia injili ya maji na Roho. Hivyo ni hakika kuwa sisi tutaishi milele pamoja na Mungu.

Je, unamwamini Mwana wa Mungu aliyekuja kwa injili ya maji na Roho kuwa ni Mwokozi wako? Ni lazima uamini hivyo, yaani kuwa Yesu Kristo Mwana wa Mungu alibatizwa

na Yohana, akafa Msalabani, akafufuka toka kwa wafu kwa ajili yako, na kwa sababu hiyo amekuokoa toka katika dhambi zako zote.

Hivyo tumefikia hatua ya kutambua kuwa sisi ni viumbe tuliokufa kiimani. Na kwamba sasa tumefanyika kuwa viumbe hai kwa imani katika injili ya maji na Roho, na kwamba sasa tunaikimbilia ile hatua ya mwisho kwa kuiweka imani yetu kwa Bwana. Kuna wakati ambapo ikiwa tutaushangaa udhaifu wa miili yetu basi tutaishia kuangukia katiak shimo lisilo na mwisho kwenye bonde la mauti. Lakini badala ya kuiangalia miili yetu, tunaweza kusimama kwa uthabiti hali tukijiangalia kwa kupitia imani katika injili ya maji na Roho. Kwa kweli, sisi tumekufa pamoja na Yesu Kristo katika injili ya maji na Roho, na tumefufuliwa pamoja naye Yesu Kristo.

Nafsi zetu sisi tunaoamini katika injili ya maji na Roho kama alivyoamini Paulo zimekuwa ni roho zilizo hali. Ingawa tunaishi hali tukiwa na miili dhaifu kwa sasa, kwa hakika tumeweza kuishi maisha ya haki kwa imani katika injili ya maji na Roho. Hii ni kwa sababu kuna nguvu katika injili ya maji na Roho. Sisi tunaweza kuishi milele kwa kuwa tunamwamini Bwana aliyekuja kwa maji na kwa damu kwa mioyo yetu yote. Kwa maneno mengine, ingawa miili yetu ina mapungufu, ni hakika kuwa tunao uzima wa milele ambao hauwezi kufa.

Kama ambavyo Mtume Paulo aliishi kwa imani pamoja na Yesu Kristo, wewe na mimi ni lazima pia tuishi kwa imani katika injili ya maji na Roho. Ikiwa utajiingalia wewe mwenyewe na kisha kufikiria hivi, “Kwa nini nipo hivi? Sina tumaini kabisa!” halafu ukaangukia katika mkanganyiko, basi hapo ndipo utakapokufa. Lakini ikiwa unaamini kuwa Mwana wa Mungu amezitoweshea mbali dhambi zako zote, na kwamba amekufufua toka mautini, basi ni hakika utaishi pamoja na Yesu Kristo. Kwa kuwa Yesu Kristo amekuokoa

kwa Ukweli wa maji na Roho, basi kama unaiamini injili hii, ni hakika kuwa unaweza kufa na kisha kufufuka pamoja na Kristo.

Ni hakika kuwa Bwana amekuokoa wewe na mimi toka mautini. Mungu amewafanya ninyi nyote kuwa watu wa Mungu kwa kuwakomboa toka katika dhambi zenu zote na adhabu ya hizo dhambi. Bwana amewaokoa ninyi na mimi toka katika dhambi zetu zote na ametupatia maisha mapya. Huu ndio msingi wa namna tunavyoweza kufufuliwa toka mautini na kisha kuishi tena, na hivi ndivyo tunavyoweza kuipokea baraka ya uzima wa milele toka kwa Mungu.

Ni lazima wakati wote tuishi tukiwa ndani ya injili ya maji na Roho, hali tukiamini kuwa tumekufa pamoja na Yesu Kristo na kwamba tumefufuliwa pamoja na Yesu Kristo. Na ni lazima tuishi kwa imani inayomwamini Mwana wa Mungu. Ili kufanya hivyo hatupaswi kujiangalia sisi wenyewe katika hali ya kukata tamaa kutokana na yale tunayoyaona, basi tunapaswa wakati wote kumwangalia Bwana. Kwa kweli, tumeweza kuishi hadi wakati huu kutokana na neema na msaada wa Bwana. Tunaweza kuyafanya yale yaliyo sahihi na kuepuka kifo ikiwa tu tutamwangalia Bwana kwa imani. Tunaposhindwa kumwangalia Bwana na kisha kuyafuata mapenzi yetu binafsi, ni hakika kuwa tutaishia kutenda yale ambayo Bwana hapendi tuyafanye. Hata ikiwa umeshafanya mambo mema, basi hayo mambo mema yalitendeka kutokana na imani yako katika injili ya maji na Roho, na hataka ulifanya mambo mabaya, basi tambua kuwa hayo mambo mabaya yalitokana na wewe kupotoshwa na mawazo ya mwili.

Imani ya Mtume Paulo inafunuliwa vizuri katika Wagalatia 3:27, ambapo alisema hivi, “*Maana ninyi nyote mliobatizwa katika Kristo mmemvaa Kristo*” Ukiri huu wa imani unamaanisha kuwa tunafikia hatua ya kuwa na imani inayotuwezesha kufa pamoja na Yesu Kristo na kisha kuishi

pamoja naye pale tunapoamini kuwa Bwana ametukomboza kwa injili ya maji na Roho. Ili tuweze kuwa pamoja na Yesu Kristo na kisha kufa na kufufuliwa pamoja naye, ni lazima tuwe na imani inayoufahamu na kuuamini Ukweli wa injili ya maji na Roho uliotolewa na Bwana. Bwana anatuwezesha sisi waamini kufa pamoja na Kristo na kisha kufufuka pamoja naye kwa kupitia injili ya maji na Roho.

Ndio maana katika Wagalatia 1:11-12 Mtume Paulo alisema hivi, *“Kwa maana, ndugu zangu, injili hiyo niliyowahubiri, nawajulisha ya kuwa siyo ya namna ya kibinadamu. Kwa kuwa sikuipokea kwa mwanadamu wala sikufundishwa na mwanadamu, bali kwa ufunuo wa Yesu Kristo.”* Sisi nasi tuliweza kuokolewa toka katika dhambi zetu zote na kisha kuishi kama watumishi wa Mungu kwa ufunuo toka kwa Yesu Kristo.

Bwana Wetu Ametuonyesha Nini Sisi Tunaoamini Katika Injili ya Maji na Roho?

“Ufunuo wa Yesu Kristo” unaotajwa katika kifungu hicho hapo juu una maanisha ni kuifunua na kuionyesha milki ya Mungu kwetu. Kwa kupitia ufunuo wa Yesu, tuliweza kutambua jinsi ambavyo Mungu ametuokoa toka katika dhambi zetu zote. Bwana alilifunua hili kupitia Neno la Mungu. Katika Agano la Kale, wanyama wa sadaka ya kuteketezwa walizipokea dhambi za Waisraeli wakati walipowekewa mikono katika vichwa vyao. Kisha hao wanyama walichinjwa na kuimwaga damu yao katika madhabahu ya sadaka ya kuteketezwa ili kuulipa mshahara wa dhambi za Waisraeli. Katika Agano la Kale, kondoo, mbuzi, au fahari la ng’ombe asiye na mawaa ndiye aliyetumika kama sadaka ya

kuteketezwa mbele za Mungu na kwa kufanya hivyo walizitoweshea mbali mara moja dhambi za mwenye dhambi.

Katika Agano Jipya, ni Yesu Kristo ambaye alikuwa ni mnyama wa sadaka ya kuteketezwa ambaye aliwekewa mikono na kutolewa dhabihu, alizipokea dhambi za mwanadamu mara moja na kwa wote kwa kubatizwa na Yohana Mbatizaji, alijitwika dhambi zote za ulimwengu mara moja, akafa Msalabani, kisha akafufuka toka kwa wafu, na kwa sababu hiyo amefanyika kuwa Mwokozi mkamilifu kwa wale wote wanaomwamini. Kwa kufanyika kama sadaka ya kuteketezwa ya Agano la Kale, Yesu ameufunua wokovu wa kweli kwetu sisi, na amefanyika kuwa Mwokozi ambaye ametuokoa toka katika dhambi zetu zote na maangamizi. Mwana wa Mungu alibatizwa na akasulubiwa, na akafanyika Mwokozi aliyezifuta dhambi zote na adhabu yote ya dhambi, Yesu alifanya hivyo ili kuzitoweshea mbali dhambi zetu zote.

Mtume Paulo pia aliweza kuwa mtumishi wa Mungu kwa imani hii katika injili ya maji na Roho ambayo Bwana alikuwa ameifunua kwake. Paulo aliamini kuwa Yesu Kristo alikuja hapa duniani ili kutuokoa toka katika dhambi za ulimwengu, na alipokuwau na miaka 30, Yesu alizichukua katika mwili wake dhambi zote za ulimwengu mara moja na kwa wote kwa kuupokea ubatizo toka kwa Yohana Mbatizaji. Pia Paulo aliamini hivi, kwa kuwa Yesu alikuwa amezichukua dhambi zote za ulimwengu, ndio maana aliibeba adhabu yote ya dhambi na akafa Msalabani, na alifufuka toka kwa wafu ili aweze kuwa Mwokozi wetu mkamilifu. Hii ndio iliyokuwa imani ya Mtume Paulo, na hiyo pia ndiyo imani yetu na sisi. Imani ya Mtume Paulo ni ile iliyoamini kuwa alikuwa amekufa pamoja na Yesu Kristo na kwamba alikuwa amefufuliwa pamoja naye. Ndio maana Paulo aliikiri imani yake kwa kusema hivi, *“Maana ninyi nyote mliobatizwa katika Kristo*

mmemvaa Kristo” (Wagalatia 3:27).

Ufunuo ambao Yesu Kristo ametuonyesha kama sehemu ya wokovu wake si mwingine bali ni injili ya maji na Roho. Biblia inasema kuwa Yesu alikuja hapa duniani kama Mwana wa Mungu na kama sadaka yetu ya kuteketezwa, na kwamba Yesu alibatizwa na kuimwaga damu yake ili kutuokoa kikamilifu toka katika dhambi za ulimwengu. Imani ya Paulo ilikuwa ni ile iliyoamini katika injili ya maji na Roho. Mtume Paulo aliamini katika ubatizo ambao Yesu Kristo alikuwa ameupokea na damu yake aliyokuwa ameimwaga pale Msalabani kuwa ni vitu muhimu sana kwa wokovu wake. Imani ya Paulo iliamini kuwa wakati Yesu alipobatizwa, dhambi zake Paulo zilipitishwa kwenda wka Yesu. Paulo alikuwa ni mtu wa imani aliyeamini kuwa baada ya kuupokea ubatizo wake toka kwa Yohana Mbatizaji na kuzipokea dhambi za ulimwengu, Yesu Kristo alikwenda Msalabani na akasulubiwa, na hapo ndipo dhambi zake Paulo ziliposulubiwa pamoja na Yesu. Pia aliamini kuwa wakati Yesu Kristo alipofufuka toka kwa wafu, yeye Paulo alifufuka pia pamoja na Yesu Kristo kwa imani. Hiki ndicho kilichokuwa kiini cha imani ya Paulo.

Kwa ufupi, Mtume Paulo alimwamini Yesu Kristo kuwa ni Mwokozi wake mkamilifu. Paulo aliushuhudia huu wokovu wa kweli kwa kuiweka imani yake katika Yesu Kristo Mwokozi wetu. Paulo aliamini kuwa alikuwa amekufa pamoja na Yesu Kristo, na kwamba alikuwa amefufuliwa pamoja Naye. Kwa kuwa Yesu Kristo alizibeba dhambi za ulimwengu kwa kubatizwa na Yohana Mbatizaji, ndio maana aliweza kusulubiwa, na kisha akafufuka tena toka kwa wafu, basi kwa imani hii inayouamini Ukweli tunaweza kufa na kisha kufufuka na kuishi pamoja na Kristo. Kifo na ufufuo wa Yesu Kristo ni kifo chetu na ni ufufuo wetu. Kwa maneno mengine, ufufuo wa Yesu Kristo ni ufufuo wa Paulo, na wakati huo huo ni ufufuo

wetu sisi.

Paulo alikiri kuwa yeye yupo hai kwa sababu ya kuuamini Ukweli kuwa Mwana wa Mungu alikuwa amemkomboa, na kwamba kwa imani hiyo ataendelea kuishi milele. Imani ya Paulo ilimwezesha kufa pamoja na Yesu Kristo na kisha kufufuka pamoja Naye. Hivyo, kwa imani hii katika injili ya maji na Roho, Paulo aliweza kupokea ondoleo la dhambi zake, na akafanyika kuwa mtumishi wa Mungu, na akafanyika kuwa mmoja kati ya watu wa Mungu ambao wataishi katika Ufalme wa Mungu milele.

Sasa, ni lazima tuwe na imani inayotufanya tuweze kubatizwa katika Yesu Kristo. Ni lazima tuwe na imani inayotuwezesha kufa pamoja na Yesu Kristo na kisha kufufuliwa pamoja na Yesu Kristo. Tunapokuwa na imani inayotuwezesha kuungana pamoja na Yesu Kristo, basi hapo ndipo tunapoweza kuwa wale watakaoishi pamoja Yesu Kristo pasipo kuonja mauti. Mwana wa Mungu ametukomboa toka katika dhambi za kifo kwa kuwa ametupatia imani inayotuwezesha kuishi milele kwa kupitia ubatizo wake na damu yake aliyoiwaga Msalabani. Bwana aliyashughulikia mapungufu yetu, na ametufanya sisi tuweze kuishi milele.

Mtume Paulo aliiamini injili ya maji na Roho na akauhumbi Ukweli wa wokovu kwa watakatifu wa makanisa ya Galatia, lakini baadaye kidogo imani yao ilidhoofika. Ndio maana Paulo akawaandikia hivi, *“Nastaajabu kwa kuwa mnamwacha upesi hivi yeye aliyewaita katika neema ya Kristo, na kugeukia injili ya namna nyingine. Wala si nyingine; lakini wapo watu wawataabishao na kutaka kuigeuza injili ya Kristo”* (Wagalatia 1:6-7).

Katika siku za Paulo, walikuwepo watu waliowasumbua watakatifu katika Kanisa la Mungu kwa kusisitiza umuhimu wa tohara ya kimwili badala ya injili iliyokuwa imehubiriwa na

Paulo. Hawa wanatohara walisisitiza kuwa watakatifu ni lazima waishike na kuifuata Sheria ya Agano la Kale, ikiwemo tohara na Siku ya Sabato.

Katika kipindi cha leo, wanasheria wanayaongoza maisha yao ya kiimani kama ifuatavyo: Wanafanya sala za toba kwa Bwana, huku wakijaribu kuzioshelea mbali dhambi zao kwa jitihada zao binafsi. Wanalilia kwa sauti kubwa wakisema, “Bwana nisamehe mimi!” wanajaribu kuziondoa dhambi zao kwa kupitia sala zao za toba. Hadi leo hii, kuna waongo wengi sana ambao wamejaribu kuikamilisha imani yao kwa kupitia utaratibu kama huo wa Kikristo na kupitia sala za toba na utakaso unaoendelea, lakini hakuna hata mmoja wao aliyeweza kulifikia lengo hilo na hatimaye wote wamepotea. Kwa kuwa wamejaribu kuzioshelea mbali dhambi zao pasipo kupitia injili ya maji na Roho, bali kwa kupitia sala zao binafsi za toba, basi ni hakika kuwa watu hao wamegongwa muhuri unaowathibitisha kuwa wao ni watenda maovu.

Katika kipindi cha Kanisa la Mwanzo, wanatohara waliinuka na wakajaribu kuidhalilisha injili ya maji na Roho ambayo Yesu Kristo alikuwa ameitoa kwa Kanisa lake. Lakini Kanisa la Mungu liliweza kuzuia jitihada zao mbovu, na zaidi ya yote, Kanisa la Mungu lilitimiza jukumu lake la kuieneza injili ya maji na Roho.

Yesu Kristo alikuja kuzitimiza huduma zake tatu: Yesu Kristo ni Mfalme wa wafalme, ni Nabii, na ni Kuhani Mkuu wa Ufalme wa Mbinguni. Yesu Kristo ni Mwokozi aliyekuja hapa duniani akiwa na huduma hizo tatu na amewakomboa wenye dhambi wote toka katika dhambi zao mara moja na kwa wote. Ili kuwaokoa watu wake toka katika dhambi zao, Yesu Kristo alikuja hapa duniani akiwa katika sura ile ile na watu wake, na kwa kupitia injili ya maji na Roho, Yesu alitufundisha jinsi dhambi zetu zilivyo na akatuonyesha jinsi wokovu wetu

ulivyotimizwa—Yesu alitundisha haya mambo yote kwa mara moja. Yesu Kristo aliutoa mwili wake mbele za Mungu Baba, na ili kufanya hivyo Yesu alibatizwa na Yohana Mbatiza na kuzipokea dhambi zote za mwanadamu, yaani dhambi zako zote na zangu, alikufa Msalabani, na kisha akafufuka tena toka kwa wafu. Hii ndio injili ya maji na Roho, na injili halisi ambayo Mtume Paulo aliiamini. Mtume Paulo alikuwa na imani iliyomwezesha kufa na kufufuka pamoja na Yesu Kristo.

Ni Madhara Gani Yatajitokeza Ikiwa Tutaipotosha Injili ya Maji na Roho Ambayo Bwana Wetu Ametupatia?

Yesu Kristo, ambaye ni Mfalme wa wafalme na Mungu Mwenyewe alikuja hapa duniani akafanyika mwili wa mwanadamu ili kuwaokoa wanadamu toka katika dhambi. Yesu alizibeba katika mwili wake dhambi zote za mwanadamu kwa kubatizwa na Yohana Mbatizaji alipokuwa na umri wa miaka 30. Kisha Yesu alizibeba dhambi za ulimwengu hadi Msalabani, akasulubiwa na kufa, kisha akafufuka toka kwa wafu, na kwa kufanya hivyo ametupatia sisi sote wokovu mara moja. Lakini kulikuwepo na wale waliojaribu kupotosha kile ambacho Yesu Kristo alikifanya ili kutuokoa wewe na mimi toka katika dhambi zetu. Mfano wa kwanza wa watu kama hao lilikuwa ni kundi la wanatohara wa kipindi cha Kanisa la Mwanzo.

Hali akiwakemea wale waliojaribu kuipotosha injili ya maji na Roho, Paulo alisema kuwa mtu yeyote anayejaribu kuieneza injili nyingine zaidi ya injili ya maji na Roho na alaaniwe. Tunapoiamini injili ya maji na Roho, basi kwa kupitia imani yetu hii kamilifu tunafanyika kuwa watu wa

Mungu mara moja na kisha tunapokea maisha mapya. Lakini wanatohara walidai kuwa ilikuwa ni lazima kwa waamini kutahiriwa kimwili ili waweze kuokolewa kikamilifu.

Hata sasa, kuna baadhi ya makundi ambayo yanauona Ukristo kuwa ni moja kati ya dini zenye nidhamu binafsi, huku wakidai kuwa ni lazima tuzinyooshe fikra zetu na mioyo yetu. Kwa kupitia mafundisho yao ya sala za toba, makundi hayo yanajaribu kuipotosha injili ya maji na Roho, injili ambayo Mwana wa Mungu ameitumia kuzitoweshea mbali dhambi zetu zote mara moja na kwa wote. Bwana wetu alizichukua dhambi zetu zote katika mwili wake kwa kubatizwa, kisha aliadhibiwa kwa sababu ya dhambi zetu zote kwa kusulubiwa na kuimwaga damu yake. Hivi ndivyo Yesu alivyotupatia maisha mapya sisi sote tunaoniama injili ya maji na Roho.

Sisi tumepokea ondoleo la dhambi zetu mara moja na kwa wote na tumefanyika watu wa Mungu mwenyewe ambao tutaishi milele kwa imani kwa kuamini injili ya kweli ya maji na Roho. Pamoja na ukweli huu, ikiwa kuna mtu ambaye hayaamini haya ambayo Yesu Kristo Mwana wa Mungu ameyafanya ili kutuokoa kikamilifu, na badala yake mtu huyo akawa anajaribu kuzioshelea mbali dhambi zake kwa kupitia sala zake binafsi za toba, basi mtu wa jinsi hiyo anapaswa kukemewa kwa ukali kuwa yeye ni mzushi. Fundisho la kidini linalodai kuwa mtu anaweza kutakaswa kwa kufanya sala za toba ni moja kati ya mafundisho potofu kabisa ya Ukristo siku hizi.

Katika makanisa ya Galatia, kulikuwa na watu waliojaribu kuwa watu wa Mungu kupitia tohara. Watu hao walikazia sana umuhimu wa kuitii Sheria na maagizo yake kama vile tohara ya kimwili, Sabato, na sikukuu nyingine za Kiyahudi, waliyalinganisha mambo haya na imani yao katika injili ya maji na Roho. Kama ambavyo baadhi ya watu huko Galatia

walivyohubiri tohara badala ya kuihubiri injili ya maji na Roho iliyokuwa imehubiriwa na Paulo, basi katika kipindi hiki ulimwenguni kote, kuna idadi kubwa sana ya Wakristo ambao wanajaribu kuzioshelea mbali dhambi zao kwa kupitia sala zao za toba kuliko injili ya maji na Roho. Mtume Paulo aliendelea kusema hivi, *“Lakini ijapokuwa sisi au malaika wa mbinguni atawahubiri ninyi injili yo yote isipokuwa hiyo tuliyowahubiri, na alaaniwe” (Wagalatia 1:8)*. Lakini, Wakristo wengi bado wanaamini katika sala zao za toba au fundisho la kidini la utakatifu unaoongezeka, na bado wanaziamini injili nyingine badala ya injili ya maji na Roho.

Mtu anaweza kuuliza, “Kuna tofauti gani basi kati ya kuiamini injili ya maji na Roho na kujaribu kuziosha dhambi kwa kuiamini damu ya Msalaba na kufanya sala za toba?” Imani ya Paulo ni ile iliyoamini katika ubatizo ambao Yesu aliupokea toka kwa Yohana na damu yake aliyoimwaga Msalabani kuwa ndio wokovu wake. Sisi pia tulikufa pamoja na Yesu Kristo na sasa tunaishi maisha mapya pamoja na Yesu Kristo kwa kuwa tunaiamini injili ya maji na Roho (Warumi 6:4). Imani ya injili ya maji na Roho, na imani inayoamini kuwa mtu anaweza kuzioshelea dhambi zake kila siku kwa sala za toba ni imani zinazotofautiana kabisa. Hii imani ya pili ndiyo inayoitwa “injili nyingine.”

Mtume Paulo alisema hivi, *“Kama tulivyotangulia kusema, na sasa, nasema tena, mtu awaye yote akiwahubiri ninyi injili yo yote isipokuwa hiyo mliyoipokea, na alaaniwe” (Wagalatia 1:9)*. Kwa Wakristo, tusi kubwa kabisa linaloweza kusemwa juu yao katika ulimwengu huu ni, “Ulaaniwe na kwenda motoni milele.” Ni tusi gani ambalo linaweza kuwa kubwa zaidi ya kumlaani mtu ili aweze kulaaniwa na Mungu na kwenda kuzimu? Wakati Paulo alipokitaja kifungu hiki alikuwa akiwaambia wale waliokuwa wakidai kuwa watu

wanaweza kuwa watu wa Mungu mwenyewe ikiwa watatahiriwa kimwili. Kifungu hiki kinaweza pia kutumika kwa wale ambao kwa sasa wanadai kuwa wanaweza kuzioshelea mbali dhambiz ao kwa kupitia sala za toba. Kwa maneno mengine, hakuna injili nyingine mbele za Mungu zaidi ya injili ya maji na Roho. Injili ya kweli ambayo Biblia inaiongelea ni injili ya maji na Roho.

Je, injili nyingine ni injili gani? Injili nyingine katika wakati wetu ni mafundisho ya uongo yanayoeleza kuwa mtu anaweza kuoshwa dhambi zake kwa kufanya sala za toba. Katika kipindi cha Kanisa la Mwanzo, injini nyingine ni ile iliyosisitiza juu ya tohara ya kimwili. Hata hivyo, injili ya kweli nile inayoeleza kuwa, ili aweze kutuokoa, Yesu Kristo alizibeba dhambi zote mara moja kwa ubatizo wake alioupokea toka kwa Yohana Mbatizaji, kisha akaenda Msalabani na kuimwaga damu yake na kufa Msalabani, na kisha akafufuka toka kwawafu na kwa sababu hiyo ameukamilisha wokovu wetu.

Pamoja na ukweli huo kuna Wakristo wengi sana ulimwenguni ambao wameiweka imani yao katika sala zao binafsi za toba, ambao ni tofauti kabisa na injili ya maji na Roho. Hivyo, tunapoihubiri injili ya maji na Roho kwao, kwa mara ya kwanza inaweza kuonekana kana kwamba wataokolewa mara moja, lakini hali haiko hivyo. Wakristo hao wamepotoshwa na mafundisho hayo potofu ya kidini kiasi kuwa mioyo yao imekuwa migumu kiasi cha kushindwa kuifahamu injili ya kweli. Tunaona kuwa watu wa jinsi hiyo kwa makusudi mazima wanasimama kinyume na injili ya maji na Roho.

Hata hivyo, kama ilivyoandikwa katika Biblia, wale walio maskini wa roho wamebarikiwa sana kupitia injili hii ya kweli. Baada ya kuwa wamekutana na injili ya maji na Roho, watu wengi ulimwenguni kote wakiwamo wachungaji wametutumia

ukiri huu huku wakishuhudia hivi, “Nilikuwa nikimwamini Yesu huku nikiwa mwenye dhambi kwa miaka mingi, lakini nilizaliwa tena upya na kuyatatua matatizo yangu ya kiroho kwa kupitia hiki kitabu kimoja.” Wanatutumia shuhuda zao, wanaeleza kuwa walikuwa wakijaribu kuoshwa dhambi zao kwa kupitia sala za toba pasipo mafanikio yoyote yale, lakini kwa sasa wamefanyika upya kwa kuuamini Ukweli wa injili ya maji na Roho.

Ni kitu gani kinatokea wakati mtu anapoziamini sala za toba tu? Imani ya jinsi hiyo itamwongoza mtu na kumfanya awe na imani isiyo na kitu ndani yake na ataangukia katika mafuriko ya dhambi. Watu wa jinsi hiyo ni sawa na wale wanaoiunda miungu kutokana na mawazo yao binafsi na kisha wakaabudu sanamu zao ambazo wamejifanyia. Wao wanafikiri kuwa wameokolewa toka katika dhambi zao, na wanaamini kuwa wamefanywa kuwa watu wa Mungu. Wao hufikiria kuwa, “Yesu wewe ni Mungu wangu,” lakini wanaamini hivyo wakati hawaufahamu Ukweli halisi. Hata hivyo, imani yao ya jinsi hiyo ni bure kabisa, ni sawa na jengo lililojengwa katika mchanga, hii ni kwa sababu imani yao imejengwa katika msingi wa mawazo yao binafsi na si katika Neno la Mungu. Hawautegemei Ukweli unaosema kuwa ubatizo wa Yesu na damu yake Msalabani vimewafanya kuwa wakamilifu, na badala yake wanaendelea kuzitegemea sala za toba. Wakati mwingine huwa wanaikiri huduma ya Yesu aliyeimwaga damu yake Msalabani, lakini huwa wanauweka kando ubatizo wa Yesu ambao ni wa muhimu sana katika kuitimiza haki ya Mungu.

Je, ingeliwezekana kwa Yesu kuzibeba dhambi za ulimwengu pasipo ubatizo ambao aliupokea toka kwa Yohana? Je, Yesu alizitoweshea mbali dhambi zetu kwa kufa Msalabani pekee? Ni wazi kuwa Yesu alizichukua dhambi zetu zote mara moja na kwa wote kwa kubatizwa na Yohana Mbatizaji, kisha

akaenda Msalabani na akasulubiwa, akazisafishilia mbali dhambi za mwanadamu mara moja na kwa wote, na kwa sababu hiyo amewaokoa wale wote wanaomwamini. Ingeliwezekanaje kwa Yesu kuzichukua dhambi zetu akiwa Msalabani? Yesu alizichukua dhambi za ulimwengu katika mwili wake wakati alipobatizwa na Yohana Mbatizaji. Kitendo cha kuamini kuwa mtu anaweza kuzioshelea mbali dhambi zake kwa sala za toba ni imani isiyo na maana inayotokana na jitihada binafsi za mwanadamu.

Hata sasa, tunaweza kuona kuwa wale wanaoamini katika sala za toba, yaani wasioiamini injili ya maji na Roho bado wanaendelea kuomba na kumsifu Mungu. Hata hivyo, watu hawa wanaoziamini sala zao za toba tu maisha yao yanathibitisha kuwa wana imani ambayo ni potofu, maana bado wana dhambi katika mioyo yao, na wao wanaendelea kujitahidi kuionyesha haki yao binafsi. Watu hao wanaendelea kumsifu Mungu hali wakifurahishwa na sauti zao nzuri zinatokana na hisia zao binafsi huku wakiwa hawajui kuwa bado kuna dhambi katika mioyo yao. Wao hawajiulizi ikiwa Mungu anataka kuwasikiliza au la.

Hata hivyo, tunachopaswa kukitambua hapa ni kuwa Yesu Kristo ametukomboza kikamilifu toka katika dhambi za ulimwengu kwa kupitia injili ya maji na Roho. Hakuna dhambi ambayo imebakia katika mioyo yetu maana tendo lake la dhaki limemaliza yote. Tunapomsifu Mungu hali tukiwa na ufahamu sahihi wa injili ya maji na Roho basi hapo ndipo sifa zetu zinapokuwa na uhalisia mbele za Mungu. Kwa kweli tunaushukuru sana wokovu wa Bwana kwa kuwa tunaamini katika injili ya maji na Roho, na tunamtukuza Mungu kwa kuwa tunapata msukumo toka kwenye injili hii. Lakini wale wanaoamini kuwa wameoshwa dhambi zao kwa kupitia sala zao za toba wanatakiwa kujiridhisha hisia zao kwa

kujihakikishia kuwa, “Mimi ni mmoja kati ya watu wa Mungu. Mimi ni mmoja kati ya watu waliochaguliwa.”

Hata hivyo, sifa zinazotolewa na wenye haki zinatolewa kwa imani. Hata tukiimba vibaya sio kitu cha kuhofia kwa upande wetu hasa inapofikia hatua ya kumsifu Mungu. Kwa kuwa yeyote anayeiamini injili ya maji na Roho iliyotolewa na Mungu, ambayo ni injili ya ondoleo la dhambi, basi mtu huyo atamsifu Mungu kwa moyo wake wote. Wenye haki wanafurahia kumsifu Mungu kwa mioyo yao yenye imani. Hivyo, mnapaswa kutambua kuwa ikiwa kila Kristo anaiaamini injili nyingine zaidi ya injili ya maji na Roho, basi imani ya huyo Mkristo ni imani ya kishirikina. Imani ya kweli inahusisha kuuamini Ukweli kuwa Bwana wetu ametuokoa kwa kuzitoweshea mbali dhambi zetu kwa kupitia injili ya maji na Roho.

Hebu niongezee kidogo kwenye hoja hii kwa kuonyesha mfano uliopo katika dini za ulimwenguni. Ubuddha ni moja kati ya dini zilizopo ulimwenguni. Mabuddha wanazisujudia sanamu za Buddha zilizochongwa kwa mawe huku wakiomba baraka. Baadhi yao huchonga sura ya Buddha katika miti halafu husujudu kwenye sura hiyo na kuomba kubarikiwa. Wakati Mabuddha wanapoomba ili kupata baraka, huwa wanaifungua mikono yao kana kwamba wanaomba kupata kitu fulani.

Lakini sanamu hizi za mawe za Buddha zimetengenezwa kutokana na sura ya mwanadamu na zimechongwa kwa mawe na fundi mjenzi wa mawe. Cha ajabu ni pale watu wanapozichukua sanamu hizo na kuziona kuwa ni mungu wao na kuziabudu. Na ajabu zaidi ni pale wanapoziomba sanamu hizo ili ziwabariki. Wale wasio na watoto huomba ili wapate mwana. Watu hawa hufikiri kuwa ikiwa wataomba kwa uaminifu kupitia vile ambavyo wamevichonga wenyewe kutoka kwenye mawe, basi wanafikiri kuwa hayo mawe

yanaweza kuwasaidia kwa kiwango fulani. Kwa kweli hii ndio imani halisi ya kishirikina. Kitendo cha kuziamini dini za ulimwenguni kinaonyesha namna watu wanavyoyaamini mawazo yao binafsi.

Kwa upande mwingine, Mtume Paulo alieleza wazi kuwa injili ambayo alikuwa akiiamini ilikuwa ni ile iliyotokana na ufunuo wa Yesu Kristo ambayo alikuwa ameonyeshwa. Paulo alikuwa ameamshwa kiroho na Neno la Agano la Kale, na akafikia hatua ya kuuamini Ukweli huu wa injili. Paulo alifahamu na aliamini kile ambacho Mungu alikisema katika Agano la Kale kuhusu ondoleo la dhambi, na pia katika Agano Jipya alifahamu jinsi ambavyo Yesu Kristo amekuja hapa duniani, na kuzichukua dhambi katika mwili wake kwa kupitia ubatizo wake, na namna ambavyo alikufa Msalabani na kisha kufufuka toka kwa wafu, na kwamba kwa kufanya hivyo ametuokoa toka katika dhambi zetu zote—hii ndiyo imani ya kweli. Huduma za wokovu ambazo Yesu Kristo amezifanya wakati alipokuja hapa duniani si nyingine bali ni huduma za injili ya maji na Roho. Sisi tunaweza kuondolewa dhambi zetu zote, tunaweza kupokea uzima wa milele, na tunaweza kufanyika watu wa Mungu kwa kuamini injili ya maji na Roho iliyodhihirishwa katika Neno la Mungu.

Paulo alisema kuwa yeye amefanyika kuwa hai na si mfu kwa sababu ya kuamini injili ya maji na Roho, ana akaeleza kuwa yeye ndiye aliyeihubiri injili hii ya kweli. Hii ndio sababu Mtume Paulo aliwakemea wanatohara na akawaambia walaaniwe, *“Lakini ijapokuwa sisi au malaika wa mbinguni atawahubiri ninyi injili yo yote isipokuwa hiyo tuliyowahubiri, na alaaniwe” (Wagalatia 1:8)*. Hivyo tunahitaji kuzifahamu hizo injili nyingine ambazo si injili halisi.

Ili tuweze kuzifahamu injili hizo nyingine, ni lazima kwanza tuweze kuitambua kibiblia injili ya kweli ambayo

Paulo aliiamini na kuihubiri. Mtume Paulo aliamini kuwa Mwana wa Mungu alizitoweshea mbali dhambi za ulimwnegu kwa kuja hapa duniani na kwa kubatizwa, kwa kufa Msalabani na kisha kufufuka toka kwa wafu. Hivi ndivyo Yesu alivyotuokoa toka katika dhambi zetu zote na ndivyo alivyotuokoa toka katika adhabu yote ya dhambi. Na hii ndio imani yenyewe aliyokuwa nayo Paulo. Imani ya Paulo haikuwa katika damu ya Msalaba pekee, bali ilikuwa katika ubatizo na damu ya Msalaba.

Kama ni hivyo, ni injili gani ambayo ni tofauti na injili ya kweli ambayo Paulo aliiamini? Ni injili ya damu pekee. Watu walio na imani katika injili hii ya damu pekee pia wanazitegemea sana sala za toba ili kuzioshelea mbali dhambi zao. Sisi tuliozaliwa tena upya tunaamini injili ya maji na Roho, lakini Wakristo wengi siku hizi wanaamini damu ya Msalaba pekee huku wakiegemea kwenye sala zao za toba. Imani hizi zinatofautiana kabisa. Injili ya maji na Roho ambayo tunaamini ndio ile injili ambayo Paulo aliihubiri. Hivyo, Mungu anaithibitisha imani yetu katika injili ya maji na Roho. Kwa upande mwingine, kwa wale wanaojaribu kuzioshelea mbali dhambi zao kwa kupitia sala za toba, imani yao ni tofauti kabisa na injili ya maji na Roho, na kwa sababu hiyo ninaweza kusema kwa ujasiri kuwa watu hao hawawezi kuthibitishwa na Mungu na badala yale watalaaniwa.

Sisemi kwamba msiamini kuwa Yesu aliimwaga damu yake ya thamani pale Msalabani. Ninachowaeleza hapa ni kuwa kitendo cha kuamini damu pekee ya Msalaba na kisha kuucha ubatizo ambao Yesu aliupokea toka kwa Yohana Mbatizaji ni tendo la kuamini injili nyingine. Kama utaendelea kuishikilia injili nyingine, ni wazi kuwa hutaweza kukwepa na hivyo utaiweka imani yako katika sala za toba, na utafanya hivyo kuwa dhambi bado zimebakia katika moyo wako hata

kama utajitahidi kwa nguvu kiasi gani.

Je, unaweza kupokea ondoleo la kweli la dhambi kwa kuiamini damu ya Yesu aliyoimwaga Msalabani pekee na kwa kutoa sala zako za toba? Kwa kweli imani ya jinsi hiyo ndiyo imani ya kishirikina. Aina hii ya imani ina maanisha kuwa kwa kiasi fulani tunakubali kumwamini Yesu kuwa ni Mwokozi wetu, na kwa kiwango kingine hatuiweki imani yetu katika injili ya maji na Roho iliyotolewa na Mungu. Injili nyingine inahusisha kumwamini Yesu kutokana na mawazo yetu binafsi yaliyojaa shukrani, huku tukiamini kuwa kwa kuwa aliimwaga damu yake ya thamani pale Msalabani kwa ajili yetu, basi dhambi zote tunazozifanya hapo baadaye zitaweza kuoshwa kwa jitihada zetu kwa kupitia sala zetu za toba. Kwa maneno mengine, imani za jinsi hiyo ni imani zilizoundwa na mwanadamu. “Yesu nimeamua kukuchukulia wewe kuwa ni Mwokozi wangu.” Kwa kuwa watu wanamwamini Yesu kwa namna hii ndio maana dhambi inashindwa kuondolewa kikamilifu katika mioyo yao. Inawezekanaje dhambi zao zikaondolewa mbali eti kwa sababu tu wanamkiri Yesu pasipo hata kufahamu namna ambavyo dhambi zao zilipitishwa kwenda kwa Yesu kwa kupitia ubatizo wake?

Katika Warumi 6 imani ya Paulo pia inaelezewa hapo vizuri. Katika Warumi 6:3-4 imeandikwa hivi, *“Hamfahamu ya kuwa sisi sote tuliobatizwa katika Kristo Yesu tulibatizwa katika mauti yake? Basi tulizikwa pamoja naye kwa njia ya ubatizo katika mauti yake, kusudi kama Kristo alivyofufuka katika wafu kwa njia ya utukufu wa Baba, vivyo hivyo na sisi tuenende katika upya wa uzima.”*

Mtume Paulo aliuliza hivi, *“Hamfahamu ya kuwa sisi sote tuliobatizwa katika Kristo Yesu tulibatizwa katika mauti yake?”* Paulo alisema kuwa sisi tulizikwa pamoja na Yesu kwa kupitia ubatizo wake hadi kwenye kifo chake. Yesu Kristo

alikuja hapa duniani, akazichukua dhambi zetu katika mwili wake kwa kubatizwa na Yohana, kisha akasulubiwa hadi kifo kwa ajili yetu. Kisha Yesu akafufuka toka kwa wafu. Paulo alikuwa na imani kuwa Yesu alikuwa ametuokoa wewe na mimi toka katika dhambi zetu zote.

Yesu Kristo aliye Mwanakondoo wa Mungu alikuja hapa duniani kama kipatanisho kwa wanadamu wote kwa mujibu wa utaratibu wa sadaka ya kuteketezwa wa Agano la Kale. Yesu amewaokoa wenye dhambi toka katika maovu yao kwa kuzichukua katika mwili wake dhambi za watu wake kwa kupitia ubatizo ambao aliupokea toka kwa Yohana, na kwa kuimwaga damu yake Msalabani. Haya matendo yote ya haki yanawiana kabisa na utaratibu wa sadaka ya dhambi katika Agano la Kale. Akiwa kama Mwanakondoo wa Mungu, Bwana wetu aliibeba dhambi ya ulimwengu kwa kubatizwa na Yohana Mbatizaji. Tunapoangalia Mathayo 3:13 na kuendelea tunaona jinsi Yesu alivyobatizwa na Yohana Mbatizaji na jinsi alivyozichukua dhambi za mwanadamu mara moja na kwa wote. Kwa maneno mengine, ni baada ya Yesu kubatizwa na Yohana ndipo aliweza kusulubiwa na kuimwaga damu yake Msalabani na kisha kufufuka toka kwa wafu, na hivi ndivyo Yesu alivyoweza kutuokoa toka katika dhambi zetu zote (Mathayo 3:13-17; Yohana 1:29; Yohana 19:30).

Sasa tunaihubiri injili ya maji na Roho ulimwenguni kote, hata Paulo pia aliithubiri injili hii hii. Injili hii ya maji na Roho iliyohubiriwa na Paulo ni injili ile ile ambayo tunaihubiri hivi sasa. Hivyo, ikiwa mtu haiamini injili ya maji na Roho na kwa sababu hiyo haihubiri injili hiyo, basi ni hakika kuwa mtu huyo atalaaniwa na Mungu.

Makanisa duniani kote yanakaribia kufunga milango yao kwa kuwa waumini wao hawaiamini injili ya maji na Roho. Kwa kuwa Wakristo siku hizi wanaiamini damu ya Msalaba na

wanajaribu kuziosha dhambi zao kwa kupitia sala zao za toba, ni hakika kuwa dhambi zao haziwezi kutoweka, na ikiwa dhambi zao zimeshindwa kutoshwa mbali, ni nani basi anayeweza kuendelea kumwamini Mungu? Ndio maana karibu kila kanisa halina uchaguzi mwingine zaidi ya kuufunga mlango wa wokovu.

Kimsingi, Wakristo wote duniani kote wanaamini kuwa wamepokea ondoleo la dhambi zao hata ikiwa wanaiamini damu pekee yenye thamani ya Msalabani. Lakini watu hao wanakufa kiroho, kwa kuwa wanazidi kuzitegemea sala zao za toba katika hali ya utupu. Hebu waangalie Wakristo waliokuzunguka wanaoimba nyimbo za sifa hali wakiwa wamejawa na hisia. Hawana namna nyingine ya kufanya ndio maana wanasifu kwa namna hiyo kwa kuwa hawafahamu na wala hawaamini jinsi Yesu Kristo alivyowaokoa kwa kupitia injili ya maji na Roho. Kwa upande mwingine, walel waliozaliwa tena upya na ambayo wanaiamini injili ya maji na Roho, kwa wao sifa ni kitu cha kawaida na wala hakitokani na hisia, hii ni kwa sababu wao wanatoa shukrani toka katika vina vya mioyo yao kutokana na neema ya wokovu ambayo bwana amewapatia.

Mtume Paulo alisema kuwa yeyote anayeihubiri injili nyingine mbali na injili ambayo aliihubiri na alaaniwe (Wagalatia 1:8). Paulo aliuliza hivi, *“Maana, sasa je! Ni wanadamu ninaowashawishi, au Mungu? Au nataka kuwapendeza wanadamu?”* Kisha akaendelea kusema, *“Kama ningekuwa hata sasa nawapendeza wanadamu, singekuwa mtumwa wa Kristo”* (Wagalatia 1:10). Kwa kuwa Yesu Kristo alikuja hapa duniani, alibatizwa, akafa Msalabani, akafufuka tena toka kwa wafu, na kwa sababu hiyo ametuokoa toka katika dhambi zetu zote, Mtume Paulo aliuamini Ukweli huu na alihubiri hivyo. Kama Paulo angelitaka kuwapendeza

wanadamu, basi ni hakika kuwa angelihubiri damu ya Msalaba pekee, lakini kwa kuwa alikuwa ni mtumwa wa Kristo, Paulo aliihubiri injili ya maji na Roho. Mtume Paulo hakuwa mtumwa wa wanadamu.

Katika Wagalatia 1:11-12 Paulo aliendelea kusema hivi, *“Kwa maana, ndugu zangu, injili hiyo niliyowahubiri, nawajulisha ya kuwa siyo ya namna ya kibinadamu. Kwa kuwa sikuipokea kwa mwanadamu wala sikufundishwa na mwanadamu, bali kwa ufunuo wa Yesu Kristo.”*

Ni aina gani ya injili ambayo Mtume Paulo aliamini na kuihubiri kwa watu? Katika maandiko haya anasema, “injili ambayo ilihubiriwa na mimi [Paulo]” ina maanisha ni injili ya maji na Roho. Paulo alieleza kuwa hakufundishwa injili hiyo a wanadamu, na wala hakuipokea toka kwa wanadamu, bali ilitoka katika ufunuo wa Yesu Kristo. Paulo alisema kuwa Mungu Baba alimwonyesha Ukweli wa injili ya maji na Roho kwa kupitia Yesu. Paulo aliamini kwa moyo wake kwia Yesu Kristo alimwokoia toka katika dhambi zake zote kwa kupitia maji na Roho.

Sisi pia tunaamini injili ya maji na Roho. Ndio maana tunaihubiri injili hii ya maji na Roho kwa Wakristo wote wanaoutafuta ukweli waliotawanyika ulimwenguni kote. Kwa kweli ninapoiangalia imani ya Wakristo walio wengi hapa ulimwenguni huwa ninajisikia kuchanganyikiwa. Maana kwa bahati mbaya hawafahamu ya kuwa wao ni vipofu kiroho, hii ni kwa sababu wamekuwa wakiamini hivyo kimakosa kwa muda mrefu sana.

Katika kipindi cha Kanisa la Mwanzo, Mitume waliihubiri injili ya maji na Roho. Petro alisema hivi, *“Mfano wa mambo hayo ni ubatizo, unaowaokoa ninyi pia siku hizi; (siyo kuwekea mbali uchafu wa mwili, bali jibu la dhamiri safi mbele za Mungu), kwa kufufuka kwake Yesu Kristo” (1 Petro 3:21).* Sisi

sote tuna imani kama aliyokuwa nayo Mtume Petro. Sisi sote tunaweza kuokolewa toka katika dhambi zetu kwa kuwa Yesu alizichukua katika mwili wake dhambi zote za mwanadamu ikiwemo dhambi zako mara moja na kwa wote kwa kubatizwa na Yohana, kwa kufa Msalabani, na kwa kufufuka tena toka kwa wafu.

Lakini sehemu kubwa wa Wakristo ulimwenguni kote wanaamini nini? Wanaiamini damu pekee ya thamani ya Yesu pale Msalabani. Kwa kweli damu ambayo Yesu aliimwaga pale Msalabani ni thamani sana kwa ajili ya wokovu wetu. Lakini itakuwa haina manufaa kabisa ikiwa tutashindwa kuuamini ubatizo ambao Yesu aliupokea toka kwa Yohana Mbatizaji. Dhambi zetu ziliweza kupitishwa kwenda kwa Yesu na kisha kuondolewa kwa kuwa Yesu alikuwa amebatizwa na ameimwaga damu yake Msalabani, pamoja na ukweli huo, bado kuna Wakristo wengi ambao hawaufahamu ubatizo huu wa Yesu na kwa sababu hiyo hawawezi kuoshwa dhambi zao zote.

Ili upatanisho wa kisheria uweze kufanyika vizuri, mnyama wa sadaka ya kuteketezwa alipaswa kwanza kuwekewa mikono na wenye dhambi ili kuzipokea dhambi zao. Baada ya mnyama huyo wa sadaka kuzipokea dhambi za wenye dhambi ndipo alipouawa. Vivyo hivyo, Yesu Kristo alizipokea dhambi za kila tu kwa kubatizwa na Yohana na akaimwaga damu yake Msalabani na kufa, lakini kwa bahati mbaya Wakristo wengi hawaufahamu ukweli huu na wala hawauamini. Hivyo, hata sasa wanatakiwa kutambua kuwa Wakristo wa Kanisa la Mwanzo waliiamini na kuihubiri injili ya kweli ya maji na Roho.

Wakati Rumi ilipokuwa ikitawala sehemu yote ya ulimwengu wa magharibi, Konstantino aliyekuwa Mfalme wa Rumi aliitangaza Amri ya Milan ambayo iliufanya Wakristo kwua ni dini ya dola yake. Kuanzia wakati huo ndipo injili ya

maji na Roho ilipo potoshwa. Ukweli halisi wa wokovu ni injili ya maji na damu, lakini watu wa wakati huo walichagua kitu kimojawapo toka katika injili ya kweli. Kwa lugha nyingine, walianza kuuacha ubatizo wa Yesu katika injili zao, na kwa sababu hiyo waliishia kuamini injili nyingine. Hatimaye, Ukristo ambao wakati fulani ulikuwa na heshima kubwa kiasi cha kuonekana kuwa ni dini ya utawala wa Rumi, kwa sasa umekuwa hauna nguvu kabisa.

Sisi tunaamini na kuihubiri injili ya maji na Roho, ambayo ni injili ile ile iliyoaminiwa katika kipindi cha mitume. Kwa kupitia huduma yetu ya vitabu, kuna watu wengi sana ulimwenguni wakiwemo wanatheolojia na wachungaji ambao wanairudia sasa injili ya maji na Roho. Wale wanaoisoma theolojia kwa kina na kwa malengo maalumu mara nyingi hufikia hatua ya kukubaliana kuwa injili ya maji na Roo ndio Ukweli halisi.

Lakini wale wanaoyafahamu madhehebu yao tu ni wagumu sana kiasi cha kutopenda hata kuufahamu Ukweli wa injili ya maji na Roho. Wao wanaishikilia damu ya Msalaba pekee, kiasi cha kufikiria kuwa mafundisho yao ya kimadhehebu ni sawa na Neno la Mungu. Baadhi ya madhehebu yanadaikuwa mtu anaweza kupokea Roho Mtakatifu ikiwa atasali kwa unyenyekevu, huku akilitaja jina la Bwana. Je, haya si maisha ya kiimani yenye ujinga? Hali wakiwa wamenaswa kutokana na mawazo yao binafsi, Wakristo wengi wameishia kuwa na imani isiyo na hoja na ya kishirikina. Hiyo ni sawa na imani ya chura mkubwa katika bwawa dogo.

Injili ambayo Mtume Paulo aliamini na kuihubiri ilikuwa ni injili ya maji na Roho. Injili hii ya maji na Roho haikutoka kwa wanadamu na wala Paulo hakujifunza toka kwa wanadamu. Paulo alijifunza injili hii ya kweli toka kwa Mungu kwa kupitia ufunuo wa Yesu Kristo. Imani ya Paulo haikuwa

imani ya kidini kama ilivyo kwa Wakristo wa leo. Wewe umejifunza injili toka katika dhehebu gani? Injili yoyote ile ambayo ipo tofauti na injili ya maji na Roho ni injili potofu.

Mtume Paulo alikuwa ni mtalaam wa Agano la Kale. Hata kabla ya kukutana na Yesu, Mtume Paulo aliufahamu Ukweli huo wote, alifahamu kuwa Masihi atazichukua katika mwili wake na kuzitoweshea mbali dhambi zote za ulimwengu kwa kuwekewa mikono. Kosa alilolifanya Paulo ni kuwa alikuwa hafahamu ikiwa Yesu alikuwa ni Mwana wa Mungu. Ndio maana mara ya kwanza Paulo aliwatesa wafuasi wa Yesu. Kuna wakati Paulo alikwenda Dameski huku akiwa na wafuasi wake ili kuwaua wafuasi wa Yesu. Wakati huo Paulo alikuwa akiitwa Sauli. Alipokuwa akienda Dameski, Paulo alikutana na Yesu Kristo aliye hai.

Yesu alimtokea Paulo katika hali ya mwanga mkali kuliko hata ule mwanga wa jua, akasema, “Sauli, Sauli, kwa nini unaniudhi? Ni vigumu kwako kuupiga mateke mchokoo.”

Kisha Paulo akasema, “Wewe ni nani Bwana?”

Kisha Bwana akamwambia, “Mimi ni Yesu ambaye unaniudhi. Lakini inuka uende; maana nimekutokea kwa jukumu hili ili nikufanye uwe mtumishi na shahidi wa mambo haya ambayo umeyaona na mambo ambayo nitakufunulia.”

Yesu Kristo aliitoa nuru yake kali na akafanya sauti yake isikike, ingawa watu waliokuwa pamoja na Paulo hawakuona chochote kile, Yesu Kristo alimtokea Paulo kwa macho na masikio yake. Wakati Yesu Kristo alipomtokea Paulo, ule mwanga ulikuwa na nguvu sana kiasi kwamba macho yake yalipatwa na upofu, na hapo ndipo Paulo alipotambua na kukiri kuwa “Nilifanya kosa.” “Kwa hiyo huyu Yesu ambaye watu hawa wanamwamini ni Masihi ajaye, ambaye alikuwa ametabiriwa katika Agano la Kale!” Kisha Paulo alifikia hatua ya kutambua kuwa Yesu alikuwa ni Mwana wa Mungu na Mwokozi ambaye

alizichukua dhambi za mwanadamu kwa kubatizwa na kisha akazitoweshea mbali hizo dhambi kwa kufa kwake Msalabani na kwa kufufuka kwake toka kwa wafu. “Masihi amekwisha kuja. Ameniokoa kwa kupitia ubatizo wake na damu yake Msalabani!” Kwa kuwa Paulo alitambua hivyo ndio maana aliweza kuwa mfuasi wa Yesu Kristo na kati ya Mitume.

Kwa hiyo, injili iliyohubiriwa na Mtume Paulo ni injili ya maji na Roho, injili inayotuwezesha kufa na kuishi pamoja na Kristo. Sisi tuna imani inayotuwezesha kubatizwa katika Yesu Kristo, kufa pamoja naye, na kisha kufufuliwa pamoja naye. Ni lazima utambue kuwa injili ambayo imetupatia maisha mapya ni injili ya maji na Roho, na kwamba injili hii ndio injili ambayo Mtume Paulo aliihubiri katika kipindi cha mitume.

Injili ya maji na Roho inaweza kuonekana kuwa ni mpya kwa upande wako, bali ni injili halisi ambayo imekwisha dhihirishwa katika Biblia. Injili hiyo ni tofauti na injili inayoiamini damu ya Yesu peke yake. Biblia inaikubali injili ya maji na Roho tu kuwa ndiyo injili ya kweli. Injili hii ya kweli kwa sasa inashuhudiwa kutoka kinywa kimoja hadi kingine ulimwenguni kote. Kwa upande mwingine, injili ambayo inashuhudia Msalaba wa Yesu peke yake inapata uungwaji mkono mdogo sana wa wokovu katika Biblia. Hata kama tutatafuta kwa juhudi sana katika Biblia, ukweli ni kuwa hakuna ushahidi unaoonyesha kuwa Yesu alizichukua dhambi zetu akiwa pale Msalabani; Biblia inashuhudia kuwa dhambi zetu zilipitishwa kwenda wka Yesu Kristo wakati alipobatizwa na Yohana Mbatizaji (Mathayo 3:13-17).

Je, wewe utamwamini Yesu Kristo kana kwamba unazitenda dini za ulimwenguni? Au je utakolewa toka katika dhambi zako kwa kuamini injili ya maji na Roho iliyotolewa na Yesu Kristo na kisha kuishi maisha yako ya kiimani kwa kuamini injili hii? Je, si unapaswa kuyaamini yale ambayo

Kristo ameyafanya kwa ajili yako? Kila mtu katika ulimwengu huu ni lazima aiamini injili ya maji na Roho. Ni lazima utambue kuwa injili ya maji na Roho ni Ukweli na kwamba unapaswa kuuamini ukweli huo kama ulivyo.

Hivi karibuni tulitafsiri na kukichapisha kitabu kilichoitwa *Imani ya Ukiri wa Mitume*. Kwa kweli sisi tunachapisha vitabu kama hivi ili kuwasaidia watu ulimwenguni kote waweze kufahamu namna tunavyomwamni Yesu Kristo. Ninaamini kuwa vitabu hivi vitatenda kazi kubwa sana ya Mungu ulimwenguni kote kwa kuwa imani yetu katika injili ya kweli ipo katika vitabu hivi. Katika kitabu hiki, tunaishuhudia imani yetu kama ilivyo, tunashuhudia jinsi tunavyomwamini Mwana wa Mungu, na kwamba tunamwamini Yeye kuwa ni nani, na jinsi alivyozitoweshea mbali dhambi zetu. Ikiwa watu watakisoma kitabu kimoja katika mfululizo wa vitabu vyetu vya Kikristo, basi ni hakika kuwa watatambua kile tunachokiamini na namna tunavyoamini.

Siku hizi, Wakristo wengi wanaoikiri imani yao na kudai kuwa wamepokea ondoleo la dhambi kwa kuamini damu ya Yesu pekee pale Msalabani, ni hakika kuwa bado wanaishi wakiwa ni wenye dhambi kila siku. Lakini wale waliozaliwa tena upya katika injili ya maji na Roho ni hakika kuwa hawana dhambi. Hao waliozaliwa tena upya ni wenye haki kila siku na milele. Ingawa tuna mapungufu, tunaishi maisha yetu kila siku kama si watu wafu, bali kama watu tuliozaliwa tena upya katika Kristo. Kwa kuwa Yesu Kristo ametupatia maisha mapya, basi sisi kama wanadamu tulio na imani ya uzima wa milele tunaweza kumfuata Bwana, na tunaweza kuufurahia utukufu wa Mungu si katika ulimwengu huu tu bali pia katika ulimwengu ujao. Mungu ametupatia wewe na mimi imani ya jinsi hiyo.

Ninamshukuru Mungu kwa kunipatia injili ya maji na Roho. ☒

Je, Sisi Tumekufa na Kufufuka Pamoja na Yesu Kwa Imani Katika Mwana wa Mungu?

< Wagalatia 2:20 >

“Nimesulibiwa pamoja na Kristo; lakini ni hai; wala si mimi tena, bali Kristo yu hai ndani yangu; na uhai nilio nao sasa katika mwili, ninao katika imani ya Mwana wa Mungu, ambaye alinipenda, akajitoa nafsi yake kwa ajili yangu.”

Je, Imani Yako Ni Ile Iliyosulubiwa na Kisha Kufufuliwa Pamoja na Yesu Kristo?

Kifungu cha leo cha Maandiko kinatoka katika Wagalatia 2:20, ni kifungu ambacho tumeshakisoma sana na kinafahamika sana kwetu. Kifungu kinasema, *“Nimesulibiwa pamoja na Kristo; lakini ni hai; wala si mimi tena, bali Kristo yu hai ndani yangu; na uhai nilio nao sasa katika mwili, ninao katika imani ya Mwana wa Mungu, ambaye alinipenda, akajitoa nafsi yake kwa ajili yangu.”*

Biblia inasema imeamriwa wanadamu kufa mara moja, na baada ya kifo ni hukumu. Hivyo, wale ambao hawaifahamu wala hawaiamini injili ya maji na Roho wanazaliwa hapa

duniani mara moja, na wanakufa mara mbili, maana wanakufa kiroho mara moja, na wanakufa kimwili vile vile. Hata hivyo, sisi tunapokea ondoleo la dhambi zetu kwa kuamini katika injili ya maji na Roho mbele za Mungu, baada ya hapo tunakufa mara moja na baada ya hapo tunafufuliwa tena kwa kuamini injili hii. Hivi ndivyo tunavyozaliwa tena upya. Waamini wa injili ya maji na Roho wamesulubiwa pamoja na Kristo, kisha wamefufuliwa tena na wamepokea maisha mapya. Hivyo, kwa wale ambao wameondolewa dhambi zao kwa kuamini injili ya maji na Roho, ni hakika kuwa nafsi zao za kale zimekufa pamoja na Kristo na nafsi zao zimefanywa upya na wamefufuliwa pamoja na Kristo.

Kwa hiyo, kadri tunavyoendelea kuamini injili ya maji na Roho katika nafsi zetu ndivyo tunavyozidi kuishi si katika nafsi zetu za kale bali kama viumbe vipya. Ili tuweze kuwa na imani ya kweli mbele za Mungu ni lazima tuamini kuwa Yesu alizichukua dhambi za ulimwengu kwa kubatizwa na Yohana Mbatizaji, akaimwaga damu yake Msalabani, na kwamba akafufuka tena toka kwa wafu. Ni pale tu tutakapoiweka imani yetu katika Yesu Kristo na kisha kuamini injili ya maji na Roho ndipo tunapoweza kuwa watu waliozaliwa tena upya ambao wanaishi pamoja na Kristo. Tunamshukuru sana Bwana wetu maana waamini wa injili ya maji na Roho wamekufa pamoja na Yesu Kristo na wamefufuliwa pamoja naye, na sasa wanaishi pamoja na Kristo milele. Hilo ndilo fumbo la kuzaliwa upya.

Kutokana na fumbo hili, hawa waliozaliwa tena upya wanamtumikia nani? Kwa hakika waliozaliwa tena upya wanapaswa kumtumikia Bwana kwa kuihubiri injili hii! Lakini hali yao ya kimaisha ikoje kiuhalisia? Je, si ni kana kwamba wanaitumikia miili yao wenyewe pamoja na kuwa wamekufa pamoja na Yesu Kristo? Kuna nyakati ambapo sisi ambao tumezaliwa tena upya huwa tunaitumikia miili yetu, na kuna

nyakati ambapo huwa tunamtumikia Mungu na injili yake kwa kumtii Roho Mtakatifu.

Sisi tuliozaliwa tena upya tunaendelea na maisha yetu ya kila siku hapa ulimwenguni, wakati mwingine huwa tunataabika namna ya kuchagua kati ya kujitumikia sisi wenyewe au kumtumikia Mungu. Hiyo ni kwa sababu wakati mwingine tunashindwa kutambua kikamilifu kuwa sisi tumekwisha ufa ulimwengu huu pamoja na Yesu Kristo. Tunapofahamu kwa usahihi kuwa nafsi zetu za kale zimekwisha kufa pamoja na Yesu Kristo, basi hapo ni hakika kuwa hatutaweza kuhangaika katika ulimwengu huu. Sababu inayotufanya tuwe tunayumba kati ya Ufalme wa Mungu na sisi wenyewe ni kwa kuwa tuna mashaka kuhusu maisha yetu kiasi cha kushindwa kuieneza injili, na kwa kuwa hatujaungana kikamilifu pamoja na Kristo ndio maana tunaugulia sana hapa ulimwenguni. Wakristo ambao wamekwisha ungana na Kristo kwa kupitia ubatizo wake, kifo chake, na ufufuo wake hawana sababu yoyote ile ya kuyumba yumba kati ya ulimwengu na Ufalme wa Mungu.

Sisi waamini wa injili ya maji na Roho hatuwezi kuwatumikia mabwana wawili kwa wakati mmoja, na hivyo ndivyo Bwana alivyotueleza. Hivyo, ni lazima tuchague moja na kuliacha jingine kati ya kujitumikia sisi wenyewe au kuitumikia injili ya Bwana. Ni hapo tu ndipo tunapoweza kumtumikia kwa uaminifu bwana mmoja atakayekuwa amebakia. Lakini pia si rahisi kumwacha bwana mmoja kati ya hao mabwana wawili. Wakati sisi Wakristo tunapokuwa na tamaa ya kutaka kuwatumikia mabwana wawili kwa wakati mmoja, basi hatimaye huwa tunaangukia kwenye mkanganyiko. Ukweli ni kuwa kwa kuwa sisi Wakristo huwa tunajaribu kuyakamilisha majukumu yetu kama wanadamu, basi kuna wakati huwa tunaona ni vigumu sana kuendelea na maisha yetu ya kiimani.

Bwana wa Waamini wa Injili ya Maji na Roho ni Yesu Kristo

Ni Wakristo wachache sana walio na ufahamu sahihi kuhusiana na Ukweli kuwa sisi wenyewe tumesha sulubiwa na kufa pamoja na Kristo na kwamba tumefufuliwa pia pamoja na Kristo. Kama tungelifahamu hivi, basi ni hakika kuwa tusingelifikiria kuwa waaminifu kwenye majukumu yetu binafsi ya kimwili kama wanadamu. Na tungelifahamu vizuri kuwa sisi hatuna lolote lile la msingi la kujihusisha na ulimwengu huu, bali tungelifanya kila kitu kwa ajili ya Bwana. Ikiwa sisi wenyewe tunaliamini Neno la injili ya maji na Roho, basi ni hakika kuwa sisi tumeshakufa katika Yesu Kristo. Ikiwa kweli tunatambua kuwa tulisulubiwa pamoja na Yesu Kristo wakati alipobatizwa na kusulubiwa, tuna nini tena cha kushughulika na ulimwengu huu? Ikiwa tunauamini ukweli huu, basi ni hakika kuwa nafsi zetu za kale hazipo katika ulimwengu huu, na badala yake Yesu Kristo anaishi ndani yetu. Uwepo na maisha yetu halisi sisi Wakristo upo katika Yesu Kristo tu.

Yesu alibatizwa na Yohana Mbatizaji, akafa Msalabani kwa niaba yetu, kisha akafufuka tena toka kwa wafu kwa ajili ya dhambi zetu. Kwa kuwa wale wote wanaouamini Ukweli huu wa wokovu walikwisha kufa pamoja na Yesu Kristo, basi wanatambua kuwa ndani yao hakuna nafsi zao za kale bali ni Kristo tu ndiye anayeishi ndani yao. Yesu Kristo amekuja katika mioyo yetu kwa kupitia injili ya maji na Roho, Yesu yupo pamoja nasi, anatuongoza, yeye ni Bwana wetu, na ametuwezesha kumtumikia Bwana maisha yetu yote. Yesu Kristo ameturuhusu kumtumikia Yeye kama Bwana wetu. Kwa maneno mengine, kwa kuwa tunaamini injili ya maji na Roho basi kwa sasa hatuitumikii dhambi tena bali tunautumikia

upendo wa Mungu. Ninyi nani mtafikia hatua ya kuweza kuutambua ukweli huu kwa imani katika injili ya maji na Roho. Kwa sisi Wakristo, nafsi zetu za kale hazipo tena bali tunaishi tukiwa na nafsi mpya tu. Hii inatokana na ukweli kuwa si kwa juhudi zetu bali ni kwa kuwa Bwana anaishi ndani yetu.

Je, unaamini kuwa ulisulubiwa pamoja na Kristo? Je, unaufahamu na kuuamini Ukweli kuwa Yesu amekwisha tuokoa kikamilifu tok katika dhambi za ulimwengu? Kwa kupitia Yesu Kristo tumefikia hatua ya kuufahamu Ukweli wa injili ya maji na Roho na kuuamini, na kwa sababu hiyo tumepokea ondoleo la dhambi zetu. Ili tuweze kukombolewa toka katika dhambi zetu ni lazima tuamini katika injili ya maji na Roho. Kuanzia sasa na kuendelea sisi si mabwana kwa nafsi zetu. Ni hakika kuwa kwa wale wote ambao wamepokea ondoleo la dhambi zao kwa kuamini injili ya maji na Roho, Yesu ndiye Bwana wao. Sisi sote tunapaswa kuishi kwa haki kama watumishi wa Yesu Kristo. Kwa kuwa sisi wenyewe tumekwisha kufa na kwamba kwa sasa Kristo anaishi ndani yetu, basi tumetambua kuwa tunapaswa kuyaishi maisha yetu yaliyobarikiwa kama watumishi wa Yesu Kristo. Kwa kweli ni muhimu na ni vizuri ikiwa tutayaishi maisha yetu huku tukimtumikia Kristo. Kwa kuwa tumefikia hatua ya kutambua kuwa yeye ni Mfalme wetu, basi sisi tunampendeza Mungu kwa kuishi maisha yetu kama watumishi wa Yesu. Ni lazima tuukubali ukweli huu katika mioyo yetu.

Tunapojiuliza sisi wenyewe, “Je, sisi ni wafalme wetu wenyewe, au Yesu Kristo ndiye Mfalme wetu?” basi jibu ni kuwa Yesu Kristo ndiye Bwana na Mfalme wetu. Jina Kristo lina maanisha “Mfalme, Kuhani, na Nabii,” na ikiwa mtu anaamini hivi, basi ni hakika kuwa mtu huyo anaamini kuwa Bwana ni Mfalme wetu. Sasa sisi tujitambulisheje mbele za Bwana? Sisi ni wanafunzi wa Yesu ambao tumepokea ondoleo

la dhambi zetu kwa kuiamini injili ya maji na Roho.

Kwa kupitia imani yetu tuna haki yote ya kujivuna tukiwa ndani ya Yesu Kristo. Hii ni injili ya maji na Roho. Kama isingelikuwa Yesu Kristo, basi ni hakika kungelikuwa hakuna kitu chochote kile cha kujivunia. Sisi ni wanafunzi wake ambao ni mali ya Yesu Kristo, aliye Mwana wa Mungu. Ninawaelezea hivyo kuwa Biblia inasema hivi, *“Nimesulibiwa pamoja na Kristo; lakini ni hai; wala si mimi tena, bali Kristo yu hai ndani yangu; na uhai nilio nao sasa katika mwili, ninao katika imani ya Mwana wa Mungu, ambaye alinipenda, akajitoa nafsi yake kwa ajili yangu”* (Wagalatia 2:20). Kifungu hiki kimejaa Neno linalozunguzia juu ya kufa kwetu katika Yesu Kristo na juu ya kufufuka kwetu katika Yesu Kristo. Kwa kuwa tumekwisha sulubiwa na kufa pamoja na Yesu Kristo basi hapo ndipo nafsi zetu za kale zilipokufa kwa sababu ya kuiamini injili ya maji na Roho, basi kama ni hivyo maisha tunayoishi sasa si maisha yetu binafsi basi Yesu Kristo ndiye anayeishi ndani yetu.

Je, unaiamini injili ya maji na Roho? Ikiwa ni hivyo, swali linalouliza kuwa tunapaswa kuishi kwa ajili ya nani unaweza kulijibu vizuri kabisa. Ni lazima tuyaishi maisha yetu tukimtumikia Bwana na Mfalme wetu, na ni lazima tuwe mawakili wema kwa imani. Hii ni kwa sababu kama kifungu cha leo cha Maandiko kinavyosema, maisha yetu tunayoishi sasa katika mwili tunayaishi kwa imani katika Mwana wa Mungu, ambaye alitupenda na akajitoa kwa ajili yetu. Tunapaswa kutambua kuwa namna pekee ya kuweza kuishi maisha safi ya Kikristo—ni kuyaishia maisha yetu yote yaliyosalia kwa Bwana kama watumishi wa haki.

Katika Maisha Yenu Mnafahamu Kuwa Ninyi ni Watumishi wa Yesu Kristo?

Ni jambo la furaha kwamba tumefanyika kuwa watumishi wa Yesu Kristo anayeishi ndani yetu. Kwa kweli tuna furaha sana kuwa watu wa Yesu Kristo ambaye ametukomboza toka katika maangamizi, na tuna furaha kwa kuwa tunaweza kumtii Mungu kuliko kuutii Ulimwengu huu. Wale waliozaliwa tena upya kwa kuamini katika injili ya maji na Roho wataishi milele kama watumishi wanaomtumikia Yesu aliye Bwana wao.

Kwa wale ambao wamepokea ondoleo la dhambi, basi Bwana wa nafsi zao za ndani ni Yesu. Hivyo tunapaswa kutambua kikamilifu kuwa Bwana ni nani. Ndugu waamini wenzangu, ni nani aliye ndani ya mioyo yetu? Roho Mtakatifu ndiye aliye katika mioyo yetu. Nani ni Bwana wa wale waliopokea ondoleo la dhambi zao? Ni Yesu Kristo. Kwa hiyo, ni lazima tuyaishi maisha yetu kwa kuzingatia kuwa sisi ni akina nani na ni muhimu tuyatende majukumu yanayotupasa. Kwa hakika Bwana wetu ni Yesu Kristo, na huyu Bwana anatuongoza sisi kama Mfalme wetu, kwa kuwa yeye anaishi katika moyo wa kila Mkristo. Ninyi na mimi ni lazima mumfahamu Yesu Kristo, ambaye ni Bwana wa mioyo yetu, na ni lazima tuyaishi maisha yetu ya kiimani hali tukitambua kuwa sisi ni watumishi tunaoishi kwa ajili ya huyu Bwana. Fundisho hili si kama mafundisho ya kidini, bali ni imani sahihi katika injili ya maji na Roho.

Wakati Mtume Paulo aliposema, *“Nimesulibiwa pamoja na Kristo; lakini ni hai; wala si mimi tena, bali Kristo yu hai ndani yangu” (Wagalatia 2:20)*, alikuwa akikiri imani yake kuwa yeye naye alisulubiwa. Vipi kuhusu wewe? Je, ulikufa pamoja na Yesu Kristo au la? Kwa kweli ulikufa pamoja naye. Bila shaka unafahamu vizuri kuwa kifo hicho sio mwisho wa

uwepo wetu. Hii ina maanisha kuwa tulifikia hatua ya kuanza kuishi maisha mapya kutokana na Ukweli wa Yesu. Bwana wetu alizichukua dhambi zetu kwa kubatizwa, akafa Msalabani kwa niaba yetu, kisha akafufuka tena toka kwa wafu. Hivyo, sisi tumesulubiwa pamoja na Yesu Kristo, na pia tumefufuliwa pamoja na Kristo. Kwa kuwa tupo ndani ya Bwana, na kwa kuwa Bwana yupo ndani yetu, basi maisha tunayoyaishi sasa tunayaishi kwa imani katika Yesu Kristo.

Wewe na mimi ni mali ya Yesu Kristo. Yeye ni Bwana wetu, na sisi ni watumishi wake. Mara tulipozaliwa tena upya kwa kuamini injili ya maji na Roho, basi hapo ndipo tulipoamriwa kuishi maisha yetu yote yaliyosalia huku tukimtumikia Bwana wetu tukiwa watumishi wake. Kwa kuwa haya ndio maisha ambayo sisi kama Wakristo tunapaswa kuyaishi, basi ni muhimu sana kuazimia kuishi maisha yetu yote yaliyosalia kama watumishi wa Kristo.

Ndugu waamini wenzangu, tunapoiamini injili ya maji na Roho na kisha kupokea ondoleo la dhambi zetu zote, basi ni hakika kuwa hatuwezi kubakia kama mabwana wa nafsi zetu. Ikiwa kuna mtu yeyote ambaye bado amebakia kama bwana wa nafsi yake mwenyewe hata baada ya kuwa amezaliwa tena upya, basi hali hiyo itamaanisha kuwa mtu huyo hajakitoa kiti chake cha enzi katika moyo wake kwa Yesu Kristo. Watu wa jinsi hiyo hata kama wamepokea ondoleo la dhambi zao si watumishi wa Kristo. Pia watu wa jinsi hiyo ni hakika kuwa bado hawajatambua kuwa wamekufa pamoja na Yesu Kristo. Sisi si mabwana wa nafsi zetu kamwe. Ninyi na mimi si mabwana wa nafsi zetu. Hapo kabla sisi tulikuwa ni mabwana wa nafsi zetu. Lakini baada ya kupokea ondoleo la dhambi zetu kwa kuamini katika injili ya maji na Roho, hapo ndipo tulipofanyika kuwa watumishi wa Yesu Kristo.

Wakati tulipokuwa tukienenda kwa namna ya ulimwengu

huu, na kwa kumfuata mfalme wa uwezo wa anga (Waefeso 2:2), basi hapo ndipo tulipokuwa mabwana wa nafsi zetu. Ni hakika kuwa wakati huo tulikuwa tumefungwa tayari kwa kulaaniwa kwa sababu ya dhambi zetu. Hata hivyo, Bwana wetu alizichukua dhambi zetu mara moja na kwa wote katika mwili wake kwa kubatizwa katika Mto Yordani, kisha akafa Msalabani kwa ajili ya dhambi zetu, na alifanya hivyo ili aweze kutuokoa. Yesu ametuokoa na kutufanya kuwa watumishi wake, na kwa sababu hiyo Yesu Kristo ameturuhusu kuishi kama watumishi wake wa kweli na kama watu wa Ufalme wa Mungu.

Kabla hatujazaliwa tena upya tulikuwa tukiishi kama mabwana wa nafsi zetu, lakini baada ya kuzaliwa tena upya hatuwezi kamwe kuwa mabwana wa nafsi zetu kwa kuwa tumeshakufa pamoja na Yesu Kristo. Kwa sasa Bwana wetu ni Yesu Kristo. Nafsi zetu na mabwana wetu wa kale walikufa pamoja na Yesu Kristo. Kwa kuwa sasa tumefufuliwa tena upya kwa kumwamini Yesu Kristo, ambaye ni Bwana wetu mpya ambaye ametuokoa toka katika dhambi zetu zote, basi ndio maana tumeweza kuyaishi maisha yetu kwa ajili ya injili ya haki ya Mungu. Kuanzia sasa na kuendelea, wale ambao wanayaishi maisha yao kwa uaminifu kama watumishi wa Yesu Kristo basi hao ndio wanaoyaishi maisha yao ya kiimani kwa usahihi mbele za Mungu.

Kwa kuwa nimepokea ondoleo la dhambi zangu kwa kupitia imani yangu katika injili ya maji na Roho, ndio maana ninaweza kuuzungumzia ukweli huu wa kuungana na Kristo kwa imani. Kama tungelikuwa hatujaiamini injili ya maji na Roho, ni hakika kuwa tusingeliweza kufa pamoja na Yesu Kristo na wala tusingeliweza kufufuliwa pamoja naye. Hata hivyo, kutokana na Ukweli kuwa Yesu Kristo ametuokoa kwa kupitia maji na Roho ndio maana iliwezekana kwetu sisi kufa

na kisha kufufuliwa pamoja na Kristo kwa imani.

Tunaweza kuona kuwa ni muhimu sana kwetu sisi kuitumikia injili ya maji na Roho ili tuweze kuishi maisha yanayompendeza Bwana. Ikiwa tutaitii amri ya Mungu basi tutafikia hatua ya kukubali katika mioyo yetu kuwa tulipata bahati ya kuiamini injili ya maji na Roho na kisha kuishi maisha yetu yote kama watumishi wa Mungu. Kuanzia wakati ule mimi na wewe tulipookolewa, basi hapo ndipo Mungu alipodhamiria tuishi maisha ya kuitumikia haki ya Mungu. Sasa sisi Wakristo ni lazima tuishi maisha yaliyotukuzwa na yaliyobarikiwa huku tukiitumikia injili ya maji na Roho. Kwa kweli tuwe huru kujipongeza kutokana na ukweli kuwa wewe na mimi tumepata bahati ya kuishi maisha ya aina hii.

Ndugu waamini wenzangu, je, Yesu Kristo amefanyika kuwa Bwana wako? Je, mnataka kweli kuwa watumishi wake? Kwa lugha nyepesi maisha ya Kikristo ni maisha ya kuishi kama mtumishi wa Kristo. Kile ambacho Mtume Paulo anakisema hapa ni kuwa Yesu Kristo ni Bwana wetu. Hivi ndivyo Mungu Baba anavyotundisha. Pia Roho Mtakatifu aliye katika mioyo yetu anatueleza hivyo. Yesu ni Bwana wa mioyo yetu: “Ninyi ni watumishi wa Bwana. Ninyi mmeshakufa pamoja na Yesu Kristo, na sasa mnaishi kama watumishi wake. Kwa kuwa Bwana wenu ni mtukufu, basi ikiwa mtamtumikia huyo Bwana mtukufu, ninyi nanyi mtatukuzwa. Ninyi si watumishi tena wa ulimwengu huu. Ninyi ni watumishi wa Bwana.” Hivi ndivyo Roho Mtakatifu aliye katika mioyo yetu anavyotueleza. Wakati mnapoendelea kuyaisha maisha yenu ya kiimani ni lazima muusikilize ujumbe huo.

Je, mnasikiliza kile ambacho Mungu anawaeleza? Ninyi na mimi ni lazima tuifahamu maana ya Neno la Mungu na kisha tuyafuate mapenzi ya Mungu. Kwa kweli sisi hatuwezi kuwa mabwana wa nafsi zetu. Sisi tulikwisha kufa pamoja na

Yesu Kristo miaka 2000 iliyopita. Sisi ambao tulikufa pamoja na Yesu Kristo na kisha tukafufuliwa pamoja naye hatuwezi kamwe kuwa mabwana wa nafsi zetu, bali sisi ni watumishi wa Kristo. Sisi si watumishi wa ulimwengu, bali tumefanyika kuwa watumishi wa Kristo ambaye ni Mungu wetu aliyetukuzwa.

Mungu ametupangia maisha yaliyobarikiwa. Tunapoyaishi maisha yetu huku tukimtumikia Bwana kama Watumishi wake, basi hapo ndipo Bwana atakapotuvika utukufu wake, na pia atafunua utukufu wake kwetu. Kwa hakika Mungu anafurahishwa sana na huduma yetu iliyojaa uaminifu, na anaturuhusu kuuona utukufu mwingi zaidi wa Mungu na anatupatia baraka nyingi sana. Bwana awetu ametupangia kuishi maisha kama hayo sisi tulio Wakristo wa kweli.

Ni lazima tuishi maisha yenye imani ya kweli hali tukiwa tumeungana na Yesu Kristo. Tunatakiwa kuyafahamu maisha ambayo Mungu ametuandalia. Sisi ni watu tunaomtumikia Kristo tukiwa hai au hata tukiwa tumekufa. Wale ambao wameokolewa kwa kupitia injili ya maji na Roho wanamtumikia Yesu Kristo ambaye ni Bwana wetu. Tumefikia hatua ya kuweza kuieneza injili hii ulimwenguni kote kwa kuwa sisi ni watumishi wake. Sisi tunamtumikia Bwana kwa kila kitu tunachokifanya, yaani ikiwa tunakula au tunakunywa vyote ni kwa kumtumikia Bwana. Kwa sababu hiyo tunapaswa kuishi kwa ajili ya utukufu wa Mungu. Hali tukitambua kuwa hayo ndio maisha yetu tuliopangiwa na Mungu, basi tunayapokea maisha hayo kwa imani. Je, unakubaliana na ukweli huu? Je, mmeiandaa mioyo yenu ili kumtumikia Bwana katika maisha yenu yote, na je mnaamini kuwa haya ndiyo majaliwa yenu yaliyopangwa na Mungu? Hivyo ndivyo Mungu alivyotueleza katika kifungu cha leo cha Maandiko.

Ninyi na mimi tu watumishiwa a Bwana, yaani Yesu Kristo.

Ni lazima tulikumbuke jambo hili wakati wote tunapoendelea katika maisha yetu ya kila siku.

Imani Yetu ya Kale Ilikuwa Kinyume na Ukweli

Kile ambacho tulikuwa tunakifikiria, tunakisikia, na tunajifunza kabla hatujazaliwa tena upya kilikuwa kinyume kabisa na Neno la Ukweli lililofunuliwa katika injili ya maji na Roho. Kwa maneno mengine, hapo zamani tulikuwa na imani za kimwili, na tulikuwa hatuutii Ukweli wa injili ya maji na Roho na kuenenda katika mwenendo mbaya. Namna tulivyokuwa tukimfikiria Mungu wa Ukweli na namna tulivyokuwa tukifanya maamuzi yetu, na yale ambayo tuliyaona kuwa yapo sahihi kabla ya kuifahamu injili ya maji na Roho ni hakika kuwa yalikuwa tofauti kabisa na Ukweli halisi.

Kwa kipindi fulani zile semina zilizokuwa zikiitwa “semina za uponyaji wa ndani” zilikuwa maarufu sana miongoni mwa Wakristo. Mafunzo hayo yalidai kuwa yaliweza kuponya majeraha ya watu ya ndani. Lakini semina hizo hazikujishughulisha sana na Neno la Mungu, kwa kweli zilikuwa ni kama matibabu kwa watu wenye matatizo ya kiakili kwa lengo la kuponya hisia za watu kwa kuwapa pole ya kutosha. Mafunzo hayo yalitaka kuwaponya watu kwa mujibu wa vipimo na viwango vya kibinadamu badala ya kutumia mtazamo wa Mungu, na kwa sababu hiyo mafunzo hayo yalisababisha makosa mengi sana.

Ufuatao ni mfano wa mafunzo hayo ambayo yalilenga kuuponya moyo uliojeruhiwa. Kiongozi wa wale waliojeruhiwa aliwataka wale waliojeruhiwa kutamka maneno haya: “Nimekuwa nikiishi katika maisha yangu hali nikiwa na

moyo uliojeruhiwa na wazazi wangu. Hadi wakati huu nilikuwa sijamwambia mtu yeyote yule kitu ambacho niliteseka nacho utotoni. Kwa kweli sikuweza kuwasamehe wazazi wangu. Hivyo hali hiyo ilibakia kuwa ni jeraha katika moyo wangu. Niliwachukia wazazi wangu na niliwaasi. Hivyo moyo wangu uliendelea kujeruhiwa tena na tena, na hadi sasa bado moyo wangu haujapona. Lakini kwa kuwa Yesu Kristo aliimwaga damu yake kwa ajili ya dhambi zetu, basi kama nisipowasamehe wazazi wangu, basi hilo litakuwa ni kosa langu mwenyewe.”

Fikra kuhusu uponyaji wa ndani inapaswa kuyaangalia majeraha ya moyo kwa mujibu wa kile ambacho Yesu Kristo aliteseka kwa ajili yetu, na kwa kufanya hivyo tunatangaza umuhimu wa msamaha na kupata rehema ya kuwasamehe wengine na kisha kuyaponya majeraha yetu ya ndani. Lengo kuu la semina za uponyaji wa ndani ni kuyaponya na kuyaacha majeraha tuliyoyapata toka kwa wengine kwa kusema hivi, “Kwa kupitia Yesu Kristo ninawasamehe wale wanao nijeruhi. Ninawasamehe kwa jina la Yesu Kristo.” Hata hivyo, kauli hii inasaidia tu kuiponya nafsi ya kimwili, na wala haihusiani na tendo la wokovu ambalo linamwezesha kila mtu kuweza kuzioshelea mbali dhambi zake kwa kuamini katika injili ya maji na Roho.

Bila shaka unaweza kufikiria kuwa hakuna tofauti yoyote ile. Lakini ni hakika kuwa kuna tofauti kubwa sana. Swali la msingi la kujiuliza ni kuwa ni msukumo gani unaomfanya mtu aweze kuyaponya majeraha yake ya moyoni, na majeraha ya watu wengine, na kisha aweze kuwasamehe. Je, msukumo huo unaanzia katika moyo wa mtu binafsi, au msukumo huo unatokana na imani aliyonayo mtu katika Ukweli wa Mungu? Kuna haja ya msingi ya kuufahamu ukweli huu ili kuweza kuiponya nafsi ya kila mtu kikamilifu.

Katika kifungu cha leo cha Maandiko, Paulo alikuwa akieleza kuwa alikuwa amesulubiwa pamoja na Kristo. Paulo alishuhudia kuwa nafsi zetu zilikuwa zimefungwa kwa ajili ya kifo kutokana na dhambi zetu, na kwamba ni hakika kuwa tulikuwa tumekufa kwa kumwamini Yesu Kristo. Pamoja na ukweli huo, hizo semina za uponyaji wa ndani zinajaribu kuirejesha nafsi ya kimwili ili iwe hai, nafsi ambayo ilisha kufa katika Kristo. Kwa maneno mengine, semina za uponyaji wa ndani zina faida, maana zinaifanya ile nafsi ya ndani kuwa hai tena. Imani hiyo ipo tofauti na ile inayoamini kuwa mtu anakufa na kisha anafufuliwa pamoja na Yesu Kristo. Lakini pamoja na ukweli huu, kuna watu wengi sana ambao bado wanataka nafsi zao za ndani ziweze kuponywa ihali watu hao hawana imani inayowawezesha kufa na kufufuliwa pamoja na Yesu Kristo.

Hata baada ya kupokea ondoleo la dhambi zao, bado kuna watu wengi sana ambao bado wanataka kuzitunza nafsi zao za kale. Bada kuna watu wanahangaika ili kujiokoa wao wenyewe pamoja na kuwa wanaambiwa kuwa tulikufa pamoja na Yesu Kristo wakati alipokufa. Je, wewe hutamani kufanya hivi pia? Ukweli ni kuwa kama unatamani kufanya hivyo basi itakuwa vigumu sana kwako kumfuata Bwana. Mawazo yetu ni lazima yaendane na Bwana; kama mawazo yetu yataenda kinyume na Bwana, basi ni hakika kuwa imani yetu ya kiroho haiendani na Bwana, na kwa sababu hiyo hatuwezi kumfuata Bwana kikamilifu. Ikiwa katika mioyo ya watu waliopokea ondoleo la dhambi zao hakuna imani ambayo imeungana na Kristo, basi ni hakika kuwa maisha yao ya kiimani yatagubikwa na mahangaiko ya moja kwa moja. Kwa hiyo, ni lazima uwe na imani kuwa umekufa pamoja na Yesu Kristo.

Tunapaswa kusikiliza kwa makini kile ambacho Bwana alitueleza, *“Yeye aipendaye nafsi yake ataiangamiza; naye*

aichukiaye nafsi yake katika ulimwengu huu ataisalimisha hata uzima wa milele” (Yohana 12:25). Kwa kuwa kimsingi sisi tulikuwa ni wenye dhambi, basi ilikuwa ni haki yetu kwenda kuzimu. Hata hivyo Yesu alizichukua dhambi za watu kama sisi kwa kupitia ubatizo wake alioupokea katika Mto Yordani, akaimwaga damu yake na kufa Msalabani kwa ajili yetu, kisha akafufuka tena toka kwa wafu. Kwa kufanya hivyo Yesu alizitoweshea mbali dhambi zetu zote na adhabu yake. Na ametuwezesha kufa na kufufuliwa kupitia imani yetu kwa Bwana, na ametufanya sasa tuweze kuishi kama watumishi wa Yesu Kristo aliye Mfalme wa haki. Hivyo, sisi wenyewe tulikufa na tulifufuliwa pamoja na Kristo Bwana wetu.

Tukiwa watu ambao tumeshakufa pamoja na Yesu Kristo kwa imani, kuna jambo gani basi lililobakia kwenye nafsi zetu? Kwa kweli hakuna kilichobakia. Lakini pamoja na ukweli huu ikiwa tutajaribu kuzihusha nafsi zetu za kale badala ya kufa kwa imani, basi hatutaweza kuwa watumishi wa Mungu, na badala yake tutakuwa mabwana wa nafsi zetu tunaajaribu kumtumia Bwana vibaya. Na hapo ndipo tutakapokuwa mabwana wa nafsi zetu. Kwa hakika si itakuwa vigumu sana kwetu sisi kumfuata Bwana? Tutaifanye hivyo?

Wanadamu mara nyingi wanafikiria kinyume na Yesu, hii ni kwa sababu tangu wakati walipozaliwa hapa duniani wamejifunza namna ya kuweza kuendelea kuishi. Ubinafsi walio nao haukuigwa toka kwa mtu mwingine, lakini pamoja na hayo mioyo yao imejaa tamaa ya kuendelea kuishi kwa ustawi wao binafsi. Kimsingi, wanadamu wote kama wasipoiadini injili ya maji na Roho basi wataishi huku wakiongozwa na hisia, na kama wataachwa kuendelea kuishi maisha yao ya kimwili basi ni hakika kuwa watadumu kuishi kwa namna hiyo.

Hivyo, ni lazima tufe na kisha kuishi tena pamoja na

Bwana kwa kuamini katika injili ya maji na Roho. Wewe na mimi ni lazima tuamini kuwa tulikufa na kwamba tulifufuliwa pamoja na Yesu Kristo. Mimi na wewe tunapojiangalia kwa msingi wa nuru ya injili ya maji na Roho, basi sisi ni wale ambao tumekwisha kufa na kufufuliwa pamoja na Yesu Kristo. Tukiwa ndani ya Yesu Kristo, nafsi zetu za kale zimekoma. Kwa sasa, tunaishi ndani ya Yesu Kristo kwa imani kupitia Roho Mtakatifu. Kama ilivyoandikwa, *“Hata imekuwa, mtu akiwa ndani ya Kristo amekuwa kiumbe kipya; ya kale yamepita tazama! Yamekuwa mapya”* (2 Wakorintho 5:17). Kwa kuwa nafsi zetu zimekufa pamoja na Yesu Kristo, basi sisi ni wafu ambao tumehuishwa na kufufuliwa pamoja na Kristo.

Vipi kuhusu wewe? Je, hiki kitu kinachoitwa nafsi bado kinaishi ndani yako? Kama kweli unaiamini injili ya maji na Roho iliyotolewa na Yesu Kristo, basi ni jambo lisilowezekana kwa nafsi ya kale kuendelea kuishi ndani yako. Kwa kweli, ikiwa unajifahamu vizuri kwa kuzingatia Ukweli, basi ni hakika utatambua kuwa umekwisha kufa na kufufuliwa pamoja na Yesu Kristo. Kabla ya hapo, ulikuwa ukiishi kwa namna nafsi yako inavyotamani, lakini kwa sasa hauishi katika nafsi yako ya kale bali unaishi kwa kuiweka imani yako kwa Kristo kama Mwokozi wako maana ulikufa pamoja na Kristo na sasa umefufuliwa pamoja na Kristo mfufuka.

Kama tungelikuwa hatujakufa pamoja na Yesu Kristo, basi kungelikuwa na uwezekano mkubwa wa nafsi zetu kugeuka na kuwa sumu inayoua maisha yetu ya kiroho. Hivyo, tendo la kujaribu kuziponya nafsi za kale na kuzihuisha ni sawa na tendo la kumktaa Yesu Kristo. Hiyo ni kwa sababu utakuwa ukienda kinyume na Yesu Kristo badala ya kwenda pamoja na Yesu Kristo.

Bila shaka utakuwa umepitia magumu mengi sanahadi

wakati huu. Na bila shaka utakuwa unasumbuliwa na kumbukumbu mbaya za magumu hayo. Lakini unapaswa kutambua kuwa sababu inayomfanya Mungu kutuletea magumu mbalimbali ni ili tuweze kwenda mbele za Yesu Kristo na kisha kuoshwa dhambi zetu zote kwa kumwamini Yeye. Bwana ametufanya tuweze kuishi kwa imani kwa kuwa ametupatia injili ya maji na Roho. Bwana ametuokoa sisi kwa kuwa amezifanya nafsi zetu kufa pamoja na Yesu Kristo na kisha kufufuliwa pamoja naye. Baada ya sisi kufa pamoja na Kristo, Bwana wetu aliamua kutupatia maisha mapya. Ndio maana Mungu ameruhusu majaribu na hali zote kwetu sisi, na amefanya hivyo ili aweze kutuongoza kuelekea wokovu. Pamoja na ukweli huu, kuna watu ambao wanamkaidi Mungu kwa kujaribu kuyashinda magumu yao kwa namna za kibinadamu. Kimsingi, mawazo na fikra kama hizo ni potofu kabisa.

Kwa kuwa maisha yetu kwa sasa yameungana na Yesu Kristo, basi ni dhahiri kuwa nafsi zetu za kale zimefikia mwisho. Mungu alitufanya tufe na kisha kufufuliwa pamoja na Yesu Kristo ili aweze kutupatia maisha mapya na kutuwezesha kuishi maisha ya haki. Pamoja na ukweli huu, bado tunawaona baadhi ya watu wakijaribu kufanya kila wawezavyo kuzilinda nafsi zao za kale badala ya kuiangalia injili ya maji na Roho, ambayo ni Ukweli wa maisha mapya. Kwa hakika mawazo kama hayo yaliyoundwa kwa fikra za kibinadamu ni mawazo ya kishetani na ni dhambi inayowafanya waende mbali na mawazo ya Mungu. Yeyote yule asiyeamini na asiyeishi kwa namna ya injili ya maji na Roho basi mtu huyo anasimama kinyume na Mungu.

Mawazo yetu ndio yanayotoa vikwazo vikubwa vinavyotuzuia kumfuata Bwana. Ni vizuri ifahamike kuwa mawazo yetu, udhaifu wetu, na nafsi zetu huwa zinainuka kwa

kuwa sisi ni wanadamu, na inapotokea kuwa mawazo yetu yameinuka basi mara nyingi huwa tunasimama kinyume nahaki ya Mungu. Hivyo, ni lazima utambue kuwa wakati ulipopokea ondoleo la dhambi zako, wewe mwenyewe ulikuwa umekufa pamoja na Yesu Kristo na ulipokea uzima wa milele. Kwa sasa ni lazima tutambue kuwa tulikufa na tulifufuliwa pamoja na Kristo. Kwa kuwa tulikufa pamoja na Yesu Kristo katika injili ya maji na Roho kwa imani, basi wafu hawawezi kufanya jambo lolote lile. Hivyo, kwa kuwa hatuwezi kufanya jambo lolote lile kwa jitihada zetu, basi ni hakika kuwa tunaishi kwa kumuomba Bwana na kwa kuiweka imani yetu kwake. zaidi ya yote, kwa kuwa tulikuwa pamoja na Kristo, basi hakuna haja ya kujaribu kuyatimiza matakwa yetu binafsi, bali tunapaswa kuishi kwa imani huku tukitamani kukamilishwa kwa mapenzi ya Mungu.

Biblia inasema hivi, *“Na kama vile watu wanavyowekewa kufa mara moja, na baada ya kufa hukumu” (Waebrania 9:27)*. Ingawa miili yetu haijafa, ni hakika kuwa nafsi zetu zilikwisha kufa pamoja na Yesu Kristo na kisha zikafufuliwa pamoja naye kwa imani katika injili ya maji na Roho. Kila kitu ambacho ni chetu kama vile mawazo yetu na nafsi zetu, ugumu na uchoyo wetu, hayo yote yalisulubiwa pale Msalabani pamoja na Yesu Kristo. Vipi kuhusu nafsi zetu? Je, nafsi zetu ziliondolewa na Ukweli huu? Kwa kweli nafsi zetu ziliishia wakati tulipozisulubisha pale Msalabani. Kilichobaki kwetu sisi ni kuishi kwa ajili ya Mungu kwa imani. Tunaishi kwa imani si kwa sababu kuna mtu anatuambia tusifanye jambo fulani baya, bali hatufanyi jambo baya kwa kuwa nafsi zetu ziliisha kufa. Mtu anapokuwa amekufa hakuna anachoweza kukifanya kwa ajili ya nafsi yake ya kale.

Ndugu waamini wenzangu, je, mnafahamu ninapowaeleza kuwa ninyi nanyi mlikufa? Ni kitu gani unachoweza kukifikia

ikiwa utaidai au kuilaani maiti? Kwa kuwa tulikwisha kufa, basi haijalishi kwamba tuna hali gani, na wala hatuna mahusiano na wale ambao bado hawajafa katika Kristo. Kwa sasa tunachotakiwa kukifanya ni kuyafahamu mapenzi ya Mungu yalivyo, na kisha kuishi maisha yetu mapya katika Yesu Kristo kwa imani. Tunapoishi kwa makusudi ya kumwinua Yesu Kristo, basi hapo ndipo Bwana atakapotutukuza na sisi. Kwa maneno mengine, Mungu anapendezwa anapotuona tukiishi maisha ya haki katika injili ya maji na Roho.

Ni Lazima Sasa Tuishi kwa Imani Inayotuwezesha Kufa na Kufufuliwa Pamoja na Yesu Kristo

Kama baadhi yenu mnavyoweza kufahamu, hata dini za ulimwengu huu zinafundisha kuwa mtu ni lazima afikie hatua ya ukombozi. Dini za ulimwengu pia zinajaribu kuwaamsha watu ili waweze kutambua kuwa wao si kitu, lakini Biblia imeshatoa jibu la swali hili katika Yesu Kristo kw akupitia Ukweli wa injili ya maji na Roho usiobadilika. Biblia inasema kuwa kwetu sisi tunaoini injili ya maji na Roho kuwa hata kama miili yetu bado ipo hai, kwa hakika nafsi zetu zilikwisha kufa. Ni lazima tutambue kuwa tulikwisha kufa katika Yesu Kristo na kwamba sasa tumefufuliwa na kuwa hai. Katika dini za ulimwengu hakuna mpatanishi kama alivyo Yesu Kristo, na kwa sababu hiyo wafuasi wao hawawezi kufa na kufufuliwa kwa imani. Kwa upande mwingine, sisi tunaoamini katika injili ya maji na Roho tunaweza kufa na kufufuliwa pamoja na Yesu Kristo na kisha tunaweza kuishi naye kwa imani. Kwa hakika Ukweli unaopatikana katika injili hii ya maji na Roho ni wa kushangaza sana.

Kadri mimi na wewe tunavyoendelea kuishi katika maisha yetu ya sasa ni lazima tuutafakari ukweli kuwa tulikufa pamoja na Yesu Kristo. Ninafahamu vizuri na ninaamini kwa uthabiti kuwa mimi mwenyewe nilikufa pamoja na Kristo. Kwa hiyo sina matamania yoyote yale ya kufanikiwa katika ulimwengu huu. Ninafahamu kuwa Mungu hapendi kitendo cha mimi kuuinua mwili wangu. Wakati nafsi yangu ya kale ilishakufa, kuna haja gani basi ya mimi mwenyewe kujiinua hapa ulimwenguni? Kadri ninavyoendelea kumfuata Bwana, kwa hakika ninataka Bwana wangu pekee ndiye ainuliwe, na ninaamini kuwa hivyo ndivyo ninavyopaswa kufanya nikiwa mmoja wa watumishi wa Mungu. Kuna tofauti gani ikiwa nitajiinua au kujishusha katika Kristo? Kujiinua kwangu hakumfanyi mtu yeyote yule kuokolewa toka katika dhambi zake, lakini kama watu wanaweza kuokolewa kutokana na kujishusha kwangu, basi kwa hakika nitajishusha mara mia zaidi.

Kwa kweli ninawasihi namna hii kwa sababu ya Yesu. Kwa wale watakatifu ambao hawayafuati mapenzi ya Mungu kikamilifu ninawasihi wayatafute maisha ya kiroho ili hatimaye waweze kuishi kama watumishi wa Mungu. Kwa upande mwingine, kwa wale ambao wanayafuata mapenzi ya Mungu kwa uaminifu, basi hao hawapaswi kukemewa bali wanapaswa kutiwa moyo. Zaidi ya mambo yote, tunahitaji kuwa na imani katika injili ya maji na Roho iliyotolewa na Yesu Kristo. Tunapaswa kuishi huku tukiieneza injili ya maji na Roho.

Pamoja na ukweli huu, sababu inayofanya wakati fulani nafsi zetu za kale zikajitokeza tena katika mioyo yetu wakati tunapoishi hapa ulimwenguni ni kwa sababu bado hatukubali kikamilifu kuwa nafsi zetu zilikwisha kufa, na sababu nyingine ni kuwa bado hatujayakataa mawazo maovu. Hivyo, inapotokea kuwa nafsi zetu bado hazijafa, na Bwana yupo hai ndani yetu, basi inatuwia vigumu sana kutenda kazi pamoja na

Yesu. Kwa kuwa tunaendelea kuzihifadhi nafsi zetu za kale, basi ule ubinafsi wetu ndivyo unavyozidi kuinuka, na kwa sababu hiyo tunaishia kufanya mambo kinyume na mapenzi ya Bwana. Tunapaswa kutambua kuwa tulikufa na Yesu Kristo, na pia ni lazima tuamini kuwa tulifufuliwa pamoja na Yesu Kristo na kisha tukapokea uzima wa milele.

Baadhi yenu mnaweza kufikiria hivi, “Nimekuwa na ndogo za kimwili muda mrefu uliopita, nitafanya kila niwezalo kuitimiza ndoto hii bila kujali chochote kile.” Ikiwa utafikiria hivyo, hiyo itamaanisha kuwa bado una ndoto za kufanikiwa kimwili maana bado hutambui kuwa uliisha kufa. Hebu fikiria vizuri kuhusu hilo. Je, wewe upo kama ulivyokuwa hapo zamani? Kwa hakika hapana! Pamoja na ukweli huo bado unadanganyika na nafsi yako. Na hiyo inaonyesha kuwa hamna ufahamu kuwa nafsi zenu zilikufa pamoja na Yesu Kristo, ni lazima mtambue kuwa mnadanganyika na kwa sababu hiyo ni lazima muirudie imani.

Ndugu waamini wenzangu, je, mnafahamu namna nilivyokuwa hapo zamani? Sikuwahi kufikiria kuwa kuna siku moja nitakuwa mhudumu katika kanisa dogo. Niliwaza kwua kanisa langu linapaswa kuwa kubwa walau kama ukubwa wa shule. Kwa nini? Kwa sababu niliona kuwa inafaa kwa kanisa langu kuwa na mahali pa kuabudia, liwe na miundombinu ya elimu, liwe na ofisi kwa kila kitengo cha kanisa kama vile maktaba, huduma ya vijana, shule ya Jumapili, huduma ya watu wazima, huduma ya wanawake, huduma za jamii, na mambo kama hayo. Hivyo nilifikiria kuwa kanisa langu lazima liwe na ukubwa kama wa kanisa. Na niliamini kwamba sintaweza kufanya huduma pasipo kuwaelimisha waumini. Kwa kuwa niliamini kuwa waumini wanapaswa kuelimishwa, basi ndio maana nilifikiria kuwa kanisa linapaswa kuwa kubwa kama vile shule.

Lakini kwa sasa sifikirii hivyo kamwe. Kwa sasa nina furaha ili mradi tu kuwe na sehemu tunayoweza kuitumia kumwabudu Mungu hata kama itakuwa ni chini ya paa la nyumba inayovuja. Sehemu tunayoabudia inaweza kubadilika na kuwa ukumbi wa chakula na wakati mwingine ikawa ni mahali kwa ajili ya mafunzo ya Biblia. Lakini hapo zamani nilikuwa ninafikiria kuwa ni lazima kuwe na maeneo mbalimbali yaani eneo ya kuabudia na eneo la chakula. Kwa sasa mawazo yangu yamebadilika kabisa. Hii ni kwa sababu malengo yangu na madhumuni ya kimaisha yamebadilika pia. Hapo zamani nilikuwa nizifuata tamaa zangu binafsi, lakini kwa sasa ninayatafuta mapenzi ya Mungu kuliko mapenzi yangu binafsi. Kwa sasa ninafikiria hivi, “Ikiwa nitafanya hivi, je jambo hili lina manufaa katika kuyatimiza mapenzi ya Mungu?” Na siku hizi sifikirii kama ifuatavyo, “Ikiwa nitafanya hivi je, nitakuwa mashuhuri?” Kwa kweli kama ningeliyafikiria matamano yangu binafsi ni hakika kuwa nisingeliweza kuitenda kazi ya Bwana hadi leo hii.

Kwa kweli sifikirii kuhusu mambo yangu binafsi na wala sifikirii juu ya tamaa zangu za kimwili. Na nina hakika kuwa hata ninyi mpo kama mimi, maana kama mngelikuwa mnazifuata tamaa zenu binafsi, ni hakika kuwa msingelikuwa mnayaishi maisha yenu ya imani hadi sasa. Ninaamini kuwa ikiwa tunalo dhumuni la kiroho, basi ni muhimu sana kulifuata dhumuni hilo kwa imani. Ndoto zetu za kimwili na tamaa zetu zipo kinyume na maisha yetu ya kiroho. Sisi tuna matamano ya kiroho kwa ajili ya Bwana na si vinginevyo.

Nafsi zenu za kimwili zinataka kujenga kitu fulani ndani yenu, yaani kama vile Mnara wa Babeli ulivyojengwa. Hata hivyo, unapokuja kwa Kristo, na kisha ukapokea ondoleo la dhambi zako na kufanywa kuwa mtakatifu kwa imani, basi hapo ndipo Mungu atakapoziangusha tamaa zako moja baada

ya nyingine. Kadri tamaa zako zitakavyoanguka, basi kitakachobakia hapo ni ile nidhamu yako binafsi. Na hapo ndipo unapoweza kumwambia Mungu “Mungu ninaomba uniruhusu kuwa na kitu hiki,” lakini unaweza kushangaa kuwa Mungu anaweza kukiangusha hata hivyo unachotaka kubakia nacho. Kisha tamaa zako zinaweza kusema hivi ndani yako, “Hapana, si kwa hili! Maana pasipo kitu hiki ninaweza kupotea kabisa.” Lakini Mungu anakuambia hivi, “Hapana, kwa kweli ulishapotea muda mrefu uliopita. Ndani yako yupo Kristo anayeishi, wewe ulishakufa.”

Mungu anaziangusha nafsi zetu zote za kale. Wakati mwingine huwa tunataka kung’ang’ania tone la mwisho la kuheshimiwa, lakini hatupaswi kufanya hivyo. Mnapaswa kufa na kisha kufufuliwa pamoja na Yesu Kristo kwa imani. Sasa, badala ya kumwomba Mungu kutoyaondoa yale uliyopenda yawe mali yako, ni muhimu sana kwa wewe mwenyewe kuachana na nafsi yako ya kale na kisha uishi kwa imani katika injili ya maji na Roho.

Baadhi ya watu wanasema, “Mungu si inatosha kwa namna ulivyo uvunja vunja mwili wangu? Tafadhali naomba uniachie basi nidhamu binafsi tu! Maana kuanzia sasa ninataka kuiendeleza.” Kwa kweli ni lazima uiondoe mizizi ya tamaa zako za kimwili na hata hiyo nidhamu yako binafsi, na baada ya hapo ni lazima ufufuliwe pamoja na Yesu Kristo kwa kupitia imani yako kwa Kristo. Ni lazima tuing’oe mizizi ya uovu katika maisha yetu ya kiimani; ikiwa mizizi hiyo itabakia kuwa hai, basi baada ya muda fulani inaweza kuchipusha matawi mengi sana. Hivyo, hatupaswi kumwomba Mungu kuyalinda matamano yetu wakati yanapojitokeza.

Bwana anatueleza kuwa hatuwezi kumtumikia yeye ikiwa tutabakia hivyo. Bwana anasema hivi, “Ikiwa utaendelea kung’ang’ania kile ambacho miili yenu inakitaka na ikiwa

mtavifuata vitu hivyo, ni hakika kuwa hamtaweza kunitumikia mimi kama Bwana wenu.” Kwa maneno mengine, sisi hatuishi kwa nia zetu wenyewe, bali tunapaswa kuwa ndani ya Bwana na Bwana anapaswa kuwa ndani yetu, na kwa kufanya hivyo ndipo tunapoweza kuwa wamoja na Bwana. Tunapaswa kuzaliwa tena upya kwa imani kama viumbe vipya.

Sasa Mnapaswa Kuishi kwa Imani Huku Mkiungamanishwa na Yesu Kristo

Kwa kweli ni kosa kubwa ikiwa tutaendelea kujaribu kujitenga toka kwa Kristo, hii ni kwa sababu sisi tumezaliwa tena upya na kuwa viumbe wapya katika Yesu Kristo. Tunapokuwa ndani ya Yesu Kristo hatupaswi kuruhusu nafsi zetu kutenganishwa na naye. Tumeweza kung’oa kiburi cha mwili kiitwacho nafsi na kukichoma. Mnapaswa kutambua kuwa tumezing’oa kwa nguvu nafsi zetu kwa kuzisulubisha Msalabani.

“Nimesulubiwa pamoja na Kristo.” Ndugu waamini wenzangu, sisi tumesha sulubiwa. Wewe na mimi tumesha sulubiwa pale Msalabani pamoja na Yesu Kristo kama vile Mtume Paulo alivyosema, *“Na hao walio wa Kristo Yesu wameusulibisha mwili pamoja na mawazo yake mabaya na tamaa zake”* (Wagalatia 5:24). Je, kama ni hivyo bado kuna uwepo wa nafsi yoyote ile katika miili yetu? Hapana. Je, ninyi si mmekufa pamoja na Yesu Kristo? Ndio mmekufa pamoja naye. Je, kwa sasa ninyi si mmefufuliwa na kuwa hai? Ndio, mmefufuliwa na kwua hai.

Kwa kuwa Yesu Kristo alikuja hapa duniani, akazipokea dhambi zote za ulimwengu huu kwa kubatizwa na Yohana, kisha akafa Msalabani, basi ni hakika kuwa dhambi zetu zote

zimeoshelewa mbali, adhabu ya dhambi zetu imetoweka, na nafsi zetu zimekufa. Lakini pamoja na ukweli huu bado kuna watu ambao wanatetemeka kwa hofu wakati madhaifu au maovu yao yanapofunuliwa. Lakini mapungufu na madhaifu yetu yote yalikufa pamoja na Yesu Kristo. Kwa sasa sisi hatulengi juu ya kuzaliwa tena upya. Sisi tunaoamini katika injili ya maji na Roho tumeshazaliwa tena upya, na kwa sababu hiyo hatuna uhusiano na dhambi zetu au madhaifu yetu, na hata mapungufu yetu.

Sisi tuko vipi? Je, hatuogopeshwi na hofu kwa sababu ya kutokuwa na imani katika injili ya maji na Roho? Wakati fulani unaweza kuomboleza ukisema hivi, “Nitakufa kwa namna hii.” Je si unahofia kuwa utakufa ikiwa utaachana na hayo matamania yako ya kimwili? Kwa hakika mashaka yetu yote yanatokana na kifo.

Vivyo hivyo, watu wanahofia kifo chao. Ingawa watu wanahofia vifo vyao na maangamizi yao, ukweli ni kuwa nafsi zetu za kale ni lazima zife pamoja na Kristo. Ikiwa tutakufa pamoja na Kristo kikamilifu basi hapo tutapokea maisha mapya toka kwa Bwana na hatutaangamia. Na hapo tutaufurahia utukufu katika Yesu Kristo. Nafsi zetu za pili ambazo ni za kiroho zinaweza kustawi ikiwa nafsi zetu za kwanza zitakuwa zimekufa. Bwana alisema, “Yeyote anayetaka kunifuata na ajikane mwenyewe, kisha ajitwike msalaba wake anifuata.” Kwa kwia kanuni za Ufalme wa Mungu ni tofauti na njia za ulimwengu huu, basi jambo la kushangaza ni kuwa mtu anapoangamia kwa mara ya kwanza ndipo anapoweza kustawi mara ya pili. Kama vile Msalaba unavyomaanisha juu ya hukumu na dhambi, ikiwa mimi na wewe tutakufa na kisha kufufuliwa pamoja na Kristo, basi ni hakika kuwa tutapokea baraka za kufanyika wana wa Mungu. Tunapofanyika wana wa Mungu tutapokea baraka zote za kiroho, pamoja na baraka za

uzazi katika nchi hii.

Hata watu wakuu wa ulimwengu huu ni lazima watambue kuwa hata wao ni viumbe wa kawaida tu ambao wanahitaji kuokolewa. Na ikiwa mtu anaamini katika injili ya maji na Roho na ikiwa amepokea ondoleo la dhambi zake zote, basi mtu huyo anatakiwa kutambua kuwa amekwisha kufa na kwamba kwa sasa anaishi pamoja na Kristo. Pamoja na ukweli huu, bado haupendi kuokolewa toka katika dhambi zako na kifo kwa kuamini katika injili ya maji na Roho? Mtu anapokufa katika Kristo na wakati nafsi yake ya kale inapopotea moja kwa moja, basi mtu huyo anakuwa hana jambo jingine la kufanya zaidi ya kuendelea kuishi ndani ya Bwana, na jambo hili huleta baraka nyingi sana. Lakini ikiwa mtu hatakufa kiroho katika Yesu Kristo hivi sasa, basi mtu huyo atakuwa akijaribu wakati wote kujilinda na atafanya kila awezalo kujijenga mwenyewe.

Kama vile nchi nyingi zilizoharibiwa na vita zinavyojaribu kuyajenga upya mataifa yao, watu ambao walishakufa katika Yesu Kristo wanajaribu kujifufua wao wenyewe. Hata hivyo, wakati mtu anapokuwa amesulubiwa katika Yesu Kristo hawezi kuishi kwa kuyategemea maisha yake mwenyewe, ni hakika kuwa mtu huyo atafikia hatua ya kumtegemea Bwana na kisha kuishi kwa imani. Kwa kuwa tulishakufa mara moja katika Yesu Kristo na kwa kuwa tumefufuliwa tena, ni wazi kuwa sisi hatujitegemei sisi wenyewe bali tunaweza kufanya mambo yote tukimtegemea Bwana.

Wakati nilipokombolewa kwa mara ya kwanza toka katika dhambi zangu, marafiki zangu waliniona kuwa ni mtu niliyeshindwa, wakwe zangu waliniona kuwa ni mtu niliyeshindwa, pia hata mimi mwenyewe nilijiona kuwa ni mtu aliyeshindwa. Kwa kuwa nililiamini Neno la Bwana, kwa

kweli sikuwa pamoja nao, na kwa kuwa wao nao walinikataa mimi, basi hiyo hali halisi ilimaanisha kuwa nilikuwa nimeshindwa katika ulimwengu huu. Rafiki zangu bado hawajaufia ulimwengu huu, na kwa sababu hiyo bado wanajaribu kuyafikia matamania yao binafsi. Lakini kwa kuwa nilishindwa mara moja, kwa sasa ninazungumza kwa ujasiri huku nikiihubiri injili ya maji na Roho na huku nikiishi maisha ya haki kwa ajili ya Mungu na kwa ajili ya watu wengine.

Mtu yeyote yule bila kujalisha kuwa yeye ni nani anapaswa kufa pamoja na Kristo mara moja na kisha kufufuliwa naye. Ikiwa mtu atashindwa kuyafikia hayo mambo basi itakuwa ni vigumu sana kwake kupona, lakini ikiwa atakufa pamoja na Kristo na kisha kufufuliwa pamoja naye, mtu huyo ataishi milele na atakuwa na ushindi. *“Nimesulibiwa pamoja na Kristo; lakini ni hai; wala si mimi tena, bali Kristo yu hai ndani yangu; na uhai nilio nao sasa katika mwili, ninao katika imani ya Mwana wa Mungu, ambaye alinipenda, akajitoa nafsi yake kwa ajili yangu.”* Kwa sasa nafsi zetu za kale hazipo tena, na hizi nafsi zetu mpya zimo ndani ya Roho Mtakatifu. Tunapaswa kutambua kuwa tulikufa pamoja na Kristo na kwamba tumefufuliwa pamoja naye. matamania ya nafsi zetu za kale yamekwisha, na sasa matamania ya nafsi zilizozaliwa tena upya yameanza.

Sisi Wakristo tuna furaha sana wakati tunapokufa katika Yesu Kristo. Mashaka na shida zetu zinajitokeza kwa sababu bado hatujakufa katika Kristo. Wakati tunapokuwa na hofu tunatakiwa kufikiria hivi, *“Nimesulubiwa pamoja na Kristo,”* na kuanzia wakati huo ndipo tutakapotambua kuwa *“Tumesulubiwa na kufa pamoja na Kristo.* Na kwa kuwa mimi ni mfu, basi mtu mfu anaweza kufanya nini? Hakuna anachoweza kukifanya,” na hapo ndipo amani ya kweli itakapotujia. Kuanzia wakati huo tunapotambua kuwa hatuwezi kufanya kitu chochote kile pasipo

kuwa na Bwana, hapo ndipo tunapoweza kujifunza namna imani ya kweli ilivyo. Ni kuanzia wakati huo ndipo tunapoweza kutambua namna ya kumtegemea Bwana, na namna ya kutumia imani yetu katika Bwana.

Kwa kupitia Neno la Yesu Kristo, ni hakika kuwa sisi tulikuwa tumekufa pamoja naye na kwa sasa tumefufuliwa pamoja naye. Hata hivyo, katika mioyo ya watu wa Mungu bado kuna sehemu ndogo iliyobakia ya kimwili, na sehemu hiyo ni ile inayohusu mawazo ya kimwili. Lakini kadri muda unavyozidi kwenda tunafikia hatua ya kutambua kuwa mawazo hayo ya kimwili hayana nguvu. Sisi tumekwisha kufa pamoja na Yesu Kristo na tumefufuliwa pamoja naye. tunapoyaishi maisha yetu ya kiimani pasipo kutambua kuwa tulikufa, basi hapo tunaweza kuuona mkanganyiko ukiwa haujaondoka katika mioyo yetu. Ufahamu huu ni wa muhimu sana katika imani yetu. Je, unaamini kuwa ulikufa pamoja na Ukweli?

Yohana 5:24 inasema hivi, *“Amin, amin, nawaambia, Yeye alisikiaye neno langu na kumwamini yeye aliyenipeleka yuna uzima wa milele; wala haingii hukumuni, bali amepita kutoka mautini kuingia uzimani.”* Hapa Neno la Kristo lina maanisha kuwa wakati Yesu Kristo alipobatizwa na kufa Msalabani, dhambi zetu zote zilipitishwa kwenda kwake kwa kupitia ubatizo wake, na kwamba tulikufa plamoja na Yesu Kristo na kisha kufufulwika pamoja na Yesu Kristo. Hivyo ni kosa kubwa sana kujaribu kuziamsha na kuzihuisha nafsi zetu za kale pasipo kufahamu kuwa nafsi zetu za kale zilikwisha kufa. Hivyo kujaribu kujenga nyumba ya imani kwa kutegemea nafsi za kale ni sawa na kujenga nyumba juu ya mchanga. Tunapaswa kuzijenga nyumba zetu juu ya msingi imara wa Ukweli, yaani ukweli kuwa tulikufa pamoja na Yesu Kristo na kwamba sasa tunaishi pamoja naye katika maisha mapya. Kuna tofauti kubwa sana ya kiimani kati ya wale waliojenga nyumba

zao juu ya mchanga na wale waliozijenga nyumba zao juu ya mwamba.

Bwana Anasema Kuwa Nyumba Iliyojengwa Katika Mchanga Itaanguka

Tukiongea kiroho, mchanga una maanisha kuwa ni mawazo binafsi ya mwanadamu. Hii ni kwa sababu mawazo ya mwanadamu huwa yanaanguka na kuvunjika wakati kosa moja dogo linapojitokeza. Ni lazima tuzijenge nyumba zetu katika imani thabiti huku tukiamini kikamilifu kuwa Bwana wetu ni Mwokozi wetu na Mchungaji wetu. Bwana alieleza kwia kumwamini Bwana kikamilifu ni kujenga nyumba juu ya mwamba. Kwa maneno mengine, ni kwamba tunapaswa kujenga nyumba zetu za imani kwa kuliadini kikamilifu Neno la Mungu.

Ni hakika kuwa kwa kuwa bado tunaishi katika nafsi zetu za kale pamoja na kuwa tunaiadini injili ya maji na Roho ni ishara kuwa bado hatujakubaliana kikamilifu kuwa tumekufa katika Yesu Kristo. Kwa mfano, wafanyakazi vijana wanaweza kufikiria kuwa ni bora waachane na kuitumikia injili na kwenda kutafuta kazi nyingine hata kama wamehitimu katika shule ya umishenari kama watumishi wa Mungu. Hii ina maanisha kuwa vijana hao bado hawajakufa pamoja na Yesu Kristo. Ni kwa sababu nafsi zao za kale hazijafa pamoja na Yesu Kristo ingawa bado zipo hai. Kwa kuwa wapo hai ndio maana wanakuwa na aina hii ya mawazo. Kwa hakika hatuwezi kuwa na fikra hizo potofu hadi pale tutakapotambua kuwa tumekwisha kufa pamoja na Yesu Kristo. Ninawasihi ninyi nyote kuepuka jambo hili. Ikiwa tunakiri kuwa tumekufa pamoja na Kristo, basi hapo ndipo tutakapofikia hatua ya

kutambua kuwa “Ninafanya hivi pasipo kufahamu kuwa nilisha kufa pamoja na Kristo,” na hapo ndipo tunapomrudia Mungu na kisha kuishi huku tukiyatii mapenzi yake.

Ikiwa mtu anafahamu kuwa amekufa pamoja na Yesu Kristo, basi ni kwa nini awe na mashaka kuhusu maisha yake ya baadaye? Ni kwa sababu nafsi yake bado haijafa pamoja na Yesu Kristo, yaani nafsi yake bado ipo hai. Hakuna sababu nyingine inayoweza kumfanya mtu ashindwe kuendelea vizuri katika maisha yake ya kiimani. Kwa kuwa nimekufa pamoja na Bwana na kwa kuwa nimefufuliwa pamoja na Kristo, ndio maana Mungu amenifanya niweze kuzitenda kazi zake na kwa msingi huo Mungu ananipatia uwezo wa kufanya mambo ambayo ni ya msingi.

Ni kwa nini unajihofia? Kwa nini tunaendelea kujihofia na kuhangaika ilhali tunaamini katika injili ya maji na Roho? Ni kwa sababu tunajaribu kujiongoza sisi wenyewe. Mnapaswa kutambua kuwa kuwa mnajaribu kujiongoza ninyi wenyewe kwa kuwa nafsi zenu bado zipo hai, kutokana na ukweli huo ndio maana mnaona vigumu sana na mnachoka kuyaishi maisha yenu ya kiimani.

Ndugu waamini wenzangu, ni akina nani miongoni mwa akina kaka na akina dada ambao wanahangaika? Ni yule ambaye amegubikwa sana na mawazo yake binafsi? Ni kwa nini mtu anakuwa na mawazo mengi sana binafsi? Ni kwa sababu mtu wa jinsi hiyo hafahamu na wala haamini kuwa alikufa pamoja na Yesu Kristo. Watu wa jinsi hiyo wanahangaika sana kwa kuwa wanashindwa kuyakana mawazo yao ya kimwili na kwa sababu hiyo hawawezi kuishi kwa imani. Je, ni wazi kuwa tulikufa pamoja na Yesu Kristo? Kwa kweli tunatakiwa kufahamu hivi: Wale waliokufa pamoja na Yesu Kristo hawawezi kufanya kitu chochote kwa kutegemea nguvu zao binafsi.

Ikiwa utaupiga mwili uliokufa, je mwili huo unaweza kusema “Acha kunipiga”? Unaweza kuupiga mwili uliokufa kwa kadri utakavyo hadi utakapotoa damu, lakini mwili huo utabakia kimya. Unaweza kuigeuza pua yake na unaweza kuuchoma mwili huo na sindano lakini hautafanya lolote wala kutikisika. Hivi ndivyo mwili uliokufa ulivyo. Tunapokuwa tumezungukwa na mashaka ya ulimwengu huu, wakati shida zinapotuangukia na kisha tukawa tunaugulia jinsi gani ya kuishi, jinsi gani ya kupata chakula, kitu gani cha kunywa, na tunapojiuliza kuwa ni jambo gani litatupata hapo ndipo tunapotakiwa kusema hivi, “Siwezi kufanya lolote Bwana, maana mimi ni mfu. Sina nguvu ya kuweza kuyashughulikia matatizo yangu. Ninakuomba unisaidia kuyatatua matatizo yangu.” Ni hadi tutakapokuwa na imani ya jinsi hiyo ndipo tunapoweza kumfuata Bwana. Ni kuanzia wakati huo ndipo tutakapoanza kuwashukuru sana watangulizi wetu wa kiimani huku tukitambua kuwa, “Aaah, kwa hiyo uwezo wao kutenda kazi haupatikani mahali pengine, lakini wanafanya kazi ya Mungu kwa kujikana wao wenyewe na kwa kutumainia Mungu huku wakiamini kuwa walisha kufa pamoja na Kristo.” Na hapo tunafikia hatua ya kutambua kuwa kile wanachotueleza ni kwa ajili ya manufaa yetu.

Mara tunapotambua kuwa tumekufa pamoja na Yesu Kristo, hapo ndipo macho yetu ya kiimani yatakapo funguliwa na hivyo tutaweza kuyafuata mapenzi ya Kanisa la Mungu. Wakati Mtume Paulo alipokuwa ndo amezaliwa tena upya, macho yake yalikuwa yamefunikwa na vitu kama magamba. Mwanafunzi fulani aliyeitwa Anania alikwenda kwa Mtume Paulo kisha akamwekea mikono Paulo, mara vitu kama magamba vikaanguka toka katika macho yake, na akaweza kuona tena. Baada ya hivyo kama magamba kuanguka kutoka katika macho ya Paulo, Paulo alitambua kuwa alikuwa

amekufa na kisha kufufuliwa pamoja na Yesu Kristo. Jina la awali la Paulo lilikuwa ni Sauli na lilimaanisha mtu aliye mkuu, lakini jina lake lake baada ya kuokoka, yaani Paulo lina maanisha ni mtu wa chini aliye mdogo.

Ikiwa unahangaika na maisha yako ya sasa ya kiimani, na ikiwa unashindwa kuyafuata mapenzi ya Kanisa la Mungu pamoja na kuwa umepokea ondoleo la dhambi zako, basi hiyo itamaanisha kuwa nafsi yako bado haijafa pamoja na Yesu Kristo kwa imani. Ikiwa mioyo yenu haitamani kuishi kikamilifu kwa ajili ya Bwana pamoja na kuwa mmezaliwa tena upya kwa kuiamini injili ya maji na Roho, basi hiyo itamaanisha kuwa mioyo yenu haiiamini kanuni hii. Hii ni hali inayoweza kujitokeza kutokana na kushindwa kwako kutambua jinsi hali yako ya kiroho ilivyo.

Ikiwa mmekufa pamoja na Yesu Kristo kwa imani, je, mtakuwa na jambo lolote lile la kuhofia? Je, mtakuwa na kitu chochote kile cha kuwasumbua? Kwa kweli hakuna chochote kile cha kuwasumbua. Mnaweza kusema hivi, “Ninaweza kuwa kama mtu yule ikiwa nitajitahidi kwa nguvu.” Lakini maisha yenye uaminifu ya kiimani hayawezekani kwa kujaribisha, bali yanawezekana kwa kuliadini Neno la Mungu. Mambo yote yanaanzia katika kufa pamoja na Yesu Kristo. Sisi binafsi hatuwezi kuwa na imani, bali tunaweza kuipata imani hiyo kikamilifu kwa kuamini katika injili ya maji na Roho. Kwa maneno mengine, tunaposhinda kufanya jambo lolote lile, wakati tunapokuwa tumekufa katika Kristo, na pale tunapokuwa na imani kuwa Mungu anatenda kazi ndani yetu, basi hapo ndipo tutakapoweza kuzitenda kazi za Mungu. Ikiwa nafsi zetu za kale bado ziko hai, ni hakika kuwa Mungu hawezi kuzifanya kazi zake ndani yetu. Ikiwa mawazo yenu bado yamejikita katika nafsi zenu, ni hakika kuwa Mungu hataweza kuwaongoza. Ni sawa na pale viongozi wa kanisa

wanapojaribu kuwaongoza akina dada na akina kaka huku wao wenyewe wakishindwa kujisimamia wakati wanapokuwa wamejawa na mawazo yao binafsi.

Hebu tufikirie jambo hili kwa kitambo kidogo. Kwa nini unafikiri viongozi wenu wanashindwa kutazamana macho kwa macho na ninyi japo kwa kitambo kifupi? Ni kwa sababu mawazo yao binafsi yamewateka. Hivyo ni muhimu sana kuwasikiliza watangulizi wenu wa kiimani huku mkiyakana mawazo yenu binafsi. Sisi ambao tumedhamiria kumtumikia Bwana baada ya kuwa tumezaliwa tena upya tunakubaliana na kile ambacho Bwana na watangulizi wetu wa kiimani wanatuambia. Wakati tulipokuwa hai katika nafsi zetu tulishindwa kufanya kitu chochote kile cha maana, lakini ni jambo gani linatokea baada ya kuamini kuwa tulikufa pamoja na Kristo? Hapo ndipo tunapotambua kuwa sisi si kitu, maana sisi ni wafu, na hapo ndipo tunapoweza kufufuliwa na Kristo kwa imani yetu.

Ikiwa baadhi ya watu wamepokea ondoleo la dhambi zao na wanaonekana kuwa wanazitenda kazi za Mungu, ukweli ni kuwa ikiwa nafsi zao bado zipo hai basi ni wazi kuwa watu hao hawazitendi kazi za Mungu bali wanazitenda kazi zao binafsi. Tunapoiangalia baadhi ya mioyo ya watu, tunaweza kuona kuwa ndani ya hiyo mioyo bado kuna matamanio ya ulimwengu huu. Hata ikiwa wanazitenda kazi za Bwana, ni hakika kuwau watu hao bado wako tofauti. Hata hivyo, ikiwa mtu anafahamu kuwa amekufa pamoja na Kristo, basi mtu huyo anaweza kuzifanya kazi za Bwana hali akiwa na nguvu ya kutosha kwa imani, pia atakuwa na utii mkamilifu kwa mapenzi ya Mungu.

Tunaweza kuonekana kuwa sisi sote ni watumishi wale wale wa Mungu, lakini baadhi ya watu wanamtumikia Bwana huku wengine wanajitumikia wao wenyewe. Wapo wale ambao wanaitenda kazi ya Mungu, lakini wapo wengine ambao

wanazitenda kazi zao binafsi. Bila shaka mmekwisha ona hata ndani ya Kanisa la Mungu zipo pia nafsi ambazo zinakiburi kwa kuwa zinajiona kuwa zipo juu sana kwa sababu tu ya utajiri zililo nao. Watu wa jinsi hiyo wanapopewa madaraka fulani ndani ya Kanisa, basi wao hujigamba sana na kujivuna wakidhania kuwa hakuna watu wengine wanaoweza kushinda nafasi hizo. Kanisa la Mungu haliwezi kuwakabidhi watu kama hao kazi ya Mungu, maana watu hao hawajafa na kufufuliwa pamoja na Yesu Kristo kwa imani.

Unapokuwa umekwisha kufa pamoja na Yesu Kristo, kuna jambo gani ambalo unaweza kulifanya? Jambo pekee unaloweza kulifanya ni kumwomba Bwana.

Hiki ndicho nilichokifanya wakati nilipolipanda kanisa na kuanza huduma yangu. “Bwana, sina fedha za kulipa pango la kanisa. Ninaomba utupatie fedha za kulipia pango la kanisa.” Kwa kweli hakukuwa na namna yoyote ile ya kufanya zaidi ya kuomba hivyo. Ningefanya kitu gani? Je, ningelirejea katika nafsi yangu ya kale na kwenda kutafuta fedha kwa sababu tu ya uhitaji wa kifedha? Kwa kweli kama ingelikuwa kutafuta fedha ni sehemu ya mapenzi ya Mungu, basi ningelikwenda kutafuta fedha. Ningelitafula fedha wakati wa mchana, halafu ningelihubiri wakati wa jioni. Ningelikuwa radhi kufanya hivyo. Lakini nilitakiwa kufundisha katika shule ya umeshnari wakati wa mchana, ningeliwezaje basi kwenda kutafuta fedha? Je, ningeliwaambia hivi wanafunzi, “Hebu ngojeeni. Nitakwenda kutafuta fedha, halafu nitarudi baadaye kuja kuwafundisha, sawa”? Kwa kweli isingelikuwa na maana yoyote ile. Hivyo nikawa sina jambo jingine la kufanya zaidi ya kuomba. Basi wakati tulipoomba hivi, “Mungu, tunaomba utusaidie kupata fedha kiasi fulani,” kwa hakika Mungu aliyatimiza mahitaji yetu kupitia mtu mwingine.

Kwa kuwa sisi tulikuwa tumekufa pamoja na Kristo ndio

maana tuliweza kufanya kazi kwa namna hiyo; kwa kweli kama tungelikuwa hatujafa pamoja na Kristo, basi ni hakika tusingeliweza kutenda hivyo. Ikiwa Bwana ananieleza kwenda na kufanya kazi za mikono, basi ni hakika kuwa nitafanya hivyo kwa shukrani. Na ningelifanya hivyo ikiwa tu Mungu angeniambia kuwa unatakiwa kwenda kufanya kazi za mikono. Ikiwa Mungu angelikuwa ameniamuru kufanya hivyo ningelifanya bila kujalisha ugumu hiyo kazi, maana ningelitambua kuwa hiyo ni kazi ya Mungu. Watu wengine baada ya kuona hivyo pengine wangeluweza kusema, “Inawezekanaje kazi ya ujenzi ikawa ni kazi ya Mungu? Hiyo ni kazi tu ya mikono,” lakini mimi ninaamini kuwa kama ningelikuwa nimefanya kazi yoyote ile ambayo Mungu ameniagiza kuifanya, basi hiyo ndio ingelikuwa kazi yake. Kwa mfano kwa sasa tunapata kiasi fulani cha fedha, tunatoa sadaka, tunalipa pango la kanisa na ofisi, tunarekodi mahubiri ya injili, tumenunauu mtambo wa kuchapisha vitabu, tunachapisha vitabu vya Kikristo—shughuli hizi zote tunazozifanya ni kazi za Mungu. Je, mnaelewa vizuri?

Mungu anapotueleza kufanya kazi za juhudi, basi tunapaswa kufanya hivyo kwa kadri tutakavyoweza. Hatujali kuwa watu wengine wanaweza kutuelewa vipi. Maana sisi tunaoamini katika injili ya maji na Roho, na ambao tulikufa na kufufuliwa pamoja na Yesu Kristo hatuna mioyo yenye uchoyo ndani yetu. Ikiwa tutajitoa kwa ajili ya kazi za Bwana hali tukitambua kuwa sisi ni wafu, halafu tukamwambia Mungu, “Mungu tutakushukuru kwa namna yoyote ile ambayo utatutumia. Tunaomba ututumie kwa ajili ya kazi yako kwa namna yoyote ile inayowezekana,” basi katika kipindi hiki ambacho kina watenda kazi wachache, Mungu atatumia kama vyombo vyake vya thamani.

Sisi sote tunayo mashaka kama hayo kwa sababu

tunafikiria kuwa sisi tupo hai, lakini ni muhimu tufahamu kuwa mashaka yetu na mawazo yetu yote yalikufa pamoja na Yesu Kristo. Sasa kwa kuwa tupo ndani ya Kristo ni lazima tuwe na mawazo ya kiroho kwa imani. Kwa kuwa tumo ndani ya Yesu Kristo ni lazima tuwe na imani, na tuwe na ndogo za imani. Huu si ndio ukweli? Kuna jambo lolote lile linaloweza kutuletea aibu baada ya kuwa tumepokea ondoleo letu la dhambi? Kwa hakika kila mwanadamu ana mapungufu na mawaa. Lakini kwa kuwa tulikufa pamoja na Yesu Kristo basi mambo haya si tatizo tena kwetu.

Kwa upande mwingine, lipo tatizo kwa wale waliokufa pamoja na Yesu Kristo hasa pale wanapoendelea kuyapima mambo mbalimbali kwa kipinmo cha mwili na kwa kufikiri kwa jinsi ya mwili. Mara ya kwanza baada ya kuamini katika injili ya maji na Roho tulianza kuwa na mawazo yetu binafsi maana tulikuwa tunajaribiwa kujiinua zaidi kuliko watakatifu wenzetu. Na wakati mwingine tulikuwa tunatenda matendo fulani ambayo hayaendani vizuri na mtazamo wa kiroho. Lakini hilo mambo hayo yote hayana mashiko sana maana, si unajua tena kuwa ni mwili mfu ndio unaofanya hayo? Na kwa sababu hiyo hilo si tatizo. Kwa upande mwingine, kitendo cha kutoishi kwa ajili ya injili ya maji na Roho ni tatizo.

Ndugu waamini wenzangu, mtu ambaye bado hajafa pamoja na Yesu Kristo ana mashaka kwa kila kitu anachokutana nacho. Mtu wa jinsi hiyo huwa na mashaka sana kuhusiana na kile ambacho watu wengine wanaweza kusema juu yake, na anaendelea kufikiria namna anavyoweza kuishi kwa amani hali akiwa na hofu hizo? Mtu wa jinsi hiyo anaweza kukosa hata usingizi. Kwa namna yoyote ile umewahi kukosa usingizi eti kwa sababu tu ya maneno yaliyonenwa juu yako? Kama ni hivyo ujue ni kwa sababu nafsi yako bado iko hali na ulikuwa unajishughulisha na heshima yako binafsi. Lakini

ikiwa nafsi yako imekufa pamoja na Yesu Kristo kwa imani, basi ni hakika kuwa huwezi kujali hata kama mtu atakulaaani. Sisi wakati wote tunayafikiria mapenzi ya Bwana, na kuna wakati tunaweza kuwa na mashaka hasa tunapoona kuwa mapenzi yake yanazuiliwa, lakini ni hakika kuwa kazi ya Bwana haiwezi kamwe kuzuiwa kwa sababu ya udhaifu wetu. Kwa kuwa tulikuwa pamoja na Kristo na kwa kuwa tulifufuliwa pamoja naye, basi ni hakika kuwa tunaweza kufanya mambo yote ili mapenzi ya Bwana yaweze kutimizwa.

Sisi tunaweza kufa pamoja na Kristo na kisha tunaweza kuishi na Kristo kwa imani. *“wala si mimi tena, bali Kristo yu hai ndani yangu.”* Sisi tumekufa pamoja na Yesu Kristo na kwa sababu hiyo Bwana ndiye anayeishi ndani yetu. Maisha yetu ya kiimani yanaweza kuwa mazuri sana ikiwa tutakuwa tumekufa kikamilifu kwa imani. Ingawa majivuno yetu yanaweza kuwa yanasumbua, lakini kwa kuwa sisi niw atu wa Mungu na wana wake, basi sisi hatutajali kile kinachotutokea ili mradi tu tuwe tunayatii mapenzi ya Bwana katika maisha yetu.

Katika kuitenda kazi ya Mungu, sisi tupo hai na nafsi zetu za kale zimekufa. Ingawa tunaweza tusiwe wanyenyekevu katika mazungumzo yetu, ukweli ni kuwa tunapaswa kuitenda kazi ya Mungu kwa mujibu wa mapenzi yake. Kuhusiana na kazi ya Mungu, sisi tunataka kumtii Mungu, na tunataka kujikana na kisha kumfuata Bwana kwa imani. Nafsi zetu za kibinadamu zimekwisha kufa katika Yesu Kristo.

Ninawasihi ninyi wasomaji wote wa kitabu hiki: Kwanza kabisa mnapaswa kufahamu mnakisoma kitabu hiki kwa neema ya Mungu, na si kwa sababu ya matamanio yenu binafsi. Hivyo haina maana kwa ninyi kuyaongeza mawazo yenu binafsi na kufikiria hivi, *“Hii ni injili ya kweli ambayo Biblia inaishuhudia. Sasa nifanye nini baada ya kuiamini injili hii? Je, niachane na kazi yangu ili niweze kuishi kwa ajili ya injili hii*

kuanzia sasa na kuendelea?” Unachotakiwa kukifanya ni kuamini kuwa umekufa pamoja na Kristo na kwamba umefufuliwa pamoja na Yesu Kristo na kisha unatakiwa kumfuata Bwana kwa kadri anavyokuongoza.

Kwa sasa hatuna kitu chochote kile cha kujihofia. Mungu amewaiteni ili kuwafanya ninyi kuwa watenda kazi wake na kuwatumia kama vyombo vyake vya haki, na wala Mungu hana mpango wa kuijenga tabia yako na kukufanya uwe mashuhuri katika ulimwengu huu. Je, Mungu amekuita ili uweze kuwa tajiri na mashuhuri kama ilivyo katika makanisa mengine? Je, Mungu si amekuita ili kukujenga na kukufanya kuwa mkamilifu?

Ndugu waamini wenzangu, msijihofie ninyi wenyewe. Imani zetu zinapokuwa dhaifu na changa ndipo tunapofikiria juu ya maisha yetu, namna ya kujiendeleza, na huwa pia tunafikiria juu ya maisha ya baadaye, lakini mambo haya yote ni lazima tuyaache kwa jina la Yesu Kristo. Ni lazima tuachane na mashaka yetu yote kwa imani katika Yesu Kristo.

Ndugu waamini wenzangu, ikiwa utakuwa umekufa katika Kristo ndipo utakapoweza kumfuata Bwana mahali popote pale anapokuongoza kwenda. Kwa kweli huwezi kumfuata Bwana kikamilifu ikiwa nafsi yako haijafa katika Kristo. Ninazungumza nanyi Wakristo mliojaliwa tena upya mnaoamini kuwa dhambi zenu zilipitishwa kwenda kwa Yesu Kristo wakati alipobatizwa, na kwamba mnaamini kuwa mlikufa pamoja na Yesu Kristo pale Msalabani, na kwamba kwa sasa mmeikwepa adhabu. Mungu hajaziita nafsi zenu za kale na wala hazipendi. Ikiwa mnaiamini injili ya maji na Roho basi hapo mmeshazipitisha dhambi zenu kwenda kwa Yesu, mmekufa pamoja naye na mmefufuliwa pamoja naye.

Ndugu waamini wenzangu, Paulo alikiri kwa moyo wake akisema “Kristo anaishi ndani yangu.” Kwa kweli

tumemtukuza Mungu na tumelifurahia hili Neno. Na ninaamini kuwa kama tutamsifu Bwana kwa imani yetu, basi ni hakika Mungu atapendezwa nasi. Mungu anapendezwa wakati tunapomsifu kwa imani toka katika mioyo yetu, Mungu hapendezwi na sifa za midomoni tu. Unapokikumbuka kifungu hiki kikamilifu na kisha ukamsifu Bwana vizuri si ndipo utakapotambua kuwa ulikufa na kisha kufufuliwa pamoja na Kristo? Kwa nini unawaka hasira kwa urahisi kihivyo ilhali unadai kuwa umekufa pamoja na Kristo?

Kuna tofauti gani ikiwa mwili uliokufa unaheshimiwa au unatukanwa? Kwa kweli haina tofauti yoyote ile kwa mwili uliokufa kwa kuwa mwili huo ni mfu. Ikiwa mtu amekutana na injili ya maji na Roho, halafu mtu huyo akalidharau na kulitukana jina la Yesu Kristo, basi hapo ndipo tunapoweza kuwa na haki ya kukasirika, lakini tusi lolote lile tunalotukanwa sisi binafsi halina maana yoyote ile.

Tunatakiwa kutambua kuwa sisi tumekufa pamoja na Kristo. Na ni lazima tutambue kuwa kwa sasa sisi tunaishi pamoja na Kristo. Ikiwa sisi ni waamini wa kweli katika injili ya maji na Roho, basi inatupasa kuyafahamu hayo mambo mawili kwa ukamilifu wake. Sababu iliyomfanya Mtume Paulo akaweza kufanya kazi kwa nguvu ni kwa sababu ya imani yake kuwa alikuwa amekufa pamoja na Kristo na kisha kufufuliwa pamoja na Kristo. “Nimesulubiwa pamoja na Kristo.” Hali akiliamini Neno hili, Mtume Paulo alitambua kuwa alikuwa amekufa na kisha kufufuliwa pamoja na Kristo, na ndio maana Paulo aliweza kutenda kazi akiwa na nguvu nyingi. *“Na uhai nilio nao sasa katika mwili, ninao katika imani ya Mwana wa Mungu, ambaye alinipenda, akajitoa nafsi yake kwa ajili yangu.”* Kwa hakika sisi tunakufa na kisha kuishi na Yesu Kristo kwa imani. Hii ndio imani ya Wakristo. Je, unaiamini injili ya maji na Roho? Kama ni hivyo unapaswa pia kuamini

kuwa ulikufa na kisha kufufuliwa pamoja na Kristo katika Ukweli wa injili.

Imeandikwa hivi, *“Mwenye haki ataishi kwa imani”* (Warumi 1:17). Kwa kuwa tulishakufa pamoja na Yesu Kristo kwa imani, basi hakuna tunachoweza kukifanya na kwa sababu hiyo tunapaswa kuishi kwa imani. Sisi sote, yaani akika dada na akina kaka, na mimi pia tunaishi kwa ajili ya jambo gani? Je, tunaendelea kuyaishi maisha yetu kwa imani gani? Je, tunaweza kujiongoza sisi wenyewe vizuri? Je, tunaweza kujilinda sisi wenyewe kikamilifu? Hakuna mwanadamu anayeweza kufanya hayo. Lakini Bwana wetu anaweza kuyafanya hayo na zaidi.

“Wewe, Bwana, nguvu zangu, nakupenda sana; Bwana ni jabali langu, na boma langu, na mwokozi wangu, Mungu wangu, mwamba wangu ninayemkimbilia, Ngao yangu, na pembe ya wokovu wangu, na ngome yangu” (Zaburi 18:1-2). Waandishi wa Zaburi walimsifu Bwana na walimwona kuwa ni nguvu yao, hii ni kwa sababu nafsi zao pia zilikuwa zimekufa. Sisi pia tunaweza kumwangalia Mungu kuwa ni nguvu zetu. Kwa kuwa kwa sasa Kristo anaishi ndani yetu, basi mimi na wewe tunastahilishwa kufanya hivyo. Je, unaamini hivi?

Ndugu waamini wenzangu, wakati ule tulipoiamini injili ya maji na Roho ndio wakati ambapo tulipokea pia ondoleo la dhambi zetu na hapo ndipo tulipokufa pamoja na Kristo. Mtu aliyekufa anaweza kufikiria nini kuhusu yale yaliyotokea hapo zamani? Wafu katika Kristo hawawezi kufanya lolote lile.

“Ya kale yamepita tazama! Yamekuwa mapya” (2 Wakorintho 5:17). Mara baada ya kupokea ondoleo la dhambi zangu, maisha yangu yalibadilika. Mahusiano yangu yote ya kale yalibatilishwa, na nikalazimika kujenga upya mahusiano ya kibinadamu. Pia nililazimika kujenga upya urafiki. Kwa maneno mengine, nilitakiwa kuujenga upya

urafiki wangu kwa mujibu wa injili ya maji na Roho kwa kuwa marafiki zangu walinifikiria kuwa ni yule waliyenifahamu hapo zamani.

“Wewe, unatakiwa kupokea ondoleo la dhambi zenu.”

“Unaongea kuhusu nini?”

“Je, hamna dhambi katika mioyo yenu? Ndio maana mnahitaji kupokea ondoleo la dhambi zenu.”

Hivyo nikalazimika kujenga upya urafiki, nikaendelea kujifunza mambo mapya na kuyabadilisha mengine kwa imani. Mambo yote yameshakuwa mapya kwangu mimi katika injili ya maji na Roho. Hali niliyoipitia pia inakuhusu wewe. Ninyi nyote mlipopokea ondoleo la dhambi zenu pia mlibadilika. Si ndivyo? Kwa kweli mmebadilika sana.

Kuna tofauti gani kati ya nafsi zenu za sasa na nafsi zenu za zamani? Nafsi zenu za kale zimeangushwa kwa kiasi gani? Ikiwa tunafahamu kuwa tumekufa pamoja na Kristo kwa imani, basi hapo ndipo Kristo atakapowajenga ndani yenu kwa mujibu wa imani yenu. Ikiwa kwa upande mwingine hamuamini kuwa mlifikufa pamoja na Kristo, basi Mungu atawaangusha. Mungu ataendelea kuwaangusha vya kutosha. Hata hivyo, ikiwa unaliamini Neno lake na ikiwa unayafuata maelekezo yake tangu mwanzo, basi Mungu akuimarisha na kukufanya kuwa kiumbe kipya.

Hapo zamani nilikuwa na uzito wa kilo 53 sawa na (Paundi 117). Maana mchana na usiku nilikuwa sipati usingizi wa kutosha, hivyo sikuwa na wakati wa kupumzika na hivyo sikuweza kupata uzito. Nilikuwa nikisoma kwa juhudi sana, nikifanya tafuti, nikiomba, na huku nikifanya mambo mengine karibu milioni moja ambayo yalinifanya nisiwe na muda wa kulala vizuri. Nilikuwa nikiamka mapema kabisa alfajiri wakati watu wengine wakiwa wamelala ili nipate kusoma. Watu wengi wanaweka vitabu vyao katika makabati ya vitabu, lakini

mimi nilikuwa ninaviweka vitabu vyangu katika boksi, na vile vitabu ambavyo sijavisoma nilikuwa naviweka katika kasha la vitabu. Nilikuwa ninavisoma vitabu hiyo tena na tena na nilikuwa ninaomba nikiwa peke yangu.

Je, kwa sasa nina tofauti gani? Kwa kweli bado ninasoma Biblia na bado ninaomba lakini nipo tofauti sana na namna nilivyokuwa hapo zamani. Kwanza kabisa, nimenenepa na nimekuwau na afya. Kwa sasa nina uzito unaozidi kila 70 sawa na (Paundi 154). Hapo zamani, kwa kuwa nilikuwa na dhambi huku nafsi yangu ikiwa hai nilikuwa sipati usingizi wa kutosha kwa sababu nilikuwa natumia muda mwingi kufanya sala za toba na kufanya utafiti wa namna ya kulitatua tatizo la dhambi, kwa sasa nina amani kwa kuwa nimepokea ondoleo la dhambi zangu kwa kuamini katika injili ya maji na Roho. Sasa hivi sihangai kuomba kwa ajili ya mwili wangu, bali ninaomba kwa sababu ya kazi ya Bwana.

Baada ya kuwa nimeiamini injili ya maji na Roho, kwa kweli nilipata mabadiliko makubwa. Hapo zamani nilikuwa na dhambi nyingi pamoja na kuwa nilikuwa ninamwamini Yesu kuwa ni Mwokozi wangu. Lakini kwa kuwa sasa ninaamini katika injili ya maji na Roho, mimi sina dhambi. Hapo zamani nilikuwa nikilisoma Neno la Mungu lakini nilikuwa silifahamu. Kwa sababu hiyo nilikuwa ninanunua vitabu vingi vya Kikristo na kuvisoma. Baada ya kuyapitia mahubiri mbalimbali, na kusoma juu ya ufafanuzi wa Biblia, na kamusi za Biblia, hapo ndipo nilipoweza kujiandaa kwenda kuhubiri. Nilikuwa ninatumia muda mwingi sana kuandaa mahubiri kwa sababu ilinipasa kupitia rejea mbalimbali.

Nimebadilika kwa kiasi gani? Kwa hakika nimebadilika sana. Nafsi zetu za kale zimekufa, na kwa sababu hiyo wewe na mimi sasa tunaishi pamoja na Kristo kwa imani yetu kwa Bwana. Kwa sasa tunaishi kwa imani katika Bwana kwa kuwa

sisi wenyewe tulikuwa tumeshakufa pamoja na Kristo.

Je, unaliamini Neno la Mungu? Ikiwa unaliamini Neno la Mungu halafu ukakutana na tatizo lolote lile, je utakwenda kutafuta kitu kingine cha kufanya? Hata baada ya kuwa nimepokea ondoleo la dhambi zangu, kulikuwa na nyakati ambapo nilikuwa ninapata shida kuhusu namna ninavyoweza kuishi. Kwa kweli nilikuwa na hofu mbele za Mungu, “Nitakula nini, nitakunywa nini, nitaishije kuanzia wakati na kuendelea, na nitamtumikiaje Bwana?” Hofu za mwili wangu hazikuishia hapo. Wakati nilipokuwa nikihofia kuhusu namna ninavyoweza kuishi, kwa kweli sikuweza kupata suluhisho kutokana na matatizo yangu hayo. Kwa kweli ilikuwa ni jambo la kusikitisha, maana nilipaswa kufikiria namna ya kupata fedha na kuishi. Mara nyingi nilikuwa nikipata mawazo ya kwenda kufungua biashara ili niweze kuendesha maisha yangu. Nilipata wazo hilo kwa sababu niliona ninaweza kufanya biashara kwa muda fulani, kisha nikatumia muda wangu mwingine kwa ajili ya kazi ya Bwana. Lakini tendo la kufikiria kwa jinsi hiyo lilinifanya nijisikie mwenye huzuni na mpweke.

Kwa kweli sikuweza kupata jibu lolote kutokana na fikra zangu. Lakini Bwana aliyafungua macho yangu kwa kupitia Neno lake. Nilipokuwa nikiisoma Biblia, nilikutana na ukweli kuwa nilishakufa pamoja na Yesu Kristo. Kwa kupitia Neno la Mungu niliweza kutambua ikiwa nilikuwa hai au ikiwa nimekufa katika Kristo. Wakati huo Mungu aliyekuwa ndani yangu aliniambia hivi, “*Nimesulibiwa pamoja na Kristo; lakini ni hai; wala si mimi tena, bali Kristo yu hai ndani yangu.*” Nilikitafakari kifungu hiki cha maandiko kutoka Wagalatia 2:20. Ndipo nikatambua kuwa, “Kwa kuwa nimeshasulubiwa pamoja na Kristo, basi bila shaka nitakuwa pia nimekufa pamoja na Yesu Kristo pale Msalabani. Ikiwa nimekufa pamoja na Kristo, nina kitu gani basi cha kukihofia kuhusu

maisha yangu? Aaah, nafsi yangu bado ipo hai ndani yangu.” Baadaye nilitambua kuwa mashaka yangu yote yalitokana na mawazo yangu binafsi ya kimwili.

Ndugu waamini wenzangu, sisi sote tunafahamu kuwa mwili uliokufa hauwezi kufanya jambo lolote lile, lakini inachukua muda mrefu kuweza kutambua jambo hilo. Lakini nilipotambua kuwa “Hakuna kitu ninachoweza kukifanya sasa katika Bwana. Maana kukaa na kujifikiria mimi mwenyewe ni jambo lisilo na maana,” hapo nikaacha kuhofia juu ya namna nitakavyoishi. Badala ya kujifikiria mimi mwenyewe, nilianza kufikiria namna injili ya Bwana itakavyohubiriwa. Kwa kweli sisi sote kwa sasa tunahitaji kuwa na imani hii.

Kuanzia wakati huo nikuwa nikiifanya kazi ya Bwana kwa kuitegemea imani yangu katika injili ya maji na Roho, na nilikuwa ninaomba hivi, “Ninakuamini wewe Bwana. Ninaomba unipatie mahitaji yangu yote. Nitakutumikia maisha yangu yote.” Niliamua kufanya hivyo kwa sababu kama ningeliendelea kuhofia maisha yangu, ni hakika kuwa nafsi yangu ingelikufa kutokana na kutokuamini kwangu. Mara nyingi hali ya kutoamini inatokana na ukweli kuwa nafsi zetu zinakuwa hazijafa. Je, hali ya kutoamini kama hivyo haipo ndani yako? Hali ya kutoamini inajitokeza katika mioyo yenu kwa sababu hamjathibitisha kuwa mmekufa pamoja na Kristo. Ikiwa mioyo yenu itakuwa imekufa, na ikiwa akili zenu zitatambua kwua mmekufa pamoja na Kristo, basi kuanzia wakati huo hamtakuwa na shaka kuhusu maisha yenu. Wakati Yesu alipoukemea upepo akauambia “Nyamaza!” kwa kweli utulivu mkuu ulitokea katika Bahari ya Galilaya, vivyo hivyo ikiwa tutakitambua kifungu hiki cha maandikoa ndipo utulivu mkuu utakapojitokeza katika maisha yetu, kifungu hicho kinasema hivi, *“Nimesulibiwa pamoja na Kristo; lakini ni hai; wala si mimi tena, bali Kristo yu hai ndani yangu.”* Kuanzia

sasa huhitaji kuhofia juu ya maisha yako.

Wanadamu wanapaswa kuwa na mantiki na wanapaswa kuutafuta Ukweli na kuuamini kwa matinki yote. Kwa kuwa sisi si kama viumbe wasio na ufahamu, basi ni hakika kuwa tunapaswa kufikiria kwa mantiki. Sisi tunafahamu dhahiri kuwa kwa kuwa tumekufa katika Yesu Kristo, basi hakuna tunachoweza kukifanya kwa kutegemea jitihada zetu binafsi. Na hapo ndipo tuakapofikia hatua ya kuomba kwa mioyo yetu yote, “Bwana, ninaomba utusaidie. Tunaomba utusaidie kuifanya kazi yako. Mimi nina mapungufu na nina udhaifu. Lakini ninaomba uniruhusu kuitenda kazi yako.” Sala za kweli za inatoka katika mioyo yetu zikisema hivi. “Mungu, nina mapungufu. Ikiwa inakupendeza naomba uweze kunitumia ingawa nina mapungufu yangu, tafadhali ninaomba unitumie kama chombo chako.” Kwa kweli sisi hatuwezi kukwepa kufanya sala za jinsi hiyo ambazo ni sala za kweli.

“Mungu ninaomba unitumie na uniongoze kwa mujibu wa mapenzi yako.” Hapo tutafikia hatua ya kuyakabidhi mambo yetu yote kwa Mungu. Kuanzia wakati huo tutaendelea kuwa na shukrani ikiwa Mungu ataturuhusu kuzifanya hata kama ni kazi ndogo, na hapo tutaweza kuzifanya kazi za Mungu kwa juhudi kubwa. Kwa kuwa tumesulubiwa pamoja na Kristo, basi sisi hatuishi kwa kuzitegemea nguvu zetu binafsi bali tunayaishi maisha yetu kwa kuzitegemea nguvu za Bwana, hii ni kwa sababu Kristo anaishi ndani yetu. Sisi tunaishi maisha yetu yaliyosalia ya mwili katika Bwana. Sisi tunaishi kwa imani katika Mwana wa Mungu ambaye alitupenda na akasulubiwa hadi kifo kwa ajili yetu na ametuokoa kikamilifu.

Ni lazima tufungue macho ya kiroho. Pia ni lazima tuone ikiwa nafsi zetu za kale zimekufa au zipo hai ndani ya Kristo. Tunaweza kwenda mbele kwa Neno ikiwa tu tutalithibitisha Neno kuwa nafsi zetu za kale zimekufa pamoja na Kristo.

Ikiwa Neno litasema “Nenda,” basi hapo na sisi tunakwenda na ikiwa Neno litasema “Simama,” basi na sisi tutasimama, na sasa tunaishi kwa kuamini kile ambacho Neno linatuambia. Watu wengi wanasema kuwa hawawezi kuliadini Neno la Mungu, lakini mimi ninaliadini. Kila mtu hapa ulimwenguni anaweza asiadini kile ambacho Neno la Mungu linatufundisha, lakini mimi ninaadini hivyo. Mimi sijiamini mimi mwenyewe na wala siyaadini mawazo yangu binafsi bali ninaliadini Neno la Mungu kuwa ni kweli.

Kama ningeliwaeleza kuhusu mimi mwenyewe, je mngeniadini kikamilifu? Kwa kweli hapana. Kwa kweli nisingeliweza kuongea kwa ujasiri. Lakini sababu inayonifanya niweze kuihubiri injili ulimwenguni kote kwa ujasiri ni kwa sababu ninamwamini Bwana na Neno lake. Watu wengi sana wanashangaa ikiwa injili ya maji na Roho ni ya kweli au la, lakini ninapowafungulia Neno la Mungu na kuihubiri injili hiyo kwa mujibu wa Neno, basi hao watu wanafikia hatua ya kulikubali Neno mbele za Mungu na kisha kupokea ondoleo la dhambi zao. Watu hao hupokea ondoleo la dhambi zao kwa kuwa injili ya maji na Roho si kitu kinachotokana na mafundisho yangu binafsi bali kinatokana na Neno la Mungu.

Wakati watu wa Israeli walipovuka Bahari ya Shamu, Wamisri waliokuwa wakimpatia Mungu changamoto kwa sababu ya kutokuamini kwao wote walizama na kufa katika maji. Lakini watu wa Israeli ambao walisonga mbele huku wakiliadini Neno la Mungu waliivuka Bahari ya Shamu salama. Ni lazima tuyaishi maisha yetu ya imani hali tukitambua kuwa tumeshakufa pamoja na Kristo. Kwa kweli hii si nadharia tu bali ni jambo halisi.

Ndugu waadini wenzangu, bila shaka wengi wenu mnadhuhuria sala za asubuhi na mnasoma Biblia mara kwa mara, lakini inawezekana wakawapo baadhi yenu ambao bado wana

mashaka na ambao pengine bado wanajuta. Ndugu waamini wenzangu ninaomba msiwe na hofu kuhusu jambo lolote lile. Kipindi hiki kilichopo hakina watenda kazi wa kutosha. Hivyo ikiwa unaiamini kweli injili ya maji na Roho na ikiwa kweli umepokea ondoleo la dhambi zako, basi ukiri kwa imani thabiti kuwa mmekufa pamoja na Kristo. Ni watu wa jinsi hiyo tu ndio wanaotumiwa na Mungu kama watenda kazi wake. Je, mnalifahamu hili? Mtu yeyote ambaye nafsi yake bado haijafa hawezi kutumiwa kama mtenda kazi wa Mungu. Ukweli ni kuwa mtu ambaye bado hajafa pamoja na Kristo hawezi kutumiwa na Mungu hata kama ana karama kiasi gani. Mungu anawatumia wale tu waliokufa katika Krito kama vyombo vyake.

Ndugu waamini wenzangu! Hali ya watumishi wa ungu ikoje? Ni watumishi ambao wanamtumia Bwana wao. Je, kila watu wanaweza kuwa watumishi au ni wale wasio wabinafsi? Mtumishi ni yule ambaye wakati wote anasema ndio kwa Bwana, yaani hata kama Mungu atasema, “Nenda ukatoe kila kitu kwenye nyumba yetu,” “Leo hii fagia uwanja wa mbele,” au “Nenda uwasindikize wageni.” Mambo haya yote yanaweza kufanyika ikiwa mtumishi huyo hana mawazo yake binafsi; mtumishi anawezaje kufanya kazi za Mungu ikiwa atakuwa na mawazo yake binafsi? Kanuni kama hiyo inatuhusu hata sisi. Wale ambao nafsi zao zimekufa katika Yesu Kristo wanaweza kuwa watumishi ambao wanamfuata Bwana kwa kusema ndio kila wakati Bwana anapozungumza nao. Mtu yeyote yule ambaye bado hajafa katika Kristo hawezi kuwa mtumishi wa Mungu.

Ndugu waamini wenzangu, tutaendelea kujihofia na kuhangaikia maisha yetu kwa muda gani? Sisi tumekwisha kufa pamoja na Yesu Kristo, ni jambo gani linalotufanya tuendeleo kuhangaika? Hebu muache kuhangaika kuhusu maisha yenu. Hebu uimalize tabia hiyo kwa kuiweka imani yako katika Neno la Mungu. *“Nimesulibiwa pamoja na*

Kristo” (*Wagalatia 2:20*). Mashaka na mahangaiko yetu yote yanaisha kwa kutumikia kifungu hiki peke yake. Tunapokufa pamoja na Kristo, basi hapo ndipo tunapokuwa na amani. Ndio maana sisi tunaitwa kuwa ni viumbe vipya.

Mara nyingi dada zetu wanaweza kuona wivu hasa wanapoyaona maendeleo ya mtu mwingine ya kiroho, na hapo wanaweza kujisumbua kwa mambo kama hayo. Lakini ninawasihi muwe na macho yanayoona mbali zaidi. Mnapaswa kuwa na macho yanayoona mbali kwa imani katika Bwana. Hebu acha kuzozana kwa mambo ambayo yapo mbele yenu, kisha angalieni mbele ili hatimaye muweze kufanya maamuzi sahihi ya kiroho katika maisha yenu yote. Hapo ndipo mtakapofikia hatua ya kufahamu utaratibu wa kiroho katika Kanisa la Mungu, na hapo ndipo mnapoweza kuyapambanua mambo ya kiroho na yale ya kimwili, kisha mtaweza kukukua siku kwa siku kama watumishi wema wa Mungu.

Msihofie ikiwa Bwana atawatumia au hatawatumia. Msiwe na hofu kuhusu namna maisha yenu ya baadaye yanavyoweza kuwa. Msihofie ikiwa mtaheshimiwa au ikiwa hamtaheshimika. Hebu acheni kuwa na mashaka kuhusiana na mambo ya kimwili. Hebu iweni watu wa imani ambao mnaangalia mbali sana.

Tabia zetu zinakuwa njema ikiwa tutaliamini Neno la Mungu na kulifuata. Watu wengi sana wanatakiwa kufahamu jinsi wanavyo danganywa. Watu hao huwa wanafikiria kuwa wataheshimika ikiwa watajipatia nidhamu kwa mujibu wa fundisho la kidini la utakaso. Ikiwa hutaliamini Neno la Mungu basi hali hiyo pia itakukuta hata wewe. Na hapo hutaweza kukwepa zaidi ya kuishi maisha ya kijinga. Ikiwa bado haujafa katika Neno la Mungu, basi ni hakika kuwa huwezi kuuona ufalme wa Mungu, ni kama kipande cha karatasi kinavyoweza kukuzuia usione mbele ya macho yako. Ikiwa kuna karatasi

mbele ya macho yako, ukweli ni kuwa hata kama hilo karatasi ni jepesi ni dhahiri wewe utauona Ukweli wenye kufifia.

Ndugu waamini wenzangu, mnapaswa kutambua kuwa ninyi mlisulubiwa hadi kifo pamoja na Kristo kwa kupitia imani yenu katika Neno la Mungu. Ikiwa mtatambua hivi, basi hapo ndipo mtakapoweza kuyaishi maisha yenu ya kiimani kwa usahihi.

Wagalatia 2:20 inasema hivi, *“Nimesulibiwa pamoja na Kristo; lakini ni hai; wala si mimi tena, bali Kristo yu hai ndani yangu; na uhai nilio nao sasa katika mwili, ninao katika imani ya Mwana wa Mungu, ambaye alinipenda, akajitoa nafsi yake kwa ajili yangu.”* Imani yote ya Mtume Paulo imejumuishwa katika kifungu hiki kimoja. Kwa maneno mengine, kifungu hiki kimoja kinaeleza namna tunavyopaswa kuamini, namna tunavyopaswa kuishi kwa ajili ya Bwana, na pia kinaeleza aina ya imani ambayo tunapaswa kuwa nayo.

Ndugu waamini wenzangu, je, mnaliamini Neno la Mungu? Kama ni hivyo ninyi nyote ni watu wenye hekima sana. Ninyi nyote mnastahili kuwa watumishi wa Mungu. Imani katika injili ya maji na Roho inazishinda nadharia zote. Kwa kuwa nadharia zote zimeondolewa, basi sisi tunapaswa kuishi kwa imani katika Bwana.

Kama vile Paulo alivyosema, *“Na uhai nilio nao sasa katika mwili, ninao katika imani ya Mwana wa Mungu, ambaye alinipenda, akajitoa nafsi yake kwa ajili yangu.”* Wewe na mii tunaishi kwa imani—yaani tunaishi kwa imani yetu katika Bwana, tunaishi kwa imani inayoamini katika ondoleo la dhambi zetu, pia tunaishi kwa imani tukiamini kuwa Mungu atatusaidia na kutuweza kuitenda kazi yake katika maisha yetu. Kwa hakika tunaweza kushinda kutokana na imani yetu katika Bwana.

Ninatoa shukrani zangu zote kwa Bwana kwa kutupatia injili ya maji na Roho. ☒

Mtu Haheesabiwi Haki Kwa Matendo ya Sheria Bali Kwa Imani Katika Injili ya Maji na Roho

< Wagalatia 2:11-21 >

“Lakini Kefa alipokuja Antiokia, nalishindana naye uso kwa uso, kwa sababu alistahili hukumu. Kwa maana kabla hawajaja watu kadha wa kadha waliotoka kwa Yakobo, alikuwa akila pamoja na watu wa Mataifa; lakini walipokuja wao, akarudi nyuma akajitenga, huku akiwaogopa waliotahiriwa. Na hao Wayahudi wengine wakajigeuza pamoja naye, hata na Barnaba pia akachukuliwa na unafiki wao. Walakini, nilipoona ya kuwa njia yao haiendi sawasawa na ile kweli ya Injili, nalimwambia Kefa mbele ya wote, Ikiwa wewe uliye Myahudi wafuata desturi za Mataifa, wala si za Wayahudi, kwa nini unawashurutisha Mataifa kufuata desturi za Wayahudi? Sisi tulio Wayahudi kwa asili, wala si wakosaji wa Mataifa, hali tukijua ya kuwa mwanadamu haheesabiwi haki kwa matendo ya sheria, bali kwa imani ya Kristo Yesu; sisi tulimwamini Kristo Yesu ili tuhesabiwe haki kwa imani ya Kristo, wala si kwa matendo ya sheria; maana kwa matendo ya sheria hakuna mwenye mwili atakayehesabiwa haki. Lakini ikiwa sisi wenyewe, kwa kutafuta kuhesabiwa haki katika Kristo, tulionekana kuwa

wenye dhambi, je! Kristo amekuwa mtumishi wa dhambi? Hasha! Maana nikiyajenga tena yale niliyoyabomoa, naonyesha ya kuwa mimi mwenyewe ni mkosaji. Maana mimi kwa njia ya sheria naliifia sheria ili nimwishie Mungu. Nimesulibiwa pamoja na Kristo; lakini ni hai; wala si mimi tena, bali Kristo yu hai ndani yangu; na uhai nilio nao sasa katika mwili, ninao katika imani ya Mwana wa Mungu, ambaye alinipenda, akajitoa nafsi yake kwa ajili yangu. Siibatili neema ya Mungu; maana, ikiwa haki hupatikana kwa njia ya sheria, basi Kristo alikufa bure.”

Imani Yetu

Hivi karibuni tumechapisha kitabu cha pili cha mahubiri kutoka kwenye waraka wa 1 Yohana. Ninaamini kuwa watu wengi wamemrudia Mungu baada ya kuutambua Ukweli ambao umedhihirika kupitia Neno la Mungu katika 1 Yohana. Ninaomba ili kwamba Mungu aendelee kutoa baraka ya wokovu toka katika dhambi zao kwa wale wote ambao wanalitafuta Neno la injili ya maji na Roho.

Siku hizi kuna baadhi ya Wakristo ambao wamezielewa vibaya baadhi ya aya katika waraka wa 1 Yohana. Na hawafahamu kuwa kumwamini Yesu kikamilifu maana yake ni kuliadini Neno la injili ya maji na Roho. Ninalo jukumu la kuyaeleza mapenzi ya Mungu ambayo yanapatikana katika injili ya maji na Roho kwa kila mtu.

Siku hizi kuna watu wengi sana miongoni mwa Wakristo ambao wana imani ya kisheria yenye msingi wake katika Sheria. Waumini wakisheria wa jinsi hiyo wanalitegemea sana Neno kutoka 1 Yohana 1:8-10 kuhalalisha imani yao yenye makosa. Kwa sababu hii, nilitaka kuielezelea injili ya kweli

kwa kulifanya Neno la Ukweli lililofunuliwa katika 1 Yohana kueleweka kwa urahisi. Kama watu wengi katika jumuiya ya Kikristo wataitambua siri ya injili iliyotolewa na Bwana injili ya maji na Roho, basi ni hakika kuwa hawataweza kutekwa na mafundisho ya kidini ya uongo kamwe. Katika kitabu hiki cha mahubiri, ninajaribu kulielezea Neno kutoka 1 Yohana katika muktadha wa Neno la injili ya maji na Roho. Hivyo, ninaamini kuwa wasomaji wengi wa kitabu hiki watafikia hatua ya kuamini injili ya maji na Roho.

Ni vigumu sana kulielewa Neno toka waraka wa 1 Yohana bila kulielewa kwanza Neno la injili ya maji na Roho. Na ndio maana siku hizi kuna watu wengi sana ambao wamechanganyikiwa kutokana na imani yao ya kisheria kwa kuwa wanajaribu kulielewa Neno toka waraka 1 Yohana pasipo kuulewa kwanza Ukweli wa injili ya maji na Roho. Ndio maana kwa mara nyingine tena ninajaribu kukueleza juu ya Ukweli wa injili ya maji na Roho.

Neno lote katika Biblia linalenga katika kulitatua tatizo la dhambi za kila mtu. Kama utaisikiliza vizuri injili ya maji na Roho, basi ni hakika utatambua kuwa wewe ni mwenye dhambi mkubwa na kwamba umefanyika kuwa mwenye haki kutokana na Ukweli huu wa wokovu. Hivyo, ikiwa tutashindwa kuutambua Ukweli wa wokovu uliofunuliwa katika injili ya maji na Roho, basi ni hakika kuwa sisi sote tutaangamia milele. Siku hizi, Wakristo wengi wanazaliwa tena upya na kufanywa wasio na dhambi kwa imani yao katika injili ya maji na Roho iliyofunuliwa katika Neno la Mungu.

Hata hivyo, bado kuna watu wengi sana ambao wanashindwa kuielewa injili ya maji na Roho kwa usahihi ingawa ni muhimu sana wapate uelewa huo. Kwa lugha nyingine, Wakristo wengi wanaishia maisha ya kijinga ya kiimani kwa kuwa hawalifahamu Neno la injili ya maji na

Roho, ambalo ndilo Ukweli wa wokovu. Kwa kuwa wengi wanaomwamini Yesu wana mawazo tofauti sana kuhusiana na injili ya maji na Roho, basi ni hakika kuwa kuna wengi sana ambao hawamfahamu Mungu kwa usahihi katika hizo injili wanazoziamini. Hata katika kifungu cha leo cha Maandiko toka Wagalatia, kinaonyesha wazi kuwa ni vigumu kuielewa maana ya Neno ikiwa hatutakuwa na imani sahihi katika injili ya maji na Roho. Ikiwa tutaifahamu kwa usahihi injili ya maji na Roho iliyoshuhudiwa na Paulo katika vifungu hivi, basi ni hakika kuwa tungeliachana kabisa na maisha yetu ya kiimani ya kisheria. Kwa sasa watu wengi wanapaswa kuielewa siri iliyofichwa katika injili ya maji na Roho ili waweze kubadilishwa mioyo yao na kuwa na imani sahihi ambayo itatawezesha kupokea baraka nyingi za Mungu wakiwa ndani ya injili ya kweli.

Kwa sasa wewe na mimi tunafurahia sana kuzifanya kazi za Mungu baada ya kuwa tumepokea ondoleo la dhambi zetu kwa kupitia imani yetu katika injili ya maji na Roho. Kwa sababu hiyo tunapaswa kuushukuru Ukweli huu wa injili. Sababu inayotufanya tuwaombe sana watumishi wa Mungu kuliko ilivyokuwa awali ni ili waweze kuieneza injili ya maji na Roho ulimwenguni kote. Ili tuweze kuzitenda kazi za Mungu kwa ufanisi, basi ni muhimu sana kumwomba Mungu kwa maombi ili aweze kutusaidia. Ni hakika kuwa sisi tunaomiamini injili ya maji na Roho tunazifanya kazi za Mungu zilizobarikiwa. Kwa hakika tumekuwa watu wenye furaha tukiwa ndani ya injili ya maji na Roho.

Leo tumesoma kifungu toka Wagalatia 2:11-21. Tunaona Paulo akimkemea Petro kwa unafiki wake wakati Petro alipokwenda Antiokia. Hii ilitokea wakati watu fulani walipokuja toka kwa Yakobo, Petro alijiepusha asile chakula pamoja na Wamataifa. Baada ya Paulo kuona hilo tendo la

kujifanyiza, Mtume Paulo alimwambia Petro maneno haya: “Ikiwa wewe uliye Myahudi wafuata desturi za Mataifa, wala si za Wayahudi, kwa nini unawashurutisha Mataifa kufuata desturi za Wayahudi?”

Lawama ambazo Paulo alimpatia Petro kutokana na unafiki wake zilikuwa ni faida kubwa sana katika kuieneza injili. Hii ni kutokana na ukweli kuwa wokovu wetu toka katika dhambi hautokani na matendo mema ya Sheria bali kwa kuamini katika Neno la injili ya maji na Roho. Kwa kweli, Wakristo wanaweza kupokea wokovu toka katika dhambi zao zote mara moja na kwa wote kwa kuamini katika injili ya maji na Roho. Lakini watu wengine wameshindwa kupokea wokivu huo kwa kuwa wamekuwa wakiziamini injili nyingine za uongo. Hivyo, ni makosa makubwa kwao kuishi maisha yao ya kiimani nje ya injili ya maji na Roho. Kama tungeliucheza mchezo wa unafiki katika maisha yetu ya kiimani, basi ni hakika kuwa tungeliwaongoza wafuasi wetu wengi kwenda katika imani ya kinafiki. Hivyo wakati Petro alipokuwa akiuonyesha ule unafiki wake ni dhahiri kuwa waamini na wafuasi wake wangeluweza kuendelea na kufuata nyayo za huo unafiki. Kwa kweli, uongo wa kujiigiza unaofanywa na watangulizi wa kiimani hatimaye huishia kuigwa na wafuasi wao.

Mtume Paulo alisema hivi, “Sikutumwa kuipeleka injili kwa Wayahudi bali kwa Wamataifa.” Hii inaonyesha kuwa Paulo alikuwa ni mhubiri wa injili kwa Wamataifa. Mungu aliwatenganisha Petro na Paulo, na akawatuma kama wamisionari kwa Wayahudi na kwa Wamataifa. Hivyo, ikiwa Paulo alitumwa kwenda kuihubiri injili ya maji na Roho kwa Wamataifa, basi ndio maana alikuwa na kila sababu ya kuachana na imani ya kisheria. Akiwa Mtume kwa Wamataifa, Paulo hakuweza kujizuia na ndio maana alimkemea Petro

kutokana na imani yake ya kinafiki. Paulo alifanya hivyo kwa sababu alitambua jinsi ambavyo kunaweza kukawa na vikwazo vingi katika kuineza injili miongoni mwa Wamataifa kutokana na unafiki wa Petro. Ikiwa Petro angeongeza matendo ya Sheria juu ya imani katika Yesu Kristo aliyekuja kwa injili ya maji na Roho, basi ule Ukweli wa wokovu ambao kwa huo Bwana ametukomboa toka katika dhambi zetu zote usingeliweza kuiangaza nuru ya wokovu. Ninachokieleza hapa ni kuwa Wamataifa wanawezaje kuupokea wokovu toka katika dhambi zao zote kwa kuamini katika injili ya maji na Roho ikiwa sisi sote tunawafanya waziamini injili nyingine kwa kuwa wanafiki katika maisha yetu ya kiimani?

Wanawadamu wote wanaweza kupokea wokovu toka katika dhambi zao kwa imani katika injili ya maji na Roho, injili ambayo Yesu ametupatia. Vinginevyo, hatuwezi kupokea wokovu toka katika dhambi zetu. Hakuna anayeweza kuziondoa dhambi zake kwa kujaribu kuitii Sheria ya Mungu. Kwa upande mwingine, imani ya kisheria kama hiyo kazi yake ni kuziongeza dhambi katika mioyo ya wale ambao hawajazaliwa tena upya. Imani yetu inatokana na ukweli kuwa dhambi zetu zote zilitupiliwa mbali wakati tulipoamini katika injili ya maji na Roho ambayo Yesu Kristo ametupatia. Sisi tunafanywa kuwa wenye haki baada ya kuwa tumepokea wokovu wetu toka katika dhambi zetu zote kwa kuifahamu na kuamini injili ya maji na Roho.

Mtume Paulo anatueleza aina ya imani katika Yesu Kristo inayotuwezesha kuupata wokovu wa kweli. Sasa tunakumbuka kuwa ili kuzitoweshea mbali dhambi zetu zote, Mungu alitupatia Sheria yake ili tuweze kuzitambua dhambi zetu na ni Mungu huyo huyo ndiye aliyetupatia wokovu wa milele kwa kupitia Neno la injili ya maji na Roho. Hivyo, kila Mkristo ni lazima apokee wokovu mara moja toka katika dhambi zake

zote kwa kuamini katika injili ya maji na Roho. Ni wazi kuwa tunaweza kuwa wana wa Mungu kwa kuamini katika injili ya maji na Roho. Ni lazima tuushuhudie Ukweli huu ulimwenguni kote ili tuweze kuufunua Ukweli wa wokovu.

Njia ya Wokovu Toka Katika Dhambi Zetu Ni Ipi?

Ukweli ambao unaleta wokovu katika mioyo yetu si mwingine bali ni imani yetu katika injili ya maji na Roho. Kwa miaka mingi kumekuwepo mabishano kwamba ni kipi kilitangulia kati ya yai au kuku. Ikiwa mtu atasisitiza kuwa yai ndilo lililotangulia, basi mtu mwingine atatoa hoja na kupinga akisema, “Sawa, inawezekanaje yai likawepo pasipo kuwepo kuku?” Lakini mabishano hayo yote yanakwisha mara baada ya kuuangalia ukweli katika Neno la Mungu. Wakati Mungu alipoumba ulimwengu, ndege walijitokeza wakati Mungu aliposema “Wawepo ndege,” ni kama vile ilivyotokea pia kwa samaki. Hivyo, jibu sahihi kwa mabishano haya ni kuwa kuku ndiye aliyenza kuwepo. Kwa kuwa Mungu alimuumba kuku aliyekamilika toka mwanzo, basi ni hakika kuwa kuku alitangulia kuwepo kuliko yai.

Kwa hiyo, Bwana wetu hakutukomboza toka katika dhambi zetu zote na wala hajatupatia wokovu ambao tunatakiwa kufanya jitihada za kibinadamu, bali tunapaswa kuwa na imani katika injili ya maji na Roho. Kwa lugha sahihi, ikiwa tunajiuliza kuwa wokovu wetu toka katika dhambi ulikuja kutokana na matendo yetu au imani yetu katika injili ya maji na Roho, basi ni uhakika ni kuwa wokovu huo umekuja kwetu kwetu kwa imani katika injili hii ya kweli. Ni dhahiri kuwa ondoleo la dhambi zetu zote halitokani na matendo yetu ya kimwili bali linatokana na imani yetu katika injili ya maji na

Roho.

Hivyo, ni makosa makubwa kusema kuwa sisi sote tunatakiwa kufanya sala za toba ili tuweze kuirekebisha au kuiimarisha imani yetu. Pia ni wazo potofu kwamba tunatakiwa kujitakasa sisi wenyewe kwa ajili ya kuweza kuokolewa toka katika dhambi zetu. Watu hawakombolewi toka katika dhambi zao kutokana na matendo yao mema. Tukisema kwa msisitizo, dhambi za kila mtu zinaweza kutoweshewa mbali wakati mtu anapomwamini Yesu Kristo ambaye aliupokea ubatizo na kuimwaga damu yake ili kuzipatanisha dhambi zote za ulimwengu. Ondoleo la kweli la dhambi zetu zote linapatikana kwa kuamini katika injili ya maji na Roho, injili ambayo Mungu ameitumia kuziondolea mbali dhambi zetu zote mara moja na kwa wote pasipo masharti yoyote yale. Kwa upande wa kibinadamu, tunachotakiwa kukifanya ili kupokea woovu wetu ni kuamini injili ya maji na Roho, injili ambayo Yesu ametupatia.

Upotofu wa Fundisho la Kidini la Toba

Hoja ya ikiwa wokovu unapatikana kwa kupitia matendo au imani imekuwa na mdahalo unaoendelea katika Ukristo. Hoja hii inahitaji kujibiwa kwa kueleza Ukweli wa wokovu unaopatikana katika injili ya maji na Roho. Na pasipo ukweli huo ni hakika kuwa kusingelikuwa na jibu jingine.

Lakini, hadi wakati huu kuna watu ambao bado wanaamini damu ya Msalaba tu huku wakisema kuwa wanatakiwa kuziosha dhambi zao kila siku kwa kufuata imani yao ya kisheria ambayo msingi wake ni Sheria. Hata hivyo, ikiwa unalisoma Neno la Biblia, basi muda si mrefu utafikia hatua ya kutambua kuwa injili ya maji na Roho imekwisha

zioshelea mbali dhambi zetu zote kikamilifu. Biblia haizungumzii juu ya damu ya Msalaba peke yake hasa pale inapohusianisha na wokovu, bali inasisitizia ufahamu wetu wa ondoleo la dhambi kwa kuukazia ubatizo ambao Yesu aliupokea toka kwa Yohana Mbatizaji.

Biblia inaelezea juu ya umuhimu wa ubatizo na hasa ikiwa tunaamini injili ya maji na Roho. Bwana anatuuliza kwa wema kabisa ikiwa tunaamini katika injili ya maji na Roho au la. Sisi ni viumbe ambao tunatakiwa kuamini kuwa Yesu Mwana wa Mungu alikuja hapa ulimwenguni akiwa kama sadaka ya Agano la Kale na akaupokea ubatizo toka kwa Yohana Mbatizaji, ubatizo ambao ulizipitisha dhambi zote za ulimwengu kwenda katika mwili wake. Pia tunapaswa kuamini kuwa Yesu alikufa Msalabani na kisha akafufuka toka kwa wafu.

Tunahitaji kuufahamu Ukweli wa injili ya maji na Roho. Hata hivyo, Wakristo wengi siku hizi wanamwamini Yesu aliyesulubiwa tu kwa kuwa hawaufahamu Ukweli wa injili ya maji na Roho. Kwetu sisi ni dhahiri kuwa Yesu Kristo ni Mwana wa Mungu. Hivyo, kwa kufuata utaratibu na sheria ya sadaka ya kuteketezwa katika Agano la Kale, Yesu alikuja hapa duniani katika mwili wa mwanadamu na akaupokea ubatizo toka kwa Yohana Mbatizaji ili kuzichukua dhambi za wanadamu wote mara moja na kwa wote. Yesu aliimwaga damu yake pale Msalabani kwa mujibu wa kanuni hizo za sadaka ya kuteketezwa. Kwa kufufuka kwake toka kwa wafu, Yesu amefanyika kuwa Mwokozi kwa wale wote wanaomwamini. Ndugu waamini wenzangu, mnapaswa kufahamu jinsi Biblia inavyoiwekea uzito injili ya maji na Roho na kwa sababu hiyo mnapaswa kuamini.

Hata hivyo, wale walio na imani ya kisheria wanasema kuwa wameupata wokovu kwa kupitia damu ya Yesu tu

aliyoimwaga Msalabani pasipo kuamini katika ubatizo ambao Yesu aliupokea toka kwa Yohana Mbatizaji. Wao wanaamini kimakosa kwua wameupokea wokovu kwa kuamini damu ya Msalaba tu pasipo kuamini injili ya maji na Roho ambayo Yesu alimwelezea Nikodemo. Tunaweza kuwasamehe wale ambao hawamfahamu Yesu kutokana na ujinga wao, lakini Wakristo wanaomwamini Yesu kuwa ni Mwokozi wao wanapaswa kuamini katika damu ya Msalaba na katika ubatizo ambao Yesu aliupokea toka kwa Yohana Mbatizaji. Je, hivyo si ndivyo ilivyo?

Siku hizi, wengi wao wanaikiri imani yao wakisema hivi, “Yesu ni Mwokozi wangu.” Hata hivyo, watu hawa wote wanaomwamini na kumfuata Yesu kuwa ni Mwokozi wao wanaamini damu ya Msalaba tu. Tatizo lililopo ni kuwa Wakristo wengi wanamwamini Yesu pasipo kufahamu kwa usahihi kuwa Yesu aliupokea ubatizo toka kwa Yohana Mbatizaji, akaimwaga damu yake Msalabani, akafa, na kisha akafufuka toka kwa wafu ili atuwezeshe kuupata wokovu. Wakristo wengi wameongezea imani yao ya kisheria juu ya imani yao kwa Yesu. Zaidi ya yote, wamejiongezea fundisho la kidini la toba na fundisho la kidini la kutakaswa.

Pamoja na hayo, kwa kuwa ni vigumu kuipata njia ya kwenda Mbinguni kwa kutumia imani yao ya kisheria yenye msingi katika Sheria, ndio maana kuna watu wengi sana ambao wanapotea katika dhambi. Watu hao wanapaswa kuipata njia ya kwenda Mbinguni kwa imani katika injili ya maji na Roho. Kwa kuwa watu hao wanaifahamu damu ya Yesu tu pale Msalabani, basi ni hakika kuwa bado wana dhambi katika mioyo yao, na dhambi hizo zinawakwaza wasiweze kwenda Mbinguni, na hali hiyo yote inatokana na kutoiamini injili ya maji na Roho.

Je, hakuna watu wengi wanaosema kuwa dhambi zoa zote

ziloshelewa mbali kwa damu ya Yesu pale Msalabani tu? Inawezekanaje basi kwa Mungu kuikubali imani kama hiyo? Wakati walipomwamini Yesu kwa mara ya kwanza bila shaka mioyo yao ilipata unafuu. Hata hivyo, kadri muda unavyozidi kwenda walifikia mahali pa kuwa na imani ambayo inafungamana na matendo yao binafsi. Hivyo, ingawa wanamwamini Yesu kuwa ni Mwokozi wao, upande mwingine wanafikiri kuwa Wakristo wanahitaji kufanya sala za toba na kisha kuingia katika mchakato wa kutakaswa.

Lakini tunachotakiwa kukifahamuni kuwa haijalishi ni kwa kiwango gani tunazifanya sala za toba, ukweli ni kuwa hatuwezi kuwa wasio na dhambi kwa kufanya hivyo. Kwa kweli kwa imani ya jinsi hiyo hatuwezi kukwepa kuwa wenye dhambi. Wanapofikia hatua ya kuuona ukweli huo ndipo wanapoamua kuwa ni muhimu kujitakasa kila siku kwa kuishi maisha mema. Lakini ukweli ni kuwa hakuna mtu anayeweza kujitakasa yeye mwenyewe binafsi. Watu wanafikiri kuwa inawezekana kujitakasa wao wenyewe kwa kuwa hawaifahamu injili ya maji na Roho. Lakini fikra kama hizo ni mawazo ya kishirikina yanayotokana na mawazo yao binafsi. Badala ya kuutegemea Ukweli wa injili ya maji na Roho, watu wa jinsi hiyo wanatarajia kuendelea kutakaswa kadri muda unavyozidi kwenda. Kitendo cha kuamini kuwa kadri muda unavyozidi kwenda mtu atakuwa akitenda dhambi chache na hivyo kuufanya moyo wake kuwa mtakatifu kwa kuendelea kutakaswa ni imani ya kishirikina.

Watu wanaoliamini fundisho la kutakaswa wanasema kuwa watabadilishwa na kufanywa watakatifu kadri muda unavyozidi kwenda. Ukweli ni kuwa hayo ni matakwa tu ya mwanadamu. Katika fundisho hili ni wapi unapoweza kuipata injili ya maji na Roho ambayo ndiyo inayoweza kutufanya kuzaliwa tena upya? Kwa kweli ni jambo lisilowezekana kwa

mwanadamu kuupata wokovu kwa kutegemea usahihi wa mwanadamu asiyeifanya dhambi wakati mwanadamu huyo huyo ni mwenye asili ya dhambi. Fundisho la dini la kutakaswa, fundisho ambalo Ukristo wa siku hizi unaliamasisha ni fundisho lenye imani potofu kabisa.

Ukweli ni kuwa watu wanakuwa na madhaifu zaidi kadri wanavyozidi kuzeeka na wala hawatakaswi muda huo. Inasemwa kuwa mwanadamu mara ya kwanza hutembea kwa miguu minne, halafu baadaye ujanani miguu miwili, na hatimaye akifikia uzeeni hutembea kwa miguu mitatu. Kwa hiyo, kila mwanadamu ni kiumbe mwenye mapungufu. Hata tunapoangalia katika maisha yetu, tunaweza kuona watu wengi sana wazee ambao wanafanya na kutenda kama watoto wadogo.

Tunaona kuwa kadri watu wanavyoendelea kuzeeka ndivyo uwezo wao unavyozidi kupungua. Hasira ya mtu inakuwa rahisi sana kuwaka kadri mtu huyo anavyozidi kuzeeka. Watu wazima walio na umri wa zaidi ya miaka 50 wanakawaida ya konyesha tabia ambazo ni mbaya kuliko walipokuwa vijana. Hii ni kwa sababu watu hawawezi kuushinda udhaifu wa miili yoyote. Udhaifu huu ndio uhalisia wa uwepo wetu. Watu wanaolitetea fundisho la kutakaswa wanakazia kuwa kadri muda unavyozidi kwenda tutaweza kujifunza kutokasirika na kujua namna ya kuitawala hasira katika mioyo yetu, lakini hoja hiyo ipo mbali na ukweli halisi. Mwili wa mwanadamu unafuata kanuni za fizikia. Ikiwa mtu ana uwezo wa kujizuia, basi mtu huyo anaweza pia kuizuia hasira yake. Kwa upande mwingine, ikiwa mtu hana uwezo wa kujizuia, basi ni hakika kuwa hasira yake italipuka tu. Hivyo, ikiwa mtu anazeeka na ana anapoteza hali ya kuwa na kiasi, basi mtu huyo anaweza kukasirika kwa wepesi hata kwa sababu ya jambo dogo. Unapofanya kosa ambalo ni vigumu kulitawala ilhali ukiwa unaishi maisha ya uaminifu, basi hiyo

itamaanisha kuwa umepoteza kiasi chako kutokana na nguvu zako kupungua.

Kwa kuwa tumekombolewa toka katika dhambi zetu zote kwa kuamini katika injili ya maji na Roho, basi tunapaswa kuishi maisha yetu kwa uaminifu hali tukiwa upande wa Bwana kwa imani. Sisi tunamtumikia Bwana wetu kwa hiari kwakuwa tunaamini kuwa Bwana amezitoweshea mbali dhambi zetu zote kwa injili ya maji na Roho.

Je, sisi tunamfuta Bwana wetu ili kwamba mioyo yetu iweze kutakaswa na kuwa mikamilifu? Kwa kweli hiyo si imani ya kweli. Kwa hakika si mapenzi ya Mungu kwamba sisi tuishi kwa kufuata Sheria ya Mungu. Mungu anatueleza hapa kuwa tunahitaji kamini katika injili ya maji na Roho ili tuweze kukombolewa toka katika dhambi zetu zote. Kwa kweli hatupaswi kusahau kuwa mara nyingi huwa tunaanguka kutokana na udhaifu wa miili yetu, yaani kuwa kuwa miili yetu si mikamilifu. Hata hivyo, kwa kuwa dhambi zetu zote zilitoweshewa mbali mara moja na kwa wote kwa upande wa Mungu kwa kupitia Ukweli wa injili ya maji na Roho, basi wale wote wanaouamini Ukweli huu kwa hakika hawana dhambi. Kwa kuwa tulikombolewa toka katika dhambi zetu zote kwa imani yetu katika injili hii ya kweli, basi dhambi zote tunazozifanya kila siku mbele za Mungu pia zilioshelwa mbali kwa imani yetu. Sasa, ni lazima tuishi kwa imani katika injili ya maji na Roho na kumshukuru Mungu. Ni lazima tumkumbuke Bwana wetu aliyeziiondoa dhambi zetu zote kwa kuitafakari injili ya maji na Roho mara kwa mara.

Sasa, ni lazima tumshukuru Mungu kwa imani yetu. Tunapokiri kwa usahihi mbele za Mungu kuhusu mapungufu ya miili yetu, basi hapo tunafikia hatua ya kuona kuwa Bwana amezitoweshea mbali dhambi zetu zote ambazo tumezifanya kutokana na udhaifu wetu. Toba ya kweli mbele za Mungu

inatoka katika imani kwamba Bwana wetu ametukomboza sisi viumbe wenye udhaifu toka katika dhambi zetu kwa injili ya maji na Roho. Hivyo, wewe na mimi tunapoingalia vizuri injili ya maji na Roho na kisha kuzikiri dhambi zetu mbele za Mungu, basi hapo ndipo tunapopata faraja kubwa na amani katika mioyo yetu hali tukitambua kuwa Bwana wetu amezitoweshea mbali dhambi zetu zote kwa Ukweli wa injili. Na hapo ndipo tunapoweza kuishi mbele za Mungu tukiwa hatuna dhambi na tukiwa wenye shukrani tele. Ingawa tuna mapungufu katika miili yetu, lakini kwa kuwa bado tunaamini injili ya maji na Roho, basi ni hakika kuwa tunaweza kuzitenda kazi za haki mbele za Mungu.

Tunaamini kuwa injili ya maji na Roho inayotoka katika mamlaka ya Mungu ina uwezo wa kuziondoa dhambi zetu zote. Pia tunaamini kuwa imani yetu katika injili hii haitokani na matendo yetu au jitihada za kibinadamu. Hatimaye, tunaamini kuwa jitihada zetu na matendo yetu hayaongezi chochote katika suala letu la wokovu.

Mtume Paulo Alisema Kuwa Haiwezi Kuiacha Imani ya Kweli

Ndio maana katika Wagalatia 2:17-20 Paulo alisema hivi, *“Lakini ikiwa sisi wenyewe, kwa kutafuta kuhesabiwa haki katika Kristo, tulionekana kuwa wenye dhambi, je! Kristo amekuwa mtumishi wa dhambi? Hasha! Maana nikiyajenga tena yale niliyoyabomoa, naonyesha ya kuwa mimi mwenyewe ni mkosaji. Maana mimi kwa njia ya sheria naliifia sheria ili nimwishie Mungu. Nimesulibiwa pamoja na Kristo; lakini ni hai; wala si mimi tena, bali Kristo yu hai ndani yangu; na uhai nilio nao sasa katika mwili, ninao katika imani ya Mwana wa*

Mungu, ambaye alinipenda, akajitoa nafsi yake kwa ajili yangu.”

Vivyo hivyo, sababu inayotufanya wewe na mimi tuiamini injili ya maji na Roho, injili ambayo Yesu ametupatia, ni ili tuweze kupokea wokovu toka katika dhambi zetu zote na kuwa watu wasio na dhambi. Tunaamini kuwa Yesu Kristo amezitoweshea mbali dhambi zetu zote kwa injili ya maji na Roho. Pamoja na ukweli kuwa tunamwamini Yesu ili tuwe wasio na dhambi, basi ikiwa tutabakia kuwa wenye dhambi hata baada ya kumwamini Yesu, je, tunaweza kusema kuwa Yesu Kristo ni mhudumu wa dhambi? Kwa kweli hapana! Yesu Kristo ametukomboa toka katika dhambi zetu zote mara moja na kwa wote kwa kupitia injili ya maji na Roho. Yesu Kristo hatufanyi mimi na wewe kuwa wenye dhambi bali yeye ni Mwokozi wetu anayetufanya sisi kuwa wasio na dhambi.

Yesu Kristo ni Mwokozi wetu na ni Mungu wetu. Ni hakika kuwa Yesu Kristo ni Mwokozi wetu ambaye amezitupilia mbali dhambi zetu zote na kwamba tumepokea ondoleo la dhambi zetu zote wakati tulipomwamini Yesu Kristo kuwa ni Mwokozi wetu. Ni jambo gani litatokea ikiwa dhambi itaingia katika mioyo yetu tena baada ya kuwa tumemwamini Yesu Kristo na ikiwa tutajaribu kulitatua tatizo la dhambi kwa kuifuata Sheria ili tuwe wasio na dhambi? Kama vile Mtume Paulo alivyofanya unafiki mbele ya Paulo, basi kitendo cha sisi kuishi kwa kuifuata Sheria ya Mungu itakuwa ni kuitenda imani yenye makosa mbele za Mungu. Hali akilishughulikia jambo hili, Mtume Paulo alisema kuwa kama angelifanya hivyo basi yeye mwenye angelikuwa ni mtenda dhambi. Hivyo, kuufanya unafiki na kuishi maisha ya kiimani ya kisheria kwa kuifuata Sheria ni kuwa mtenda dhambi.

Ni muhimu tuangalie jinsi ambavyo Mtume Paulo

alivyomkemea Petro kwa makosa yake. “Unawezaje kuwaambia Wamataifa kuishika Sheria, wakati wewe uliye Myahudi unashindwa kuzishika amri zote? Hivyo, si ni kosa kubwa sama kwako wewe kuweka mkazo katika kuishika Sheria?” Alichokuwa akikisema hapa Paulo ni kuwa Petro na wafuasi wake walikuwa wakitenda dhambi kuu mbele za Mungu. Hivyo Paulo alikuwa akisema hivi, “Kwa matokeo hayo mmeukata upendo wa haki wa Mungu kwa kutouamini Ukweli wa injili ya maji na Roho iliyotolewa na Mungu; ikiwa mtaendelea kufanya huo unafiki, basi ni hakika hamtaweza kukombolewa toka katika dhambi zenu zote.”

Injili ya maji na Roho ni karama ya wokovu inayowakomboa wenye dhambi toka katika dhambi zao kwa kuwa inaifunua haki ya Mungu. Kitendo cha kuieneza imani binafsi ya unafiki ni kosa kubwa na pia ni uasi dhidi ya injili ya kweli ya maji na Roho. Ni lazima tuufahamu ukweli huu. Yaani kufanya unafiki kutokana na imani ya kisheria ni kosa kubwa linalosimama kinyume na Mungu ambaye anatupenda pasipo masharti kwa kupitia injili ya maji na Roho.

Ikiwa tutaitumia imani ya Mtume Paulo kwa wanasheria, basi ni dhahiri kuwa imani ya hao wanasheria ina makosa. Kuna idadi kubwa sana ya watu wenye imani ya kisheria katika jumuia ya Kikristo na hilo ni tatizo kubwa sana. Ninachowaeleza hapa ni kuwa hali hiyo ni jambo baya sana. Ikiwa tunamwamini Yesu kuwa ni Mwokozi wetu anayetufanya kuwa wasio na dhambi, lakini tukajikuta bado tuna dhambi hata baada ya kuwa tumemwamini Yesu, basi imani ya jinsi hiyo ni mbaya sana. Kwa kawaida, Wakristo wengi wana imani ya kisheria, na kwa sababu hiyo wamejikuta kuwa ni wenye dhambi wakubwa hata baada ya kuwa wamemwamini Yesu Kristo, hii ni kwa sababu watu wa jinsi hiyo wameshindwa kabisa kuishika Sheria kikamilifu. Lakini

watu wa jinsi hiyo wanafikiri kuwa wameupokea wokovu toka katika dhambi zao zote. Watu wa jinsi hiyo hujikuta wakilitegemea fundisho la kidini la toba na fundisho jingine la kidini la kutakaswa huku wakitumaini kuwa Yesu atawaonea huruma ati kwa kuwa wanajaribu kuishika Sheria ya Mungu.

Je, Yesu ni kiumbe? Hapana, Yesu ni Mungu. Mungu katika haki yake anaihukumu dhambi ya wale wasioamini katika injili ya maji na Roho kwa moto, lakini Mungu hutoa zawadi ya uzima wa milele kwa wale wanaoamini injili ya maji na Roho. Kwa sababu hiyo, ni lazima tutambue kuwa kuishika Sheria ya Mungu kikamilifu hakuwezi kututakasa. Mafundisho hayo ya kidini yanapingana kabisa na injili ya maji na Roho iliyotolewa na Mungu. Imani za jinsi hiyo ni bure kabisa. Ni wale tu wanaoamini katika injili ya maji na Roho ndio wanaokombolewa toka katika dhambi zao zote.

Kwa kuwa tulikuwa hatuwezi kuishika Sheria ya Mungu kikamilifu, Bwana wetu alimtoa Mwanawe pekee ili awe kipatanisho kwa Baba—na akamfanya kuupokea ubatizo toka kwa Yohana Mbatizaji na akamfanya aimwage damu yake pale Msalabani—kwa kufanya hivyo Mungu aliutimiza upendo mkamilifu wa wokovu. Pamoja na haya, ikiwa kuna watu ambao hawaifahamu injili ya maji na Roho na wanajaribu kukombolewa toka katika dhambi zao zote kwa kuishika Sheria kikamilifu, basi watu hao wanapaswa kugeuka na kuachana na hizo njia zao mbaya na wanatakiwa kuiamini injili ya kweli. Ikiwa bado kuna watu ambao wameangukia katika fundisho la kidini la kutakaswa, basi wanapaswa kutambua kuwa wanatenda dhambi inayopingana na injili ya maji na Roho iliyotolewa na Mungu. Hatupaswi kuitenda dhambi ya kupingana na wokovu uliotolewa na Bwana mbele za Mungu.

Paulo anazungumzia juu ya kiini cha imani yake kwa kukitamka kifungu mashuhuri sana cha Wagalatia 2:20. Kila

Mkristo ni lazima akitafakari kifungu hiki. Tunapoangalia kifungu cha Wagalatia 2:19 kinasema hivi, *“Maana mimi kwa njia ya sheria naliifia sheria ili nimwishie Mungu.”* Mtume Paulo alisema kuwa aliifia Sheria kwa sababu ya ukali wa Sheria ya Mungu. Paulo alipojitazama mbele ya Sheria ya Mungu, aliona dhahiri kuwa Sheria inaongelea zaidi kuhusu dhambi zake binafsi. Kwa kuwa haki ya Mungu inaeleza hivi, *“Mshahara wa dhambi ni mauti,”* basi ni hakika kuwa hatuwezi kukwepa kuwa wenye dhambi na hivyo hatuwezi kuikwepa hukumu ya Mungu. Mtume Paulo anatueleza kuwa tunastahili kifo hata ikiwa tutakuwa na dhambi kidogo sana ndani yetu na hata ikiwa tutakuwa tumevunja sheria ndogo sana katika Sheria ya Mungu. Ni lazima tuukiri ukali wa Sheria ya Mungu, na tunatakiwa kuwa wale ambao tumeifia Sheria kutokana na Sheria hiyo.

Wakristo wa kawaida hawaukiri ukali wa Sheria ya Mungu na wanajiona kuwa wao ni wenye dhambi kutokana na viwango walivyojiwekea wao wenyewe. Kimsingi, mtazamo wa jinsi hiyo ni kosa kubwa. Mtu hawezi kuwa mwenye dhambi au hawezi kwenda kuzimu kutokana na viwango vyake binafsi. Mungu ametupatia Sheria yake na wale wanaoivunja Sheria hiyo wanakuwa ni wakosaji ambao wametenda dhambi mbele za Mungu. Wakosaji kama hao wanapaswa kuhukumikiwa na kuipokea hukumu kwa mujibu wa Sheria ya Mungu. Yaani sheria yenyewe ya Mungu ambayo inasema kuwa mshahara wa dhambi ni mauti. Lakini ikumbukwe kuwa karama ya Mungu ni uzima wa milele katika Kristo. Waamini wa injili ya maji na Roho wamekombolewa toka katika dhambi zao kwa kuwa Yesu Kristo alizichukua dhambi zao zote katika Mwili wake kwa kuupokea ubatizo na kisha akafa huku akiimwaga damu yake Msalabani.

Je, Wewe Umeshaifia Sheria ya Mungu?

Kama vile Mtume Paulo alivyolikiri na kuliadini Neno la Mungu, basi wewe na mimi ni lazima tufanye vivyo hivyo. Ni lazima tukiri kuwa Mungu yupo hai na kwamba alitupatia Sheria. Sisi wanadamu kwa hakika hatuwezi kuishika Sheria ya Mungu kikamilifu na badala yake tutaendelea kutenda dhambi katika maisha yetu yote. Hivyo, ikiwa tungelihukumiwa kwa mujibu wa Sheria ya Mungu, basi ni hakika kuwa tungelitumwa moja kwa moja kwenda kuzimu. Hii ni kwa sababu Sheria ya Mungu ni takatifu sana wakati sisi wanadamu tumezaliwa hapa ulimwenguni tukiwa na dhambi ya asili. Sheria ya Mungu inasema, *“Mshahara wa dhambi ni mauti,”* yaani wale walio na dhambi ni lazima watupwe kuzimu.

Sisi tunalikubali Neno lote la Mungu. Neno linasema, *“Maana mimi kwa njia ya sheria naliifia sheria ili nimwishie Mungu.”* Ni lazima tuifie Sheria mara moja ili tuweze kumwishia Mungu. Mungu ametukomboa wewe na mimi toka katika dhambi zetu zote kwa kupitia injili ya maji na Roho, amezioshelea mbali dhambi zetu zote, na ametufanya sisi kuwa wana wake kwa kumtuma Mwanae Bwana wetu Yesu Kristo hapa ulimwenguni. Sisi tunaamini kwa mioyo yetu yote katika wokovu ulioletwa kwa kupitia injili ya maji na Roho. Wale wanaomwamini Yesu Kristo kama sisi ni wana wa Mungu ambao wamepokea wokovu toka katika dhambi zao zote. Ndugu waamini wenzangu, je, mnaamini katika mioyo yenu kuwa Mungu amewakomboa toka katika dhambi zenu zote? Ikiwa ni hivyo, basi hii ndio imani ya kweli.

Ndio maana Biblia inasema hivi, *“Tena mtaifahamu kweli, nayo hiyo kweli itawaweka huru”* (Yohana 8:32). Ukweli wa injili ya maji na Roho umetukomboa wewe na mii toka katika dhambi zetu zote, umetufanya sisi kuwa wana wa

Mungu, umetukomboha toka katika hukumu yote ya dhambi zetu zote, na umetufanya kuwa watu tulio huru. Tumefanyika kuwa wana wa Mungu kwa kuamini injili hii ya kweli, na hii haijalishi ikiwa tuna mapungufu katika mioyo yetu. Ndugu waamini wenzangu, je, mnaamini hivyo? Nina hakika kuwa mnaamini hivyo.

Ni wazi kuwa itakuwa vigumu sana kwa mtu ambayo hajapokea ondoleo la dhambi zake kuweza kuihubiri injili ya kweli. Mtu anaweza kuihubiri injili hii ya kweli ikiwa tu mtu huyo anaamini katika injili ya maji na Roho. Hata wainjilisti wakubwa kabisa hapa ulimwenguni hawawezi kuihubiri injili ya maji na Roho pasipo kwanza kuamini injili hii. Wainjilisti hao wanaweza kuzungumza juu ya mafundisho mbalimbali ya kidini lakini hawawezi kusema neno lolote kuhusiana na injili ya maji na Roho. Ni lazima mtambue kuwa injili ya maji na Roho ni ya ajabu sana kiasi kuwa si kila mtu anaweza kukueleza habari zake.

Mtume Paulo alikiri kuwa aliifia Sheria ili aweze kumwishia Mungu: “Ninaamini kuwa Mungu amenikomboa toka katika dhambi zangu zote kwa kupitia injili ya maji na Roho. Hivyo, nimekufa pamoja Kristo na nimefufuka pamoja naye. Hapo kabla nalikuwa ni mwenye dhambi kwa kuwa nililiamini Neno la Sheria lakini baadaye nikafanywa kuwa mwenye haki kwa imani katika injili ya maji na Roho. Sasa, tumefanyika kuwa watu wa Mungu mwenyewe na watumishi wake. Hivyo, ninaiangaza nuru ya Ukweli kwa watu wengi sana nikiwa mtumishi wa Kristo.”

Pia sisi tunaweza kukiri kuwa tumekombolewa kwa kuamini injili ya maji na Roho. Kwa kuwa Mtume Paulo ameandika katika Biblia kuwa alikufa na kisha akafufuka pamoja na Kristo, basi na sisi pia tunaweza kuwa na imani kama iyo hiyo aliyokuwa nayo Paulo.

Mtume Paulo ametuachia idadi kubwa ya nyaraka ambazo zinajulikana kuwa ni Nyaraka za Paulo: Warumi, 1 & 2 Wakorintho, Wagalatia, Waefeso, Wafilipi, Wakolosai, 1 & 2 Wathesalonike, 1 & 2 Timotheo, Tito, Filemoni, na Waebrania. Kwa kweli hii inashangaza. Mungu alimchagua Mtume Paulo ili kuzifanya hizi kazi zote.

Ili kuliandika vizuri Neno la Biblia, Mungu alimtumia Paulo na Mtume Yohana kuliandika Neno. Mungu aliwaongoza baadhi ya Mitume na watumishi kuiandika Biblia. Kwa kufanya hivyo, Mungu aliitimiza Biblia yote na akautimiza unabii wake na wokovu. Mungu alionya kuwa yeyote atakayeongeza kitu chochote au kukiondoa kitu chochote toka katika Maandiko atafutwa kutoka katika Kitabu cha Uzima. Sasa, Mungu anatuasa kuisoma hii Biblia na kisha kuamini katika injili ya maji na Roho.

Siku hizi, watumishi wa Mungu wanapaswa kuhubiri kwa kulifuata Neno la Mungu. Kwa lugha nyingine, watumishi wa Mungu wana jukumu la kulihubiri Neno la Mungu na si maneno yao binafsi. Zaidi ya yote, ni lazima watumishi hao walishuhudie Neno la Mungu kwa mujibu wa Neno la injili ya maji na Roho. Hapo ndipo wale wanaolitangaza Neno la Mungu na wale wanaolisikia hawataangukia katika makosa kwa kuwa kile wanachoongea na kile wanachosikia wanakipokea kwa imani.

Yesu Kristo amefanyika kuwa Mwokozi wa kweli ambaye ametukomboa toka katika dhambi zetu zote kwa kupitia injili ya maji na Roho. Mtume Paulo pia aliweza kuikiri imani yake kwa kuwa alikuwa akiamini katika Ukweli wa injili ya maji na Roho. Hivyo, kutokana na kifungu cha leo cha Maandiko tumeweza kuupata ukweli huo. Ndio maana mtumishi wa Mungu alisema hivi, *“Nimesulibiwa pamoja na Kristo; lakini ni hai; wala si mimi tena, bali Kristo yu hai ndani yangu; na*

uhai nilio nao sasa katika mwili, ninao katika imani ya Mwana wa Mungu, ambaye alinipenda, akajitoa nafsi yake kwa ajili yangu” (Wagalatia 2:20).

Kule kusema tumepokea wokovu toka katika dhambi zetu zote kunawezekana si kwa sababu ya matendo yetu ya Sheria, bali kwa kuiamini katika mioyo yetu injili ya maji na Roho ambayo Yesu Kristo ametupatia. Tunafanyika kuwa wenye haki, na tunafanyika kuwa wana wa Mungu, na tunapokea uzima wa milele toka kwa Mungu na kuwa watumishi wa Mungu kwa kuupokea wokovu ambao Mungu ametupatia wewe na mimi kwa kupitia imani yetu katika injili ya maji na Roho. Ndio maana Mtume Paulo alisema hivi, *“Kwa maana kwa moyo mtu huamini hata kupata haki, na kwa kinywa hukiri hata kupata wokovu” (Warumi 10:10).* Kwa kuwa Mungu ni Mungu wa Ukweli, Bwana wetu alituahidia wokovu wa kweli na akautimiza kama vile alivyouahidi. Mungu amezitoweshea mbali dhambi zetu zote kwa kupitia injili ya maji na Roho ana ametufanya sisi kuwa wana wake Mwenyewe. Tunaweza kupokea wokovu toka katika dhambi zetu kwa kuamini kwa mioyo yetu katika wokovu ambayo Mungu ametupatia na katika upendo wake ambao umejumuishwa katika injili ya maji na Roho. Mtume Paulo anailinganisha neema ya Mungu ya wokovu na Sheria kwa upande wetu.

Tunaupokea wokovu toka katika dhambi zetu zote, tunakufa na kufufuka pamoja na Kristo ili tuweze kuwa watumishi wenye haki mbele za Mungu hali tukiwa ndani ya imani katika injili ya maji na Roho ambayo Mwana wa Mungu ametupatia. Ikiwa tutaishi maisha yetu yaliyosalia kama watumishi wa Mungu wa haki, basi sisi tutapokea utukufu na heshima katika Ufalme wa Milenia wa Mungu ambao umeahidiwa kupitia Neno lake. Hali tukiwa tumepokea uzima wa milele toka kwa Mungu, hatutakufa milele na badala yake

tutashiriki utukufu na heshima pamoja na Mungu. Huu ndio upendo wa Mungu na dhumuni lake kwa ajili ya wokovu wetu. Haya ndiyo mapenzi ya Mungu kwetu sisi. Ninaamini kuwa Mungu atatuendea hivyo. Kwa kuwa Mungu ametuahidi, basi ni hakika kuwa hali itakuwa hivyo. Je, mnaamini hivyo? Nina hakika kuwa na ninyi mnaamini hivyo.

Mtume Paulo alisema kuwa hawezi kuiweka kando neema ya wokovu ambayo Mungu ametupatia. Ule Ukweli kuwa Mungu ametukomboa toka katika dhambi zetu zote kwa kupitia injili ya maji na Roho ni karama ya wokovu toka kwa Mungu. Upendo wa Mungu pia ni karama toka kwa Mungu. Pia kitendo cha kutukomboa toka katika dhambi zetu zote na kutubadilisha sisi kuwa watu wenye haki ni karama kubwa toka kwa Mungu. Ufalme wa Mungu ulioandaliwa kwa ajili yetu pia ni karama toka kwa Mungu. Hata ule ukweli kuwa tunaishi katika ulimwengu huu tukiwa kama vyombo vya haki ni zawadi nyingine toka kwa Mungu. Pia mahitaji yote ambayo Mungu anatupatia kimwili na kiroho pia ni zawadi toka kwa Mungu. Hata zile kazi za haki tunazozifanya zinazowakomboa wengine toka katika dhambi zao, yaani kwa kuwashirikisha wengine injili ya maji na Roho ni zawadi pia toka kwa Mungu. Hata ule ukweli kuwa wewe na mimi tutaishi milele pia ni zawadi toka kwa Mungu.

Kati ya mambo ambayo tumeyapokea, ni jambo gani ambalo si karama na zawadi toka kwa Mungu? Kila kitu kilicho katika mazingira ya kiasili ni zawadi ya bure toka kwa Mungu. Sisi tunayaamini haya yote kwa mioyo yetu. Tunaamini kuwa Mungu ametufanya sisi kuwa wana wake, na ametufanya watumishi wake wenye haki na ametuahidi kuwa atatushirikisha utukufu na heshima hapo baadaye kwa kuwa Mungu ni upendo.

Ndugu waamini wenzangu, hatupaswi kamwe kuukataa

upendo wa Mungu na karama yake ya wokovu ambayo imekuja kupitia injili ya maji na Roho. Ni lazima tuifahamu injili hii ya kweli. Mungu hawezi kuubatilisha wokovu ambao amekwisha tupatia. Na wala hatupaswi kuiweka kando injili ya maji na Roho iliyotolewa na Mungu kwa kushindwa kuiamini.

Ni dhambi gani kuu ambayo mtu anaweza kuifanya mbele za Mungu? Dhambi hiyo ni kutoiamini nguvu ya injili ya maji na Roho. Dhambi kubwa kuliko zote ni kuikataa injili ya maji na Roho—ambayo ni upendo wa Mungu—yaani kuikataa wakati ukiwa unaifahamu vizuri. Katika nyaraka zake, Mtume Yohana alisema kuwa ingawa watu wanaendelea kutenda dhambi mbele za Mungu, basi watu hao wanapaswa kutotenda dhambi isiyosameheka mbele za Mungu. Yohana aliielezea dhambi hii kuwa ni “dhambi iletayo mauti” (1 Yohana 5:16). Hivyo, Mtume Yohana anatueleza kuwa hatupaswi kuitenda dhambi isiyosameheka. Dhambi ya jinsi hiyo si dhambi ya kawaida ambayo tunaifanya katika maisha yetu ya kila siku bali ni dhambi kutoiamini injili ya maji na Roho iliyotoelewa na Mungu. Hii ina maanisha kuwa hatupaswi kabisa kuikataa neema ya Mungu ya wokovu.

Kwa upande mwingine, hali tukiwa tumepokea karama ya neema ya Mungu kwa imani, basi tunapaswa kuwa na shukrani milele, tunapaswa kumwamini Mungu na kumtukua Yeye milele. Mungu anataka sisi tuzipokee na kuzifurahia baraka zake zote alizotupatia hali tukiwa na shukrani. Hivyo, ni lazima tuamini kuwa Mungu atatupatia utukufu na heshima milele, na atafanya hivyo ikiwa tutaipokea karama ya wokovu iliyotolewa na Mungu kwa imani. Ukweli huu unatuhusu mimi na wewe pia. Tunapokea karama za Mungu na hivyo tunapaswa kushukuru na kumsifu Mungu.

Tunapaswa Kuwa Watu wa Aina Gani?

Mwishoni mwa Wagalatia sura ya 2, Mtume Paulo alihitimisha kwa kusema hivi, *“Siibatili neema ya Mungu; maana, ikiwa haki hupatikana kwa njia ya sheria, basi Kristo alikufa bure”* (Wagalatia 2:21).

Ikiwa tunaweza kuwa watu wasio na dhambi mbele za Mungu kwa kupitia imani yenye msingi katika Sheria, huku tukitoa sala za toba na huku tukijaribu kujitakasa sisi wenyewe, basi kama ni hivyo, Yesu Kristo atakuwa aliupokea ubatizo na kisha kufa bure kwa ajili yako na yangu. Ndugu waamini wenzangu, je, mnadhani itakuwa ni sahihi kuufanya ubatizo na kifo cha Yesu Kristo kuwa ni kitu cha bure? Kwa kweli hatupaswi kuufanya wokovu ambao Yesu Kristo ametupat kuwa ni kitu kisicho na maana.

Kwa mtazamo wa kidunia, jambo baya kabisa ambalo mwanadamu anaweza kulifanya ni kufa kabla ya wazazi wake hawajafariki. Kama ni hivyo ni dhambi gani basi inayoweza kuwa kubwa sana mbele za Mungu? Dhambi hiyo ni kutoamini kuwa Yesu Kristo amefanyika kuwa Mwokozi wetu mkamilifu kwa kuja hapa duniani, kwa kuupokea ubatizo ili kuzichukua dhambi zote za ulimwengu katika mwili wake, kwa kuimwaga damu yake Msalabani ili kuzipatanisha dhambi zote za ulimwengu, na kw akufufuka kwake toka kwa wafu. Ikiwa tutaubatilisha upendo wa Yesu wa wokovu ambao kwa huo aliutoa uhai wake yeye mwenyewe ili aweze kutupatia maisha mapya kwa kupitia ubatizo wake na damu yake aliyoimwaga, basi kwa hakika hiyo itakuwa ni dhambi kubwa sana kati ya dhambi zote. Yeyote anayemkufuru Roho Mtakatifu hawezi kusamehewa na hivyo ataangamia milele (Mathayo 12:31). Hakuna mtu anayepaswa kuitenda dhambi ya kumkufuru Roho Mtakatifu. Mnalielewa hilo?

Hivyo, unapowashirikisha wengine injili ya maji na Roho, unapaswa kufanya hivyo kwa imani na wala hupaswi kufanya hivyo mara moja tu bali uendelee kuwashirikisha wengine injili hiyo. Ingawa mara ya kwanza watu wanaweza kuiamini nusu nusu injili ya maji na Roho katika mioyo yao, ukweli ni kuwa kadri unavyoendelea kuwashirikisha injili hii, ni hakika kuwa injili hii itaota mizizi katika mioyo yao binafsi. Imani katika injili ya maji na Roho ni lazima iote mizizi katika moyo wa kila mtu. Tunapaswa kuukiri Ukweli wa injili kwa akili zetu, hisia zetu, na kwa nia zetu. Ninachowaeleza hapa ni kuwa tunapaswa kuwa watu tunaoufahamu na kuuamini Ukweli kwa usahihi, na tunapaswa kuwa na hisia za upendo, na hatimaye kuyaweka yale tunayoyaamini katika matendo. Hatupaswi na hatuwezi kuugeuza ukweli wa kuja kwa Yesu Kristo hapa ulimwenguni, na tendo lake la kuupokea ubatizo, kifo chake, na kufufuka kwake kuwa ni vitu vya bure visivyo na maana. Ikiwa hatuiamini injili ya maji na Roho, basi ni hakika kuwa tutapokea hukumu kutokana dhambi hiyo.

Zaidi ya yote, sisi ambao tunaamini katika injili ya maji na Roho ni lazima tuyaongoze maisha yetu ya kiimani kwa yale majukumu ambayo tumepewa. Mungu anawaeleza wenye haki kuwa waaminifu na kuwa wenye shukrani kwake hali wakiwa na imani katika injili ya maji na Roho, na huku wakiwashirikisha wengine injili hii. Ndio maana tunaitumikia injili ya maji na Roho kwa uaminifu mbele za Mungu. Kama si hivyo mnadhani kungelikuwa na sababu yoyote ile ya kuieneza injili hii ulimwenguni?

Siku hizi, asilimia ya ardhi ambayo haitumiki inazidi kuongezeka katika nchi yangu. Serikali ilitangaza sera yake ya kuwasaidia wale ambao hawalimi katika ardhi zao kwa kuwapatia kiasi fulani ambacho ni sawa na wastani wa mavuno. Na kwa sababu hiyo kuna wakulima wengi ambao hawalimi na

wananufaika kutokana na sera hii. Ardhi ambayo haijatumiwa ni ardhi iliyopumzishwa na hivyo wamiliki wa ardhi yake hawailimi. Hivyo kama tutatoka na kwenda katika ardhi ambayo haijalimwa ni hakika kuwa hatuwezi kupata mazao yoyote yale bali tutakuwa magugu ambayo yameigubika ardhi yote. Hebu nenda mashambani wakati wa kiangazi na ulinganishe ardhi ambayo haijalimwa na ile ambayo imekuwa ikilimwa. Katika ardhi ambayo imekuwa ikilimwa utaona nafaka mbalimbali. Lakini katika ile ardhi ambayo haijalimwa utakutana na magugu tu. Ardhi hiyo itaonekana ni kana kwamba kuna mtu alikuja akapanda magugu na kisha akayamwagilia ili yaweze kukua. Ulimwengu huu unafanana sana na mfano huu.

Ili tusiifanye neema ya Mungu kuwa ya bure, basi tunatakiwa kuwa wenye haki kwa kuamini kwa mioyo yetu katika injili ya maji na Roho, na kisha kupokea wokovu, na kuutumia muda wa maisha yetu uliosalia kuzipanda mbegu za wokovu kwa kuieneza injili ya kweli. Mtume Paulo alisema, *“Nimesulibiwa pamoja na Kristo; lakini ni hai; wala si mimi tena, bali Kristo yu hai ndani yangu; na uhai nilio nao sasa katika mwili, ninao katika imani ya Mwana wa Mungu, ambaye alinipenda, akajitoa nafsi yake kwa ajili yangu”* (Wagalatia 2:20). Kama kifungu hiki cha Maandiko kinavyoeleza, ikiwa Mungu ametupatia wewe na mimi wokovu wa kweli kwa kupitia injili ya maji na Roho katika Yesu Kristo, basi tunatakiwa kuitumikia injili hii ya kweli kwa imani na tunatakiwa kuieneza ulimwenguni kote.

Ikiwa hatuitumikii injili na ikiwa hatuishi kwa haki katika maisha yetu yaliyosalia ilhali tumepokea wokovu toka katika dhambi zetu zote, basi hapo ndipo aina yote ya mawazo machafu yatakapojaza mioyo yetu. Na hapo ndipo tutakapokuwa viumbe tusio na maana kabisa. Wewe na mimi tunapaswa kuipalilia mioyo yetu mara kwa mara kwa injili ya

maji na Roho. Kadri tunavyoendelea kuitumikia injili ya maji na Roho, ni hakika kuwa hatutaweza kuipalilia mioyo yetu mara kwa mara. Ingawa ardhi ambayo haijalimwa inaweza kuleta raha ya kimwili kwa mkulima, ukweli ni kuwa mwishowe ardhi hiyo itazalisha magugu yasiyoweza kuliwa. Ardhi hutoa mazao yanaliwa ikiwa itakuwa imelimwa, imepandwa, imewekewa mbolea, na ikiwa imemwagiliwa. Ndugu waamini wenzangu, je, mnataka kuwa watu msio na maana na pengine kuwa watu wenye madhara kwa sababu tu ya kutafuta starehe katika maisha yenu?

Kwa kweli hatupaswi kabisa kutamani katika mioyo yetu kukwepa kuitumikia injili ya maji na Roho. Ikiwa tutashindwa kuitumikia injili, basi ni hakika kuwa magugu na aina nyingine za mawazo maovu zitaota katika mioyo yetu. Na hapo tutakabiliana na kifo kibaya. Mioyo yetu ni misafi kwa kuwa tunaamini na kuitumikia injili ya maji na Roho. Ikiwa hatutafanya hivyo, basi ni hakika mioyo yetu itachafuka.

Katika Biblia, mfano wa magugu una maanisha kuwa ni wana wa yule mwovu (Mathayo 13:30). Hata hivyo, ni aibu kuona kuwa kuna watu ambao wanajiinua isivyostahili. Baadhi ya watu wanaeleza kuwa hata magugu yana thamani yake kwa kuwa magugu pia yanaweza kutoa mbegu zake. Kwa kweli ni aibu unaopona kuwa watu wa jinsi hii wanashindwa kuelewa kuwa wao ni mbegu mbaya ambazo zinatakiwa kuondolewa toka katika shamba.

Hili ni Neno la Mungu. Nikisema katika ukweli halisi, watu ambao hawaitumikii injili ya maji na Roho mara nyingi huishia kuwa waovu. Ndio maana ninawaeleza kuitumikia injili ya maji na Roho hata kama itakuwa ni vigumu kwenu kufanya hivyo. Ikiwa tutayakana mawazo yetu ya kimwili na kisha tukaitumikia injili ya maji na Roho, basi ni hakika kuwa tutazaa matunda mengi kutokana na injili tunayoitumikia. Sio tu kuwa tutazaa

matunda mengi ya kiroho na kuiimarisha imani yetu, basli tutazaa pia matunda mengi sana kwa upande wa vitu na mali.

Mimi nina furaha sana kutokana na Mungu na kutokana na injili ya maji na Roho. Na kwa hakika ninashukuru. Mimi ninafuraha sana ninapoitenda kazi ya Mungu. Kadri ninavyoendelea kuitumikia injili ya maji na Roho ndivyo ninavyozidi kuwa mvumilivu, ndivyo ninavyozidi kukutana na Roho Mtakatifu na ninamuona akifanya kazi kwa nguvu ndani ya moyo wangu huku akinifariji zaidi, ndivyo ninavyoona Roho Mtakatifu akinitia nguvu zaidi, na zaidi ya yote ninamuona Roho Mtakatifu akinibariki. Ninafuraha sana kwa kuwa Mungu ametubariki sisi sote katika mwili na katika roho.

Badala ya kutafuta faraja na starehe ya mwili, ninatumaini kuwa mnafurahia kuishi kwa ajili ya injili ya maji na Roho. Ikiwa tutakabiliana na magumu au furaha, basi hayo yote yanapaswa kushughulikiwa ndani ya Bwana. Bila kujalisha kitu chochote, tunapaswa kujitoa maisha yetu kwa ajili ya kazi za Mungu.

“Nimesulibiwa pamoja na Kristo; lakini ni hai; wala si mimi tena, bali Kristo yu hai ndani yangu; na uhai nilio nao sasa katika mwili, ninao katika imani ya Mwana wa Mungu, ambaye alinipenda, akajitoa nafsi yake kwa ajili yangu” (Wagalatia 2:20). Mtume Paulo aliyatoa maisha yake yote kwa ajili ya Yesu Kristo. Sio kwa Mtume Paulo peke yake bali sisi pia tumeyatoa maisha yetu kwa ajili ya kuieneza injili. “kwa hakika nitafanikiwa katika injili.” Tunapoazimia kufanya hivyo, ni hakika kuwa Mungu atafanya kazi ndani yetu na atatubariki na kutuwezesha kuwa watu wa imani. Ikiwa tutajitoa kwa ajili ya kazi za Mungu kwa imani, basi miili yetu itazaa matunda mengi na tutafikia hatua ya kuisha maisha yenye kufanikiwa chini ya baraka za Mungu.

Ninamshukuru sana Mungu. ☒

Tunahesabiwa Haki kwa Imani Safi Tu

< Wagalatia 2:11-21 >

“Lakini Kefa alipokuja Antiokia, nalishindana naye uso kwa uso, kwa sababu alistahili hukumu. Kwa maana kabla hawajaja watu kadha wa kadha waliotoka kwa Yakobo, alikuwa akila pamoja na watu wa Mataifa; lakini walipokuja wao, akarudi nyuma akajitenga, huku akiwaogopa waliotahiriwa. Na hao Wayahudi wengine wakajigeuza pamoja naye, hata na Barnaba pia akachukuliwa na unafiki wao. Walakini, nilipoona ya kuwa njia yao haiendi sawasawa na ile kweli ya Injili, nalimwambia Kefa mbele ya wote, Ikiwa wewe uliye Myahudi wafuata desturi za Mataifa, wala si za Wayahudi, kwa nini unawashurutisha Mataifa kufuata desturi za Wayahudi? Sisi tulio Wayahudi kwa asili, wala si wakosaji wa Mataifa, hali tukijua ya kuwa mwanadamu hahesabiwi haki kwa matendo ya sheria, bali kwa imani ya Kristo Yesu; sisi tulimwamini Kristo Yesu ili tuhesabiwe haki kwa imani ya Kristo, wala si kwa matendo ya sheria; maana kwa matendo ya sheria hakuna mwenye mwili atakayehesabiwa haki. Lakini ikiwa sisi wenyewe, kwa kutafuta kuhesabiwa haki katika Kristo, tulionekana kuwa wenye dhambi, je! Kristo amekuwa mtumishi wa dhambi? Hasha! Maana nikiyajenga tena yale niliyoyabomoa, naonyesha ya kuwa mimi wenyewe ni mkosaji. Maana mimi kwa njia ya sheria naliifia sheria ili nimwishie Mungu. Nimesulibiwa pamoja na Kristo; lakini ni hai; wala

si mimi tena, bali Kristo yu hai ndani yangu; na uhai nilio nao sasa katika mwili, ninao katika imani ya Mwana wa Mungu, ambaye alinipenda, akajitoa nafsi yake kwa ajili yangu. Siibatili neema ya Mungu; maana, ikiwa haki hupatikana kwa njia ya sheria, basi Kristo alikufa bure.”

Kabla sijaanza mahubiri katika kifungu hiki, hebu tusome kwa pamoja Wagalatia 5:2-3: *“Tazama, mimi Paulo nawaambia ninyi ya kwamba, mkitahiriwa, Kristo hatawafaidia neno. Tena namshuhudia kila mtu atahiriwaye, kwamba ni wajibu wake kuitimiza torati yote.”* Nimewaomba hapa msome Wagalatia 5:2-3 ili kwa pamoja tuweze kuona ni kwa nini Mtume Paulo aliuandika waraka kwa Wagalatia, na baada ya hapo ninaweza kuendelea na mahubiri yangu katika sura ya 2.

Ni matatizo gani ambayo Kanisa la Galatia lilikabiliana nayo? Tofauti na ilivyokuwa katika kanisa la Wakorintho, tatizo la makanisa ya Galatia lilikuwau ni kuhusu suala la tohara. Katika makanisa ya Galatia kulikuwa na watu wengi ambao walikuwa wametahiriwa, na kulikuwa na watu wengi waliokuwa wakisisitiza juu ya tohara ya kimwili. Kwa maneno mengine, katika makanisa ya Galatia kulikuwa na watu walisisitiza juu ya tohara huku wakidai kuwa yeyote aliyejiunga na kanisa alipaswa kutahiriwa. Jambo hili lilimfanya Mtume Paulo kulisemea jambo hilo.

Watu wa Israeli waliamini kuwa kutahiriwa ilikuwa ni ishara ya kuwa mtu amefanyika kuwa wa ukoo wa Ibrahimu, yaani watu wa Mungu. Lakini tatizo ni kwamba katika makanisa haya ya Galatia kulikuwemo na mchanganyiko wa Wayahudi na Wamataifa. Hivyo, wakati baadhi ya watu waliposisitiza juu ya tohara, ni hakika kuwa watu wengi sana walitahiriwa. Basi baada ya Mtume Paulo kuona yaliyokuwa

yakitokea katika makanisa ya Galatia, alitambua kuwa jambo hilo kama lisingeshughulikiwa lingeweza kuleta matatizo makubwa. Ndio maana Mtume Paulo aliwatia moyo waamini wa Galatia kwa waraka wake. Kama tulivyokwisha kusoma, Mtume Paulo alisema hivi, *“Mkitahiriwa, Kristo hatawafaidia neno.”* Kufuatana na kifungu hiki, Paulo alikuwa akisema hivi, *“Ikiwa mtatahiriwa, ni faida gani ambayo Kristo atawapatia? Je, mmefanyika kuwa watu wa Mungu kutahiriwa? Ikiwa ni hivyo, ni jambo gani basi ambalo Yesu amelifanya kwa ajili yenu?”*

Kwa kweli, tohara haina faida yoyote ile. Na kinyume chake tohara itamfanya mtu atengwe na neema ya Mungu. Paulo alimaanisha hivi, *“Wale wanaosisitizia juu ya tohara ya kimwili na wale wanaotaka kutahiriwa kimwili wanatakiwa kuifuata Sheria yote ya Mungu. Hii ina maanisha kuwa ni lazima uishike Sheria yote, je, unaweza kuishika hiyo Sheria yote?”* Kwa maneno mengine Mtume Paulo alikuwa akiandika waraka wa kuwajenga na kuwasahihisha wanatohara katika makanisa ya Galatia. Nyaraka za Paulo zilishughulikia matatizo ya kiroho ambayo kila kanisa lilikuwa nanyo, na ndio maana Mtume Paulo aliyaandikia makanisa ya Galatia kutokana na matatizo waliyokuwa nayo, na alifanya hivyo kutokana na wale waliodai kuwa watu wangeluweza kuwa watu wa Mungu ikiwa tu wangelitahiriwa kimwili.

Tunapokiangalia kifungu cha leo cha Maandiko hali tukiwa na ufahamu huu, basi hapo tunaweza kufahamu sawasawa kile ambacho kifungu cha leo kinatueleza.

Hebu tusome Wagalatia 2:11-13 kwa mara nyingine tena: *“Lakini Kefa alipokuja Antiokia, nalishindana naye uso kwa uso, kwa sababu alistahili hukumu. Kwa maana kabla hawajaja watu kadha wa kadha waliotoka kwa Yakobo, alikuwa akila pamoja na watu wa Mataifa; lakini walipokuja wao, akarudi nyuma akajitenga, huku akiwaogopa*

waliotahiriwa. Na hao Wayahudi wengine wakajigeuza pamoja naye, hata na Barnaba pia akachukuliwa na unafiki wao.”

Paulo anaeleza hapa kuwa wakati Petro alipokuja kutoka Antiokia alishindana naye uso kwa uso, kwa kuwa Petro alipaswa kulaumiwa. Kwa nini Petro alimkemea Petro? Ni kwa sababu Petro alikuwa ni mnafiki. Ni unafiki gani ambao Petro alikuwa ameufanya? Unafiki huu ulitokea wakati Petro alipokuwa akila pamoja na Wamataifa. Baadhi ya watu toka kwa Yakobo walimjia Petro, na watu hawa walikuwa ni wanatohara. Wanatohara ni wale ambao pamoja na kumwamini Yesu walisisitiza kuwa waamini ni lazima watahiriwe. Basi wakati wanatohara walipokuja, basi huku akiwahofia, Petro alijitenga kula pamoja na Wamataifa. Baada ya Paulo kuliona jambo hili alimkemea Petro. Tunapokiangalia kifungu cha leo cha Maandiko, tunaweza kuona kuwa Petro aliwaogopa wanatohara kiasi cha kujitenga na kutokura na Wamataifa na kukimbia kujiunga nao hao wanatohara.

Hao wanatohara ambao Petro aliwahofia waliendelea kutoa hoja kuwa hata watakatifu ni lazima watahiriwe ili waweze kuwa wana wa Mungu. Na walidai kuwa watu wasiotahiriwa hawakustahili kuwa watu wa Mungu, walitoa hoja kuwa watu hao wanapaswa kutahiriwa kimwili kama vile Ibrahimu alivyotahiriwa. Msingi wa hoja hiyo ulikuwa ni nini? Ulikuwa ni ufahamu kuwa wale waliotahiriwa ndio watu wanaokubaliwa na Mungu. Kwa kuwa Petro alikuwa akiwahofia wanatohara ndio maana aliweza kujitenga na Wamataifa.

Hii inaonyesha kuwa wanatohara walikuwa na ushawishi mkubwa sana katika Kanisa. Na kwa sababu hiyo waamini wengi sana katika makanisa ya Galatia walitahiriwa kimwili. Mtume Paulo alikasirishwa na hali hiyo. Paulo aliudhiwa sana kwa kuwa wanatohara walikuwa ni mashuhuri sana kiasi kuwa ilionekana ni kana kwamba hakuna njia nyingine ya kuweza

kuwazuia. Tumeona kuwa hata Petro alikimbia na kujitenga. Wanatohara walisisitiza kuwa ingawa watu wanatakiwa kumwamini Yesu, basi wanaume wote ni lazima watahiriwe kikamilifu, na walikataa kuwatambua wale ambao walikuwa hawajatahiriwa hata kama walikuwa ni watakatifu. Wao waliwainua na kuwatambua wale waliokuwa wametahiriwa.

Hebu tuangalie Wagalatia 2:14-16: *“Walakini, nilipoona ya kuwa njia yao haiendi sawasawa na ile kweli ya Injili, nalimwambia Kefa mbele ya wote, Ikiwa wewe uliye Myahudi wafuata desturi za Mataifa, wala si za Wayahudi, kwa nini unawashurutisha Mataifa kufuata desturi za Wayahudi? Sisi tulio Wayahudi kwa asili, wala si wakosaji wa Mataifa, hali tukijua ya kuwa mwanadamu hahesabiwi haki kwa matendo ya sheria, bali kwa imani ya Kristo Yesu; sisi tulimwamini Kristo Yesu ili tuhesabiwe haki kwa imani ya Kristo, wala si kwa matendo ya sheria; maana kwa matendo ya sheria hakuna mwenye mwili atakayehesabiwa haki.”*

Mtume Paulo alimkemea Petro kwa unafiki wake akisema, *“Ikiwa wewe uliye Myahudi wafuata desturi za Mataifa, wala si za Wayahudi, kwa nini unawashurutisha Mataifa kufuata desturi za Wayahudi?”* Kisha Paulo akasema kuwa hakuna mwanadamu anayehesabiwa haki kwa matendo ya Sheria. Paulo alisema hivyo ili kusahihisha upotofu wa wanatohara na alisema hivyo hali akiwa na imani katika Yesu Kristo. Kadri wanatohara walivyozidi kuwa mashuhuri, Paulo aliwataka kuwaeleza ukweli na kuyasahihisha makosa yao, na katika mazingira haya fursa nzuri ilikuwa imejitokeza. Mtume Petro alianza kwa kumkemea Petro na hatimaye akaikuza hotuba yake huku akikemea upotoshaji na makosa ya wanatohara.

Paulo alieleza wazi kuwa, *“Kwa matendo ya sheria hakuna mwenye mwili atakayehesabiwa haki.”* Mtume Paulo alitumia sentensi kuhusu “matendo ya Sheria” kama kiini cha

kuwapinga kwa sababu alitaka kusesitizia kuwa mtu hawezi kuwa mwenye haki kwa sababu ya kutahiriwa. Sheria yenyewe ni pana sana na ina mambo mengi sana. Katika makanisa ya Galatia kulikuwa na wanatohara ambao walidai kuwa watakatifu wanaweza kuwa watu wa Mungu ikiwa watatahiriwa kimwili. Ndio maana Paulo aliwaeleza kuwa, “Watu hawawezi kuwa wasio na dhambi na wala hawawezi kufanywa watu wa Mungu kwa sababu ya matendo ya Sheria, bali watu wanahesabiwa haki kwa kumwamini Yesu Kristo.” Je, huu si ndio ukweli, hakuna mwili unaoweza kuitiwa usio na dhambi mbele za Mungu. Kwa maneno mengine, Paulo alikuwa akiwakemea wanatohara huku akiweka wazi kuwa tunahesabiwa haki kwa kuamini injili ya maji na Roho.

Katika siku za Kanisa la Mwanzo, kulikuwa na wale waliokuwa wakitilia mkazo na kutete tohara ya kimwili katika Kanisa la Mungu. Waliendelea kudai kuwa waamini wanaweza kuwa watu wa Mungu ikiwa tu watatahiriwa kimwili. Tunachopaswa kukitambua hapa ni maana ya tukio hili lilivyo. Sasa, katika kipindi hiki cha sasa, tunawezaje kuutumia mfanyao huu wa wanatohara kwetu sisi? Tunaweza kuutumia mfano huo kwenye imani ya wale wanaoamini kuwa dhambi zao zinatoweshewa pale wanapotoa sala za toba. Wale wanaolitetea fundisho la sala za toba leo hii wanadai kuwa mtu anapotenda dhambi baada ya kuwa amemwamini Yesu, basi dhambi hiyo inaweza kutoweshwa kwa kufanya sala za toba.

Je, ni kweli kuwa dhambi zetu zinatoweshwa mbali kupitia sala zetu za toba? Paulo alisema hapa kuwa mwanadamu hahesabiwi haki kwa matendo ya Sheria, kama ni hivyo dhambi za mtu zinaweza kutoweshwa kwa kupitia sala za toba? Hapana, mtu wa jinsi hiyo anaweza kuona amani kwa muda mfupi baada ya kusali toba, lakini dhambi zake haziwezi kamwe kuondolewa na kusafishwa milele kwa sala hizo za toba. Hii ndio maana

Paulo alisema hivi, *“Mwanadamu hahesabiwi haki kwa matendo ya sheria,”* Ni lazima tutambue kuwa mtu anahesabiwa haki kwa kumwamini Ysu Kristo kupitia Neno la injili ya maji na Roho. Ndio mana Paulo alisema hivi, *“Hali tukijua ya kuwa mwanadamu hahesabiwi haki kwa matendo ya sheria, bali kwa imani ya Kristo Yesu; sisi tulimwamini Kristo Yesu ili tuhesabiwe haki kwa imani ya Kristo, wala si kwa matendo ya sheria; maana kwa matendo ya sheria hakuna mwenye mwili atakayehesabiwa haki (Wagalatia 2:16).*

Ninalirudia jambo hili tena na tena kwa sababu kuna Wakristo wengi sana ulimwenguni kote ambao wanaamini kuwa dhambi zao zinatoweshwa wakati wanapofanya sala za toba. Madai ya jinsi hiyo hayaendani kabisa na Neno la Mungu, lakini pamoja na ukweli huu, sala za toba zimekuwa ninyingi mno katika makanisa mengi hapa duniani. Imani hii potofu ya sala za toba katika makanisa mengi ipo sawa na imani ya kisheria ya wanatohara. Watu hawa ni wanafiki, na wanajaribu kuziosha dhambi zao kwa kupitia sala zao za toba jambo ambalo ni kosa mbele za Mungu. Hata hivyo, Wakristo wengi duniani kote na baadhi ya waamini wa injili ya maji na Roho hawaufahamu vizuri upotofu wa jambo hili.

Kudai kuwa mtu anaweza kuhesabiwa haki kwa kupitia sala za toba au kupitia utakaso unaoongezeka ni sawa na upotoshaji ule ule wa wanatohara tulioona katika kifungu cha leo cha Maandiko ambapo wanatohara walikuwa waking'ang'ania juu ya tohara ya kimwili ili waweze kuwa watu wa Mungu. Hivyo, ni makosa makubwa kabisa kudai kuwa mtu anapaswa kuamini damu ya Yesu Msalabani, na kwamba dhambi zitakazofuatia hapo zitatoweshwa kwa kufanya sala za toba. Biblia inaeleza wazi kuwa, *The Bible clearly states, “Mwanadamu hahesabiwi haki kwa matendo ya sheria, bali kwa imani ya Kristo Yesu” (Wagalatia 2:16).* Kwa maneno mengine,

tunahesabiwa haki kwa kuwa tunaamini kuwa Yesu Kristo amezitoweshea mbali dhambi zetu zote kwa kupitia injili ya maji na Roho, na kwamba hatuwi wasio na dhambi kwa kufanya sala za toba au kutahiriwa kimwili. Kwa kweli hivyo sivyo. Hiki ndicho Mtume Paulo anachokieleza hapa.

Kati ya Wakristo bilioni moja katika ulimwengu huu, unafikiri ni wangapi wanaofahamu kuwa dhambi zao hazitoweshwi kwa kupitia sala zao za toba? Wenye haki hawapaswi kufanya sala za toba, bali wanapaswa kukiri na kufanya ungamo la kweli. Siku hizi sala za toba zinachukuliwa kama ni sehemu ya utaratibu katika kumwamini Bwana na kumfuata. Kama vile Wakatoliki wanavyoamini kuwa wanaweza kuoshwa dhambi zao kwa kupitia sakramenti ya kitubio, Waprotestanti wengi wanaamini kimakosa kuwa dhambi zao zinazoshwa kwa kupitia sala za toba. Kwa kuwa Wakristo takribani wote hapa ulimwenguni wapo hivyo, kwa kweli wengi wao hawafahamu jinsi imani yao hiyo ilivyo na makosa. Baadhi yao wanaweza kuwa na ufahamu, lakini wengine wanashindwa kuuthibitisha ufahamu huo kwa msingi wa kibiblia.

Mtu hawezi kuwa asiye na dhambi kwa kutumia sala za toba, bali dhambi za mtu zinaweza kutoweshwa na kuwa nyeupe kama theluji kwa kuamini katika injili ya maji na Roho. Ni nani basi kati ya Wakristo leo hii wanaofikiri kuwa sala za toba ni imani yenye makosa? Ni makosa makubwa kujaribu kuzioshelea mbali dhambi kwa kupitia sala za toba, lakini ni nani anayeweza kulionyesha hilo? Kwa kuwa sala za toba zimekubaliwa vizuri katika Ukristo wa leo kama sehemu ya utaratibu wa mtu kuzioshelea dhambi zake, basi kitendo cha kuonyesha upotofu wa imani hiyo ni kama vile kuamsha matengenezo ya kiimani ambayo ni makubwa zaidi kuliko wakati ule Luther alipoanzisha matengenezo kwa kusema kinyume na Upapa. Watu wanaamini kuwa ili kuziosha dhambi

walizozifanya baada ya kuwa wameiamini damu ya Msalaba, ni lazima watoea sala za toba, lakini Mtume Paulo anatuthibitishia jinsi imani hii ilivyo na makosa. Kila Mkristo duniani ni lazima afahamu kile ambacho Mtume Paulo amekisema kwa makanisa ya Galatia: “*Mkitahiriwa, Kristo hatawafaidia neno*” (*Wagalatia 5:2*).

Wakristo ulimwenguni kote wanajaribu kupokea ondoleo la dhambi zao kwa kupitia sala za toba. Kwa kweli hili si kosa kubwa? Haijalishi ikiwa unaiamini injili ya maji na Roho, ikiwa unadai kumwamini Yesu kuwa ni Mwokozi wako, basi unapaswa kutambua kuwa imani inayoamini kuwa unaweza kuondolewa dhambi zako kwa kupitia sala za toba ni imani inayokutenga na Kristo—kwa kweli ikiwa unaamini hivyo ni hakika kuwa umeshaondolewa mbali na Kristo.

Katika jamii ya Wayahudi, wanaume walihesabiwa kuwa ni watu wa Mungu ikiwa tu walikuwa wametahiriwa. Mara baada ya wanaume wa Kiyahudi kutahiriwa kimwili, walitambuliwa kuwa wao ni watu wa Mungu. Vipi kuhusu Wayahudi ambao walikuwa hawajatahiriwa? Wayahudi wasio tahiriwa hawakuhesabiwa kama Wayahudi. Maana kati ya Wayahudi, tohara ilikuwa ni ishara ya kuonyesha kuwa wao ni watu wa Mungu. Kwa kweli katika Agano la Kale Mungu aliahidi kuwa, “Nitakuwa Mungu wako na Mungu wa wana wako, lakini wewe pamoja na wana wako ni lazima mtahiriwe.” Hivyo, inasemekana kuwa katika Agano la Kale tohara ilikuwa ni ishara ya kuwa watu wa Mungu.

Katika kipindi cha Agano Jipya, ni jambo gani ambalo Mtume Paulo alilisema katika Warumi sura ya 2? Paulo alisema kuwa, “*Na tohara ni ya moyo*” (*Warumi 2:29*). Paulo alizungumzia kuwa mtu hapaswi kutahiriwa katika mwili, bali anapaswa kutahiriwa katika moyo. Sisi ni lazima tutahiriwe mioyo yetu kwa imani katika injili ya maji na Roho huku

tukiamini kuwa Yesu Kristo amezitoweshea mbali dhambi zetu kwa kupitia ubatizo na damu yake aliyoimwaga. Kwa maneno mengine, ni lazima tuupokee wokovu wetu wa kweli kwa kuamini kwa moyo kuwa Yesu alizichukua dhambi zetu zote katika mwili wake kwa kubatizwa na Yohana Mbatizaji, kwa kufa Msalabani, na kwa sababu hiyo ametuokoa toka katika dhambi zote za ulimwengu.

Sisi tumeokolewa kwa kuuamini Ukweli huu kwa kuwa Yesu Kristo alikuja hapa duniani na akatuokoa na dhambi za ulimwengu kwa kupitia injili ya maji na Roho; dhambi zetu hazioshelewi mbali kutokana na sala zetu binafsi za toba. Kwa kuwa Yesu ametuokoa kikamilifu kwa kupitia matendo yake ya haki, basi ndio maana tumeweza kuokolewa kwa imani yetu katika injili kamilifu, na tumefanyika watu wa Mungu, watu wasio na dhambi na waliounganishwa na Kristo, na tumehesabiwa haki. Kwa kweli hakuna njia nyingine inayoweza kutufanya sisi kuwa watu wa Mungu zaidi ya hii. Hakuna mtakatifu anayeweza kuziondolea mbali dhambi zake kwa kupitia sala za toba, na wala mtakatifu hawezi kuwa mtu wa Mungu kwa kutahiriwa kimwili. Kuamini kinyume na hapo ni jambo lisilo na maana kabisa.

Tohara yako ya kiroho inatokana na imani yako katika injili ya maji na Roho, na haitokani na matendo yako binafsi. Unapomwamini Yesu Kristo kuwa ni Mwokozi wako, na unapoamini kuwa Yesu amekuokoa kwa kubatizwa kwake, kwa kufa Msalabani, na kwa kufufuka kwake toka kwa wafu, basi hapo unaweza kupokea ondoleo la dhambi zako mara moja na kwa wote. Hakuna njia nyingine ya kuweza kupokea ondoleo la dhambi zetu zaidi ya kuamini kuwa Yesu Kristo amezitoweshea mbali dhambi zetu. Kwa kweli Mungu hajatupatia namna nyingine zaidi ya hiyo.

Haijalishi ikiwa Wakristo wamejawa na uamsho,

haijalishi ikiwa wameona maono, na haijalishi ikiwa wameisikia sauti ya Bwana katika ndogo zao au hata wakiwa macho, mambo haya yote kimsingi hayana maana. Haijalishi jinsi mtu anavyoweza kufanya sala za toba kwa Yesu kwa juhudi, na haijalishi mtu anavyoweza kuhudhuria kwa uaminifu sala za asubuhi, na haijalishi ikiwa mtu ametahiriwa kimwili kwa kufuata sheria, ukweli ni kuwa mambo hayo yote hayahusiani kwa lolote na wokovu wa mtu. Kuishika Sabato kwa uaminifu au kuzishika sikukuu nyingine za Agano la Kale ni mambo yasiyo na maana kwa wokovu wa mtu.

Wokovu wetu umekuja kikamilifu kwa kupitia imani katika injili ya maji na Roho. Kwa kweli tunaweza kuokolewa kwa hakika ikiwa tumwamini Yesu Kristo kuwa ni Mwokozi wetu aliyekuja kwa maji na kwa Roho. Wokovu wetu w akweli unapatikana kwa kupitia imani katika injili ya maji na Roho, na haujumuishi jitihada zozote binafsi hata kwa asilimia 0.1%. Ile fikra ya kwamba tunaoshwa dhambi zetu kwa sababu tumefanya sala za toba au kuwa tumefanyika watu wa Mungu kwa sababu tulitahiriwa—basi fikra zote za namna hiyo ambazo zinajumuisha matendo yetu binafsi hata kama ni kwa asilimi 0.1% zinauharibu wokovu wa Bwana. Ikiwa matendo yetu yanahitajika hata kama ni kwa asilimi 0.1% ili kuupata wokovu, basi hiyo itamaanisha kuwa Yesu Kristo alishindwa kutuokoa kikamilifu kwa kupitia injili ya maji na Roho. Pamoja na hayo Yesu Kristo ametuokoa kikamilifu toka katika dhambi zetu zote.

Hivyo, ikiwa tutamwamini Yesu na yale mambo ambayo amefanya kwa ajili yetu, basi ni hakika kuwa tutaokolewa toka katika dhambi zetu. Kwa upande wetu ni hakika kuwa hatuna kitu cha kufanya kwa matendo. Kwa hakika hakuna jambo jingine na namna nyingine zaidi ya kuiamini injili ya maji na Roho katika mioyo yetu. Lakini pamoja na ukweli huu, ikiwa bado kuna mtu anataka kutahiriwa kimwili au kufanya sala za

toba, basi mtu huyo ni lazima afahamu kuwa anaomba kuwa nje ya neema ya Mungu. Huyo atakuwa ni mtu ambaye amedhamiria kuangukia mbali na neema ya Mungu, yaani atakuwa anataka kuwa mbali na wokovu ambayo Mungu ametupatia.

Kwa hiyo, kila mtu hapa ulimwenguni ni lazima afahamu Ukweli wa injili ya maji na Roho, kila mtu ni lazima aache tabia yake ya kujaribu kuupata wokovu kwa kuzitegemea jitahada zake binafsi. Kati yenu ninyi ambao mmo katika Kanisa hili, na kwa Wakristo wote ulimwenguni kote, wale ambao pengine waliamini kuwa dhambi zao zilitoweshwa mbali kwa sababu ya sala za toba ni lazima watambue kuwa wametenda dhambi kuu mbele za Mungu. Ni lazima waachane na imani yao ya kimwili na kisha waliamini injili ya maji na Roho. Na ni lazima watambue jinsi imani ya sala za toba ilivyo na makosa.

Kufanya sala za toba kunaweza kuonekana kuwa ni jambo jema sana, lakini jambo hilo ni baya sana. Watu hawapaswi kufanya sala za toba bali wanapaswa kutubu kwanza. Kutubu kwa upande wetu maana yake ni kugeuka na kuyaacha matendo yetu mabaya. Ni lazima tutubu mbele za Mungu, halafu ikiwa tunataka sasa kuungama dhambi zetu basi tufanye hizo sala za kuungama. Tunapaswa kuungama mbele za Mungu na kuomba tukisema hivi, “Nimetenda dhambi hizi. Lakini wewe umeshaniokoa toka katika dhambi hizi pia. Nina hakika kuwa umezitoweshea mbali hata hizi dhambi kwa kupitia injili ya maji na Roho. Tafadhali, naomba unishike ili nisiweze kujaribuwa na maovu haya tena.” Hii ndio sala sahihi ya ungamo baada ya kuwa tumezitambua dhambi zetu. Dhambi zetu binafsi haziwezi kutoweshwa kwa kufanya sala za toba.

Kama ulikuwa unaelekea upande fulani, kisha utakatambua kuwa mwelekeo huo ulikuwa si sahihi, basi ni lazima ugeuke na kuitafuta njia sahihi. Kwa hiyo watu

wanapaswa kugeuka na kuziacha njia zao mbaya za kiimani na kisha kuitafuta njia sahihi ya kumwamini Yesu. Sala za toba, ambapo watu husema tu kwa maneno, “Nimekosea. Tafadhali naomba nisamehe, kwa kweli sintafanya mambo hayo tena. Ninaamini hivyo,” ni imani yenye makosa makubwa.

Lakini katika Ukristo wa leo hii, kuna wale ambao bado wanadai wanaweza kuziosha dhambi zao kwa kupitia sala zao za toba, na kwa sababu hiyo watu hawa wanajigeuza wenyewe ili kuwa maadui wakuu wa Mungu. Ni makosa makubwa kuamin kuwa mtu anaweza kuizoshelea mbali dhambi zake kwa kupitia sala zake za toba. Ni vigumu mtu kuondolewa dhambi zake kwa kusema tu “Bwana, sahamani. Tafadhali naomba nisamehe,” na kwa hakika maneno hayo hayawezi kuzifanya dhambi za mtu kutoweshwa. Ni hakika kuwa dhambi za mtu hazitaweza kuondolewa kwa namna hiyo hata kama atakuwa ameitegemea damu ya Bwana pale Msalabani. Hii ni kwa sababu mtu huyo anadharau kazi za Bwana ambazo zipo katika injili ya maji na Roho. Kitendo cha kujaribu kuziosha dhambi binafsi kwa kufanya sala za toba ni kuukanyaga na kuudharau upendo wa Mungu. Ni kitendo cha kuiondoa haki ya Mungu na kisha kuiweka mbele haki binafsi, na kwa sababu hiyo ni kitendo chenye upotoshaji mkubwa.

Sababu inayoufanya Ukristo ulimwenguni kote kuwa katika hali ya matatizo ni kwa sababu ya fundisho la kidini la sala za toba. Hata ikiwa mtu anaiamini injili ya maji na Roho, basi kama mtu huyo anachukuliwa na mkondo huo wa sala za toba, basi imani ya mtu huyo itakuwa imekwisha.

Sasa, kuna tofauti gani kati ya mtu anayeiamini injili ya maji na Roho na mtu anayeamini kuwa dhambi zake zinaweza zinaoshwa kwa kupitia sala zake binafsi za toba? Kwa kweli tunapaswa kulifahamu jambo hili kwa usahihi. Tutakapoifahamu hiyo tofauti ndipo tunapoweza kutambua

makosa yaliyomoo katika sala za toba na tunaweza kuliacha kabisa tendo hilo. Baada ya kuifahamu hiyo tofauti ndipo tunapoweza kuihubiri injili ya maji na Roho kwa wale ambao wanafanya sala za toba kwa juhudi ingawa hazina maana kwao. Ikiwa tunataka kuwaambia kuwa wamefanya makosa, basi inatupasa kwanza kufahamu sawasawa kuhusu makosa yaliyomo kwenye imani hiyo; maana bila kuwa na ufahamu sahihi ni hakika kuwa hatutaweza kuwaambia kuwa wanapaswa kupokea ondoleo lao la dhambi kwa kuiamini injili ya kweli. Ikiwa sisi wenyewe hatutambui uovu uliomo katika sala za toba, basi ni wazi kuwa hatuwezi kuwaeleza wengine kuhusu uovo huo.

Katika kitabu chake kilichoitwa Taaluma ya Vita, Sun Tzu, aliyekuwa mwanamikakati maarufu wa China hapo zamani alisema hivi, “Jifahamu wewe mwenyewe na adui zako, na kwa hakika hutaweza kushindwa vita.” Vivyo hivyo, ni pale tutakapoweza kuonyesha kwa kina na kikamilifu makosa yaliyomo katika imani yao ya sala za toba ndipo tutakapoweza kuihubiri injili ya maji na Roho kwa mafanikio, na ni hakika watakubaliana pamoja nasi. Tunachopaswa kutambua hapa ni kuwa ikiwa mtu anaamini kuwa anaweza kuzioshelea mbali dhambi zake kwa kufanya sala zake za toba, basi ni hakika tutashindwa kumhubiria mtu huyo injili ya maji na Roho. Wakristo wengi ulimwenguni kote wanajaribu kupokea ondoleo la dhambi zao kwa kufanya sala za toba. Ndio maana tunapaswa kuwa na ufahamu sahihi wa upotoshaji uliomo katika fundisho la kidini la sala za toba. Kwa hakika ni muhimu sana kufanya hivi, yaani kuuelewa undani wa imani yao.

Kwa kweli haitakuwa vibaya tukisema kuwa wale wanaodai kuwa wanaoshwa dhambi zao kwa kufanya sala za toba ni watu wasioiamini injili ya maji na Roho iliyotolewa na Yesu Kristo. Hivyo, ni lazima tuihubiri injili hii ya maji na

Roho kwa mtu yeyote yule aliye na aina hii ya imani. Watu wa jinsi hiyo ambao imani yao ipo katika sala za toba kwa ajili ya wokovu wao ni watu wenye makosa makubwa, na kwa sababu hiyo wanapaswa kwanza kuachana kabisa na imani potofu kama hiyo. Baada ya hapo wanapaswa sasa kuiamini injili ya maji na Roho, maana watu hao wanaweza kuokolewa ikiwa tu wataiamini hii injili ya kweli. Ili uweze kuwahubiri watu wengine Ukweli huu, basi unatakiwa uwe na hakika katika moyo wako kuwa umeokolewa toka katika dhambi zako kwa kumwamini Yesu Kristo aliyekuja hapa duniani kwa maji na kwa Roho. Ikiwa wewe mwenyewe huna hakika kuhusu imani yetu hii, basi ni wazi kuwa huwezi kuihubiri injili kwa wale Wakristo ambao wanaamini kuwa wanaweza kuziondoa dhambi zao kwa kupitia sala zao binafsi za toba.

“Lakini ikiwa sisi wenyewe, kwa kutafuta kuhesabiwa haki katika Kristo, tulionekana kuwa wenye dhambi, je! Kristo amekuwa mtumishi wa dhambi? Hasha! Maana nikiyajenga tena yale niliyoyabomoa, naonyesha ya kuwa mimi mwenyewe ni mkosaji” (Wagalatia 2:17-18).

Ikiwa wakati tunatafuta kuhesabiwa haki na Kristo, halafu sisi wenyewe tukaonekana kuwa ni wenye dhambi, basi Kristo atakuwa ni mtumishi wa dhambi? Paulo alisemaha hapana. Anachotueleza hapa Mtume Paulo ni kuwa ikiwa waamini wa injili ya maji na Roho watamwamini Yesu kwa usahihi na kutambua kuwa tohara ya mwili haina maana yoyote ile, basi waamini hawa hawawezi kuwa wenye dhambi tena. Kwa maneno mengine, ikiwa mtu ataiweka mbali imani ya matendo yake binafsi na kisha akamwamini Yesu Kristo kuwa ni Mwokozi wake aliyekuja kwa maji na kwa Roho, basi mtu huyo atakuwa ni mwenye haki na hawezi kamwe kuwa mwenye dhambi.

Mtume Paulo aliendelea kwa kusema hivi, *“Maana*

nikiyajenga tena yale niliyoyabomoa, naonyesha ya kuwa mimi mwenyewe ni mkosaji” Mtume Paulo anaposema “yale niliyoyabomoa” ana maanisha ni Sheria, na hasa kuhusu tohara ya kimwili. Hivyo, katika kifungu hiki, sentensi inayosema, “nikiyajenga tena yale niliyoyabomoa,” inaongelea juu ya jitihada za kujaribu kuwa watu wa Mungu kwa kutahiriwa kimwili. Kwa kuwa tendo hilo ni la kujaribu kupokea ondoleo la dhambi kwa kuishika na kuitenda Sheria, basi Paulo anaweka bayana kuwa tendo hilo litamgeuza mtu yeyote yule kuwa mkosaji anayetenda dhambi dhidi ya Mungu. Paulo alirudia kusema hivyo katika Wagalatia sura ya 3 na katika Warumi sura ya 4. Ni wakati gani ambapo Ibrahimu alifanywa kuwa mwenye haki? Kwa kwaa Ibrahimu aliliamini Neno la Mungu, basi imani yake ilihesabiwa kuwa haki muda mrefu kabla hata ya kutahiriwa. Hii inatuonyesha kuwa Ibrahimu alikuwa amekubaliwa na Mungu kutokana na imani yake katika Neno la Mungu muda mrefu na akawa amehesabiwa kuwa ni mwenye haki.

Ni kitu gani basi ambacho kinatangulia? Ni kutahiriwa kimwili au ni kuwa na imani katika Neno la baraka ambalo Mungu alimwahidia Ibrahimu? Ibrahimu aliliamini Neno la Mungu la ahadi kuwa ataufanya uzao wake kuwa mwingi kama nyota za angani. Na kwa sababu hiyo imani ya Ibrahimu ilikubaliwa. Mungu alilitoa Neno la ahadi kwa Ibrahimu muda mrefu sana hata kabla Ibrahimu hatajatahiriwa, na Ibrahimu aliamini hiyo ahadi ya Mungu. Mungu alimwesabia haki Ibrahimu kutokana na imani yake kwa kuwa alikuwa ameliamini Neno la Mungu la ahadi hata kabla hajatahiriwa, ndipo Mungu akamwambia Ibrahimu atakuwa ni Mungu wa wana wake, akamwambia Ibrahimu anatakiwa kutahiriwa kimwili kama ishara ya ahadi hii. Mungu alisema kuwa tohara ya kimwili ni ishara ya tohara ya kiroho ambayo aliipokea kwa

kupitia imani yake katika Neno la Mungu.

Hivyo hii ina maanisha kuwa Mungu bado anatumiea katika mioyo yetu kuwa wewe na mimi tunaweza kuwa wana wake kwa kuliadini Neno la injili, kwa kweli ashukuriwe Yesu Kristo aliyekuja kwa injili ya maji na Roho. Sisi tunapokea ondoleo la dhambi zetu na kufanyika wenye haki mara moja kwa imani yetu katika injili ya maji na Roho. *“Maana nikiyajenga tena yale niliyoyabomoa, naonyesha ya kuwa mimi mwenyewe ni mkosaji” (Wagalatia 2:18)*. Ikiwa tumekwisha okolewa kwa kumwamini Yesu Kristo aliyekuja kupitia maji na Roho katika mioyo yetu, kisha tukatakiwa kutahiriwa kimwili, unadhani hiyo itamaanisha nini? Kwa hakika tendo hilo la kutahiriwa kimwili litazifuta kazi za Yesu Kristo ambazo ziliyatimiza matakwa yote ya Sheria.

Kwa kweli hatuwezi kuwa watu wasio na dhambi kwa kutahiriwa kimwili. Kama ambavyo imani ya Ibrahimu ilikubaliwa wakati alipoliadini Neno la Mungu, basi ni hakika kuwa dhambi zetu hazitoweshwi kwa kutahiriwa kimwili au kwa kufanya sala za toba. Bali, tunaoshwa dhambi zetu mara moja na kwa wote na tunafanyika wenye haki kwa kumwamini Yesu Kristo aliyekuja kwa injili ya maji na na Roho kuwa ni Mwokozi wetu. Je, mnaamini hivyo? Imani ya jinsi hiyo ndiyo inayoitwa kuhesabiwa haki kwa imani. Tunaweza kuwa wenye haki kwa imani tu. Tunakubaliwa na Mungu kwa imani, na tunaokolewa na kuhesabiwa haki kwa imani. Ikiwa tumehesabiwa haki kwa kuamini katika mioyo yetu injili ya maji na Roho iliyotolewa na Mungu, na kwa kuyaamini yale ambayo Mungu ameyafanya kwa ajili yetu, tunawezaje basi kuyageukia matendo ya kidini ambayo msingi wake ni matendo na si imani? Ndio maana tunasema kuwa sisi tunahesabiwa haki kwa imani. Kuhesabiwa haki kwa imani maana yake ni kuwa tunaipata haki ya Mungu kwa kuliadini

Neno lake.

Mtume Paulo aliweka bayana kuwa hakuna mtu anayeokolewa kupitia tohara ya kimwili. Kupokea tohara ya kimwili hakuwezi kutuokoa; bali tunaweza kuupata wokovu wetu kwa kupokea tohara ya *kiroho*—yaani kwa kuiamini injili ya maji na Roho. Tohara ya kiroho maana yake ni kupokea ondoleo la dhambi katika mioyo yetu kwa kuiamini injili ya maji na Roho. Tunaweza kuzikata na kuziondoa dhambi katika mioyo yetu kwa kupitia hii tohara ya kiroho, ni sawa na wakati Ibrahimu alipolikata govi lake kwa kisu. Hivi ndivyo Mtume Paulo alivyokuwa akimaanisha.

Hebu tuangalie Wagalatia 2:19. *“Maana mimi kwa njia ya sheria naliifia sheria ili nimwishie Mungu.”* Mtume Paulo alieleza kwua alikuwa ameifia Sheria. Paulo hakusema kuwa alikuwa akijaribu kuitenda Sheria. Kwa nini? Paulo alifahamu kuwa ikiwa mtu atasimama mbele ya Sheria basi dhambi zake zitafunuliwa kwa kuwa Sheria ni takatifu sana, ya haki, na njema (Warumi 7:12). Hivyo, Biblia inasema, *“Kwa sababu hakuna mwenye mwili atakayehesabiwa haki mbele zake kwa matendo ya sheria; kwa maana kutambua dhambi huja kwa njia ya sheria”* (Warumi 3:20). Kwa maneno mengine, dhambi za Paulo ziliweza kufunuliwa kwa kupitia Sheria, na akatambua kuwa kwa msingi huo alipaswa kuangamizwa.

Hii ndio maana mbali na kuitetea Sheria, Mtume Paulo alisema kuwa alikuwa ameifia Sheria. Paulo alisema kuwa alikuwa amekufa ili kwamba aweze tena kumwishia Mungu. Hii inamaanisha kuwa Mtume Paulo alilikubali Neno la Mungu. Alilikubali Neno la Mungu lenye ukuu ambalo ni Neno la Ukweli. Kwa kweli hakuna mtu anayeweza kuishika Sheria kikamilifu. Hii ni kwa sababu matakwa ya Sheria ni mengi mno, maana ikiwa mtu angelihesabiwa kuwa haki kwa kuishika Sheria, basi sio tu kwamba alipaswa kutahiriwa, bali

alipaswa pia kuzishika sheria zote 613 zinazoeleza kinachopaswa kufanywa na kile ambacho hakipaswi kufanywa katika maisha ya mtu.

Hivyo, ndio maana Paulo alikiri wazi uwa hakuweza kuishika Sheria yote kikamilifu, pia alieleza kuwa wakati Sheria ya Mungu ilikuwa ni kamilifu na ya haki, yeye alikuwa mchafu na mtu wa mwilini, na kwamba kwa msingi huo alistahili kuangamizwa. Ndio maana Paulo alikiri kuwa badala ya kuishika Sheria, yeye alikuwa ameifia Sheria. Baada ya kuufahamu uhalisia wa Sheria, Paulo hakujaribu tena kuitekeleza Sheria tena, bali aliamua kukiri kuwa alipaswa kufa kutokana na masharti ya Sheria ya Mungu, na ndio maana aliamini hivyo. Na kuanzia hapo aliamua kumwishia Mungu kwa imani. Kwa lugha tofauti, Paulo alitambua kuwa hataweza kuokolewa toka katika dhambi zake isipokuwa tu iwe ni kwa msaada wa Mungu, na ndio maana aliamini injili ya maji na Roho ili Mungu aweze kumwokoza. Paulo alisema kuwa alikuwa ameifia Sheria ili aweze kuonana na Mwokozi na kisha kupokea wokovu toka kwa Mungu. Kwa kupitia Yesu Kristo, Mtume Paulo alifikia hatua ya kupokea maisha mapya kwa kuiamini injili ya maji na Roho. Imani hiyo ya Paulo ndiyo ilimfanya Paulo aweze kuhesabiwa haki kwa imani.

Ndugu waamini wenzangu, ikiwa utashindwa kuufahamu waraka kwa Wagalatia vizuri, ni wazi kuwa huwezi kuupata ule Ukweli. Bila shaka unaweza kufikiria hivi, “Kwa hiyo kulikuwa na wanatohara katika siku za kale. Bila shaka walikuwa wakimsumbua Paulo kuhusiana na mambo ya tohara. Hata Petro alionyesha unafiki, na akakemewa mbele ya watu wengine na Paulo, mtu ambaye alikuwa ni mdogo wake kiimani. Kama ni hivyo nadhani hakuna jambo la msingi. Bila shaka hakuna jambo la maana.”

Hata hivyo, ni lazima utambue kuwa kifungu hiki

kilichoandikwa katika Biblia kilikuwa na lengo la kutufundisha sisi ili tuweze kujifunza leo hii, na ni muhimu sana kwako wewe kuufahamu Waraka huu vizuri. Kama kisingelikuwa Kitabu cha Wagalatia, ni hakika kuwa ingelikuwa vigumu sana kwetu sisi kuyaelezea mambo haya, hasa kuwaeleza wale wanaoamini kuwa ondoleo la dhambi zao linapatikana kwa kupitia sala zao binafsi, kuwa imani yao ina makosa. Pia ni makosa kuendelea kusema pasipo ushahidi wa maandiko kuwa “Mna makosa! Maana ukifanya hivyo ni sawa na ‘mtazamo usio na mashiko unaokazia hivi “Mimi nipo sahihi, kwa hiyo wewe umekosea. Hakuna haja ya kutoa sababu; hivyo ndivyo ilivyo.” Lakini mtazamo wa jinsi hii hauna maana, ni kama vile mtazamo aliokuwa nao Hitler wakati alipodai kuwa Wajerumani ni bora kuliko watu wengine duniani. Jambo muhimu tunalopaswa kulifanya ni kuelezea, na kutoa sababu na kufafanua ili kutoa hoja kuhusu ubaya wa imani ya wanatohara. Katika kifungu cha leo cha Maandiko, Paulo anaeleza waziwazi kuwa kukazia suala to tohara ni kufanya unafiki mkubwa. Kwa kupitia vifungu hivi katika Wagalatia, Wakristo wa leo wanaweza kutambua jinsi ilivyo makosa kuzitegemea sala za toba na kwa sababu hiyo wanaweza kuing’oa imani yao potofu.

Hebu tuangalie Wagalatia 2:20. *“Nimesulibiwa pamoja na Kristo; lakini ni hai; wala si mimi tena, bali Kristo yu hai ndani yangu; na uhai nilio nao sasa katika mwili, ninao katika imani ya Mwana wa Mungu, ambaye alinipenda, akajitoa nafsi yake kwa ajili yangu.”*

Kifungu hicho hapo juu kinaonyesha juu ya kiini cha imani ya Paulo. Paulo alimwamini Yesu kikamilifu: Paulo hakuyaonyesha matendo yake binafsi, bali aliyaamini matendo ya Kristo kwa moyo wake wake; na aliamini kuwa Yesu Kristo alikuja hapa duniani, akazichukua katika mwili wake dhambi

zake kwa ubatizo wake, na kwamba alisulubiwa na kisha kufa kwa ajili yake, kisha akafufuka toka kwa wafu kwa ajili yake na kwamba kwa sababu akawa amefufuliwa pamoja na Kristo. Kwa lugha nyingine, Paulo aliamini jinsi Yesu Kristo alivyofanyika kuwa Mwokozi wake mkamilifu kwa kina.

Ndio maana Paulo aliweza kusema hivi, “*Nimesulibiwa pamoja na Kristo*” (*Wagalatia 2:20*). Huu ulikuwa ni ukiri wa imani yake ambayo ilimwamini kikamilifu Yesu kuwa ni Mwaokozi. Ulikuwa ni ukiri wa imani ambayo uliamini kwa moyo wake kuwa Yesu alizichukua katika mwili wake dhambi za ulimwengu kwa kubatizwa na Yohana Mbatizaji, kwa kufa Msalabani, na kwa kufufuka toka kwa wafu, na kwamba kwa sababu hiyo Yesu amemkomboa kikamilifu toka katika dhambi zake zote. Ukiri huu unazungumzia juu ya imani ya mtu iliyo sahihi. Mtume Paulo alisema kuwa ni kwa kupitia imani hii ndio maana aliweza kufa pamoja na Kristo na kisha kufufuliwa pamoja na Kristo. Hiyo ndiyo iliyokuwa imani ya Mtume Paulo.

Ndugu waamini wenzangu, Je, Mtume Paulo alisema kuwa dhambi zako zinaoshelewa mbali au zinaweza kutakaswa kwa kupitia sala zako binafsi za toba? Kipindi hicho wakati wanatohara walipokuwa wanasisitiza kuwa Wakristo ni lazima watahiriwe kimwili, Mtume Paulo alisema hivi, “*Maana katika Kristo Yesu kutahiriwa hakufai neno, wala kutokutahiriwa, bali imani itendayo kazi kwa upendo*” (*Wagalatia 5:6*). Kwa maneno mengine, wokovu wetu unapatikana kwa imani tu katika injili ya maji na Roho kwa asilimia 100%. Hivyo inapofikia suala la wokovu wetu toka katika dhambi, hakuna suala la matendo yetu binafsi linaloweza kuhesabiwa. Hakuna hata tendo moja kati ya matendo yetu linaloweza kusimama, na wala hakuna hata sehemu ndogo ya wokovu wetu binafsi inayoweza kusimama pia.

Hebu tafakari hapa kuwa imetokea dada yetu mmoja ananyonyoka nywele zake, wakati alipokuwa akitutengenezea supu baadhi ya nywele zake zikaingia katika supu. Je, hili litakuwa ni tatizo wakati tunataka kunywa supu? Kama tutaona kifungu cha nywele kinaelea katika supu, je, kuna yeyote yule miongoni mwetu atakayeweza kuinywa hiyo supu? Kwa kweli hapana. Vivyo hivyo, imani yetu ni lazima iwe safi. Tunahitaji aina ya imani ambayo inayomwamini Yesu Kristo kwa usafi wote na inayoyaamini yale ambayo Yesu ameyafanya kwa ajili yetu bila kuongeza wala kupunguza kitu chochote. Ikiwa tunaamini injili ya maji na Roho iliyotolea na Mungu kama ilivyo, basi ni hakika kuwa sisi sote tumeokolewa kikamilifu kwa mujibu wa imani yetu. Ni muhimu sana kuwa na imani katika injili ya maji na Roho inayoamini kwa usahihi kama ilivyo.

Imani ya Mtume Paulo ilimwongoza akaweza kusema maneno haya, *“Nimesulibiwa pamoja na Kristo; lakini ni hai; wala si mimi tena, bali Kristo yu hai ndani yangu”* (Wagalatia 2:20). Je, Paulo amesema hapa kuwa alifanya jambo fulani? Hapana, hakuna hata sentensi moja inayoeleza jinsi alivyoamini damu ya Msalaba pekee na jinsi alivyofanya sala za toba, na wala hakuna panaposema namna alivyotahiriwa, na wala hakuna panaposema namna alivyoizishika shughuli za sikukuu, na wala hakuna panaposema kuwa Paulo aliishika Sheria kwa uaminifu. Kwa maneno mengine katika imani ya Paulo hakukuwa na suala la matendo yake binafsi. Kitu cha maana ambacho Paulo alikifanya ilikuwa ni kumwamini Mungu na kukiri hivi, *“Nimesulibiwa pamoja na Kristo; lakini ni hai; wala si mimi tena, bali Kristo yu hai ndani yangu”*

Mtume Paulo aliokolewa kwa kumwamini Yesu na yale mambo ambayo ameyafanya kwa ajili yake. Imani yake ilikuwa safi kwa kiasi gani? Yeye aliamini tu. Paulo hakusema

hivi, “Lakini nilifanya jambo hili, halafu nikafanya na jambo lile.” Paulo aliamini kwa moyo wake kuwa Yesu Kristo alikuja hapa duniani kama Mwokozi wetu, alibatizwa na Yohana Mbatizaji ili kumwokoza kila mtu hapa duniani, alizibeba dhambi hizo hadi Msalabani ambapo alisulubiwa, na baada ya kuimwaga damu yake na kufa, alifufuka toka kwa wafu, na kwa sababu hiyo amefanyika kuwa Mwokozi wetu. *“Nimesulibiwa pamoja na Kristo; lakini ni hai; wala si mimi tena, bali Kristo yu hai ndani yangu” (Wagalatia 2:20).* Je, wewe nawe unaamini hivi? Kwa mujibu wa imani ya Paulo, hakukuwa na matendo yake binafsi, yeye aliokolewa kwa imani tu. Paulo aliokolewa kwa kuamini injili ya maji na Roho kama ilivyo. Hakuna namna nyingine inayoweza kumfanya mtu aokolewe zaidi ya kuamini.

Paulo aliendelea kukiri akisema, *“na uhai nilio nao sasa katika mwili, ninao katika imani ya Mwana wa Mungu, ambaye alinipenda, akajitoa nafsi yake kwa ajili yangu” (Wagalatia 2:20).*

Paulo aliokolewa kwa kumwamini Yesu na wokovu wake na hakufanya jambo lolote kwa maana ya matendo. Paulo hakuyataja matendo yake mema mbele za Mungu, na wala hakuzitaja sala zake za imani, bali yeye aliipeleke imani yake mbele za Mungu. Hii ndio imani ile ile aliyokuwa nayo Habili wakati alipokuwa akitoa sadaka yake kwa kutoa wanyama wake wazaliwa wa kwanza walionona. Habili alimwamini Yesu Kristo kuwa ‘mzaliwa wa kwanza wa wanyama wake,’ na aliamini hivyo kwa moyo safi. Mungu alipendezwa na akaipokea sadaka yake ya imani safi, lakini Mungu hakupendezwa na Kaini na sadaka yake. Kwa nini Mungu alikataa kuipokea sadaka ya Kaini? Ni kwa sababu alitoa sadaka ya mazao ya ardhi kwa Bwana Mungu, mazao ambayo yaashiria matendo ya mwili (Mwanzo 4:1-5).

Mtume Paulo pia alimwamini Yesu kuwa ni Mwokozi

mkamilifu, na aliamini kuwa hakuwa na namna nyingine zaidi ya kufa na kuangamia mbele za Kristo, ndio maana Kristo alimpenda sana Paulo kiasi cha kuweza kumwokoa Paulo kwa kubatizwa, kwa kufa Msalabani, na kufufuka tena toka kwa wafu. Mtume Paulo aliupokea Ukweli huu kama ulivyo kama vile mtoto mdogo na akauamini, na kwa hakika hivyo ndivyo Paulo alivyoweza kuokolewa. Wewe na mimi ni lazima tuwe na aina hii ya imani. Kila Mkristo hapa ulimwenguni ni lazima awe na imani kama hii.

Tunapowapatia watoto wadogo kitu kinacholika, wao si huwa wanafungua midomo? Hufungua midomo yao kama vile vifaranga. Hata kama tutachomoa chakula toka katika vinywa vyetu na kisha kumpatia mtoto tukisema “haya” watoto watafungua midomo yao bila shaka. Kwa kweli huna hata haja ya kusema hiki ndicho chakula, ili mradi ukiwaambia huu ni muda chakula watafungua midomo yao. Wafungua midomo kwa kuwa ulichowaambia ni kuwa unataka kuwalisha. Unapotamka neno “haya” linaweza kuonekana kama ni soma jingine la kupangilia sauti, lakini kwa watoto hilo lina maanisha kuwa kuna mtu anataka kuwapatia chakula.

Tunahitaji kuwa na imani hii ya kitoto. Mungu anaposema, “Nimekuokoa. Nilimtuma Mwana Wangu kuja hapa duniani, kisha nikamfanya abatizwe, afe Msalabani, na kisha afufuke toka kwa wafu, na kwa mambo hayo nilimfanya aibebe adhabu yote ya dhambi na hivyo kuzioshelea mbali dhambi zako zote kikamilifu. Kisha Mwanangu aliteseka na kifo kwa niaba yako, na kisha Mwanangu alifufuka ili aweze kukupatia maisha mapya. Hivyo Mwanangu amekwisha kukuokoa. Unapaswa kuamini hivyo,” basi hapo hatupaswi tena kusema jingine zaidi ya kujibu “Ndiyo,” na kuamini namna hiyo. Kama Paulo alivyosema, “Nimesulibiwa pamoja na Kristo; lakini ni hai; wala si mimi tena, bali Kristo yu hai

ndani yangu” ni hakika kuwa tunaokolewa kwa kuiamini injili ya maji na Roho, na si kwa Sheria, wala si kwa matendo yetu binafsi. Paulo aliokolewa kwa imani safi.

Watu wengi wanaweza kuwa na ufafanuzi mbalimbali wa kifungu cha Maandiko cha leo, lakini kifungu hiki kinaonyesha wazi kuwa kwa kupitia matendo ya Sheria, sala za toba, tohara, au mambo ya jinsi hiyo, hakuna mwanadamu anayeweza kuokolewa toka katika dhambi zake. Paulo hakuokolewa kwa kumwamini Yesu na kisha kuongeza mambo mengine juu yake, bali aliokolewa kwa kuamini na kupokea katika moyo wake kuwa Yesu Kristo alikuwa amemwokoa kupitia injili ya maji na Roho bila kuongeza chochote kile. Hivi ndivyo anatueleza Paulo katika kifungu cha leo cha Maandiko. Baada ya Mtume Paulo kuokolewa, je, aliendelea kuishi kwa imani katika Mwana wa Mungu au la? Kwa kweli aliishi kwa imani katika Mwana wa Mungu. Ndio maana Paulo aliihubiri injili ya maji na Roho.

Hebu tuangalie Wagalatia 2:21: *“Siibatili neema ya Mungu; maana, ikiwa haki hupatikana kwa njia ya sheria, basi Kristo alikufa bure.”*

Paulo anasema kuwa haibatili neema ya Mungu. Wakati huo Paulo alikuwa na imani ya jinsi hii. Aliweka bayana kuwa wokovu wake ulipatikana kutokana na imani katika neema ya Mungu. Ndio maana Paulo alisema kwia ikiwa haki huja kwa matendo ya Sheria, basi Kristo alikufa bure. Ikiwa matendo yetu yataongezwa hata kama ni kwa uchache katika jitihada zetu za kuwa watu wasio na dhambi, basi hiyo itamaanisha kuwa Yesu alikufa bure. Ikiwa mambo kama matendo mema, sala za toba, kuishi maisha mema yataongezwa katika suala la wokovu wetu, basi ni hakika kuwa Kristo alikufa bure. Kwa maneno mengine, ikiwa matendo yetu binafsi yataongezwa katika kazi ya wokovu ya Yesu hata kama ni kwa uchache—basi mambo yote ambayo

Yesu ameyafanya kwa ajili yetu alipokuwa hapa duniani, kama vile kubatizwa na kufa Msalabani yataonekana kuwa hayana maana yoyote. Hatupaswi kabisa kuibatili neema ya Mungu. Tunapaswa kuipokea na kuikubali neema ya Mungu kwa shukrani. Tunapaswa kuipokea kwa shukrani, na tunapaswa kumtukuza Mungu kwa shukrani, na hatimaye tunapaswa kuungana pamoja na Bwana kwa shukrani. Kwa kuwa “tumesulubiwa pamoja na Kristo,” basi ni hakika kuwa mioyo yetu imeungana na Kristo.

Mimi na wewe ni lazima tuhesabiwe haki kwa imani, na ni lazima tuwe watu wasio na dhambi kwa imani. Tunatakiwa kuwa watu tusio na dhambi kwa kuamini kuwa Yesu Kristo ametuokoa. Wale wanaoamini kuwa Mungu amezitoweshea mbali dhambi zao kwa kupitia injili ya maji na Roho ni watu wasio na dhambi. Hivyo, sisi sote tunatakiwa kuwa watu wa aina hiyo.

“Ikiwa haki hupatikana kwa njia ya sheria, basi Kristo alikufa bure” (Wagalatia 2:21). Ikiwa tunaweza kuoshwa dhambi zetu kwa kupitia sala zetu za toba, basi ni hakika kuwa Yesu Kristo alikuja hapa duniani bure, alibatizwa bure, na alikufa Msalabani bure. Je, hiyo ni kweli?

Tunatakiwa kutambua jinsi makanisa ya Galatia yalivyoangamizwa. Baada ya kifo cha Mtume Paulo, makanisa ya Galatia yalipotea kiasi cha kutoweza kujulikana. Hii inatuonyesha jinsi ilivyo hatari kuhamasisha matendo yetu binafsi, na kuongeza matendo ya Sheria katika wokovu wetu. Kwa kweli ni muhimu sana kufahamu kuwa ni makosa makubwa kuyatanguliza matendo yetu katika suala la wokovu.

Bila shaka unaweza kufikiria hivi, “Je, matendo yote ni mabaya? Je, hakuna jema katika matendo tunayofanya? Nina hakika kuna matendo mema miongoni mwa matendo tunayofanya.” Hata kufikiria namna hii pia ni jambo lenye hatari. “Kwa kuwa mababa zetu wa iani walitahiriwa, kuna

ubaya gani basi wa sisi nasi kutahiriwa? Kuna ubaya gani kwa sisi kuiamini injili ya maji na Roho na kisha kutahiriwa? Kwa nini utamaduni huu mzuri usiendelezwe” —je, kuna yeyote yule miongoni mwenu anayefikiria hivi? Ukweli ni kuwa hata kufikiria hivi ni makosa makubwa. Na kufikiria hivyo ni sehemu ya unafiki, na itakuwa ni kuwafundisha wengine kutenda unafiki pia; injili ya maji na Roho mara nyingi inapotoshwa kutokana na unafiki huu; na kwa sababu hii ndio maana kuna watu wengi sana ambao wanaangamia. Yale mambo ambayo tulikuwa tukiyaona kuwa ni mema kabla hatujazaliwa tena upya, yale matendo ambayo tuliyaona kuwa mema na mioyo mizuri, kwa hakika hayo yote ni uovu. Ndio maana Paulo alisema kuwa yale mambo aliyoyaona kuwa yana faida kwake aliyahesabu kuwa ni hasara na takataka kwa ajili ya Kristo (Wafilipi 3:7-8).

Je, si baadhi yenu mlikuwa mkifanya semina zilizoitwa “uponyaji wa ndani”? Kwa kweli hizo ni semina zenye uovu kabisa. Semina kama hizo ndizo zinazoibatili neema ya Yesu Kristo na zinaikataa neema hiyo. Hilo ni suluhisho kiraka linalotufanya tusifikiri vizuri na badala yake kufikiri hivi, “Nimeumizwa, lakini kila ninapomfikiria Yesu Kristo, je, hakupata majeraha makubwa kuliko mimi? Wazazi wangu wananiumiza, je, na wao hawakuumizwa?” Kitendo cha kupewa faraja na Yesu Kristo kutokana na majeraha ambayo mtu ameyapata na kule kusema kuwa mtu amewasamehe wazazi wake ni tendo la kusamehe kutokana na jitahada za mtu binafsi. Suala la kusamehe huwa ni suala la mtu binafsi. Ni suala la mtu binafsi ambalo linatibu jeraha kwa kumtumia Yesu Kristo, na ni mtu huyo ndiye anayewasamehe wengine. Kitambao kilichopita nilisikia kanda ya semina hizo, pamoja na kuwa inaweza kuonekana kuwa ni nzuri, ukweli ni kuwa mafundisho hayo yana uovu ndani yake.

Sisi Wakristo ulimwenguni kote ni lazima tutambue jinsi ilivyo makosa kuyategemea matendo yetu. Maana mtu anaweza kuokolewa ikiwa tu ataamini kwa usahihi katika injili ya maji na Roho, na ikiwa matendo yake bila kujalisha ni mema au mabaya yataongezwa katika imani yake, basi ni hakika kuwa mtu huyo hawezi kuokolewa. Ndio maana unapaswa kuweka kando matendo yako. Ikiwa utapokea katika moyo wako kwa imani kama vile mtoto mdogo juu ya yale ambayo Yesu Kristo ameyafanya kwa ajili yako, basi ni hakika kuwa utaokolewa na kufanya mwana wa Mungu. Na kama utaueneza ukweli huu kama ulivyo, basi watu wengi sana wataokolewa. Ndio maana imeandikwa hivi, *“Kila neno la Mungu limehakikishwa; Yeye ni ngao yao wamwaminio”* (Mithali 30:5). Neno la Mungu ni safi sana. Kwa kweli ninatoa shukrani juu ya shukrani kwa Mungu.

Tunapokisoma Kitabu cha Wagalatia, tunaweza kutambua kuwa matendo yetu mazuri au mabaya hayapaswi kabisa kuunganishwa kwa namna yoyote ile na wokovu wetu. Kwa hakika tunaweza kuona ilivyo makosa kuunganisha matendo yetu kwenye wokovu ambao Mungu ametupatia; tunaweza kuona kuwa unafiki wa Petro ulikuwa ukiwaposha wengine; na tunaweza kuona moyo wa Paulo ulipokuwepo wakatia alipomkemea Petro kwa unafiki huo. Zaidi ya yote, mioyo yetu ina uhakika kuwau wakati tunapoihubiri injili, basi ni muhimu tuihubiri kwa usafi wote. Haijalishi ikiwa watu wengine wanaamini au la, kinachotupasa sisi ni kuihubiri injili ya maji na Roho hali tukiwa na imani safi. Ikiwa tutaingiza kitu kingine chochote kile katika kuihubiri injili, basi wale wanaotusikiliza wanaweza kuchanganyikiwa kiasi cha kuwafanya waone vigumu kuokolewa.

Ndugu waamini wenzangu, ni lazima tulihubiri Neno la Mungu kwa usafi kama lilivyo. Kwa sasa, tofauti na

ilivyokuwa miaka 10 au 20 iliyopita, ni hakika kuwa Ukweli unapatikana katika injili ya maji na Roho. Ndio maana kila siku tunazungumzia kuhusu injili ya maji na Roho na tunaihubiri. Kwa kuwa injili hiyo ni Ukweli, basi hakuna sababu ya kusema kuwa tunaweza kuzidisha au kupitiliza tunapoihubiri. Hali nikiwa nimeiubiri injili hii kwa miaka Kumi, je, nihubiri kitu kingine ati kwa sababu kuna watu wamechoka kuisikia injili ile ile? Niwaambie ukweli siku tutakapoanza kuihubiri injili nyingine, basi hapo ndipo tutakapotoweka kama yalivyotoweka makanisa ya Galatia.

Ni lazima tuliadini Neno la injili ya maji na Roho kwa usafi. Ni lazima muuadini upendo wa Mungu kwa usafi wote, na ni lazima muuadini wokovu ambao Mungu amewapatia kama ulivyo. Ikiwa mtafanya hivyo, basi kwa hakika ninyi ni watu wa Mungu. Kwa kweli mapungufu yetu yatakuwepo tu. Lakini bado sisi ni watu wa Mungu kwa imani. Mnapofanyika kuwa watu wa Mungu kwa imani, basi Neno lake litaundoa uchafu wote wa mioyo yenu na litawalea ili muweze kukua katika imani.

Wale ambao hata baada ya kuwa wamepokea ondoleo la dhambi zao bado wanamfuta Bwana kwa mawazo yao binafsi na matendo basi hao ni sawa kabisa na wale waliokuwa wakiitetea tohara ya kimwili. Watu wa jinsi hiyo wanafikiri kuwa wanatenda jambo jema, lakini ukweli ni kuwa hayo wanayoyafanya yataleta matokeo mabaya sana. Watu wa jinsi hiyo wanapaswa kutambua kuwa wanafanya makosa. Kwa hiyo, tunapaswa kumwamini Mungu kwa usafi, tunapaswa kuungana naye katika usafi, tunapaswa kumfuata Mungu kwa usafi, na kisha tunapaswa kuuhubiri Ukweli wa injili kwa usafi. Hali tukiwa tunafahamu hivyo, na tukiwa tunaamini hivyo, basi hebu tuihubiri injili ya maji na Roho na hebu tuishi kwa imani. ☒

SURA YA 3



Unaweza Kupakua Vitabu vya Kikristo vya Mchungaji Paul C. Jong
katika Kompyuta, Kompyuta-Kibao, au kwenye Simu-Mahiri

Wakati Wote Uishi Maisha Yako Kwa Imani Katika Injili Ya Maji na Roho

< Wagalatia 3:1-11 >

“Enyi Wagalatia msio na akili, ni nani aliyewaloga, ninyi ambao Yesu Kristo aliwekwa wazi mbele ya macho yenu ya kuwa amesulibiwa? Nataka kujifunza neno hili moja kwenu. Je! Mlipokea Roho kwa matendo ya sheria, au kwa kusikia kunakotokana na imani? Je! Mmekuwa wajinga namna hii? Baada ya kuanza katika Roho, mnataka kukamilishwa sasa katika mwili? Mmepatikana na mateso makubwa namna hii bure? Ikiwa ni bure kweli. Basi, yeye awapaye Roho na kufanya miujiza kati yenu, je! Afanya hayo kwa matendo ya sheria, au kwa kusikia kunakotokana na imani? Kama vile Ibrahimu alivyomwamini Mungu akahesabiwa haki. Fahamuni basi, ya kuwa wale walio wa imani, hao ndio wana wa Ibrahimu. Na andiko, kwa vile lilivyoona tangu zamani kwamba Mungu atawahesabia haki Mataifa kwa imani, lilimhubiri Ibrahimu habari njema zamani, kusema, Katika wewe Mataifa yote watabarikiwa. Basi hao walio wa imani hubarikiwa pamoja na Ibrahimu aliyekuwa mwenye imani. Kwa maana wale wote walio wa matendo ya sheria, wako chini ya laana; maana imeandikwa, Amelaaniwa kila mtu asiyedumu katika yote yaliyoandikwa katika kitabu cha torati, ayafanye. Ni dhahiri ya kwamba hakuna mtu

ahesabiwaye haki mbele za Mungu katika sheria; kwa sababu Mwenye haki ataishi kwa imani.”

Je, Wewe ni Mtu wa Aina Gani?

Hata katika nyakati hizi tulizopo kuna Wakristo wengi sana ambao wanaendelea kuishi maisha ya kiroho ya kijinga. Biblia inawaambia Wakristo hao ikisema hivi, *“Je! Mmekuwa wajinga namna hii? Baada ya kuanza katika Roho, mnataka kukamilishwa sasa katika mwili?” (Wagalatia 3:3).* Wakristo hao wanaishi maisha yao pasipo kuifahamu injili ya maji na Roho. Wanadai kuwa wanamtumikia Mungu, lakini ukweli ni kuwa hawawezi kumtumikia Mungu na badala yake wanatumika kwa namna za kijinga kwa kuwa hawaifahamu injili ya kweli. Kinyume na wao, sisi tunaweza kumwamini Bwana wetu kuwa ni Mwokozi na kisha tunamtumikia Yesu kwa kuwa tunaamini injili ya maji na Roho. Na kwa sababu hiyo sisi tunazikomboa nafsi za watu wengi toka katika dhambi zao kwa imani katika Neno la injili ya maji na Roho lililomo katika mioyo yetu.

Sisi tunaoamini katika injili hii ya kweli tunaishi na Roho Mtakatifu katika mioyo yetu. Na kwa sababu hiyo tunaweza kuongozwa na Roho Mtakatifu, ambaye anatuongoza na kutusukuma kumfuata Bwana wetu. Hata hivyo, kuna watu wengi sana ambao wanayafuata matamanio ya miili yao kuliko kuyafuata mapenzi ya Mungu, na hii ni kwa sababu hawaamini katika injili ya maji na Roho, na kwa sababu hiyo hawajampokea Roho Mtakatifu. Mungu ametupatia karama ya ondoleo la dhambi kwa kutupatia injili ya maji na Roho. Hivyo, ushahidi kamili kuwa sisi tumekombolewa toka katika dhambi zetu unapatikana katika imani yetu inayoamini katika

Neno la injili ya maji na Roho. Kwa kuwa tumeliamini hilo Neno, basi ndio maana tumepokea ondoleo la dhambi zetu. Ondoleo letu la dhambi linamtegemea Mungu kikamilifu na linategemea pia imani yetu katika injili ya maji na Roho. Mungu ametupatia Ukweli wa injili ya maji na Roho na ameruhusu wale wanaouamini ukweli huo kuupokea wokovu wa kweli. Ukweli wa injili ya maji na Roho uliotolewa na Mungu ni karama ya ya Mungu ya wokovu kwa wenye dhambi wote.

Hata hivyo, waamini huko Galatia walikuwa wakiyafuata mafundisho ya wanatohara. Na ndio maana Mtume Paulo aliwakemea waamini hao kwa sababu ya ujinga wao akawaambia hivi, *“Enyi Wagalatia msio na akili, ni nani aliyewaloga, ninyi ambao Yesu Kristo aliwekwa wazi mbele ya macho yenu ya kuwa amesulibiwa?”* (Wagalatia 3:1). Wagalatia walitaka kuwa watu wa Mungu kwa kupokea tohara ya miili yao, lakini jambo hilo lilikuwa mbali kabisa na imani ya kweli.

Ndio maana, Paulo aliwauliza tena, *“Nataka kujifunza neno hili moja kwenu. Je! Mlipokea Roho kwa matendo ya sheria, au kwa kusikia kunakotokana na imani?”* (Wagalatia 3:2) Hii ilitokea kwa sababu Wakristo wa Kiyahudi walikuwa wakisisitiza kimakosa kuwa watu wangeluweza kuwa watu wa Mungu ikiwa tu wataipokea tohara ya kimwili. Kwa kweli baadhi ya waumini katika makanisa ya Galatia walionekana kuwa ni wajinga kabisa kiasi kwamba waliweza kupotoshwa na walimu wa uongo. Alipokuwa akilishughulikia jambo hili, Mtume Paulo alieleza kuwa hakuna anayeweza kupokea wokovu toka katika dhambi zake zote kwa kutegemea matendo ya Sheria. Na ndio maana Mtume Paulo aliwataka Wagalatia walioamini kuwa na imani ambayo ingeliwawezesha kubatizwa katika Kristo. Imani ya kweli inaamini kuwa wokovu wetu

unatoka katika ubatizo wa Yesu Kristo alioupokea toka kwa Yohana Mbatizaji na pia unatoka katika kusulubiwa kwake pale Msalabani.

Injili ambayo Paulo aliiamini ilikuwa ni injili ya maji na Roho. Paulo aliamini kuwa Yesu Kristo amefanyika kuwa Mwokozi wetu kwa kuja hapa ulimwenguni, kwa kuupokea ubatizo toka kwa Yohana Mbatizaji ili kuzichukua dhambi zote za wanadamu mara moja na kwa wote, kwa kusulubiwa pale Msalabani, na kisha kwa kufufuka kwake toka kwa wafu. Yesu Kristo ametukomboza toka katika dhambi zetu zote kwa kupitia Ukweli wa injili ya maji na Roho. Wale wanaouamini Ukweli wa injili hii wanapokea kipawa cha Roho Mtakatifu toka kwa Mungu inayotujia kama kipawa cha ondoleo la dhambi. Ninawashuhudia watu kuwa ondoleo la dhambi linawaruhusu watu kuipokea karama ya Roho Mtakatifu. Pia ninashuhudia kuwa tumefanyika kuwa wana wa Mungu tusio na mawaa baada ya kuwa tumeipokea karama ya Roho Mtakatifu kwa sababu tumeliamini Neno la injili ya maji na Roho.

Sasa, kwa kuwa tumepokea wokovu toka katika dhambi zetu zote kwa injili ya maji na Roho, na kwa kuwa tumefanyika watu wa imani, basi tunapolisikia Neno la Mungu, imani yetu katika Neno la Mungu inaimarishwa zaidi. Baada ya kuwa tumeliamini Neno la Mungu katika mioyo yetu, hapo ndipo Neno la Mungu lilipoanza kuingia ndani ya mioyo yetu na hivyo kumruhusu Roho Mtakatifu kutuongoza. Hivyo, wenye haki hawana maoni tofauti inapofikia kuliamini na kulifuata Neno lote la Mungu kuwa ni ukweli. Sisi hatuna mashaka kuhusiana na maelekezo ya watangulizi wetu katika imani na katika kulifuata Neno la Mungu. Na ndio maana bado tunaweza kupokea maelekezo ya kweli kwa kuwa tupo radhi kuyasikia maelezo ya watumishi wa Mungu yanayolieleza Neno la Mungu. Tunafikia hatua ya kuyafahamu mapenzi ya

Mungu kwa kupitia watumishi wake.

Tumekuwa na furaha katika mioyo yetu kwa kuwa tunazitenda kazi za haki kwa kuitumikia injili ya maji na Roho. Ingawa tunaweza kuchoka kimwili na kiroho, ukweli ni kuwa Roho Mtakatifu amehuisa mioyo yetu ili iweze kuungana na Bwana. Roho Mtakatifu anakaa katika mioyo yetu, na anatutumia kama vyombo halisi vya imani.

Kuanzia Sasa na Kuendelea Unapaswa Kuiamini Injili ya Maji na Roho

Kuanzia sasa na kuendelea tunapaswa kuiweka imani yetu thabiti katika Neno la injili ya maji na Roho. Tunapaswa kuifahamu na kuiamini injili ya maji na Roho kuwa ndio injili pekee ya kweli. Ikiwa hatutaiamini injili hii kuwa ni Ukweli wa injili na kisha tukajaribu kupokea tohara ya kimwili kama vile Waisraeli wa Agano la Kale walivyofanya, basi hilo litakuwa ni kosa kubwa. Hili ni onyo kwa wale waishio katika kipindi cha Agano Jipya ambao wanajaribu ondoleo la dhambi zao kwa kufanya sala za toba. Huu ni ushuhuda kuwa imani yao ina makosa. Ikiwa tutaishikilia imani ya jinsi hiyo basi ni hakika kuwa tutapokea hukumu ya Mungu badala kupokea upendo wa Mungu. Mtume Paulo anatusihi kutokana na imani yake katika Ukweli ambao umezitoweshea mbali dhambi zetu zote mara moja kwa injili ya maji na Roho. Hivyo, tunapaswa kujichunguza ikiwa imani yetu imejikita katika injili ya maji na Roho au la.

Mtume Paulo aliwaeleza wale wanaojaribu kuwa watu wa Mungu kwa kupokea tohara ya kimwili kuwa imani yao haikuwa imani ya kweli. Kwa lugha nyingine, Paulo alikuwa akisihi kuwa waamini katika Injili ya kweli ya maji na Roho

wanapaswa kuishika na kuitunza imani ya kweli, imani ambayo inawaweza kuwafanya wapokee ondoleo la dhambi. Kwa hivi sasa tunaifuata imani ya watangulizi wetu hali tukiwa na imani katika injili ya maji na Roho ambayo ni haki ya Mungu. Tunaweza kuilinda imani yetu ya kweli pale tutakapoifuata imani ya watangulizi wetu wa kiimani. Pia tunaweza kuishi katika imani ya kweli kwa kuwa tumeishuhudia haki ya Mungu iliyofunuliwa katika injili ya maji na Roho.

Sisi tumekombolewa toka katika dhambi zetu zote kwa kuiamini haki ya Mungu ambayo imedhihirishwa katika injili ya maji na Roho. Lakini kama tutazitegemea sala zetu za toba au matendo mengine ya Sheria ili tuweze kuokolewa, basi ni hakika kuwa hatutaweza kukombolewa toka katika dhambi zetu zote na tutakuwa bado tupo katika adhabu ya milele. Sisi tuliweza kuishika imani ya kweli hadi wakati huu kwa sababu ya kuiamini injili ya maji na Roho. Vinginevyo isingewezekana kabisa.

Anachotueleza Mtume Paulo ni kuwa tumeshapokea ondoleo la dhambi kwa kuwa tuliiamini injili ya maji na Roho. Sisi tumepokea pia karama ya Roho Mtakatifu ambaye anatutia nguvu ili tuweze kuishi kwa haki. Hivyo, kwa nguvu ya injili hii ya kweli tumeweza kuishi tukimfuata Bwana na huku tukiieneza injili ya wokovu ulimwenguni kote. Na ndio maana tunaweza kuendelea kumfuata Bwana wetu kwa imani yetu katika injili ya maji na Roho. Na ni kwa namna hiyo ndipo wenye haki wanapoweza kuishia maisha ya kiroho yenye ushindi.

Mtume Paulo alisema kuwa aliweza kumshukuru Mungu wakati wote kwa kupitia imani katika injili ya maji na Roho. Pamoja na ukweli huo kuna waumini baadhi katika makanisa ya Galatia walipotoshwa na walimu wa uongo

waliowafundisha injili nyingine ambayo ilikuwa kinyume na injili ya kweli ya maji na Roho. Hivyo, Paulo aliwakemea na akawauliza, *“Baada ya kuanza katika Roho, mnataka kukamilishwa sasa katika mwili? Mmepatikana na mateso makubwa namna hii bure?”* Paulo hakuruhusu upotofu kama huo kutokea. Kosa walilokuwa wamelifanya ilikuwa ni kujaribu kukubaliwa kama watu wa Mungu na wenye imani kwa kuipokea tohara ya kimwili ilhali walishakuwa wameiamini injili ya maji na Roho.

Hata siku hizi kuna watu wengi sana katika Kanisa la Mungu ambao wamefanyika kuwa wana wa Mungu kwa kuisikia na kuiamini kwa mioyo yao yote injili ya maji na Roho. Kati ya hao wapo wale walio na ufahamu potofu kuwa wanapaswa kutoa sala za toba kikamilifu ili waweze kuwa wana wa Mungu. Hali hii inatokana na imani ya kisheria iliyokuwepo katika makanisa ya Galatia. Watu wanaoamini kwa namna hiyo si lolote na ni watu wanaotaka kujionyesha kuwa ni wema kimwili.

Bwana wetu ametukomboa wewe na mimi toka katika dhambi za ulimwengu kwa kutupatia Neno la injili ya maji na Roho. Pia Bwana anatoa Roho Mtakatifu kama karama kwa wale wote wanaoamini na kupokea ondoleo la dhambi kwa imani. Hata sasa, bado Mungu anatuongoza kupitia Ukweli wa injili ya maji na Roho. Tumepokea wokovu toka katika dhambi zetu na tunaweza kuishi maisha ya milele hali tukiwa pamoja na Bwana huku tukiongozwa na Ukweli wa injili ya maji na Roho.

Tumekombolewa toka katika dhambi zetu zote, tumeunganishwa na Kanisa la Mungu, na tunaweza kumfuata Bwana kwa kuamini katika injili ya maji na Roho. Kwa kuwa tunayaongoza maisha yetu kwa kuifuata injili ya maji na Roho, basi ni hakika kuwa sisi tunayo imani sahihi kuliko zote. Wale

waliopokea wokovu toka katika dhambi zao zote kwa imani katika injili ya maji na Roho ndio hao wanaoweza kuikana haki yao binafsi. Wale wanaoishika imani yao katika injili hii ya kweli ni watu wakuu sana mbele za Mungu. Bila kujalisha jinsi tunavyoweza kuwa wadhaifu kimwili, ukweli ni kuwa tunapaswa kuilinda imani yetu katika injili ya maji na Roho. Hili ni jukumu muhimu sana kwa wale wote waliozaliwa tena upya.

Tunapoanza tukiwa na imani katika injili ya maji na Roho ni hakika kuwa hatuwezi kuishia kuangamia tukiwa na imani ya Kisheria. Kitendo cha kuzitegemea sala za toba ili zitufanye watu tusio na dhambi ni kuibatilisha injili ya maji na Roho ambayo ameitimiza kwa kujitoa sadaka. Kwa hakika hatuwezi kuirejea imani ya kisheria na kuiacha imani katika injili ya maji na Roho. Ni hakika kwamba mafundisho ya wanatohara wa Kanisa la Mwanzo kuwa ili mtu aweze kupokea wokovu toka katika dhambi zake zote ni lazima pia apokee tohara ya kimwili.

Tunaweza kupokea ondoleo la dhambi, na tunaweza kumpokea Roho Mtakatifu wa Mungu, na kisha kufanyika watumishi wa Mungu kwa kuamini katika Ukweli wa injili ya maji na Roho tu. Hivyo, sisi tumefanyika kuwa watu tunaoweza kuishi na kumfuata Bwana wetu kwa imani katika injili ya maji na Roho hadi mwisho. Hivyo, maisha yetu yote ya kiimani ni lazima yaanze na imani katika injili ya maji na Roho. Pia ni lazima tuendeleo kueneza injili hii ya kweli pasipo kukoma. Sisi tunamfuata Bwana wetu huku tukiwashinda magumu yote kwa imani katika injili ya maji na Roho. Kwa hakika tutaendelea kuwa washindi kwa imani yetu katika injili ya maji na Roho.

Je, Matendo Yako Yana Mapungufu?

Wakati fulani mapungufu yetu ya kimwili yanaonekana wakati tukiwa tunamtumikia Bwana wetu kwa kuiamini injili ya maji na Roho. Hata katika hali hiyo, wewe na mimi bado tunatakiwa kuendelea kuishi kama watumishi wa Mungu tunaoongozwa na Roho Mtakatifu huku tukiwa na imani katika injili hii ya kweli. Kwa hakika njia sahihi kwetu sisi katika maisha yetu ni kendelea kuieneza injili ya maji na Roho. Nina hakika kuwa aina hii ya maisha inampendeza Mungu. Hivyo, ndio maana tunakuwa na furaha wakati tunapoitumikia injili ya maji na Roho na tunapokuwa tumeunganishwa na Kanisa la Mungu. Kwa hakika haya maisha ya kiimani ndio maisha yetu ya kila siku.

Na kwa sababu hiyo, sisi tumebarikiwa sana bila kujalisha mapungufu yetu kwa kuwa tunaishi kwa imani katika Mungu. Je, umepokea ondoleo la dhambi zako kwa kuamini katika injili ya maji na Roho? Je, unaamini kuwa Roho Mtakatifu anakaa ndani yako kwa kuwa unaiamini injili ya kweli? Kama unaamini hivyo basi ni hakika kuwa kwa pamoja tunaweza kuishika imani yetu katika injili ya maji na Roho na kisha kuungana na Kanisa la Mungu. Sisi tunaitumikia injili na tunatafuta faida itakayoisaidia injili. Tunapaswa kuyafuata mapenzi ya Bwana wetu kwa kupitiai imani yetu katika injili ya maji na Roho. Sisi pamoja na watu wengine wa Mungu wanaoamini katika injili ya maji na Roho tunaishi kwa ajili ya haki ya Mungu na kwa ajili ya kuieneza injili hii ya kweli ulimwenguni kote.

Tunapomfuata Bwana wetu mara baada ya kuwa tumepokea ondoleo la dhambi, kuna nyakati ambapo mapungufu yetu yanaweza kudhihirishwa. Je, si kweli? Basi katika nyakati kama hizo, hatupaswi kwenda mbele za Mungu

ili kuyasahihisha mapungufu yetu ya kimwili. Bali tunapaswa kwanza kuishi maisha ya kuitumikia injili kwa imani katika injili ya maji na Roho. Kabla ya jitihada zozote za kuyasahihisha mapungufu yetu kwa lengo la kutaka kumkaribia Mungu, ni muhimu kwanza kuiimarisha imani yetu kwa kuamini katika Ukweli wa injili. Sasa tumepokea Roho Mtakatifu na tumefanyika kuwa wana wa Mungu baada ya kupokea ondoleo la dhambi kwa kuamini katika injili ya maji na Roho. Hivyo, tunapaswa kusonga mbele tukiwa tumeungana na Bwana katika kifo na uzima.

Hata hivyo, kwa kuwa hata wenye haki wana udhaifu katika mwili, basi maisha yao ya kiroho yanaweza kupata shida ikiwa watafikiria namna ya kuyatatua kwanza matatizo yao ya kimwili. Kwa hakika ni kosa kubwa kiroho ikiwa tutaangalia namna ya kuyatatua kwanza matatizo ya kimwili badala ya kuifuata haki ya Mungu. Maana kufanya hivyo kunaidhihirisha imani ya kimwili. Kadri tunavyomfuata Bwana wetu hali tukiwa na imani katika injili ya maji na Roho, basi matatizo yetu mengi ya kimwili yanatatuliwa yenyewe. Lakini ikiwa tutajaribu kumfuata Bwana wetu baada ya kuwa tumeyashuhgulikia matatizo yetu ya kimwili, basi ni hakika kuwa tutashindwa kuishi maisha ya haki. Hivyo, tunapaswa kusonga mbele katika kuieneza injili kwa imani yetu katika injili ya maji na Roho.

Sasa ni kipindi cha kiangazi. Majani mapya huchipuka wakati wa kuchipua, na majani hayo hukuwa sana wakati wa mvua. Ukifika tena muda wa kiangazi, majani hudondoka na matunda huvunwa. Katika kipindi cha kiangazi huwa tunaonyesha hali za upendo huku wakati mwingine tukiandika ushairi. “Simoni, je unasikia sauti ya majani yaliyoanguka?” Lakini, kwa upande mwingine, wale wanaokusanya uchafu hupiga kelele na kusema, “Majani ya ovyo haya! Hebu

dondokeni nyote kwa pamoja.” Hata hivyo, msimu wa kiangazi ukishapita hufuatiwa na msimu wa baridi ambapo majani huanguka zaidi. Inapofikia kipindi hicho cha baridi majani yote huanguka yenyewe.

Kwa hiyo, tunaweza kufahamu kuwa matatizo yetu yote ya kimwili yanaweza kushughulikiwa katika kipindi fulani wakati sisi tukiendelea kumfuata Bwana baada ya kuwa tumepokea ondoleo la dhambi kwa kupitia imani yetu katika injili ya maji na Roho. Ni wazi kuwa Bwana anayashughulikia matatizo yako ya kimwili kadri tunavyozidi kuitumikia injili yake. Ninachoeleza hapa ni kuwa hatupaswi kujaribu kumfuata Bwana wetu baada ya kuwa tumeyashughulikia matatizo yetu yote ya kimwili. Ikiwa tutamfuata Bwana wetu kwa imani yetu katika injili ya maji na Roho, basi ni hakika kuwa tutafikia hatua ya kuona matatizo yetu yote ya kimwili yakishughulikiwa na Bwana kwa kipindi fulani.

Ikiwa tutang’ang’ania matatizo yetu ya kimwili pasipo kuutambua ukweli huu, basi tutajikuta tukiishia kuyatenda matendo ya Sheria wakati tulianza kwa Roho Mtakatifu kama vile Paulo alivyoonya. Hivyo, sisi tunatamani kuishi maisha bora huku tukimfuata Bwana wetu hali tukiwa na imani katika Neno la Mungu kama Ibrahimu alivyofanya. Sisi tumeunganishwa na Bwana na tumepokea ondoleo la dhambi kwa kupitia imani yetu katika injili ya maji na Roho. Sisi tunaiweka mioyo yetu kwa Bwana ili tuweze kuutumikia Ukweli huu wa injili. Zaidi ya yote, tunapaswa kuzipokea baraka za kiroho toka kwa Mungu kwa kufa pamoja na Yesu Kristo na kisha kufufuka pamoja naye. Kwa kuwa tumepokea ondoleo la dhambi kwa kuliadini Neno la Mungu kwa kupitia injili ya maji na Roho, basi tunapaswa kuwa na tumaini la maisha katika Ufalme wa Milenia.

Kwa kuwa tumefanyika tusio na dhambi kwa kuamini

katika injili ya maji na Roho, basi tunapaswa kuendelea kuishi kwa imani. Imani hii ni kama ile inayopatikana katika maandiko: *“Kwa maana haki ya Mungu inadhihirishwa ndani yake, toka imani hata imani; kama ilivyoandikwa, Mwenye haki ataishi kwa imani” (Warumi 1:17).* Kwa kuwa Roho Mtakatifu wa Mungu anakaa katika mioyo yetu, basi tunapaswa kuishi maisha ya haki maisha yetu yote.

Sasa Unaweza Kuishi Maisha ya Haki Ikiwa Utakuwa na Imani Katika Ukweli wa Injili

Katika Wagalatia 3:9 Mtume Paulo alisema, *“Basi hao walio wa imani hubarikiwa pamoja na Ibrahimu aliyekuwa mwenye imani.”* Sisi tunamwita Ibrahimu kuwa ni baba wa imani. Hii ni kwa sababu Ibrahimu alilifuata Neno la Mungu kwa imani. Sisi ni watu ambao tumepokea baraka kama vile Ibrahimu. Mungu alimtokea Ibrahimu kisha akamwambia, *“Nami nitakupa wewe na uzao wako baada yako nchi hii unayoikaa ugeni, nchi yote ya Kanaani, kuwa milki ya milele; nami nitakuwa Mungu wao.”* Wewe na mimi pia tunaweza kupokea baraka za wokovu kama Ibrahimu ikiwa tutalifuata na kuliadini Neno la Mungu lililoandikwa, ambalo ni injili ya maji na Roho. Wewe na mimi tumepokea ondoleo la dhambi kwa kuamini katika Neno la Mungu. Kwa kufanya hivyo tumefanyika kuwa wana wa Mungu, na hapo ndipo Roho Mtakatifu alipoingia katika mioyo yetu.

Sasa, sisi sote tunaweza kuishi kwa imani katika injili ya maji na Roho. Tunapaswa kulifuata Neno la Mungu kwa imani hadi siku tutakapoingia Mbinguni. Ni lazima tuendeleo kuyaishi maisha yetu hali tukiwa na imani katika injili ya maji na Roho. Ikiwa unaiadini injili hii ya kweli, basi ni lazima

ufanye hivyo. Jambo la muhimu ni ikiwa tunaamini katika injili ya maji na Roho, na kisha tunapaswa kuishi hali tukieneza Ukweli wa injili hii ulimwenguni kote. Ikiwa tunaamini injili ya maji na Roho katika mioyo yetu, basi hapo ni hakika kuwa Roho Mtakatifu anakaa katika mioyo yetu. Kwa kuwa Roho Mtakatifu yupo katika mioyo yetu, basi ni lazima tuachane na wazo lolote linalotaka tuyatatue matatizo yetu ya kimwili na kisha kumfuata Bwana. Tunapoungana na Bwana na kisha kumfuata Yeye wakati tukimtumikia na kuiamini injili ya maji na Roho, basi hofu zetu zote za kimwili zitaisha na kudondoka kama vile majani makavu yalivyokuwa yakidondoka wakati wa kiangazi.

Ni lazima tujitoe kwa ajili ya kazi za Mungu hali tukiwa na imani katika Neno la Mungu. Hatupaswi kutatua jambo lolote kwa kuzitegemea nguvu zetu wenye kwa imani katika Neno la Mungu, bali tunapaswa kuishi maisha yetu kwa imani katika injili ya maji na Roho. Mungu ametuamuru kuieneza injili ya maji na Roho kwa mataifa yote ulimwenguni kote. Bwana wetu anataka mataifa yote yafanywe kuwa wanafunzi wake na kisha yaieneze injili ulimwenguni kote hadi katika miisho ya ulimwengu. Bwana wetu anatusukuma kuwa mashuhuda wa injili ya maji na Roho. Kwa kuwa Bwana wetu anafurahishwa sana pale tunapoitumikia injili ya maji na Roho, basi tunapaswa kuishi maisha yetu tukieneza injili hii ya kweli kwa watu wengine. Tunapaswa kuitumikia injili ya maji na Roho katika Neno la Mungu na kisha kumfuata Bwana wa Ukweli.

Ndugu waamini wenzangu, msiangukie katika matendo ya Sheria, na wala msishangae mkisema “kwa nini niko hivi?” hasa pale udhaifu na mapungufu ya kimwili yatakapoinuka wakati mkiitumikia injili. Katika nyakati kama hizo uamini kwa nguvu zaidi katika Neno la Mungu na kisha ujitoe kwa

nguvu zote katika kuineza injili ya maji na Roho. Hapo ndipo utakapoweza kuona madhaifu ya kimwili yakianguka na kwenda mbali ndani ya kipindi kifupi.

Mtume Paulo alichanganyikiwa alipoona maisha ya kiroho ya watakatifu wa Galatia. Hii ni kwa sababu watakatifu hao walijitahidi kwa moyo wao wote kupokea tohara ya kimwili ilhali walikwisha amini kuwa dhambi zao zilikuwa zimetoweshwa wakati Yesu alipokuja kwa injili ya maji na Roho. Kulikuwa na wanatohara dani ya makanisa ya Galatia ambao walisisitiza juu ya tohara ya kimwili.

Ndugu waamini wenzangu, bila mnafahamu kuhusu tohara ya kimwili ilivyo. Hebu fikiria umekwenda katika eneo ambalo Mtume Paulo alikuwa akihudumu. Ungewezaje basi kumzuia mtu ambaye ameishi maisha mazuri ya kiroho katika injili ya kweli wakati amekuambia hivi, “Ninapaswa kwenda kwa wanatohara”? Ukweli ni kuwa tumepokea ondoleo la dhambi zetu na tumepokea wokovu kwa kuamini katika injili ya maji na Roho. Tunapaswa kufanya nini wakati tunapokutana na baadhi ya watu wakitueleza kuwa wanapaswa kupokea tohara ya kimwili ili waweze kufanyika watu wa Mungu mwenyewe na wana wa Ibrahimu? Kwa hakika inakuwa vigumu sana kuwashauri watu kama hao maana wamejitenga na kuipinga injili ya maji na Roho, na bila shaka ilikuwa vigumu pia kwa Mtume Paulo.

Katika zama hizi tunapaswa kuishi kwa imani katika injili ya maji na Roho. Tunapaswa kulifuata Neno la Mungu kwa imani yetu katika injili ya maji na Roho. Tunapaswa kuungana na Mungu kwa imani katika Neno la Mungu. Na tunapaswa kumfuata Bwana hadi mwisho wa ulimwengu kwa imani katika Neno la Mungu. Haya yote hayawezekani kwa kuzitegemea nguvu na nia zetu binafsi pasipo kuwa na imani katika Neno la Mungu.

Ikiwa tumefanyika wana wa Mungu kwa kupokea ondoleo la dhambi na kwa kumpokea Roho Mtakatifu, basi tunapaswa kumtumikia Bwana wetu hivi sasa, na tunapaswa kuungana na injili, na tunapaswa kuamua kumfuata Bwana na kisha kuishi naye hadi mwisho wa ulimwengu kwa imani. Tunapoendelea kuishi katika maisha yetu hatupaswi kuyatafakari maisha yetu tukifikiria, “Hivi mwili wangu ukoje? Je, ni sahihi kwangu mimi kuwa katika hali kama hii?” Tunachopaswa kwanza kukifanya ni kuliadini Neno la Mungu, na pili ni kumwamini Mungu, na tatu ni kuadini injili ya maji na Roho. Tunapaswa kuendelea kuyafuata maelekezo ya Kanisa la Mungu kwa imani. Tunapaswa kuungana na Kanisa la Mungu kwa imani hiyo kwa manufaa ya injili na ya kaka na dada zetu katika imani. Tunapaswa kuishika injili na kisha kuishi kwa ajili sifa na utukufu wa Mungu huku tukimfuata Mungu kwa imani.

Hatupaswi kumsumbua Mungu kwa masuala ambayo yalimsumbua Mtume Paulo. Paulo aliwakemea watu wa jinsi hiyo akisema, *“Baada ya kuanza katika Roho, mnataka kukamilishwa sasa katika mwili?”* Kitendo cha kujaribu kukamilishwa kimwili hata baada ya kuwa tumepokea ondoleo la dhambi ni kitendo cha kutafuta faida za kimwili. Tunapaswa kuitumikia injili ya maji na Roho kwa imani na kisha kumfuata Bwana kwa imani hiyo. Kwa kuwa tumepokea ondoleo la dhambi zetu, basi hatupaswi kufikiri kuwa tunapaswa kujionyesha kuwa sisi ni wema kimwili na kisha kujivunia hilo. Wewe na mimi tunapaswa kuuvunja ugumu wa miili yetu—na tunapaswa kujivunia hali yetu ya kiroho—na kisha tuishi kwa imani katika Neno la Mungu.

Kwa kuwa tumepokea ondoleo la dhambi kwa kuamini katika injili ya maji na Roho, je haitakuwa vema ikiwa tutakutana na Bwana baada ya kuwa tumeyaishi maisha yetu kwa imani hadi mwisho? Sisi ni watenda kazi wa Mungu

ambao tunapaswa kuzitafuta na kuziongoza nafsi zilizopotea ili nafsi hizo ziweze pia kupokea ondoleo la dhambi zao.

Mtume Paulo alisema, “*Basi hao walio wa imani hubarikiwa pamoja na Ibrahimu aliyekuwa mwenye imani.*” (*Wagalatia 3:9*). Kama alivyosema Mtume Paulo, sisi tunaamini kuwa Mungu atawabariki wale wote wanaoishi kwa imani katika Neno la Mungu kama vile alivyombariki Ibrahimu.

Kwa sababu hiyo, nitaishi kwa imani katika injili ya maji na Roho hadi mwisho. Ingawa sifahamu kuwa una msimamo kiasi gani wakati huu, lakini nina hakika kuwa ikiwa utaendelea kusonga mbele kwa imani, basi matatizo yako yote yatashughulikiwa na Bwana.

Ninawasihi ninyi nyote muishi maisha ya haki hadi mwisho hali mkiwa na imani katika Ukweli wa injili. ☒

Ni Wakati Gani Ambapo Utupu wa Mioyo Yetu Unapotoweka?

< Wagalatia 3:23-29 >

“Lakini kabla ya kuja ile imani tulikuwa tumewekwa chini ya sheria, tumefungwa mpaka ije ile imani itakayofunuliwa. Hivyo torati imekuwa kiongozi kutuleta kwa Kristo, ili tuhesabiwe haki kwa imani. Lakini, iwapo imani imekuja, hatupo tena chini ya kiongozi. Kwa kuwa ninyi nyote mmekuwa wana wa Mungu kwa njia ya imani katika Kristo Yesu. Maana ninyi nyote mliobatizwa katika Kristo mmemvaa Kristo. Hapana Myahudi wala Myunani. Hapana mtumwa wala huru. Hapana mtu mume wala mtu mke. Maana ninyi nyote mmekuwa mmoja katika Kristo Yesu. Na kama ninyi ni wa Kristo, basi, mmekuwa uzao wa Ibrahimu, na warithi sawasawa na ahadi.”

Wale Wapendao Uovu Hawezi Kuja Kwenye Nuru

Biblia inasema, “Maana kila mtu atendaye mabaya huichukia nuru, wala haji kwenye nuru, matendo yake yasije yakakemewa” (Yohana 3:20).

Watu wengi wanaishi katika ulimwengu huu wakiwa na mioyo yenye utupu. Ili kujipatia utoshelevu na raha katika mioyo yao, watu wengi wamegeukia kuzitafuta anasa katika

muziki, sanaa, uandishi, na mambo kama hayo. Kwa ujumla, watu wanafikiri kuwa ikiwa watapatiwa mahitaji yao yote ya msingi, au ikiwa watakuwa matajiri na wenye mamlaka basi mioyo yao itatosheka kikamilifu. Hata hivyo, hakuna mtu anayeweza kutosheka na utajiri wa ulimwengu huu. Mtu anaweza kuishi katika nyumba kubwa ya kifahari, lakini ukweli ni kuwa hawezi hawezi kuujaza huo moyo wake mdogo kwa mambo ya dunia hii. Mnapaswa kutambua kuwa hakuna anayeweza kuuridhisha moyo wake kwa kupitia fedha, anasa, umashuhuri, mamlaka, mahusiano ya kimwili, au mambo mengine ya ulimwenguni. Watu wengi wametafuta kujiridhisha mioyo yao kupitia dini za ulimwengu huu, lakini ukweli ni kuwa hakuna aliyeweza kupata utoshelevu wa kweli.

Kwa nini Mioyo ya Watu Imejaa Utupu na Kutokuridhika?

Ni kwa sababu watu wanajaribu kuijaza mioyo yao kwa vitu vya ulimwenguni. Haijalishi jinsi mtu anavyoweza kujaribu kuujaza moyo wake kwa vitu vya ulimwenguni, ukweli ni kuwa hakuna moyo ambao unaweza kuridhika kutokana na mambo hayo ya kidunia. Kwa nini kila mwanadamu anaishi maisha yasiyoridhisha kiasi hicho? Baadhi ya watu, hata kama ni matajiri wanaishi maisha ya huzuni kwa kuwa si kila kitu kinaenda vizuri kama wanavyotaka.

Kinyume chake, mimi sina kitu zaidi ya injili ya maji na Roho, lakini ninafuraha sana kuwa na injili hii. Ninaishi maisha yangu nikiwa na shukrani, hali nikiwa nimeiweka imani yangu katika injili ya maji na Roho iliyotolewa na Bwana. Ninawasihi ninyi yote kuishi maisha yaliyobarikiwa.

Kwa nini mioyo ya watu wengi ina utupu na hairidhiki?

Mioyo yao ina utupu kwa sababu haina Neno la Mungu katika mioyo yao, ingawa imejawa na mambo mengi sana ya ulimwenguni. Utupu huu wa moyo ni uthibitisho kuwa katika nafsi zao hakuna imani katika injili ya Mungu ya maji na Roho. Katika habari za Uumbaji, Mungu alisema hivi, *“Nayo nchi ilikuwa ukiwa, tena utupu, na giza lilikuwa juu ya uso wa vilindi vya maji; Roho ya Mungu ikatulia juu ya uso wa maji”* (Mwanzo 1:2). Biblia inasema kuwa mioyo ya watu imejaa utupu kwa kuwa imeshindwa kulishughulikia tatizo la dhambi.

Ndugu waamini wenzangu, je, mngeridhika ikiwa mngelikuwa ni wanazuoni mnaoheshimika hapa ulimwenguni? Je, mioyo yenu ingeliridhika ikiwa mngelikuwa matajiri? Watu wanajaribu kufanya mambo mengi kama vile kunywa, kuimba, na kucheza ili kuliziba hilo pengo la utupu. Lakini mwisho wa siku kinachobakia katika mioyo yao ni huzuni. Ukweli ni kuwa mioyo yenu haiwezi kabisa kuridhishwa na mambo kama hayo. Ninyi na mimi hatuwezi kuridhika kutokana na tatizo la dhambi zetu. Ukweli ni kuwa mioyo ya watu haiwezi kufurahia hali ya kuridhika kutokana na sababu ya msingi kuwa kuna dhambi katika mioyo yao. kwa hakika mioyo yetu itaendelea kuwa mitupu wakati wote na haiwezi kuridhika hadi pale tutakapokuwa tumelishughulikia tatizo la dhambi. Hivyo, ninawaeleza kuwa ikiwa mnataka mioyo yetu kuridhika, basi ni muhimu na lazima mpokee ondoleo la dhambi zenu kwa kupitia injili ya maji na Roho.

Kabla huzuni haijazidi na utupu haujarundikana katika nafsi zao, kuna ukweli ambao ni lazima wautambue. Ukweli huu ni kuwa wanaweza kuridhika pale tu watakapokuwa wameamini katika injili ya maji na Roho na kupokea ondoleo la dhambi zao. Ninyi nanyi ni lazima muweze kulitatua tatizo la dhambi zenu kwa kuamini katika Neno la injili ya maji na Roho. Hapo ndipo mnapoweza kuridhika kikamilifu.

Wanadamu wote ni lazima wapokee ondoleo la dhambi zao kwa kuamini katika injili ya maji na Roho iliyotolewa na Bwana. Baada ya kupokea ondoleo la dhambi hapo ndipo wanapoweza kuridhika katika Bwana hata ikiwa watakuwa na mapungufu.

Je, siku hizi kuna mateja? Kwa nini watu wanatumia madawa ya kulevya na kulewa sana? Je, ni kwamba hawafahamu kuwa madawa ya kulevya na ulevi ni vitu vibaya kwa afya zao? Hapana. Ni kwa sababu wanashindwa kuridhika katika maisha yao kiasi cha kuyategemea madawa ya kulevya na pombe. Haya ni matokeo mabaya ambayo yanatokana na watu kushindwa kumpokea Yesu Kristo katika mioyo yao. Watu wengi sana wanateseka kwa sababu hawaifahamu na hawaiamini injili ya maji na Roho.

Sababu Inayomfanya Kila Mtu Kuishi Katika Huzuni

Kwa nini kila mtu ana huzuni? Ni kwa sababu watu wanapenda giza kuliko nuru ya Ukweli wa Mungu ambayo ametupatia. Mtume Paulo alisema, *“Maana kila mtu atendaye mabaya huichukia nuru, wala haji kwenye nuru, matendo yake yasije yakakemewa”* (Yohana 3:20). Ndugu waamini wenzangu, Mungu alisema kuwa kimsingi wanadamu ni wazao wa watenda mabaya (Isaya 1:4). Hivyo, watu ni lazima wayakiri maovu yao mbele za Mungu na wanapaswa kuamini katika injili ya maji na Roho.

Lakini pamoja na hayo, watu wengi wameshindwa kuipokea nuru ya kweli ya wokovu katika mioyo yao, na wanashindwa kuipokea nuru hiyo kutokana na hofu kuwa dhambi zao zitawekwa bayana mbele za Mungu hasa

watakapokuja kuipokea injili ya maji na Roho. Kwa kifupi, watu hao wanajaribu kuzificha dhambi zao. Ni watu wangapi katika ulimwengu huu ambao wanashindwa kuigundua nuru ya wokovu katika maisha yao?

Dhambi za kila mtu zimeorodheshwa katika Marko 7:21-22. Vifungu hivi vinatueleza kuwa kuna aina 12 ya dhambi katika mioyo ya watu, na imeandikwa hivi, *“Kwa maana ndani ya mioyo ya watu hutoka mawazo mabaya, uasherati, wivi, uuaji, uzinzi, tamaa mbaya, ukorofi, hila, ufisadi, kijicho, matukano, kiburi, upumbavu.”* Kwa kuwa Mungu anafahamu kuwa kila mtu anatenda hizo dhambi 12 wakati wote, Mungu anataka watu waende mbele zake kama walivyo wakiwa na nafsi zao zilizojaa dhambi ili waweze kuoshwa dhambi zao kwa kuamini katika injili ya maji na Roho. Hata hivyo, watu wengi sana wanajaribu kuendelea kuitii Sheria kinafiki mbele za Mungu, huku wakijaribu kuzificha dhambi zao ambao ambalo ni kusimama kinyume na mapenzi ya Mungu. Kwa kuwa wanaogopa kuwa matendo yao maovu yatawekwa hadharani, basi ndio maana wanajaribu kuendelea kuyaficha.

Moyo wa mwanadamu una dhambi kiasi hicho. Sasa tunawezaje basi kujificha mbele za Mungu? Je, dhambi zetu zinaweza kufishwa mbele za Mungu eti kwa sababu tunajaribu kuzificha? Wakati fulani, Sokrate, aliyekuwa mwanafalsafa mashuhuri alisema hivi, *“Jitambue wewe mwenyewe.”* Mtu anapojitambua yeye binafsi, kwa hakika atajiona kuwa yeye ni lundo la dhambi, na kwamba amefungwa na dhambi katika maisha yake yote. Inakuaje basi kwa wale walio na imani ya kisheria wanapojisifu mbele za Mungu na kujifanya kuwa watakatifu katika hali ya unafiki kiasi cha kushindwa kupokea ondoleo la dhambi?

Ili muweze kuiamini injili ya maji na Roho, ninawaombeni ninyi nyote kukiri kuwa ninyi ni wenye dhambi,

namkri kuwa mmefungwa na mtahukumiwa kwa ajili ya dhambi zenu, na baada ya kufanya hivyo mtaweza kujiunga na injili ya maji na Roho. Badala ya kuendelea kumwogopa Mungu mnatakiwa kuja katika injili ya maji na Roho, ambayo ni nuru. Bwana wetu anafahamu kila kitu kuhusu sisi na anatungojea ili twende kwake.

Kila mtu anajaribu kuikwepa injili ya maji na Roho ili kwamba uovu wake usiweze kufunuliwa, kwa nini kuna hali kama hii? Ni kwa sababu watu wa jinsi hiyo hawataki kumwamini Yesu Kristo kuwa ni Mwokozi wao wa kweli. Baadhi ya watu wanashindwa kuamini kwa kuwa hawana ufahamu kabisa kuhusu Yesu Kristo na hawajui uwepo wa nuru, lakini kuna watu wengine wanaikwepa nuru kwa kuwa wanaogopa kuwa dhambi za zitafunuliwa mbele ya hiyo nuru.

Katika ulimwengu wa Ukristo, kuna watu wengi sana ambao ndio hao wanaoikwepa nuru. Kwa mfano, wakati mchungaji anapoulizwa, “Je, umezaliwa tena upya? Je, una dhambi?” mchungaji atajibu kuwa bado ana dhambi katika moyo wake, halafu wakati huo huo anadhani kuwa imani yake ipo sahihi. Watu wa jinsi hiyo hawajaribu kuufahamu Ukweli wa injili ya maji na Roho. Hadi leo hii wachungaji wa kisheria wanaendelea kuhudumu kwa namna hii. Wachungaji hao huwaambia waumin iwao, “Ndugu waamini wenzangu, ninawasihi muishi maisha mazuri! Ni lazima muweze kutakaswa siku hadi siku. Madikoni hampaswi kudanganya. Vivyo hivyo kwa Madikoni wakuu na wazee wa kanisa. Ikiwa mnataka kuwa watakatifu waliobatizwa, basi mnapaswa kuachana na kuvuta sigara na kunywa pombe. Ninyi nyote mnapaswa kuishika na kuiheshimu Siku ya Bwana. Na hamtakiwi kuwadhuru wengine. Mnapaswa kuwa mfano kwa kila mtu.” Lakini hakuna neno la injili ya maji na Roho linatamkwa kutoka katika vinywa vyao, neno ambalo

lingeweza kuwaweka huru toka katika dhambi zao.

Viongozi wa kanisa kama hao ndio wanaowapaka chokaa waumini wao kwa uongo. Wakati waamini wanapokuja kanisani, viongozi hao huwaambia waumini wao “Hebu tuishi maisha mema,” halafu huabudu katika hali ya unafiki. Wanajitahidi kadri wawezavyo ili kuuficha uovu wao, na hufanya hivyo pia ili uovu wa waumini wao usiweze kujulikana kwa nje. Wao hujitahidi kuipaka chokaa mioyo yao kwa nje ili ionekane kuwa myeupe, na hufanya hivyo pia kwenye dhamiri zao, mawazo yao, na kwenye nafsi zao. Pamoja na kuwa kuna dhambi katika mioyo ya waumini, viongozi hao bado huwaambia hivi waumini wao, “Kwa kuwa mnamwamini Yesu, ni hakika kuwa mtakwenda Mbinguni hata kama mna dhambi.” Ili kuwafanya waumini wao waweze kujisikia wapo salama, viongozi wa jinsi hiyo huwadanganya Wakristo kwa kuwaambia hivi, “Mna dhambi, lakini pamoja na hizo dhambi bado Mungu anawaita ninyi kuwa ni wenye haki.” Kutokana na hali kama hiyo ndio maana Yesu aliwaambia hivi Mafarisayo, “Ole wenu, waandishi na Mafarisayo, wanafiki! Kwa kuwa mmefanana na makaburi yaliyopakwa chokaa.” Kaburi lililopakwa chokaa huwa ni safi sana kwa nje. Lakini kwa ndani kaburi hilo linaloonekana kuwa safi huwa ni chafu likiwa lina maiti iliyooza na inayoendelea kuoza. Vivyo hivyo, tunaweza kusema kuwa wale wanaokiri kumwamini Yesu ilhali wakiwa bado wana dhambi katika mioyo yao ni kama hayo makaburi yaliyopakwa chokaa.

Wakristo Ambao Kwa Sasa Wanamwamini Yesu Wanaweza Pia Kuwa na Mioyo Mitupu

Kwa nini watu wa ulimwengu huu wanajiona kuwa mioyo

yao ina utupu? Hata Wakristo ambao wanaamini kuna wakati fulani wanaiona mioyo yao kuwa ina utupu, na ndio maana huhangaika kutoka kanisa hili na kwenda kanisa jingine, na pia hutoka katika mkutano mmoja wa maombi kwenda katika mkutano mwingine wa maombi. Kuna watu wengi sana ambao wanamwamini Yesu kuwa ni Mwokozi wao, lakini wengi kati ya Wakristo hao wanaishi wakiwa hawajazaliwa tena upya kwa kuwa hawaifahamu injili ya maji na Roho, ambayo ndio Ukweli halisi wa injili. Ili waweze kuyatimiza matamania yao binafsi hujikuta wakifungasha vitu vyao na kwenda kwenye mkutano fulani wa maombi kumtafuta Bwana. Ikitokea mambo yamekwenda kinyume na walivyokusudia, huanza kushangaa wakifikiria hivi, “Au ni kwa sababu sikutoa sadaka ya kutosha? Au ni kwa sababu sikuishika kikamilifu Siku ya Bwana,” na baada hapo hufanya sala za toba zaidi na zaidi.

Kwa nini kuna watu wengi siku hizi ambao wanamtafuta Bwana kwa namna hiyo ya kijinga? Kwa nini wanaishi katika hali ya mkanganyiko hali wakishindwa kukutana na Ukweli ambao unawaokoa? Watu hao hufa kiroho kwa sababu ya kukutana na manabii wa uongo na wanyang’anyi wa nafsi. Hivyo ni lazima waachane na maneno ya uongo ambayo wameyasikia toka kwa manabii wa uongo na kisha waamini katika injili ya maji na Roho. Lakini ukweli wenye kuhuzunisha sana ni kuwa watu hao hawafahamu linalowapasa kufanya kiasi cha kubakia wafungwa katika madhehebu yao.

Katika Yohana 10:10 Yohana alisema hivi, *“Mwivi haji ila aibe na kuchinja na kuharibu; mimi nalikuja ili wawe na uzima, kisha wawe nao tele.”* Je, unawezaje kupokea maisha mapya? Je, umekutana na nuru ya wokovu kwa kuamini injili iliyotolewa na Mungu yaani injili ya maji na Roho? Sisi tumepokea nuru ya wokovu kwa imani kwa kuukubali na kuuamini Ukweli wa injili ya maji na Roho.

Kila mtu ana mawazo yake na ana namna yake ya kufikiri. Lakini, ili mtu aweze kuokolewa dhambi zake, basi itampasa mtu huyo kuyaachilia mbali mawazo yake binafsi na kisha kulishikilia Neno la Mungu. Kama ni hivyo watu wanapaswa kuamini nini katika mioyo yao? Watu wanapaswa kuamini katika Ukweli wa injili ya maji na Roho tu, injili ambayo imetolewa na Bwana. Ni lazima waamini kuwa Bwana wetu Yesu alizipokea dhambi zote za mwanadamu katika mwili wake kwa kuupokea ubatizo toka kwa Yohana, alizibeba hizo dhambi zote katika kichwa chake, kisha akaibeba adhabu yote ya hizo dhambi ili kuzioshelea mbali dhambi hizo zote. Hivyo injili ya maji na Roho inaeleza kuwa Bwana alibatizwa na Yohana Mbatizaji, akaimwaga damu yake, na kisha akafufuka tena toka kwa wafu.

Ndugu waamini wenzangu, ikiwa mnataka kuridhika katika mioyo yenu, basi ni lazima muuamini kwa mioyo yenu yote Ukweli wa injili ya maji na Roho ambao Yesu ametupatia. Biblia inasema hivi, *“Kwa maana kwa moyo mtu huamini hata kupata haki, na kwa kinywa hukiri hata kupata wokovu” (Warumi 10:10).*

Vifaa vya nyumbani vya umeme kama vile Televisheni, video, au mashine za kupooza hewa zinakuja zikiwa na mwongozo kwa mtumiaji. Kwa kawaida huwa tunaanza kutumia vifaa hivyo baada ya kuwa tumeusoma mwongozo huo. Hakuna mtumiaji hata mmoja anayeuwekea mashaka huo mwongozo wa mtumiaji. Na huwa tunatakiwa kuanzisha matumizi ya vifaa hivyo kwa mujibu wa mwongozo wa mtumiaji ili viweze kufanya kazi vizuri bila kuleta tatizo lolote na ili tuweze pia kuwa salama Lakini ikiwa tutatumia vifaa hivyo kinyume na inavyoelekezwa katika mwongozo wa mtumiaji, basi ni hakika kuwa tutaishia kuleta hasara kubwa kama vile mlipuko wa umeme, au kukifanya kifaa kushindwa

kufanya kazi vizuri. Vivyo hivyo, wokovu ambao Mungu ametupatia unaweza kupokelewa kwa imani tu katika “injili ya maji na Roho” kama ilivyoandikwa katika Biblia.

Kati ya Mungu na mwanadamu, kuna sheria ya haki ya Mungu inayoitwa Torati, ambayo kazi yake ni kuwaelekeza watu kwenda kwa Yesu Kristo. Kama isingelikuwepo Torati ya Mungu basi kwa hakika tusingelikuwa wenye dhambi, na kwa sababu hiyo kusingelikuwa na haja ya kuamini injili ya maji na Roho, na kwa msingi huo tusingeliweza kuokolewa. Tunapaswa kutambua kuwa maisha yetu ya kweli ya kiimani mbele za Mungu yanaanza mara baada ya haki ya Mungu kuingia katika mioyo yetu. Kwa lugha rahisi ni kuwa, mara tunapozitambua dhambi zetu kupitia Sheria ya Mungu basi hapo ndipo tunapoanza kuipata injili ya kweli. Kwa maneno mengine, ni hadi pale tunapouamini ukurasa wa kwanza wa mwongozo wa mtumiaji unaiotwa Sheria au Torati, na kisha kuufuata kama unavyoelekeza, basi ndipo tutakapoweza kwenda katika ukurasa wa pili unaoitwa “injili ya kweli.” Ikiwa tutafanya hivyo, basi ni hakika tutafika salama kwa imani katika kituo chetu kikuu na cha mwisho kinachoitwa Ufalme wa Mbinguni.

Vivyo hivyo, tunafanyika kuwa wenye dhambi kwa kupitia Sheria iliyotolewa na Mungu, na tunafanyika kuwa wenye haki pale tunapoiamini injili ya maji na Roho ambayo imetukomboha toka katika dhambi zetu zote. Hivyo, ni muhimu kabisa kuyafahamu yaliyomo katika Sheria na dhumuni lake kwa mujibu wa maagizo ya Mungu, kisha ni lazima tumpokee Yesu Kristo katika mioyo yetu kwa kuamini katika injili ya maji na Roho ili tuweze kusafishwa kikamilifu dhambi zetu zote.

Watu wanapoishi hapa duniani hukujikuta wamefanya mambo mema na mambo mabaya vile vile, lakini kwa ujumla

wake mambo mabaya yanakaa kwa muda mrefu sana katika kumbukumbu zao kuliko matendo mema. Na katika nyakati mbalimbali tunajikuta tukikumbushwa kuhusu hizo dhambi, na hivyo kuifanya mioyo yetu kuwa na huzuni na mitupu. Kwa kuwa wanadamu wote wana mapungufu, basi kila mwanadamu ana hofu kadhaa kuhusiana na dhambi zake ambazo hazifahamiki kwa watu wengine, na kwa sababu hiyo hawapaswi kuendelea kuzishughulikia dhambi hizo wao wenyewe bali wanapaswa kuzipeleka kwa Bwana.

Watu wanajaribu kulitatua tatizo la dhambi kwa kuzitegemea imani za dini zao na kufanya maombi kwa miungu yao. Lakini inawezekanaje kwa miungu iliyoundwa na wanadamu kuweza kuwaweka toka katika mashaka yao? Wanapaswa kutambua kuwa wanaweza kuwekwa huru kikamilifu toka katika dhambi zao pale mioyo yao itakapopata uhakika wa wokovu wao kwa kuamini katika injili ya maji na Roho.

Utupu wa Mioyo Yetu Utatoweka Pale Tu Tutakapokuwa na Imani Katika Haki ya Mungu

Kifungu cha leo cha Maandiko kinsema hivi, *“Lakini, iwapo imani imekuja, hatupo tena chini ya kiongozi.”* Kwa maneno mengine, mara tunapozaliwa tena upya kwa kuamini katika injili ya maji na Roho, basi hapo tunakuwa hatupo chini ya Sheria, ambayo ndio kiongozi anayetajwa katika kifungu hiki. Kwa hiyo, ni wakati ambao ambapo imani ya kweli inayotufanya tupokee ondoleo la dhambi zetu inapokuja? Inakuja katika mioyo yetu pale tunapoamini katika injili ya kweli ya maji na Roho. Mashaka na hofu za mioyo yetu zinatoweka mara moja wakati tunapokutana na Yesu Kristo

aliyekuja hapa duniani kwa maji na kwa damu. Kwa lugha tofauti, wakati tunapozaliwa tena upya kwa kuamini katika injili ya maji na Roho, basi hapo ndipo ule utupu wa mioyo yetu unapotoweka.

Wakati imani ya kweli inapoingia katika kila moyo wa mwanadamu basi hapo ndipo wanapoweza kuipata amani ya kweli. Yesu alitueleza kuwa, *“Mungu ni Roho, nao wamwabuduo yeye imewapasa kumwabudu katika roho na kweli”* (Yohana 4:24). Kama ni hivyo, ni kuanzia wakati gani ambapo tunapaswa kumwabudu Mungu katika roho na kweli? Ni tangu pale tulipofahamu kuwa dhambi zetu zote zilipitishwa kwenda kwa Yesu Kristo kwa kupitia ubatizo wake, yaani ndio wakati ambapo tulitakiwa kuanza kumwabudu Mungu katika roho na kweli, na kwa amani.

Kwa nini Mungu aliamuru hivi, “Usiwe na miungu mingine ila Mimi”? Je, unaweza kumpenda Mungu kuliko kitu kingine? Uwezo wa kumpenda Yesu kuliko kitu kingine chochote unapatikana ikiwa tu umepokea ondoleo la dhambi zako kwa kuamini katika injili ya maji na Roho ambayo Yesu ametupatia. Hata hivyo, ikiwa hatuutambui Ukweli wa wokovu na hatujazipitisha dhambi zetu kwenda kwa Yesu Kristo kwa imani, basi ni hakika kuwa hatuwezi kumpenda Mungu kuliko vingine. Kwa hakika hali yetu ya kiasili inatufanya tusikwepe kuwa na miungu mingine mbele za Mungu, hali hiyo itatoweka pale tu tutakapokuwa tumezaliwa tena upya kwa maji na Roho.

Lakini pamoja na hayo, tangu imani ilipotufikia, basi tuliweza kumpenda Mungu kwa mioyo yetu yote kwa imani, tukamshukuru na kumsifu Bwana wetu, na tuliweza kufanya hivyo ingawa sisi si wakamilifu kwa matendo yetu kwa asilimia 100%. Hivyo, baada kuja kwa imani, sisi hatupo tena chini ya Sheria, bali tumefanywa kuwa warithi wa urithi wote wa Mungu. Maisha ya kweli ya Kikristo yanaanza wakati mtu

anapookea ondoleo la dhambi zake.

“Kwa hakika Bwana alizibeba dhambi zangu zote na akazitoweshea mbali. Kwa sasa sina dhambi. Kwa kuwa bwana alizichukulia mbali dhambi zetu kwa kubatizwa, basi kwa imani hii kwa sasa nimefanyika kuwa asiye na dhambi. Kwa kuwa Bwana aliibeba adhabu yangu yote ya dhambi kwa niaba yangu, basi mimi sistahili kuadhibiwa. Mimi nina mapungufu mengi, lakini pamoja na hayo Bwana ameniokoa toka katika dhambi zangu zote.” Baada ya imani hii kumjia kila mmoja wetu, basi tuliweza kutambua kuwa sisi hatumo tena chini ya laana ya Sheria pamoja na ghadhabu yake na adhabu. Tulitambua kuwa sisi tumo ndani ya wokovu uliotolewa na Mungu. Kuanzia hapo ndipo tulipoanza maisha yetu ya kiimani. Kwa hiyo, tunatakiwa kutambua kuwa tunaweza kuyaishi maisha yetu ya kiimani baada ya kuwa tumeamini katika injili ya maji na Roho.

Ni wakati gani ulipoanza kumwamini Yesu kuwa ni Mwokozi wako? Ni wakati gani ambapo mashaka yako yote yalitoweka toka katika moyo wako? Mambo haya yalitokea wakati ulipozipitisha dhambi zako kwenda kwa Yesu Kristo kwa kuuamini ubatizo wake. Yesu Kristo alizichukua katika mwili wake dhambi zetu zote mara moja na kwa wote kwa kupitia ubatizo wake alioupokea toka kwa Yohana, kisha alitukomboa toka katika kifo kwa kufa kwake Msalabani, na kwa kufufuka kwake toka kwa wafu amefanyika kuwa Mwokozi wa kweli kwa wale wote wanaoamini katika injili ya maji na Roho. Hivyo, tunaweza kuona kuwa imani ambayo Mungu anataka tuwe nayo ni kufahamu na kuamini hivi, “Ahaa! Bwana alizipokea dhambi zangu zote kwa kupitia ubatizo wake, akafa Msalabani, akafufuka tena toka kwa wafu na kwa sababu hiyo amefanyika kuwa Mwokozi wangu wa kweli.”

Sisi tunaweza kuokolewa ikiwa tutamwamini Yesu kikamilifu aliyekuja kwa maji na kwa Roho, na kuwa na imani inayotufanya sisi kuwa wasio na dhambi. Ni kwa kupitia imani hiyo ndipo tunapoweza kuanza kuisha maisha yetu ya kiimani. Kwa hiyo, haijalishi ikiwa umemwamini Yesu kwa miaka 10 au 20, ukweli ni kuwa utatambua kuwa tangu pale ulipoanza kuamini katika injili ya maji na Roho ndipo imani ya kuzaliwa tena upya ilipoanza. Hata mtu ambaye amekuwa akiishi kama mtu aliyezaliwa tena upya kwa miaka mingi bado anaweza kuzaliwa tena upya leo. Hivyo, si Wakristo wote wanaoweza kusema kuwa wamezaliwa tena upya eti kwa sababu tu wanamwamini Yesu kuwa ni Mwokozi wao.

Sheria ni Kiongozi cha Kutuleta Kwenye Haki ya Mungu

Mara tunapokutana na Yesu kwa kupitia injili ya maji na Roho ndipo tunapotambua vizuri juu ya haki ya Mungu ilivyo. Ndio maana Mtume Paulo alisema hivi, *“Lakini kabla ya kuja ile imani tulikuwa tumewekwa chini ya sheria, tumefungwa mpaka ije ile imani itakayofunuliwa.”* Kabla hatujaokolewa na kuzaliwa tena upya tulikuwa tumefungwa chini ya Sheria. Katika 1 Petro 3:19 Mtume Petro alisema kuwa Yesu Kristo alikwenda na kuzihubiria roho zilizokuwa kifungoni. Hili neno “roho zilizo kifungoni” lina maanisha kuwa ni wenye dhambi waliofungwa chini ya Sheria. Ndio maana Mtume Paulo alisema hivi, *“Lakini kabla ya kuja ile imani tulikuwa tumewekwa chini ya sheria, tumefungwa mpaka ije ile imani itakayofunuliwa.”*

Kiongozi anayetajwa katika vifungu hivyo ni nani? Neno la Kiyunani linalohusiana na huyo kiongozi ni *paidagogos*,

neni ambalo kwa kawaida lina maanisha kuwa ni kiongozi-mtumwa ambaye alikuwa na wajibu wa kumwongoza mtoto wa bwana wake kwenda na kurudi toka shule. Tendo hilo lilitokana na utaratibu wa Kiyunani kwa watu wenye maisha ya juu, utaratibu huu ulikuwa kuigwa na Warumi na ulifanyika miongoni mwa familia tajiri katika kipindi ambacho Paulo alikuwa akihudumu, utaratibu huo uliwafanya wazazi matajiri kumpatia jukumu mtumwa mwenye cheo cha juu aliyeaminika kuwapeleka watoto shule na kuwarudisha na kuhakikisha kuwa watoto wanaelimika. Vivyo hivyo, Sheria ililitekeleza jukumu hilo la kiongozi kwa kuwaongoza watu kwenda moja kwa moja kwa Yesu Kristo.

Kiini cha Sheria ni zile Amri Kumi. “Usiwe na miungu mingine ila Mimi. Usizisujudie sanamu. Usilitaje bure jina la Bwana Mungu wako. Ikumbuke siku ya Sabato na uitakase. Waheshimu wazazi wako. Usiue. Usizini. Usiibe. Usimshuhidie jirani yako uongo. Usitamani nyumba ya jirani yako.” Kutokana na hizi amri kumi za Mungu, ni hakika kuwa kila mtu anafanywa kuwa mwenye dhambi na hivyo kufungwa na dhambi kikamilifu. Halafu ukijumlisha na Sheria ya dhamiri, basi hapo ndipo kila mtu anapokuwa mwenye dhambi. Wakati mtu anapofanya dhambi, dhambi hiyo huandikwa katika kibao cha moyo wake (Yeremia 17:1), na kwa sababu hiyo mtu huyo hujisikia kuwa na hatia. Kwa wale wasioifahamu Sheria, basi dhamiri ya mwanadamu ina jukumu na inatenda kwa niaba ya Sheria.

Mtu anapokuwa haifahamu Sheria ya Mungu, dhamiri ya moyo wa mtu huyo ndiyo inayounda Sheria ya Mungu na huionyesha hiyo dhambi. Lakini hukumu ya Sheria ni kali: inaeleza kuwa “Wewe ni mwenye dhambi. Umetenda dhambi. Umefanya dhambi nyingi sana leo hii. Unastahili kabisa kwenda kuzimu. Umeshindwa kuzishika kanuni zangu. Basi

unatakiwa kwenda mbele za Yesu ili uweze kuondolewa hizo dhambi zako kwa kuamini katika injili ya maji na Roho. Kama usipofanya hivyo ni hakika kuwa utakwenda moja kwa moja kuzimu.”

Hivyo, tunapoifahamu na kuiamini haki ya Mungu ambayo ilikuja kwa kupitia injili ya maji na Roho, basi hapo tunafikia hatua ya kuwa na ushahidi wa imani kuwa tumeokolewa, na tunafikia hatua ya kuwa na uhakika katika mioyo yetu kuwa, “Yesu alizichukulia mbali dhambi zetu zote kwa kubatizwa kwake. Na kwamba Yesu amefanyika kuwa Mwokozi wetu.” Hivi ndivyo tunavyoweza kwenda mbele za Yesu kwa uamini katika injili ya maji na Roho. Ni jambo gani linalotupeleka mbele za Bwana kinyume na mapenzi yetu? Ni jambo gani linalotushurutisha kumtafuta Mwokozi? Jambo linalolitekeleza jukumu la kiongozi si jingine bali ni “Sheria” iliyotolewa na Mungu.

Sheria ya Mungu inaionyesha dhambi ya kila mtu. Pamoja na kuwa anaweza asiwepo mtu aliyetuona tukifanya dhambi, Sheria inabakia katika mioyo yetu kama sheria ndogo za Mungu, na inaionyesha dhambi katika maisha yetu huku ikisema, “Umetenda dhambi. Haupaswi kufanya hivyo.” Kwa maneno mengine, Sheria ya Mungu inatufundisha kuwa mawazo yetu, mioyo yetu, na matendo yetu hayako sahihi. Watu wanaweza kuzitambua dhambi zao kwa kupitia Sheria iliyotolewa na Mungu. Hivyo, tunaweza kwenda mbele za Bwana na kulitatua tatizo la dhambi zetu kwa kupitia injili ya maji na Roho. Kile ambacho Mtume Paulo alikisema ni kuwa tunakwenda mbele za Yesu Kristo kwa kupitia Sheria, na kwamba tunaweza kuokolewa na kuzaliwa tena upya kwa kuamini katika injili ya maji na Roho iliyotolewa na Yesu Kristo. Kwa lugha tofauti, Sheria ya Mungu ni kiongozi kinachowaongoza wanadamu kwenda kwa Yesu Kristo, aliye

Mungu wa kweli.

Sheria ya Mungu inafundisha kuwa kila mtu hawezi kuishika na kuifuata Sheria, na sheria ndogo za Mungu. Hakuna hata mtu mmoja hapa duniani anayeweza kuishika Sheria kikamilifu. Ikiwa ni hivyo, kuna watu ambao wanaambiwa wanatakiwa kuishika Sheria, unafikiri ni nini kitatokea? Kwa hakika wataishia kuwa ni wanafiki, na watawekwa mbali na karama ya Yesu Kristo ya wokovu. Waadventista wanasema kuwa wokovu unapatikana ikiwa mtu atamwamini Yesu na ikiwa ataishika siku ya Sabato. Wanasema kuwa wanaweza kwenda Mbinguni ikiwa ikiwa wataitangaza imani yao walau siku 3 katika wiki na masaa 3 kila siku. Kwa kweli waamini wa jinsi hiyo wanasheria. Kule kusema kuwa mtu anatakiwa kufanya kitu fulani kwa jitihada zake ili aweze kuokolewa kinaishia kujenga fikra hii “imani + matendo = wokovu,” fikra hii ni ya kisheria na waamini wake wamekamatwa na Shetani.

Sheria inaweza kuwaleta watu kwenda kwa Yesu Kristo, lakini hiyo Sheria haiwezi kuwaokoa kikamilifu toka katika dhambi. Hii ndio maana Yesu alikuja hapa duniani akafanyika mwili wa mwanadamu, alibatizwa na Yohana, akafa Msalabani, akafufuka toka kwa wafu, akapaa Mbinguni, na kwa sababu hiyo amefanyika kuwa Mwokozi kwa wale wote wanaomwamini. Ni lazima tutambue kuwa hatuwezi kuokolewa hadi pale tutakapoiamini injili ya maji na Roho. Ninyi na mimi ni lazima tuliamini tendo la Yesu la wokovu, yaani wokovu wa maji na damu. Ni hapo tu ndipo tunapoweza kuokolewa toka katika dhambi zetu zote.

Dhambi Zetu Zilioshelewa Mbali Baada ya Kubatizwa Katika Kristo kwa Imani

Wagalatia 3:27 inasema hivi, *“Maana ninyi nyote mliobatizwa katika Kristo mmemvaa Kristo.”* Mtume Paulo anatueleza hapa kuwa yeyote anayetaka kuwa mwana wa Mungu na kuurithi Ufalme wa Mbinguni ni lazima abatizwe katika Kristo. Kule kusema kuwa tunamvaa Kristo kwa kubatizwa katika Kristo maana yake ni kuwa tunafanywa kuwa waamini katika haki ya Mungu ambayo imetujia kupitia Kristo.

Tunafikia hatua ya kumvaa Kristo wakati tunapoamini kwa mioyo yetu yote katika haki ya Mungu, haki inayoeleza kuwa Yesu alizichukua katika mwili wake dhambi zetu zote na makosa ya ulimwengu mzima kwa kupitia ubatizo wake alioupokea toka kwa Yohana Mbatizaji. Mtume Paulo anaendelea kusema kuwa, *“Na kama ninyi ni wa Kristo, basi, mmekuwa uzao wa Ibrahimu, na warithi sawasawa na ahadi.”* Huo ni ukweli. Kwa hakika sisi ni wale tuliofanyika wenye haki kwa imani, na ni watu ambao tutazipokea baraka zote za Mungu.

Kama tungelifanya muhtasari wa kiini cha Sheria tungelisema hivi, Mungu ametupatia Sheria ili tuweze kuzitambua dhambi zetu kama inavyoelezwa katika Warumi 3:20. Hata hivyo, kuna watu wengi sana katika ulimwengu huu ambao wanajaribu kusimama mbele za Mungu kwa kuishika Sheria na kwa kutenda matendo mema kwa kuzitegemea jitihada zao wenyewe badala ya kuzitambua dhambi zao kwa kupitia Sheria.

Kuna ndugu mmoja katika kanisa letu ambaye aliwahi kushuhudia kuwa kabla hajazaliwa tena upya, alichukua likizo ya maisha yake ya kiimani, na katika kipindi hicho cha likizo aliamua kujipima yeye mwenyewe huku akifikiria hivi,

“Nitamwamini tena Yesu baada ya kuwa nimeridhika kuwa sina mapungufu mbele ya Sheria kwa kuwa ninaweza kusimama imara kwa matendo yangu.” Hata hivyo, hatimaye aliweza kutambua kuwa alikuwa hawezi kabisa kuishika Sheria kikamilifu. Baada ya kukutana na baadhi ya ndugu zetu waliozaliwa tena upya katika kanisa letu huyo ndugu aliwasikia wakisema hivi, “Sheria inalenga la kukufanya uzitambue dhambi zako,” ndipo alipotambua, “Kumbe! Kwa hiyo Sheria lengo lake ni kunifanya niweze kuzitambua dhambi zangu, sasa muda huu wote nimekuwa nikijaribu kuishika Sheria. Kumbe nilidhani ninaweza kusimama na kuwa mkamilifu mbele ya Sheria kutokana ujinga wangu. Kumbe nilikuwa nimepotea kabisa.” Ndipo huyo ndugu alipoupata Ukweli kuwa Yesu alizibeba dhambi zake zote kwa kubatizwa, kisha akafa Msalabani, na akafufuka toka kwa wafu siku ya tatu, na kwamba amefanyika kuwa Mwokozi wake wa kweli, ndipo huyo mtu alipopokea ondoleo la dhambi zake zote.

Hata sasa kuna Wakristo wengi sana ambao wanajaribu kuishika Sheria kwa ukamilifu wa asilimia 100%. Na huendelea kujaribu kufanya hivyo hata pale wanapojikwaa na kuanguka kutokana na Sheria iyo hiyo. Lakini hatimaye watu wa jinsi hiyo huishia kuisha maisha ambayo huishia kujikwaa na kuanguka kutokana na Sheria, na huishia kuufanya mzunguko huo huo kuanguka mara kwa mara.

Hata hivyo, kifungu cha Maandiko cha kinasema, “*Lakini, iwapo imani imekuja, hatupo tena chini ya kiongozi,*” ikiwa mioyo yenu ina imani inayowawezesha kuzaliwa tena upya kwa maji na Roho, basi ni hakika kuwa mmewekwa huru toka katika Sheria. Ikiwa mnaamini kuwa Yesu amezitoweshea mbali dhambi zetu zote kwa maji na kwa Roho, na ikiwa mnaamini kuwa dhambi zenu zote zilipitishwa kwenda kwa Yesu Kristo na kwamba aliadhbiwa kwa sababu yenu, na ikiwa

mnaamini kuwa alifufuka tena toka kwa wafu na kwamba Yesu ni Mungu wenu wa wokovu, basi hata ikiwa mtakuwa na mapungufu katika maisha yenu, ni dhahiri kuwa mtawekwa huru toka katika dhambi zenu zote na kisha kuzifanya kazi za haki mkiwa wana wa Mungu walio wakamilifu.

Ni Lazima Tuuamini Upendo wa Mungu Uliokuja Kupitia Injili ya Maji na Roho

Katika 1 Yohana 5:5-12 imeandikwa hivi, “*Mwenye kuushinda ulimwengu ni nani, isipokuwa ni yeye aaminiye ya kwamba Yesu ni Mwana wa Mungu? Huyu ndiye aliyekuja kwa maji na damu, Yesu Kristo; si katika maji tu, bali katika maji na katika damu. Naye Roho ndiye ashuhudiaye, kwa sababu Roho ndiye kweli. Kwa maana wako watatu washuhudiaio mbinguni, Baba, na Neno, na Roho Mtakatifu, na watatu hawa ni umoja. Kisha wako watatu washuhudiaio duniani, Roho, na maji, na damu; na watatu hawa hupatana kwa habari moja. Tukiupokea ushuhuda wa wanadamu, ushuhuda wa Mungu ni mkuu zaidi; kwa maana ushuhuda wa Mungu ndio huu, kwamba amemshuhudia Mwanawe. Yeye amwaminiye Mwana wa Mungu anao huo ushuhuda ndani yake. Asiyemwamini Mungu amemfanya kuwa mwongo, kwa kuwa hakuuamini huo ushuhuda ambao Mungu amemshuhudia Mwanawe. Na huu ndio ushuhuda, ya kwamba Mungu alitupa uzima wa milele; na uzima huu umo katika Mwanawe. Yeye aliye naye Mwana, anao huo uzima; asiye naye Mwana wa Mungu hana huo uzima.*”

Pia katika Yohana 19:34-35 imeandikwa hivi, “*Lakini askari mmojawapo alimchoma ubavu kwa mkuki; na mara ikatoka damu na maji. Naye aliyeona ameshuhudia, na*

ushuhuda wake ni kweli; naye anajua ya kuwa anasema kweli ili ninyi nanyi mpate kusadiki.” Kama ambavyo vifungu hivi vinavyotueleza, Roho, maji, na damu ndio mashahidi wa kweli wa Mungu. Hivyo, ikiwa kweli sisi ni wana wa Mungu, basi kwa hakika tunapaswa kuwa na mashahidi hawa watatu katika mioyo yetu.

Kwanza, Roho Mtakatifu anashuhudia hivi, Yesu Kristo ni Mwana wa Mungu, Mfalme wa wafalme, na kimsingi yeye ni Mungu Muumbaji.

Maji yana maanisha ubatizo ambao Yesu aliupokea toka kwa Yohana Mbatizaji. Ubatizo ambao Yesu aliupokea toka kwa Yohana unatueleza kuwa kwa kubatizwa kwake Yesu Kristo alizibeba dhambi zote za ulimwengu, yaani dhambi za zamani, zilizopo, na zijazo kama vile ilivyoandikwa katika 1 Petro 3:21 *“Mfano wa mambo hayo ni ubatizo, unaowaokoa ninyi pia siku hizi; (siyo kuwekea mbali uchafu wa mwili, bali jibu la dhamiri safi mbele za Mungu), kwa kufufuka kwake Yesu Kristo.”*

Na damu ambayo Yesu aliimwaga Msalabani inashuhudia kuwa Yesu aliimaliza laana yote ambayo ilikuwa ni stahiki kwa mshahara wa dhambi kwa kuadhibiwa na kwa kuimwaga damu yake hadi kifo pale Msalabani. Ni wale tu walio na hao mashahidi watatu katika mioyo yao ndio wanaoweza kuwekwa huru toka katika dhambi zao na kisha kufanyika watu wenye haki. Ikiwa mtu atayaondoa maji katika vitu hivi vitatu kisha akabatiza mashahidi wawili ambao ni Roho na damu, basi mtu huyo dhambi zake zitabakia katika moyo wake, na kwa sababu hiyo ataishia kumfanya Mungu kuwa mwongo, hii ni kwa sababu Mungu alikwisha sema kuwa amezitoweshea mbali dhambi zetu zote.

Hivyo, wale wasio na mashahidi hawa watu ambao ni Roho, maji, na damu ni hakika kuwa hawana Mwana wa

Mungu katika mioyo yao; na kwa sababu hiyo hawana uzima ndani yao. Kwa maneno mengine, wao si wana wa Mungu bali ni wana wa Ibilisi, na wamefungwa tayari kwa kuadhibiwa na kutumwa katika moto wa kuzimu. Pia imeandikwa hivi, “*Na huu ndio ushuhuda, ya kwamba Mungu alitupa uzima wa milele; na uzima huu umo katika Mwanawe*” (1 Yohana 5:11).

Sasa, unawezaje kujua ikiwa umo ndani au nje ya Yesu Kristo? Warumi 8:1-2 inaelezea hili na inasema hivi, “*Sasa, basi, hakuna hukumu ya adhabu juu yao walio katika Kristo Yesu. Kwa sababu sheria ya Roho wa uzima ule ulio katika Kristo Yesu imeniacha huru, mbali na sheria ya dhambi na mauti.*” Kwa hakiak hakuna adhabu kwa wale walio katika Yesu Kristo, kwa kuwa wanao hao mashahidi watatu ambao ni Roho, maji, na damu. Kwa kuwa Yesu Kristo, ambaye kimsingi ni Mwana wa Mungu alizipokea dhambi zote za ulimwengu kwa kubatizwa, kisha akaimwaga damu yake Msalabani ili kuulipa mshahara wa dhambi hizi zote, basi wale wanaoamini hivi hawawezi kuwa na dhambi kamwe.

Pia katika Warumi 8:33 imeandikwa hivi, “*Ni nani atakayewashitaki wateule wa Mungu? Mungu ndiye mwenye kuwahesabia haki,*” na Isaya 50:8-9 inasema hivi, “*Yeye anipatiaye haki yangu yu karibu; ni nani atakayeshindana nami? Na tusimame pamoja; ni nani aliye hasimu yangu? Na anikaribie basi. Tazama, Bwana MUNGU atanisaidia; ni nani atakayenihukumu kuwa mkosa? Tazama hao wote watachakaa kama vazi; nondo atawala.*”

Zaidi ya yote, Zaburi 37:32-33 inaeleza kuwa, “*Mtu asiye haki humvizia mwenye haki, Na kutafuta jinsi ya kumfisha. Bwana hatamwacha mkononi mwake, Wala hatamlamu atakapohukumiwa,*” inatuthibishia kuwa wale walio na hao mashahidi watatu ambao Roho, maji, na damu—yaani ambayo ndio imani halisi iliyothibitishwa na Mungu—hawataadhibiwa

kamwe kwa ajili ya dhambi zao. Kwa kwa heshima ya wale wote walio katika Yesu Kristo, 1 Yohana 4:13 inasema hivi, *“Katika hili tunafahamu ya kuwa tunakaa ndani yake, naye ndani yetu, kwa kuwa ametushirikisha Roho wake.”*

Ili uweze kupokea Roho Mtakatifu ni lazima kwanza upokee ondoleo la dhambi zako. Katika Matendo ya Mitume 2:38 kuna ahadi kuwa Mungu atawapatieni karama ya Roho Mtakatifu ikiwa mtakuwa mmepokea ondoleo la dhambi zenu, pia katika Waefeso 1:13-14 imeandikwa hivi, *“Nanyi pia katika huyo mmechwisha kulisikia neno la kweli, habari njema za wokovu wenu; tena mmechwisha kumwamini yeye, na kutiwa muhuri na Roho yule wa ahadi aliye Mtakatifu. Ndiye aliye arabuni ya urithi wetu, ili kuleta ukombozi wa milki yake, kuwa sifa ya utukufu wake.”*

Hii ina maanisha kuwa kwa wale wanaopokea ondoleo la dhambi zao na kisha kuupata wokovu wa kupitia injili ya maji (ubatizo) na damu (Msalaba), basi hao Mungu atawatia muhuri kuwa ni wana wake mwenyewe kwa kuwapatia Roho Mtakatifu. Hii ni kama vile kumweka ng’ombe au farasi alama katika mguu wake kwa chumba cha moto, na hivyo kuacha kovu ambalo haliwezi kufutwa na linaloonyesha juu ya mmiliki wake. Hivyo, Mungu ametoa karama ya Roho Mtakatifu katika mioyo ya wana wake ili aweze kuwatenganisha wana wake waliopokea ondoleo la dhambi zao na waliofanyika kuwa wenye haki kwa kuamini katika injili ya maji na Roho kutoka kati ya wale walio wana wa Ibilisi.

Zaidi ya yote, katika Yohana 6:53-58 imeandikwa hivi: *“Basi Yesu akawaambia, Amin, amin, nawaambieni, Msipoula mwili wake Mwana wa Adamu na kuinywa damu yake, hamna uzima ndani yenu. Aulaye mwili wangu na kuinywa damu yangu anao uzima wa milele; nami nitamfufua siku ya mwisho. Kwa maana mwili wangu ni chakula cha kweli, na damu yangu*

ni kinywaji cha kweli. Aulaye mwili wangu na kuinywa damu yangu hukaa ndani yangu, nami hukaa ndani yake. Kama vile Baba aliye hai alivyonituma mimi, nami ni hai kwa Baba; kadhalika naye mwenye kunila atakuwa hai kwa mimi. Hiki ndicho chakula kishukacho kutoka mbinguni; si kama mababa walivyokula, wakafa; bali akilaye chakula hicho ataishi milele.”

Hapa Mungu anatumia kuula mwili wa Mwana wa Adamu na kuinywa damu yake. Je, hii ina maanisha kuwa tunapaswa kuula mwili wa Yesu na kuinywa damu yake kimwili kama vile Wayahudi wa wakati huo walivyoshindwa kuelewa? Kwa kweli hapana! Ufafanuzi wa jinsi hiyo hauna msingi wowote ule na huwa unafanywa na wenye dhambi ambao kwa kutozaliwa tena upya, wamebakia kuwa wapofu na kutolifahamu Neno. Wakatoliki bado wana wanalitetea fundisho linaloitwa “Transubstantiation,” fundisho ambalo linalisitiza kwia ule mkate na divai vinavyotolewa ana kuombewa wakati wa ushirika mtakatifu huwa vinabadilika kabisa na kuwa mwili na damu halisi ya Yesu Kristo katika ukiroho wake hali vitu hivyo vikiwa vinaonekana kama vilivyo.

Sasa, kitendo cha kuula mwili wa Mwana wa Adamu kikoje? Hii inahusiana na imani yetu inayotokana na ukweli kuwa Yesu alizichukua dhambi za ulimwengu katika mwili wake kwa kubatizwa na Yohana. Na hii ni sawa na kuamini haki ya Mungu kwa kupitia Yesu Kristo aliyekuja kwa maji (1 Yohana 5:6). Kwa maneno mengine, kitendo cha kuula mwili wa Mwana wa Adamu ni kule kuamini haki ya Mungu ambayo inaeleza kuwa Yesu Kristo, ambaye ni Mungu Mwenyewe katika uwepo wake, alifanyika mwili wa mwanadamu, na kwamba baada ya kubatizwa na Yohana Mbatizaji, Yesu alizipokea na kuzibeba dhambi zote za

ulimwengu katika mwili wake.

Na tendo la kuinywa damu ya Mwana wa Mungu linaonyesha ni kuamini kuwa Yesu alilipa laana yote ya dhambi zetu kwa kuimwaga damu yake na kufa Msalabani kama mshahara wa dhambi zote alizokuwa amezibeba.

Katika hili 1 Wakorintho 11:23-29 inaeleza hivi: *“Kwa maana mimi nalipokea kwa Bwana niliyowapa nanyi, ya kuwa Bwana Yesu usiku ule aliotolewa alitwaa mkate, naye akiisha kushukuru akaumega, akasema, Huu ndio mwili wangu ulio kwa ajili yenu; fanyeni hivi kwa ukumbusho wangu. Na vivi hivi baada ya kula akakitwaa kikombe, akisema, Kikombe hiki ni agano jipya katika damu yangu; fanyeni hivi kila mnywapo, kwa ukumbusho wangu. Maana kila mwulapo mkate huu na kukinywea kikombe hiki, mwaitangaza mauti ya Bwana hata ajapo. Basi kila aulaye mkate huo, au kukinywea kikombe hicho cha Bwana isivyostahili, atakuwa amejipatia hatia ya mwili na damu ya Bwana. Lakini mtu ajihoji mwenyewe, na hivyo aule mkate, na kukinywea kikombe. Maana alaye na kunywa, hula na kunywa hukumu ya nafsi yake, kwa kutokuupambanua ule mwili.”*

Hapa Bwana alisema kuwa mtu anapaswa kujichunguza kabla ya kuula mkate na kukinywea kikombe, hapo alimaanisha kuwa ni lazima tukiri katika mioyo yetu kuwa sisi ni mbegu za watenda maovu, ambao tutaendelea kutenda aina mbali mbali ya dhambi hadi siku tutakapokufa na hivyo kuhukumiwa kwenda kuzimu. Baada ya kukiri hivyo, ndipo tunapopaswa kuamini kuwa Yesu Kristo ameziondoa dhambi zetu zote zilizopita, zilizopo, na zitakazokuja kwa ubatizo wake, na kwamba Yesu ameziondoa dhambi zote za ulimwengu mzima, na kwamba kwa kuimwaga damu yake Msalabani kama mshahara wa hizo dhambi zote, basi Yesu amezifutilia mbali laana zetu zote. Matendo haya yote ndio

yanayounda tendo la kuula mkate wa Bwana na kuinywa divai ya Bwana.

Hata hivyo, Wakristo wengi siku hizi wanaula mkate tu huku wakiwa hawauamini ubatizo ambao Yesu aliupokea toka kwa Yohana. Kwa upande wao, Ushirika Mtakatifu ni sawa na desturi fulani tu ya kidini. Kwa kuwa watu wa jinsi hiyo hawaamini kuwa Yesu Kristo alizipokea dhambi zao zote, ndio maana dhambi zao zimebakia kama zilivyo katika mioyo yao, na kwa kuwa wanaula mkate na kukinywe kikombe hali wakiwa bado ni wenye dhambi, basi ni hakika kuwa wanahatia ya kuutumia vibaya mwili na damu ya Bwana. Kimsingi, inatakiwa tuule mkate na kukinywea kikombe baada ya kuwa tumeamini katika ubatizo wa Yesu Kristo na damu yake aliyoimwaga pale Msalabani.

Wagalatia 1:4 inasea kwua Kristo, “alijitoa nafsi yake kwa ajili ya dhambi zetu, ili atuokoe na dunia hii mbovu iliyopo sasa, kama alivyopenda Mungu, Baba yetu,” vivyo hivyo ubatizo wa Yesu ulikuwa ni upendo wa kweli and mapenzi ya Mungu Baba kwa ajili yetu.

Katika 1 Wathesalonike 4:3, Biblia inasema hivi, “*Maana haya ndiyo mapenzi ya Mungu, kutakaswa kwenu, mwepukane na uasherati,*” na katika Yohana 6:40, Yesu alilishuhudia Neno la ahadi akisema hivi, “*Kwa kuwa mapenzi yake Baba yangu ni haya, ya kwamba kila amtazamaye Mwana na kumwamini yeye, awe na uzima wa milele; nami nitamfufua siku ya mwisho.*” Hivyo, unaweza kutakaswa na kupokea uzima wa milele ikiwa tu unaiamini injili kamilifu ya maji na Roho kwa moyo wako wote.

Kutokana na maelezo haya, yeye anayeijenga nyumba yake katika mwamba atafananishwa na “mtu mwenye haki” ambaye haadhibiwi kwa sababu ya dhambi zake, kwa kuwa ameokolewa na kuondolewa dhambi zake kwa kuamini kwa

moyo wake wote katika injili ya ubatizo wa Yesu Kristo na Msalaba wake, na ni mtu ambaye hadanganywi na majaribu kwa kuwa anaye Roho Mtakatifu.

Naye anayejenga nyumba yake katika mchanga atafananishwa na mtu asiyeamini katika ubatizo wa Yesu Kristo, na anayeufahamu ubatizo kwa namna ya nadharia tu lakini hauamini katika moyo wake, na kwa sababu hiyo mtu huyo bado ana dhambi zote katika moyo wake. Kwa kuwa watu wa jinsi hiyo hawajapokea ondoleo la dhambi zao, basi siku ya hukumu itakapofika, Shetani atawashutumu na hivyo watatupwa kuzimu. Hawa ndio watu waitwao wazushi.

Imani ya Kizushi Katika Ukristo

Katika Biblia imeandikwa hivi, *“Mtu aliye mzushi, baada ya kumwonya mara ya kwanza na mara ya pili, mkatae; ukijua ya kuwa mtu kama huyo amepotoka, tena atenda dhambi, maana amejihukumu hatia yeye mwenyewe”* (Tito 3:10-11). Biblia inafafanua kikamilifu kuhusu wazushi. Mzushi ni yule ambaye anajihukumu yeye mwenyewe.

Neno mzushi linatokana na neno la Kiyunani linalomaanisha chaguo. Kuwa inawapasa Wakristo kukuri na kumwamini Yesu Kristo kuwa ni Bwana wao kwa mujibu wa Ukweli wa injili ya maji na Roho, Wakristo hao hao wamejichagulia namna tofauti ya kumwamini Yesu. Wale waliochagua kutouamini ubatizo wa Yesu Kristo na badala yake wakaiamini damu yake pekee basi hao ndio wazushi, na wazushi wanajihukumu wenyewe na wanasimama kinyume na Kristo. Kitendo cha wao cha kutoiamini injili hii ya kweli ndio kinachowapelekea waangukie katika kifo (1 Yohana 5:16). Kwa maneno mengine, 1 Yohana 3:4 inasema hivi, *“Kila*

atendaye dhambi, afanya uasi; kwa kuwa dhambi ni uasi,” basi hao wanaoishikilia imani hiyo potofu hao ndio wanaotenda uasi.

Zaidi ya yote, Wagalatia 2:17 inasema hivi, *“Lakini ikiwa sisi wenyewe, kwa kutafuta kuhesabiwa haki katika Kristo, tulionekana kuwa wenye dhambi, je! Kristo amekuwa mtumishi wa dhambi? Hasha!”* Kama ilivyoielezwa, Biblia inatushuhudia kuwa mara tunapomwamini Yesu Kristo kwa usahihi, basi hapo tunahesabiwa kuwa watu wenye haki, na haiwezekani tena kwa sisi tena kuwa wenye dhambi.

Unapokuwa na imani kuwa umeokolewa kwa kweli kwa kuamini katika injili kamilifu ya ubatizo wa Yesu Kristo na Msalaba wake, basi kuanzia hapo maisha ya kweli ya kiimani ndipo yanapoanza kwako. Imani hii, ambayo inathibitisha kuwa tumefanyika kuwa watu wenye haki na wasio na dhambi kwa kuamini katika ubatizo na damu ya Yesu, ndiyo imani sahihi ya Ukweli ambayo inampendeza Mungu na imethibitishwa na Mungu.

Je, wewe na mimi tunayo imani sahihi? Kuwa na imani katika injili ya maji na Roho ndiko kuwa na imani sahihi mbele za Mungu. ☒

Sasa Hatupaswi Kuwa Chini ya Laana ya Sheria

< Wagalatia 3:1-29 >

“Enyi Wagalatia msio na akili, ni nani aliyewaloga, ninyi ambao Yesu Kristo aliwekwa wazi mbele ya macho yenu ya kuwa amesulibiwa? Nataka kujifunza neno hili moja kwenu. Je! Mlipokea Roho kwa matendo ya sheria, au kwa kusikia kunakotokana na imani? Je! Mmekuwa wajinga namna hii? Baada ya kuanza katika Roho, mnataka kukamilishwa sasa katika mwili? Mmepatikana na mateso makubwa namna hii bure? Ikiwa ni bure kweli. Basi, yeye awapaye Roho na kufanya miujiza kati yenu, je! Afanya hayo kwa matendo ya sheria, au kwa kusikia kunakotokana na imani? Kama vile Ibrahimu alivyomwamini Mungu akaahesabiwa haki. Fahamuni basi, ya kuwa wale walio wa imani, hao ndio wana wa Ibrahimu. Na andiko, kwa vile lilivyoona tangu zamani kwamba Mungu atawahesabia haki Mataifa kwa imani, lilimhubiri Ibrahimu habari njema zamani, kusema, Katika wewe Mataifa yote watabarikiwa. Basi hao walio wa imani hubarikiwa pamoja na Ibrahimu aliyekuwa mwenye imani. Kwa maana wale wote walio wa matendo ya sheria, wako chini ya laana; maana imeandikwa, Amelaaniwa kila mtu asiyedumu katika yote yaliyoandikwa katika kitabu cha torati, ayafanye. Ni dhahiri ya kwamba hakuna mtu ahesabiwaye haki mbele za Mungu katika sheria; kwa sababu Mwenye haki ataishi kwa imani. Na torati haikuja kwa imani, bali, Ayatendaye hayo ataishi katika hayo.

Kristo alitukomboza katika laana ya torati, kwa kuwa alifanywa laana kwa ajili yetu; maana imeandikwa, Amelaaniwa kila mtu aangikwaye juu ya mti; ili kwamba baraka ya Ibrahimu iwafikilie Mataifa katika Yesu Kristo, tupate kupokea ahadi ya Roho kwa njia ya imani. Ndugu zangu, nanena kwa jinsi ya kibinadamu. Lijapokuwa ni agano la mwanadamu, hata hivyo likiisha kuthibitika, hakuna mtu alibatilishaye, wala kuliongeza neno. Basi ahadi zilinenwa kwa Ibrahimu na kwa mzao wake. Hasemi, Kwa wazao, kana kwamba ni wengi, bali kana kwamba ni mmoja, Kwa mzao wako, yaani, Kristo. Nisemalo ni hili; agano lililothibitishwa kwanza na Mungu, torati iliyotokea miaka mia nne na thelathini baadaye hailitangui, hata kuibatilisha ile ahadi. Kwa maana urithi ukiwa kwa sheria, hauwi tena kwa ahadi; lakini Mungu alimkirimia Ibrahimu kwa njia ya ahadi. Torati ni nini basi? Iliingizwa kwa sababu ya makosa, hata aje huyo mzao aliyepewa ile ahadi; iliamriwa kwa utumishi wa malaika kwa mkono wa mjumbe. Basi aliye mjumbe si mjumbe wa mmoja; bali Mungu ni mmoja. Basi je! Torati haipatani na ahadi za Mungu? Hasha! Kwa kuwa, kama ingalitolewa sheria iwezayo kuhuisha, yakini haki ingalipatikana kwa sheria. Lakini andiko limeyafunga yote chini ya nguvu ya dhambi, makusudi hao waaminio wapewe ile ahadi kwa imani ya Yesu Kristo. Lakini kabla ya kuja ile imani tulikuwa tumewekwa chini ya sheria, tumefungwa mpaka ije ile imani itakayofunuliwa. Hivyo torati imekuwa kiongozi kutuleta kwa Kristo, ili tuhesabiwe haki kwa imani. Lakini, iwapo imani imekuja, hatupo tena chini ya kiongozi. Kwa kuwa ninyi nyote mmekuwa wana wa Mungu kwa njia ya imani katika Kristo Yesu. Maana ninyi nyote mliobatizwa katika Kristo mmemvaa Kristo. Hapana Myahudi wala

Myunani. Hapana mtumwa wala huru. Hapana mtu mume wala mtu mke. Maana ninyi nyote mmekuwa mmoja katika Kristo Yesu. Na kama ninyi ni wa Kristo, basi, mmekuwa uzao wa Ibrahimu, na warithi sawasawa na ahadi.”

Kitabu cha Wagalatia kiliandikwa ili kuonya dhidi ya mafundisho ya uongo ya wanatohara. Kati ya watakatifu wa makanisa ya Galatia kulikuwa na baadhi ya watu waliokuwa wakitetea sana juu ya tohara ya kimwili. Watu hawa walitoa hoja wakisema ili watakatifu waweze kuwa watu wa Mungu, watakatifu hao walipaswa kutahiriwa kimwili hata kama walikuwa wanamwamini Yesu, lakini ukweli ni kuwa hoja hizo zilikuwa ni uongo. Hii inafanana sana na fundisho la uongo la sala za toba ambalo limeukumba Ukristo wa leo. Fundisho hili la kidini lililoundwa na mwanadamu limewapotosha Wakristo wengi walio na dhambi kujaribu kuziosha dhambi zao kwa kutegemea jitihada zao binafsi hata baada ya kumwamini Yesu. Kutoka katika Kitabu cha Wagalatia tunaweza kuona kuwa jinsi imani hiyo ya kisheria ilivyo na makosa mbele za Mungu.

Kulikuwa na Watetezi wa Tohara ya Kimwili Miongoni Mwa Waamini wa Kigalatia

Katika Wagalatia 3:1-5 imeandikwa hivi, “*Enyi Wagalatia msio na akili, ni nani aliyewaloga, ninyi ambao Yesu Kristo aliwekwa wazi mbele ya macho yenu ya kuwa amesulibiwa? Nataka kujifunza neno hili moja kwenu. Je! Mlipokea Roho kwa matendo ya sheria, au kwa kusikia kunakotokana na imani? Je! Mmekuwa wajinga namna hii? Baada ya kuanza katika Roho, mnataka kukamilishwa sasa*

katika mwili? Mmepatikana na mateso makubwa namna hii bure? Ikiwa ni bure kweli. Basi, yeye awapaye Roho na kufanya miujiza kati yenu, je! Afanya hayo kwa matendo ya sheria, au kwa kusikia kunakotokana na imani?" Vivyo hivyo, hali akiwa na moyo wenye kuchanganyikiwa, Mtume Paulo aliwahoji wale waliodai kuwa watu wanaweza kuwa watu wa Mungu ikiwa tu watatahiriwa. Mtume Paulo aliuliza kwa nguvu ya hoja akisema, *"Je! Mlipokea Roho kwa matendo ya sheria, au kwa kusikia kunakotokana na imani? Baada ya kuanza katika Roho, mnataka kukamilishwa sasa katika mwili?"* Sababu iliyomfanya Paulo kusema maneno haya ni kwa kuwa watetezi wa tohara ya kimwili walikuwa wakiikufuru injili ya kweli ya maji na Roho.

Imani ya Paulo ilikuwa ni ile iliyoamini katika injili ya maji na Roho. Wakati Yesu alipokuja hapa duniani, alibatizwa na Yohana Mbatizaji na akazichukua dhambi zetu katika mwili wake mara moja na kwa wote kwa kupitia ubatizo wake. Kisha alisulubiwa hadi kifo, akafufuka tena toka kwa wafu, na kwa sababu hiyo ametuokoa sisi tunaoamini katika injili ya maji na Roho katika ukamilifu wake mara moja na kwa wote.

Lakini Wagalatia walikuwa ni wajinga sana, kwa kuwa walikuwa wakifundisha kuwa mtu angeliweza kuwa mtu wa Mungu ikiwa tu angeliipokea tohara ya kimwili. Waumini wengi katika makanisa ya Galatia yaliyamini tohara ya kimwili kutokana na ujinga. Hivyo Mtume Paulo aliendelea kuyakemea makosa yao huku akiwataka wageuka na kubadilika. Pamoja na jitihada hizo, watu wengi katika makanisa ya Galatia waliendelea kuamini kuwa wangelifanyika kuwa watu wa Mungu kikamilifu ikiwa tu wangelipokea tohara ya kimwili katika miili yao.

Je, tunaweza kuwa wana wa Mungu kwa kuipokea na kuiamini tohara ya kimwili? Hapana, tunafanywa watu wa

Mungu ikiwa tu tutamwamini Yesu Kristo kuwa ni Mwokozi wetu aliyekuja kwa injili ya maji na Roho. Lakini pamoja na ukweli huu, hata leo hii bado kuna watu wengi wanaodai kuwa dhambi zao zinaweza kuoshelewa mbali kwa kuzifanya sala za binafsi za toba ambazo ni sawa na tohara ya kimwili.

Wakristo wengi siku hizi wanaamini na wanadai kuwa wanaweza kuziosha dhambi zao kwa kupitia sala za toba. Huu ni uthibitisho unaonyesha kuwa imani za kisheria zimeenea sana katika Ukristo wa siku hizi pia. Wale ambao wanatetea imani za kisheria katika Ukristo wa leo wanajitenga na Mungu na wamejigeuza na kuwa watumishi wa Shetani. Kwa hiyo, tunahitaji kufahamu jinsi fundisho la sala za toba lilivyo fundisho la kidini la Kikristo lililo potofu.

Uongo Utokanao na Madai Kuwa Dhambi Inaweza Kuoshwa Kwa Kupitia Sala za Toba

Imani ya leo hii inayodai kuwa mtu anaweza kuzioshelea mbali dhambi zake kwa kupitia sala za toba ni sawa na ile imani ya uongo iliyokuwepo katika Kanisa la Mwanzo ambayo ilieleza kuwa mtu angeliweza mtu wa Mungu ikiwa tu angelitahiriwa kimwili. Kama wanatohara wa kimwili katika siku za Mtume Paulo walivyowapotosha Wakristo wengi kiasi cha kuangukia katika maangamizi kutokana na mafundisho yao potofu, ndivyo ilivyo kwa wachungaji wa uongo leo hii ambao wanawapeleka Wakristo wengi kwend kuzimu kutokana na mafundisho ya uongo ya sala za toba. Kwa matokeo hayo, karibu Wakristo wengi leo hii wanaelewa vibaya kuwa ikiwa watamwamini Yesu kuwa ni Mwokozi wao, basi wanaweza kuziosha dhambi zao binafsi kwa kupitia sala za toba. Hata hivyo, ni lazima tutambue kuwa ingawa wanazifanya sala zao

za toba kwa Bwana hiyo haimaanishi kuwa dhambi zao zinatoweshwa kila wanapofanya hizo sala. Mafundisho ya jinsi hiyo yana masingi wake katika jitihada binafsi za mwanadamu na kwa sababu hiyo ni uongo ambao unasimama kinyume na Neno la Mungu.

Siku hizi, Wakristo wanapofanya dhambi hapa ulimwenguni baada ya kuwa wamemwamini Yesu kuwa ni Mwokozi, basi wao hufanya sala za toba kama ifuatavyo: “Bwana, tafadhali naomba nisamehe. Ikiwa utazisamehe dhambi zangu wakati huu tena sintafanya dhambi hizo tena.” Na baada ya kusali hivyo hufikiria kuwa dhambi zao zimeoshelewa mbali kwa maneno machache ya kujuta kama hayo. Kwa kuwa hawaifahamu injili ya maji na Roho, wao wanafikiria kuwa hakuna njia nyingine ya kuweza kuzishughulikia dhambi zao zaidi ya hiyo ya sala ya toba. Wao huamini kuwa wanaondolewa dhambi zao kwa kumwomba Mungu awasamehe dhambi zao. Hata hivyo, wanapofanya hivyo hata dhamiri zao huonyesha wazi kuwa dhambi zao hazijaondolewa kwa kutoa maneno machache kama hayo ya sala za toba.

Wale ambao bado wanazitegemea sala za toba kujaribu kuziosha dhambi zao ni lazima wakubaliane na ukweli huu, yaani wageuke, na waiamini injili ya maji na Roho. Ikiwa ni kweli kuwa dhambi za mwanadamu zingeliweza kuondolewa kwa kufanya sala za toba kwa Bwana, basi kungelikuwa hakuna haja ya Bwana kuja hapa duniani na kubatizwa na Yohana ili kuwakomboa wenye dhambi toka katika maovu yao, na wala haikuwa na sababu ya yeye kufa Msalabani. Kwa nini Yesu alibatizwa na Yohana? Yesu alibatizwa na Yohana Mbatizaji ili kuzipokea dhambi zetu katika mwili wake mara moja na kwa wote. Ni Yesu ndiye aliyetukomboa toka katika dhambi kwa kuzichukua dhambi za ulimwengu kwa kupitia

ubatizo wake na kwa kuimwaga damu yake Msalabani; kwa kweli sala zetu binafsi haziwezi kabisa kuziosha dhambi zetu. Tofauti kati ya imani hizo mbili ni kubwa mno.

Hata hivyo, karibu Wakristo wote ulimwenguni kote wanaamini kwa sasa kuwa dhambi zao zinaoshwa kwa kupitia sala za binafsi za toba, na hivyo si makosa kusema kuwa maisha yao ya kiimani yanaanza kwa sala za toba na kuhitimishwa kwa sala za toba. Wao huamini kuwa waliokolewa kwanza kwa kuiamini damu ya Yesu Msalabani, na huamini kuwa dhambi wanazozifanya baada ya hapo huwa zinaondolewa kwa kufanya sala za toba. Jamani hao si ndio watu wa kuhurumiwa? Kila mmoja wao anajidanganya mwenyewe. Watu hao wameiacha imani ya kweli katika injili ya maji na Roho na wameikumbatia imani yao binafsi ya kisheria kwa msingi wa maadili yao binafsi. Kama hawatabadilika kutoka katika imani hiyo, basi ni hakika kuwa hawataweza kuziondolea mbali dhambi zao.

Ikiwa dhambi inatoweshewa mbali kwa kufanya sala za toba, basi hiyo itamaanisha kuwa wokovu wetu haumtegemei Yesu, bali unayategemea matendo yetu binafsi, na hii itamaanisha kuwa kazi za Yesu hazina uhusiano wowote ule na wokovu wetu. Kwa kweli hatupaswi kuamini kwa namna hiyo. Kinyume chake, watetezi wa sala za toba na tohara ya kimwili sasa wanapaswa kutambua kuwa wanaufanya ubatizo wa Yesu na damu yake aliyoi mwaga Msalabani kuwa ni bure, na kwa sababu hiyow wanapaswa kuachana na imani hiyo potofu.

Ikiwa wataendelea kuyaishi maisha yao ya kiimani huku wakizitegemea sala zao binafsi za toba, basi ni hakika kuwa watabakia kuwa wenye dhambi milele. Kwa nini? Kwa sababu ingawa Yesu amezitoweshea mbali dhambi zetu zote mara moja na kwa wote kwa kubatizwa na Yohana Mbatizaji katika Mto Yordani, na kufa Msalabani, na kisha akafufuka toka kwa

wafu, ukweli ni kuwa Wakristo walio wengi hawaiamini injili ya maji na Roho ambayo ndio Ukweli wa wokovu!

Je, Wakristo wa leo hii ambao wanamwelewa na kumwamini Yesu vibaya si wale wanaozitegemea sala zao binafsi za toba ili kutatua matatizo yao binafsi ya dhambi? Wafuasi na watetezi wa sala za toba wanafikiri kuwa Yesu Kristo alishindwa kuzitoweshea mbali dhambi zao mara moja na kwa wote kwa kupitia injili ya maji na Roho. Imani ya jinsi hiyo si sahihi. Lakini pamoja na maelezo haya, imani inayoamini kuwa mtu anaoshwa dhambi zake kwa kufanya sala za toba bado ipo kwa wingi hadi wakati huu, kinachohuzunisha zaidi ni kuwa wale wanaofahamu kuwa fundisho hili la kidini la Kikristo lina makosa ni wachache sana. Kwa kuwa wafuasi wa sala za toba wana imani isiyo na msingi, ndio maana hawafahamu kuwa imani yao ina makosa, na wala hawafahamu kuwa wanapoiendeleza imani yao yenye makosa wanawafanya watu wengi washindwe kuoshwa dhambi zao na kwa sababu hiyo wataangamizwa milele.

Baada ya kuzitoweshea mbali dhambi zetu mara moja na kwa wote kwa kupitia injili ya maji na Roho, kwa sasa Bwana ameketi mkono wa kuume wa kiti cha enzi cha Mungu Baba. Bwana alikuja hapa duniani kuwakomboa wenye dhambi toka katika dhambi; alibatizwa na Yohana Mbatizaji, akafa Msalabani, alifufuka tena toka kwa wafu, na hivyo akazitoweshea mbali dhambi zetu zote mara moja na kwa wote; kisha akapaa kwenda katika Ufalme wa Mbinguni ana ameahidi kuwa atarudi tena. Ni kwa nini basi mtu hawezi kuliadini hili Neno la Ukweli? Ni lazima tuamini katika injili ya maji na Roho. Neno la injili ya maji na Roho ambalo Mungu ametupatia ndio njia ya wokovu wa kweli.

Bwana wetu alikuja hapa duniani zaidi ya miaka 2000 iliyopita, akazichukua dhambi zetu mara moja na kwa wote

kwa kubatizwa alipokuwa na umri wa miaka 30, kisha akaenda Msalabani na kusulubiwa hadi kifo, akafufuka tena toka kwa wafu, na kwa sababu hiyo amezitoweshea mbali dhambi zetu zote mara moja na kwa wote. Bwana amefanyika kuwa Mwokozi wetu wa kweli kwa kuwa ametuokoa sisi tunaoamini katika injili ya maji na Roho mara moja na kwa wote. Hivyo, Bwana wetu ni Mwokozi wa kweli ambaye amezitoweshea mbali dhambi zetu zote, naye ni Hakimumu wa kweli ambaye atamhukumu kila mtu kwa haki.

Hivyo Ukweli halisi wa wokovu ambao tunapaswa kuuamini ni injili ya maji na Roho. Kwa upande mwingine, fundisho la kidini la sala za toba ambalo Wakristo wengi siku hizi wanaliamini si lolote bali ni uongo unaotokana na nadharia ya mwanadamu iitwayo “kanuni ya sababisho.”

Kwa Wakristo wanaosema kuwa wanaondolewa dhambi zao kwa kufanya sala za toba, wanasisitiza kuwa ondoleo la dhambi halipokelewi katika wakati uliopo mkamilifu bali linapokelewa katika wakati uliopo unaoendelea. Imani ya jinsi hiyo ni potofu. Je, ni kweli kuwa Bwana wetu anazitoweshea mbali dhambi katika wakati uliopo unaoendelea? Hapana, kwa kweli si hivyo. Bwana alikwisha zitoweshea mbali dhambi zote za ulimwengu hapo zamani kwa tendo lake la haki, na kwa sababu hiyo sisi tumepokea ondoleo la dhambi zetu kutokana na kuuamini Ukweli huo. Kwa kweli dhambi zetu haziondolewi kidogo kidogo kila siku kwa kupitia sala za toba, bali Bwana amekwisha zitoweshea mbali dhambi hizo mara moja na kwa wote kwa ubatizo wake na damu yake Msalabani, hivyo yeyote yule anayeuamini Ukweli huu anapokea ondoleo la dhambi la kudumu mara moja.

Kwa hiyo, tunapaswa kutambua kuwa kwa wale wanaoamini katika injili ya maji na Roho, baraka ya ondoleo la dhambi imekwisha kukamilishwa katika wakati uliopita

mkamilifu. Kwa kuwa tumeondolewa dhambi zetu zote kwa kuamini katika injili ya maji na Roho, ni hakika kuwa sisi hatuna dhambi inayohitaji kusamehewa tena. Kwa wale ambao wamezaliwa tena upya kwa kuamini katika injili yamaji na Roho, ule wakati wa ujinga na upotofu wa kujaribu kuondolewa dhambi kupitia sala za toba ulishaisha. Sasa, kila mtu ni lazima aoshwe dhambi na apokee uzima wa milele kwa kuamini injili ya maji na Roho iliyotolewa na Bwana kwa wanadamu wote.

Wakristo ambao wamefungwa katika mafundisho ya kidini ya uongo wameshindwa kuzaliwa tena upya kwa sababu wamekuwa wakiuamini uongo unaoitwa wokovu unaokua: yaani wokovu utokanao na kuhesabiwa haki kwa imani, kutakaswa, na kutukuzwa. Kwa maneno mengine, Wakristo wa jinsi hiyo wamefundishwa na wanaamini kama ifuatavyo: “Ingawa tumeokolewa toka katika dhambi zote zilizopita kwa kuamini damu ya thamani ya Msalabani, lakini kwa kuwa bado tunatenda dhambi wakati huu, basi wokovu wetu ni lazima upatikane kwa namna inayokua kwa kufanya sala za toba kila siku, huku tukipita katika njia ya kutakaswa, na hatimaye tutakaswa hadi kifo na hatimaye kuufikia wokovu uliotukuka.”

Hivyo wakati wanapoulizwa hivi, “Je, mmeokolewa kikamilifu toka katika dhambi?” wao hutoa jibu la ajabu wakisema hivi, “Ndio! Nilikolewa toka katika dhambi, na bado ninaokolewa, na bado nitaendelea kuokolewa.” Je, majibu haya yanaleta maana yoyote ile? Kama mtu anayetaka kufa kwa kuzama kwenye maji anasema hivi, “Niliokolewa, ninaokolewa, na nitaokolewa,” basi ni hakika kuwa mtu huyo bado yupo katika hatari ya kufa maji.

Uongo mmoja unahitaji uongo mwingine wa aina kumi ili kuweza kuuficha uongo huo. Hivyo ndivyo ilivyo kwa

mafundisho ya kidini ya uongo. Kwa kuwa Ukristo uliruhusu uongo mara moja ndio maana uongo mwingi sana umeingia ndani yake. Ndio maana fundisho la kidini la Kikristo lihusulo wokovu limekuwa na utata mwingi sana kiasi cha kuwepo aina nyingi sana za wokovu. Kutokana mkanganyiko huo kumekuwapo na nadharia za wokovu kama vile “wokovu kwa kuhesabiwa haki kwa imani,” “wokovu kwa kutakasawa,” na “wokovu kwa kutukuzwa,” kwa kweli walimu wa uongo wanauelezea wokovu kana kwamba unapatikana kwa hatua mbalimbali. Kusema kweli, walimu hao wanashindwa kuuelezea wokovu kwa maelezo ya kina na yaliyo thabiti. Walimu hao huuona wokovu kuwa ni kati ya baraka nyingi za Mungu. Lakini ukweli ni kuwa dhana ya wokovu inahusiana na ondoleo la dhambi. Kwa lugha tofauti, wokovu ni neno lililofupishwa linalo maanisha “wokovu kwa ondoleo la dhambi” (Luka 1:77).

Je, ondoleo la dhambi zetu zote linapokelewa mara moja kwa kuamini injili ya maji na Roho? Au ni lazima tupokee ondoleo hilo la dhambi kila siku katika wakati uliopo unaendelea kwa kufanya sala za toba kila siku? Kwa hakika ni lazima tupokee ondoleo la dhambi zetu kwa imani katika injili ya maji na Roho. Lakini pamoja na ukweli huu, Wakristo wengi bado wanasisitiza kuwa waliokolewa toka katika dhambi zao zote kwa kumwamini Yesu kuwa ni Mwokozi wao, na kwamba sasa wanaokolewa kwa kupitia sala zao za toba, na kwamba wataendelea kuokolewa hapo baadaye, kwa maelezo hayo ni hakika kuwa imani yao imejengwa katika msingi wa mafundisho ya kidini na si katika msingi wa imani inayoamini katika injili ya maji na Roho ambayo ndio Ukweli. Wale wanaoamini kuwa wanaweza kuziosha dhambi zao kwa kupitia sala zao binafsi za toba ni hakika kuwa hawana imani sahihi, na kwa sababu hiyo wataendelea kubakia katika dhambi.

Hebu tufikirie hapa kuwa nimepokea zawadi ya siku ya kuzaliwa toka kwa mtu fulani. Basi ikiwa nitamwambia yule aliyenipatia zawadi kuwa, “Nitapata zawadi ya siku ya kuzaliwa toka kwako,” basi huyo mtu anaweza kufikiria kuwa pengine nimeugua kichaa. Habari hii pia inahusiana sana na namna wokovu ulivyo. Wokovu wetu umetimizwa mara moja na kwa wote kwa imani, maana wokovu umekuja kwetu kupitia injili ya maji na Roho. Tunapokea ondoleo la dhambi zetu mara moja na kwa wote kwa kuamini katika injili ya maji na Roho iliyotolewa na Yesu Kristo; ondoleo hili la dhambi halipatikani kila siku kwa kupitia sala zetu za toba.

Hivyo watu ni lazima watambue kuwa ni makosa kuamini kuwa dhambi zao zinaweza kusafishwa kwa kufanya sala za toba. Sisi tumeokolewa toka katika dhambi mara moja na kwa wote na tumepokea uzima wa milele kwa kuamini katika injili ya maji na Roho. Mnapaswa kutambua kuwa hii ndio imani sahihi. Imani katika injili ya maji na Roho imewapatia uhakika wa wokovu wa kweli Wakristo walio wengi. Tunapaswa kutambua kuwa suala la kuamini kuwa dhambi zetu zinaweza kuoshwa kwa kumwamini Yesu kuwa ni Mwokozi na kisha kufanya sala za toba ni imani isiyo ya kibiblia bali ni imani ya kisheria inayotokana na ufahamu binafsi wa mwanadamu.

Kuna tofauti kubwa sana kati ya imani katika injili ya maji na Roho na imani inayoamini kuwa dhambi zinaoshwa kwa kupitia sala za toba. Ikiwa mtu anaiamini injili ya maji na Roho, basi mtu huyo atapokea ondoleo la dhambi zake na atafanywa kuwa mtu mwenye haki asiye na dhambi. Lakini kama mtu huyo atajaribu kuoshwa dhambi zake kwa kuzitegemea sala zake binafsi za toba, basi ni hakika kuwa mtu huyo hatapokea ondoleo la dhambi zake na ataangukia katika imani ya kisheria. Ikumbukwe kuwa imani inayoamini katika injili ya maji na Roho inatuwezesha kuupata uzima wa milele huko Mbinguni

na kisha kumtumikia Bwana katika neema yake, ilhali imani inayoamini katika sala za toba inatufanya tuutumie muda mwingi katika maisha yetu kujaribu kutafuta ondoleo la dhambi zetu na hatimaye kuishia kuadhibiwa na kutupwa kuzimu.

Hivyo, kwa mara nyingine tena ni lazima uchunguze ikiwa imani yako ni ile iliyowekwa katika injili ya maji na Roho au ikiwa ni ile iliyo na msingi wake katika sala zako binafsi za toba huku ukijaribu kuziosha dhambi zako kwa jitihada zako binafsi. Na ikiwa unaangukia katika imani yenye makosa inayoamini kuwa ondoleo la dhambi zako linapatikana kwa kufanya sala za toba, basi ni ninakusihi sana kuachana na imani ya jinsi hiyo na kisha uamini katika injili ya maji na Roho.

Tunapaswa kufahamu na kuamini kuwa injili ya maji na Roho ndio Ukweli halisi wa wokovu. Yesu alikuja hapa duniani, akajitwika dhambi zote za ulimwengu kwa kubatizwa na Yohana Mbatizaji, alikufa Msalabani, akafufuka tena toka kwa wafu, na kwa sababu hiyo amezitoweshea mbali dhambi zetu zote na amefanya hivyo ili kuwaokoa wenye dhambi toka katika dhambi. Kama vile Bwana alivyosema wakati alipokuwa karibu na kukata roho, “Imekwisha!” Ni hakika kuwa Yesu amemaliza kila kitu, yaani hakuna kitu kilichopungua katika suala la wokovu kwa wale wanaoamini katika injili ya maji na Roho. Kisha Bwana aliahidi kuwa atashuka toka Mbinguni kwa mara nyingine tena ili kuwachukua wenye haki wanaoamini katika injili ya maji na Roho. Bwana atarudi tena hapa duniani ili kuwachukua waamini wanaoamini katika injili ya maji na Roho kwa kuwa watu hao ni watu wa Mungu.

Ni imani yenye makosa kufikiri kuwa tunaondolewa dhambi zetu kupitia sala za toba badala ya kuuamini wokovu ambao Bwana ameutumiza kwa ajili yetu, kwa kweli imani ya

jinsi hii haiwezi kutusaidia kuingia katika Ufalme wa Bwana. Ni lazima tuiamini injili ya maji na Roho na kisha tuiweke katika mioyo yetu. Ni lazima tutambue kuwa wakati Wakristo wengi wa siku hizi wanapoamini kuwa dhambi zao zinaoshwa kwa kupitia sala zao binafsi za toba, ni hakika kuwa imani yao ya jinsi hiyo ni imani yenye makosa sana. Kitendo cha kuiamini injili ya maji na Roho ni kitendo cha kuwa na imani kama alivyokuwa nayo Ibrahimu.

Tumebarikiwaje Kama Ibrahimu?

Katika Wagalatia sura ya tatu, Mtume Paulo anaelezea imani ya kweli akitolea mfano wa imani ya Ibrahimu: *“Kama vile Ibrahimu alivyomwamini Mungu akahesabiwa haki. Fahamuni basi, ya kuwa wale walio wa imani, hao ndio wana wa Ibrahimu. Na andiko, kwa vile lilivyoona tangu zamani kwamba Mungu atawahesabia haki Mataifa kwa imani, lilimhubiri Ibrahimu habari njema zamani, kusema, Katika wewe Mataifa yote watabarikiwa. Basi hao walio wa imani hubarikiwa pamoja na Ibrahimu aliyekuwa mwenye imani”* (Wagalatia 3:6-9).

Paulo anaelezea hapa kuwa Ibrahimu alithibitishwa na Mungu na alifanyika kuwa baba wa imani ya kweli kwa kuwa aliliamini Neno ambalo Mungu alimwambia. Hivyo, wale walio na imani iliyo sawa na ya ile ya Ibrahimu wanahesabiwa haki ya Mungu pamoja na Ibrahimu.

Je, unataka kuwa mwana wa Ibrahimu kwa kuiweka imani yako katika Neno la Mungu? Kama ni hivyo basi uiamini injili ya maji na Roho kwa moyo wako wote kama vile Ibrahimu alivyoamini kile ambacho Mungu alimwambia. Tunaweza kuishi milele kwa kumwamini Mwana wa Mungu na Mwokozi

wetu ambaye ametuokoa toka katika dhambi, na kwa kupitia imani yetu katika Neno la Mungu la maji na Roho. Ninawataka ninyi nyote muwe na imani kama ile aliyokuwa nayo Ibrahimu. Kama vile Ibrahimu alivyofanyika kuwa mwana wa Mungu kwa kupitia imani yake katika Neno la Mungu, kwa hakika ninatawaka ninyi nyote kuiiga imani hii. Kama vile Ibrahimu alivyopokea baraka zote kwa kuliadini Neno la Mungu, basi ninyi nanyi mtazipokea baraka hizo.

Ninyi nanyi mnapaswa kupokea ondoleo la dhambi zetu toka kwa Mungu kwa kuiweka imani yenu katika injili ya maji na Roho. Kwa lugha nyingine, ni lazima muadini kuwa Bwana wetu alikuja hapa duniani, akabatizwa na Yohana Mbatizaji ili kuzichukua dhambi za ulimwengu, alikufa Msalabani, akafufuka toka kwa wafu na kwa sababu hiyo ametuokoa toka katika dhambi. Wakati tunapoiadini injili ya maji na Roho tuliopewa, basi hapo huwa tunafanywa kuwa watu wa Mungu, na huwa tunafanyika kuwa wana wa Ibrahimu kiroho. Kama vile Ibrahimu alivyokubaliwa na Mungu kuwa ni mwenye haki kwa kuliadini Neno la Mungu, basi ninyi nanyi mnafanywa kuwa watu wa Mungu kwa imani yenu katika injili ya maji na Roho. Mungu anasema kuwa imani ya Ibrahimu ni sawa na imai ya wale wanaoadini katika injili ya maji na Roho.

Ni lazima tutambue kuwa injili ya maji na Roho ndio Ukweli. Kwa sasa, utafikia wakati ambapo watu wengi ulimwenguni kote wataliadini Neno la Ukweli la injili ya Mungu, na hapo ndipo imani yao itakapokubaliwa kama ile ya Ibrahimu. Hii ni kwa sababu Mungu amesha azimia kuwa wale walio na imani kama hiyo ni lazima wafanywe wenye haki kwa imani na kisha kuokolewa toka katika dhambi zao zote. Ni lazima tukumbuke kuwa katika Biblia imeandikwa hivi: *“Na andiko, kwa vile lilivyoona tangu zamani kwamba Mungu atawahesabia haki Mataifa kwa imani, lilimhubiri Ibrahimu*

habari njema zamani, kusema, Katika wewe Mataifa yote watabarikiwa” (Wagalatia 3:8).

Imani ya Ibrahimu Ilikuwa ni ya Aina Gani?

Katika kipindi cha Agano la Kale, Ibrahimu na binamu zake waliondoka na kuicha nchi ya kwao, na familia zao, na nyumba za baba zao katika mji wa Uru wa Wakaldayo kisha wakaenda katika nchi ambayo Mungu alimwonyesha Ibrahimu. Baada ya kuingia katika Nchi ya Ahadi, mifugo yao iliongezeka mara dufu na mifugo hiyo ilikuwa ndio kipimo cha utajiri wa wakati huo. Ikatokea wakati fulani watumishi wa Ibrahimu na wale wa Lutu wakagombana kuhusiana na maeneo ya kuchungia. Ibrahimu akatambua kuwa alipaswa kutengana kiroho na ndugu yake Lutu.

Kisha Ibrahimu akamwambia nduguye Lutu, “Ondoka uniache. Kama utakwenda kulia, basi mimi nitakwenda kushoto; kama utakwenda kushoto, basi mimi nitakwenda kulia. Hebu uchague wewe kwanza. Maana naona huniheshimu mimi kama mjomba wako na sasa unafanikiwa na unataka kuachana na mimi. Hivyo chagua. Utakwenda wapi? Hebu uende mahali unapotaka kwenda.”

Kisha Lutu akachagua maeneo yenye rutuba ya nchi ya Zohali na akaondoka akamwacha Ibrahimu. Baada ya Lutu kuondoka, Mungu akamwambia Ibrahimu, “*Inua sasa macho yako, ukatazame kutoka hapo ulipo, upande wa kaskazini, na wa kusini na wa mashariki na wa magharibi; maana nchi hii yote uionayo, nitakupa wewe na uzao wako hata milele*” (Mwanzo 13:14-15). Alichokiongea hapa Mungu kilikuwa ni Neno la injili la agano, yaani kuwa Ibrahimu atabarikiwa kupitia Yesu Kristo.

Imani ya Ibrahimu ilithibitishwa na kukubaliwa kwa kuliadini Neno la Mungu na akafanyika kuwa baba wa imani kwa wale wote ambao baadaye wataadini katika injili ya maji na Roho. Wakati Mungu alipomwambia Ibrahimu, “nchi hii yote uionayo, nitakupa wewe na uzao wako hata milele,” Mungu alimaanisha kuwa watu watakuja ingia katika nchi ya kiroho ya Kanani kupitia Yesu Kristo. Yesu alizaliwa hapa duniani ili kuwakomboa wenye dhambi toka katika dhambi zao, alibatizwa na Yohana Mbatizaji, akafa Msalabani, akafufuka toka kwa wafu, na amefanyika kuwa Mwokozi wa wenye dhambi. Ndio maana Mungu alisema kwia atawapatia Mbingu wale wanaomwamini Yesu Kristo kuwa ni Mwokozi wao aliyekuja kwa injili ya maji na Roho.

Mtume Paulo alifahamu kuwa Ukweli huu ndio utakaohubiriwa kwa Wamataifa ili kuwapatia wokovu. Mungu Baba alikuwa ametabiri kuwa Yesu Kristo atazaliwa katika ukoo wa Ibrahimu, na akasema kama vile imani ya Ibrahimu ilivyokubaliwa na Mungu, vivyo hivyo imani ya wale ambao wanaadini kuwa Yesu Kristo ni Mwokozi wao aliyekuja kwa injili ya maji na Roho itakubaliwa. Ndio maana Mtume Paulo alisema, “*Basi hao walio wa imani hubarikiwa pamoja na Ibrahimu aliyekuwa mwenye imani*” (Wagalatia 3:9).

Kwa hiyo, katika zama hizi, Wamataifa wanaweza kupokea baraka zile zile alizopokea Ibrahimu kwa kuliadini Neno la Mungu, ambalo ni injili ya maji na Roho. Neno la Mungu ambalo Ibrahimu alilipokea, na Neno la injili ya maji na Roho ambalo tumelipokea, yalileta wokovu kwa wanaoadini, na kwa sababu hiyo hakuna tofauti kati ya Neno la zama za Ibrahimu na zama zetu. Ndio maana waadini wanaoadini katika injili ya maji na Roho wanapokea baraka zilezile ambazo Ibrahimu alizipokea.

Kama Iliyokuwa Zamani, Bado Kuna Watu Wasioamini

Sababu iliyomfanya Paulo akaitaja imani ya Ibrahimu ni kwa sababu Wakristo wa Kiyahudi waliendelea kujiaminisha kuwa watakuwa watu wa Mungu ikiwa watapokea tohara ya kimwili. Hivyo Paulo alilazimika kuwaonyesha jinsi imani yao ilivyo potofu, na alifanya hivyo kwa kuwaelezea juu ya imani ya kweli inayomwokoa mtu toka katika dhambi. Ndio maana kwa mara nyingine tena Mtume Paulo alizungumzia juu ya hali halisi ya imani ya Ibrahimu.

Katika kipindi hiki, ili sisi nasi tuweze kuwa na imani ya Ibrahimu ni lazima tuamini kwa mioyo yetu katika injili ya maji na Roho ambayo Mungu ametupatia. Ikiwa mtu yeyote yule anaiamini injili ya maji na Roho, basi ni hakika kuwa dhambi zake zitatoweka toka katika moyo wake na atafanyika kuwa mmoja kati ya watu wa Mungu. Je, mmefanyika kuwa watu wa Mungu kwa kupokea tohara ya kimwili? Hapana, mnafanywa kuwa watu wa Mungu ikiwa tu mtaiamini injili ya maji na Roho.

Hata hivyo, wale wanaoamini kuwa injili ya maji na Roho ni Ukweli halisi wa wokovu ni wachache sana. Imani ya siku hizi ya Ukristo imepotoka sana kwa kuwa watu wanaliamini Neno la Mungu kwa kulitafsiri kimwili na kimaandishi tu.

Wakati wa kipindi cha Matengenezo huko Ufaransa, kulikuwa na mtu aliyemitwa John Calvin ambaye baadaye aliibuka na kuwa kati ya wanatheolojia mashuhuri wa Kiprotestanti. Tatizo la Calvin lilianza wakati alipoandika waraka wa wazi kwa rafiki yake aliyemitwa Nicholas Cop aliyekuwa mkufunzi katika Chuo Kikuu cha Paris huku akiliunga mkono Kanisa kufanya matengenezo. Jambo hili lilifanya Kanisa Katoliki kumshutumu kuwa yeye ni mzushi,

hivyo akalazimika kuikimbia Ufaransa kama mkimbizi. Alipokuwa akikimbia aliandika kitabu kilichoandikwa *Kanuni za Dini ya Kikristo*, kitabu hicho kilirudiwa mara kwa mara hapo baadaye. Mawazo ya Calvin yanayoelezwa katika kitabu hiki yanaelezwa kuwa ni “Dondoo Tano za Ukavini.”

Dondoo zinazoitwa “Dondoo Tano za Ukavini” zipo kama ifuatavyo: Upotofu Mkamilifu (pia hufahamika kama Kukosa Uwezo Kukamilifu na au Dhambi ya Asili); Kuteuliwa Bila Masharti; Upatanisho Wenye Ukomo (ambao pia unajulikana kama Upatanisho Maalum); Neema Isiyozuilika; na Uvumilivu wa Watakatifu (pia hujulikana kama Ukishaokolewa Umeshaokolewa Wakati Wote). Tunaweza kuona hapa kuwa fundisho la kidini la “Kuteuliwa Bila Masharti” linaeleza kuwa baadhi ya watu wamekwisha teuliwa kuingia Mbinguni ilhali wengine wameshateuliwa kwenda kuzimu.

Mawazo ya Calvin yalishambuliwa na watu wengi kwa kuwa yalionekana kuwa hayana chembe ya uvumilivu. Hata hivyo, mawazo yake yaliingizwa katika shule ya theologia wakati ni hakika kuwa yalikuwa ni mawazo yenye upotofu, hivyo wale ambao walikuwa wamekamatwa na mawazo yake walishindwa kufahamu kuwa injili ya maji na Roho ilikuwa ndio Ukweli. Kadri muda ulivyokwenda, basi baadhi ya Wakristo kwa kuzingatia hoja za Calvin walifikia hatua ya kuamini kuwa zile dhambi zilizotendwa baada ya kumwamini Yesu zilipaswa kuoshwa kwa kufanya sala za toba.

Biblia inaeleza kuwa Mungu amezitoweshea mbali dhambi zetu mara moja na kwa wote. Hata hivyo, Calvin alisema kuwa hata kabla watu hawajazaliwa, baadhi yao walikuwa wameshapangiwa wokovu wakati watu wengine walikuwa wamepangikiwa maangamizi. Hili ni fundisho la kidini lililoundwa kwa kutegemea fikra za mwanadamu na limeunganishwa kwa hisia na misukumo ya kibinadamu.

Kuchaguliwa na Mungu kuliko halisi ni huku: Mungu Baba aliyeko Mbinguni alituchagua sisi katika Kristo Yesu na katika injili ya maji na Roho; Mungu aliwachagua waamini katika injili hii ili waweze kukombolewa toka katika dhambi zote za ulimwengu na akawafanya kuwa watu wake. Ni lazima tukumbuke kuwa wokovu wa kweli unapatikana kwa kuamini katika injili ya maji na Roho. Biblia inasema kuwa waamini katika injili ya maji na Roho ni wale ambao wamezaliwa tena upya na wale ambao wamepokea wokovu toka katika dhambi zao na kwamba ndio hao waliopokea uzima wa milele (Yohana 3:5).

Kila mtu alizaliwa kama mwenye dhambi hapa duniani, na alikuwa amefungwa kuendelea kutenda dhambi katika maisha yake yote na alikuwau hawezi kuikwepa adhabu ya kuzimu kwa sababu ya dhambi zake. Hata hivyo, Yesu Kristo alitupokea watu kama sisi kuwa ni watu wa Mungu—yaani sisi tunaoamini kuwa Kristo ametukomboa toka katika dhambi za ulimwengu kwa kupitia injili ya maji na Roho. Ni lazima tumwamini Yesu Kristo kuwa ni Mwokozi wetu ndani ya Ukweli wa injili.

Hata hivyo, Bwana anasema kuwa wale wasioiamini injili ya maji na Roho ni hakika kuwa watatupwa kuzimu. Kama ni hivyo, injili ya kweli ni ipi, na hiyo imani ya kweli ni ipi? Kwa kweli hakuna injili nyingine zaidi ya injili ya maji na Roho ambayo Bwana anaizungumzia katika Biblia, maana injili hii ndio Ukweli wa injili na ni Neno la Wokovu lisilo na makosa.

Ni Nani Aliye Chini ya Laana ya Mungu?

Hebu tugeukia Wagalatia 3:10-14. *“Kwa maana wale wote walio wa matendo ya sheria, wako chini ya laana; maana*

imeandikwa, Amelaaniwa kila mtu asiyedumu katika yote yaliyoandikwa katika kitabu cha torati, ayafanye. Ni dhahiri ya kwamba hakuna mtu ahesabiwaye haki mbele za Mungu katika sheria; kwa sababu Mwenye haki ataishi kwa imani. Na torati haikuja kwa imani, bali, Ayatendaye hayo ataishi katika hayo. Kristo alitukomboza katika laana ya torati, kwa kuwa alifanywa laana kwa ajili yetu; maana imeandikwa, Amelaaniwa kila mtu aangikwaye juu ya mti; ili kwamba baraka ya Ibrahimu iwafikilie Mataifa katika Yesu Kristo, tupate kupokea ahadi ya Roho kwa njia ya imani.”

Kifungu cha maandiko hapo juu kinaeleza kuwa wale walio wa Sheria wapo chini ya laana. Mtume Paulo alisema kuwa, “Kwa maana wale wote walio wa matendo ya sheria, wako chini ya laana; maana imeandikwa, Amelaaniwa kila mtu asiyedumu katika yote yaliyoandikwa katika kitabu cha torati, ayafanye” (Wagalatia 3:10). Vivyo hivyo, Mtume Yakobo pia alisema, “Maana mtu awaye yote atakayeishika sheria yote, ila akajikwaa katika neno moja, amekosa juu ya yote” (Yakobo 2:10).

Mungu ameweka wazi hapa kuwa wale walio wa matendo ya Sheria wapo chini ya laana. Sheria haileti wokovu kwa mtu yeyote yule aneyeishika. Kwanza kabisa, ni nani anayeweza kuishika Sheria yote kikamilifu wakati kuna sheria ndogo ndogo 613 zinazounda Sheria ya Mungu kama ilivyoandikwa katika Agano la Kale?

Kazi ya Sheria ni kutuonyesha dhambi zetu na kutufanya tuweze kuzitambua dhambi, kwa sababu hiyo Sheria inatuongoza kwenda katika injili ya maji na Roho. Ikumbukwe kuwa Sheria ni maagizo ya Mungu kwa kila mtu. Waendesha mashtaka huchunguza na kutoa mashtaka kwa mtuhumiwa. Ni jukumu la waendesha mashtaka kuleta mashataka ya jinai kwa mtu ambaye ametuhumiwa kutenda kosa la jinai. Pia huwa ni

jukumu la mwanasheria wa utetezi kumtetea yule aliyetuhumiwa na anayeshitakiwa. Kimsingi, Sheria ni kama mwendesha mashtaka ihali Yesu ni kama mwanasheria mtetezi wetu. Hebu tuangalie kwa kina uhusiano kati ya matendo ya Yesu na matendo ya Sheria.

Wale walio wa matendo ya Sheria wanajaribu kuwa wana wa Ibrahimu kwa kupokea tohara ya kimwili, lakini Biblia inaeleza wazi kuwa watu hao wapo chini ya laana ya Mungu. Hakuna hata mtu mmoja anayeweza kuwa mwenye haki kwa kuishika Sheria. Imeandikwa hivi, *“Na torati haikuja kwa imani, bali, Ayatendaye hayo ataishi katika hayo” (Wagalatia 3:12)*. Hakuna hata mmoja aliyepo hapa ulimwenguni anayeweza kuitenda na kuishika Sheria ya Mungu kikamilifu.

Hivyo, Yesu Kristo Mwenyewe alikuja hapa duniani, akazichukua dhambi zetu zote katika mwili wake kwa kubatizwa, alisulubiwa hadi kifo ili kulaaniwa, kisha akafufuka toka kwa wafu ili kutuokoa sisi tunaomwamini. Ni Yesu Kristo ndiye alizipokea dhambi zote za ulimwengu huu kwa kuupokea ubatizo toka kwa Yohana Mbatizaji, kisha akaibeba laana yote ya mwanadamu kwa kusulubiwa na kuimwaga damu yake hadi kifo. Ndio maana Mtume Paulo alisema hivi, *“Amelaaniwa kila mtu aangikwaye juu ya mti” (Wagalatia 3:13; Kumbu Kumbu la Torati 21:23)*.

Katika kipindi cha Yesu, taifa la Kiyahudi lilikuwa chini ya ukoloni wa Dola ya Rumi, na sheria ya Kirumi iliwahukumu watenda maovu wakuu kwa kifo cha kusulubiwa na kugongelewa misumari mtini. Kwa lugha tofauti, kunyongwa kwa kusulubiwa ilikuwa ni adhabu iliyokuwa imehifadhiwa maalum kwa ajili ya wahalifu wakuu.

Ni kwa nini basi Yesu Kristo aliangikwa mtini? Ni kwa sababu alikuwa amezipokea dhambi zetu zote mara moja na kwa wote kwa kubatizwa na Yohana Mbatizaji. Yesu Kristo

aliweza kufa katika mti wa makosa kwa kuwa alikuwa amezichukua dhambi zetu katika mwili wake kwa kupitia ubatizo wake. Wewe na mimi tuna dhambi nyingi sana ndio maana ilimpasa Yesu kuulipa mshahara wa dhambi hizo kwa kusulubiwa kwake na kuibeba laana yote.

Yesu Kristo aliweza kusulubiwa katika msalaba wa mti kwa kuwa alikuwa amejitwika dhambi za ulimwengu kwa kupitia ubatizo wake. Kusulubiwa kwa Yesu kulitokana na ukweli kuwa alikuwa amezichukua dhambi zetu zote kwa kupitia ubatizo wake na ilifanyika hivyo ili aweze kufanyika laana kwa dhambi hizo. Kama vile Biblia inavyoeleza Yesu alisulubiwa, *“ili kwamba baraka ya Ibrahimu iwafikilie Mataifa katika Yesu Kristo, tupate kupokea ahadi ya Roho kwa njia ya imani”* (Wagalatia 3:14), kwa hakika Yesu Kristo ametuokoa kikamilifu kwa kupitia injili ya maji na Roho.

Hivyo ndivyo ilivyokuwa kiasi cha kuweza kuzifanya baraka za Ibrahimu ziweze kutufikia sisi tunaoamini katika kile ambacho Yesu Kristo amekitenda kwa ajili yetu. Kama vile Ibrahimu alivyobarikiwa na Mungu na akafanywa kuwa baba wa imani, basi yeyote yule anayeiamini injili ya maji na Roho anaweza kupokea baraka kamahizo na kufanyika kuwa mwana wa Mungu.

Mungu ametuwezesha kuipokea ahadi ya Roho Mtakatifu kwa imani inayomwamini Yesu Kristo (Wagalatia 3:14). Ikiwa mtu yeyote anapokea ondoleo la dhambi zake kwa kuamini injili ya maji na Roho, basi ni hakika kuwa mtu huyo atapokea karama ya Mungu ya Roho Mtakatifu. Hivyo, Roho Mtakatifu anakaa katika mioyo ya wale wanaoamini katika injili ya maji na Roho.

Kama tunaye Roho Mtakatifu katika mioyo yetu, basi hiyo itamaanisha kuwa tumepokea uzima wa milele kupitia Roho Mtakatifu. Ndio maana Mungu alisema, *“Mwenye haki*

ataishi kwa imani.” Kwa kuwa Mungu ametupatia karama ya Roho Mtakatifu kwa wale wote wanaoamini katika injili ya maji na Roho, wewe na mimi tunaweza kuishi milele kwa kupitia imani yetu katika Neno la Mungu. Hivyo, ikiwa mtu yeyote amepokea ondoleo la dhambi zake katika moyo wake kwa kuamini injili ya maji na Roho, basi haitakuwa vigumu kwa mtu huyo kuishi kwa imani katika Mungu.

Waamini wa Injili ya Maji na Roho Wanaweza Kuwekwa Huru Toka Katika Laana Zote kwa Kuuamini Ukweli Huu

Je, ni vigumu kupokea ondoleo la dhambi kwa kupitia imani katika injili ya maji na Roho? Kwa kweli ni rahisi sana.

“Ndugu zangu, nanena kwa jinsi ya kibinadamu. Lijapokuwa ni agano la mwanadamu, hata hivyo likiisha kuthibitika, hakuna mtu alibatilishaye, wala kuliongeza neno. Basi ahadi zilinenwa kwa Ibrahimu na kwa mzao wake. Hasemi, Kwa wazao, kana kwamba ni wengi, bali kana kwamba ni mmoja, Kwa mzao wako, yaani, Kristo. Nisemalo ni hili; agano lililothibitishwa kwanza na Mungu, torati iliyotokea miaka mia nne na thelathini baadaye hailitangui, hata kuibatilisha ile ahadi. Kwa maana urithi ukiwa kwa sheria, hauwi tena kwa ahadi; lakini Mungu alimkirimia Ibrahimu kwa njia ya ahadi. Torati ni nini basi? Iliingizwa kwa sababu ya makosa, hata aje huyo mzao aliyepewa ile ahadi; iliamriwa kwa utumishi wa malaika kwa mkono wa mjumbe. Basi aliye mjumbe si mjumbe wa mmoja; bali Mungu ni mmoja. Basi je! Torati haipatani na ahadi za Mungu? Hasha! Kwa kuwa, kama ingalitolewa sheria iwezayo kuhuisha, yakini haki ingalipatikana kwa sheria. Lakini andiko limeyafunga yote

chini ya nguvu ya dhambi, makusudi hao waaminio wapewe ile ahadi kwa imani ya Yesu Kristo. Lakini kabla ya kuja ile imani tulikuwa tumewekwa chini ya sheria, tumefungwa mpaka ije ile imani itakayofunuliwa. Hivyo torati imekuwa kiongozi kutuleta kwa Kristo, ili tuhesabiwe haki kwa imani. Lakini, iwapo imani imekuja, hatupo tena chini ya kiongozi” (Wagalatia 3:15-25).

Mtume Paulo alisema kuwa atatumia mfano wa maisha yetu ya kila siku kuelezea kile alichokuwa akikimaanisha. Paulo alieleza kuwa hata ikiwa ahadi imefanywa kati ya mtu na mtu, basi ahadi hiyo inapokuwa imefanywa hakuna mtu mwingine anayeweza kuibatilisha au kuibadilisha.

Hebu kwa mara nyingine tena tuigeukie ahadi ya Mungu kwa Ibrahimu. Wakati ugomvi ulipojitokeza kati ya Lutu na nduguye Ibrahimu kuhusiana na masuala ya ardhi, Ibrahimu alimwomba Lutu kuchagua mahali alipotaka kwenda kuishi, kisha Lutu akachagua nchi ya Zoari na akaondoka. Kisha Mungu akamwita Ibrahimu katika mlima mrefu kisha akamwambia aingalie nchi iliyokuwa chini yake. Kisha Mungu akamwahidi Ibrahimu akisema, “*Nchi hii yote uionayo, nitakupa wewe na uzao wako hata milele.*”

Hili ni agano la Mungu linalomaanisha kuwa Yesu Kristo atazaliwa toka katika uzao wa Ibrahimu. Kwa maneno mengine, Mungu alikuwa akisema kuwa atamtuma Yesu Kristo aliyezaliwa katika ukoo wa Ibrahimu, na kwamba Mungu atawapatia baraka zilezile alizompatia Ibrahimu wale wote wanaomwamini Yesu Kristo. Kwa hakika, kwa kumtuma Yesu Kristo kuja hapa duniani, Mungu ameitimiza kikamilifu baraka inayotuwezesha sisi waamini kuingia Mbinguni kama alivyoahidi. Hivyo sisi ni wale ambao tumepokea baraka kama zile za Ibrahimu, na tumepokea baraka hizo kwa kumwamini Yesu Kristo. Kama vile Mungu alivyompatia Ibrahimu nchi ya Kanani, Mungu ametupatia sisi karama ya ahadi ya Ufalme

wake, na amefanya hivyo kwa kuwa tunaliamini Neno lake.

Hata hivyo, baada ya miaka 430 tangu alimpotatia Ibrahimu Neno lake la Ahadi, Mungu aliwapatia watu wa Israeli Sheria. Sheria hiyo pia ilitolewa kwako. Lakini pamoja na uwepo hiyo Sheria bado hatukuweza kuwekwa huru toka katika dhambi zetu, na hivyo tulibakia kuwa chini ya laana.

Lakini hii Sheria haiwezi kuiondoa ahadi ya Mungu ambayo ilifanywa tangu hapo zamani. Kwa maneno mengine, Mungu aliitoa Sheria kwa watu wa Israeli baada ya miaka 430 kupita tangu alipowabariki, hivyo hii Sheria haikuweza kuibatilisha ile ahadi na baraka ambazo Mungu alimpatia Ibrahimu. Hii ni ahadi muhimu sana na ni Ukweli usioyumba kwa watu wa Israeli na kwetu pia. Imani sahihi ni ile inayoamini kuwa tunaokolewa kwa kupitia imani katika injili ya maji na Roho, na huu ndio Ukweli halisi wa ondoleo la dhambi. Vivyo hivyo, ni rahisi sana kuupata wokovu wa ondoleo lad hambi katika injili ya maji na Roho.

Hebu tusome Wagalatia 3:18-20. *“Kwa maana urithi ukiwa kwa sheria, hauwi tena kwa ahadi; lakini Mungu alimkirimia Ibrahimu kwa njia ya ahadi. Torati ni nini basi? Iliingizwa kwa sababu ya makosa, hata aje huyo mzao aliyepewa ile ahadi; iliamriwa kwa utumishi wa malaika kwa mkono wa mjumbe. Basi aliye mjumbe si mjumbe wa mmoja; bali Mungu ni mmoja.”*

Mtume Paulo alitumia neno la kuashiria maana “kwa maana.” Paulo alieleza kuwa kwa maana urithi ukiwa kwa Sheria, hauwi tena kwa ahadi. Kwa maneno mengine, ikiwa tunafanywa wenye haki na warithi wa ufalme wa Mungu kwa kuishika Sheria kikamilifu, basi hiyo itakuwa ni matokeo ya matendo yetu na si baraka ya ahadi ambayo Mungu aliifanya kwa Ibrahimu akisema, “Nchi hii yote uionayo, nitakupa wewe na uzao wako hata milele.”

Ondoleo la dhambi zetu pia linapatikana kwa imani katika Neno la Mungu. Tunapokea ondoleo la dhambi zetu kwa kuiamini injili ya maji na Roho, pia tunaipata Mbingu baada ya kupokea ondoleo la dhambi zetu—tunapokea ondoleo la dhambi zetu kwa imani katika Neno la Mungu—yaani kwa kumwamini Yesu Kristo na kwa kuiamini Neno la Mungu la ahadi kwetu.

Kwa kuwa Mtume Paulo alikuwa na ufahamu mpana kuhusiana na Agano la Kale, ndio maana aliweza kumuunganisha Yesu Kristo na Agano la Kale. Paulo alisema, *“Torati ni nini basi? Iliingizwa kwa sababu ya makosa”* (Wagalatia 3:19). Hii ina maanisha kuwa Mungu alitupatia Sheria kwa kuwa tunafanya dhambi. Kwa maneno mengine, kwa kuwa wana wa Ibrahimu walikuwa hawazifahamu dhambi zao, basi ndio maana walipewa Sheria ili waweze kuzitambua dhambi zao; wana wa Ibrahimu hawakupewa Sheria ili iweze kuwaokoa. Hivyo, Sheria ina nguvu hadi pale ilipofika ile Mbegu ya ahadi. Ni nani basi ambaye ni Mbegu ya ahadi iliyoahidiwa katika Sheria ya Mungu? Si mwingine bali ni Yesu Kristo.

Mungu aliitoa Sheria kwa wanadamu kwa kuwa walikuwa hawazitambui dhambi zao hata pale walipozitenda. Je, hali ya mwanadamu ilikuwaje baada ya miaka 430 tangu Mungu alipomwahidi Ibrahimu wokovu kwa imani? Watu hawakumfahamu Mungu vizuri, na wala hawakuifahamu dhambi, maana wakati huo kulikuwa hakuna sheria. Ndio maana Mungu alimtokea na akasema hivi, “Mimi ni Yehova. Ni Mungu niliyewaongoza toka katika nchi ya Misri. Kwanza, Usiwe na miungu mingine ila mimi. Pili usijifanyie sanamu, ukainama na kuiabudu. Mimi ni Yehova”; hivyo Mungu aliwapatia Sheria watu wa Israeli ili waweze kumfahamu Mungu.

Kwa kifupi, sababu iliyomfanya Mungu kutupatia Sheria ililenga kuwa kwa kupitia Sheria hii tuweze kujitambua sisi wenyewe tulivyo wenye dhambi wakuu, na Mungu alifanya hivyo ili tuweze kumtafuta Yesu Kristo na kumpata. Ndio maana Mungu alitufunga sisi chini ya Sheria hadi siku Yesu Kristo alipokuja. Na wakati ulipofika, Yesu Kristo alikuja hapa duniani kwa ajili yetu, alibatizwa na yohana Mbatizaji, akafa Msalabani, akafufuka toka kwa wafu, na kwa sababu hiyo ametuokoa toka katika dhambi za ulimwengu.

Hivyo, ikiwa mtu yeyote anajaribu kuwa mwenye haki mbele za Mungu kwa kuishika Sheria, yaani kwa kuishi vizuri, au kwa kupokea tohara ya kimwili, basi imani ya mtu huyo ni imani ya matendo na ni imani ya kisheria. Imani hii ya kisheria ni imani potofu kabisa mbele za Mungu. Imani hiyo potofu inahusisha jitihada za bure za kuupata wokovu kwa kutegemea jitihada binafsi, na imani hiyo inatokana na fikra potofu kuwa mwanadamu anaweza kuupata wokovu kwa jitihada zake binafsi kwa kuishi maisha ya wema na usafi.

Kinyume chake, Mtume Paulo alisema hivi, “Hatuwezi kuokolewa kwa kupitia matendo yetu binafsi, maana hatuwezi kukwepa dhambi hadi siku tutakapokufa. Hata hivyo, Mpatanishi kwa sasa yupo. Huyo Mpatanishi wako pamoja na Mungu. Mpatanishi wetu ni Yesu ambaye pamoja na kuwa Mungu Mwenyewe, alikuja hapa duniani akafanyika mwili wa mwanadamu na akawa Mwokozi wetu. Huyu Mpatanishi hapatanishi upande mmoja tu. Mpatanishi huyo anatupatanisha sisi pamoja na Mungu Baba. Yesu alifanyika kuwa Mpatanishi wetu kwa kuwa alifanya kazi pande zote mbili.” Huyu Mpatanishi Yesu Kristo alizichukua dhambi zetu zote katika mwili wake mara moja na kwa wote, alikufa Msalabani, na akatufanya sisi kuwa watu wa Mungu, na akaitimiza haki yote ya Mungu, na akautimiza upendo na haki yake.

Biblia inaendelea kusema yafutayo: *“Basi je! Torati haipatani na ahadi za Mungu? Hasha! Kwa kuwa, kama ingalitolewa sheria iwezayo kuhuisha, yakini haki ingalipatikana kwa sheria. Lakini andiko limeyafunga yote chini ya nguvu ya dhambi, makusudi hao waaminio wapewe ile ahadi kwa imani ya Yesu Kristo. Lakini kabla ya kuja ile imani tulikuwa tumewekwa chini ya sheria, tumefungwa mpaka ije ile imani itakayofunuliwa. Hivyo torati imekuwa kiongozi kutuleta kwa Kristo, ili tuhesabiwe haki kwa imani” (Wagalatia 3:21-24).*

Kwa hiyo, madai ya siku hizi kuwa ondoleo la dhambi linapatikana kwa kufanya sala za toba, au dai la zamani katika kipindi cha Kanisa la Mwanzo kuwa watu wanafanywa kuwa wana wa Ibrahimu na wana wa Mungu kwa kupokea tohara ya kimwili, yote hayo ni matokeo ya imani potofu. Fikra iliyopo katika Wakristo wa leo kuwa wanafanywa kuwa watu wa Mungu ikiwa tu watatakaswa ni fikra potofu, ni sawa na hoja inayoeleza kwia watu wanaweza kuoshwa dhambi zao na kufanyika watu wa Mungu ikiwa watafanya sala za toba kwa juhudi. Kitendo cha mtu kufanya sala za toba kwa juhudi hakimaanishi kuwa Mungu atamfanya mtu huyo kuwa asiye na dhambi.

Yeyote anayemwamini Yesu Kristo kuwa ni Mwokozi wake kwa kupitia injili ya maji na Roho anaweza kupokea ondoleo la dhambi zake na anaweza kufanyika mwana wa Mungu. Ni makosa makubwa na ni uongo kusema kuwa watu wanaweza kuoshwa dhambi zao, wakakutana na Mungu na kuzipokea nguvu zake kwa sababu tu wamefanya sala za toba kwa juhudi. Kwa bahati mbaya, Wakristo wengi sana bado wanaifuata imani hii potofu, wanajaribu kuupata wokovu kwa kuzitegemea sala zao binafsi za toba na kwa kufuata matendo yao binafsi ya Sheria. Kwa kweli inanivunja moyo ninapoona jinsi Wakristo wengi ulimwenguni kote walivyoipata hiyo

imani potofu, pia inanihuzuisha kuona watu hao wakiadini kuwa wanaweza kuoshwa dhambi zao kwa kufanya sala za toba, bahati mbaya zaidi imani hii potofu imeenea sana katika Ukristo wa leo hii.

Hebu sikiliza kile ambacho Mtume Paulo alikisema: *“Je! Mmekuwa wajinga namna hii? Baada ya kuanza katika Roho, mnataka kukamilishwa sasa katika mwili?” (Wagalatia 3:3).* Kwa aya hii, Paulo alikuwa akiuonyesha uongo unaodai kuwa mtu anaweza kuoshwa dhambi zake kwa kufanya sala za toba kwa namna ya kimwili. Kwa maneno mengine, Paulo alikuwa akiuliza tunawezaje hapa duniani kuoshwa dhambi zetu kwa kupitia sala zetu binafsi za toba wakati Mwana wa Mungu amekwisha tuokoa kikamilifu toka katika dhambi zetu zetu kwa kuja hapa duniani, kwa kuzichukua dhambi zetu katika mwili wake, na kwa kufa Msalabani, na kwa kufufuka toka kwa wafu. Wakati tunapoweza kumwona kwa wazi Yesu Kristo aliyebatizwa na Yohana na kisha kufa Msalabani, kwa nini basi tulete aina nyingine ya injili na kujaribu kuziosha dhambi zetu kwa kupitia sala za toba?

Wakati Mtume Paulo alipokuwa akiongea na watakatifu wa makanisa ya Galatia, haukuwa muda mrefu tangu wakati Yesu alipokuwa amekuja duniani, na kubatizwa, na kufa Msalabani, na kisha kufufuka na kupaa Mbinguni. Lakini pamoja na hayo, watakatifu wa Kigalatia walikuwa wamekwisha iacha imani yao na walikuwa wakiitafuta imani nyingine hali wakiwa wamenaswa na mitego ya mawazo ya Shetani. Kibaya zaidi ni kuwa walikuwa hawatambui kuwa imani yao ilikuwa na makosa makubwa.

Pasipokuwa Makini, Waamini wa Leo Katika Injili ya Maji na Roho Wanaweza Pia Kuangukia Kwenye Makosa Hayo

Hata wale ambao wamepokea ondoleo la dhambi zao kwa kuamini katika injili ya maji na Roho wanaweza kufikiria kama ifuatavyo: “Ingawa nimepokea ondoleo la dhambi zangu, lakini kwa kuwa bado ninafanya dhambi ninatamani kufanya sala za toba. Ninafikiria nikifanya hivyo ndipo dhambi zangu zote zitakaposamehewa.” Hata kama mtu amepokea ondoleo la dhambi zake, ikiwa atatenda dhambi nyingine, basi mtu huyo anakosa ujasiri mbele za Mungu na hivyo anafikiri anatakiwa kufanya jambo fulani ili kusahihisha jambo hilo, hivyo ndivyo mtu huyu anavyoweza kufikiria hivyo.

Hata hivyo, katika mazingira kama haya, tunapaswa kukiri mbele za Mungu kuwa tumetenda dhambi na kisha tunapaswa kuiamini injili ya maji na Roho badala ya kujihuzunikia na kufanya sala za toba; pia ni muhimu kukumbuka kuwa kitendo cha mtu kufanya sala za toba hakimaanishi kuwa dhambi zake zimetoweshwa. Watakatifu wenzetu wote ulimwenguni kote ni lazima wautambue ukweli huu, na wale wengine ambao wanajiona kuwa ni Wakristo wazuri, na ambao bado hawajaifahamu injili ya maji na Roho hadi wakati huu wanapaswa kutambua kuwa fundisho la sala za toba lina makosa.

Kwa nini Mtume Paulo aliwakemea wanatohara na kwa nini aliwakana kwa ukali wote katika Kitabu cha Wagalatia? Hii ni kwa sababu ushawishi wao mbaya umefanya watokee waamini wengi katika makanisa ya Galatia ambao hawaifahamu injili ya maji na Roho kikamilifu. Hivyo, kila Mkristo, kuanzia wahudumu hadi maofisa wa kanisa na walei wanapaswa kutambua jinsi wanatheolojia walivyowafundisha

vibaya muda huu wote. Kwa kuwa kuna mambo mengi sana ambayo wamefundisha vibaya, ndio maana inakuwa vigumu sana kuihubiri injili ya maji na Roho katika kipindi hiki pasipokuwa na msingi imara katika Neno la Ukweli. Hii ni kwa sababu wakati Ukweli wa injili unapoelezwa kwao kwa kupitia Neno, basi wao hukataa na kuwa kinyume.

Mtu anapaswa kuwa na ushahidi makini wa Neno la Mungu kuhusiana na ukombozi wake toka katika dhambi, na ili aweze kuwa na ushahidi huo mtu anatakiwa kuupata wokovu uliokuja kwa maji na kwa Roho. Ikiwa mtu yeyote yule hana ushahidi wa wokovu wake alioupata katika injili ya maji na Roho, basi ni hakika kuwa mtu huyo hawezi kutoa ushuhuda wa wokovu wa kweli.

Waamini wengi sana wa Kigalatia walikuwa wameupoteza ushuhuda huu. Hivyo, katika Kitabu cha Wagalatia, Mtume Paulo alisema hivi, “Imani ya wanaotetea tohara si ina makosa mengi mno? Je, mnataka kuitenda Sheria? Je, mnataka kuhesabiwa haki kwa kupitia Sheria ya Mungu? Na kama ni hivyo basi mnatakiwa kuitenda Sheria yote kwa ukamilifu wake. Mnatafuta kuwa wakamilifu kwa matendo yenu binafsi ya Sheria, lakini hebu mjiulize ikiwa mnaweza kuishika Sheria yote kikamilifu. Si dhahiri kuwa hamuwezi kufanya hivyo? Sasa kwa nini mnajaribu kuupata wokovu kwa kuishika Sheria kupitia matendo yenu binafsi? Wokovu wetu wa kweli unapatikana si kwa matendo yetu bali unapatikana kwa imani katika injili ya maji na Roho. Imani inayoamini kuwa Yesu Kristo alikuja hapa duniani akazitoweshea mbali dhambi zetu zote kwa injili ya maji na Roho ndio imani halisi inayoleta ondoleo la dhambi la kweli.”

Wokovu haupatikani katika matendo yetu, bali unategemea imani yetu, yaani ikiwa tunaamini injili ya maji na Roho au la. Lakini kwa muda huu wote tumekuwa tukifikiria

na kuamini vibaya huku tukidhani kuwa tutabarikiwa na Mungu ikiwa tutafanya matendo mema na kwamba kama tusipoyafanya hayo matendo mema tutalaaniwa. Hii ndio imani ya kisheria, na hiyo si imani inayoamini katika injili ya maji na Roho. Sisi tunafanywa kuwa wasio na dhambi kwa imani, watu wanaopokea baraka ya wokovu ni wale waliompata Yesu Kristo katika Ukweli wa injili ya maji na Roho na waliompokea katika mioyo yao. Ikiwa baadhi ya watu wanajaribu kuwa wasio na dhambi kwa namna nyingine kama vile kufanya sala za toba, basi hii itamaanisha kuwa watu hao wameangukia katika imani potofu. Watu wa jinsi hiyo ni lazima watubu haraka sana, na ni lazima wageuke na kumwamini Yesu Kristo kwa usahihi.

Wakati Imani Katika Injili ya Maji na Roho Inapotujia, Ndipo Tunapoweza Kuwekwa Huru Mbali na Laana ya Sheria

“Lakini, iwapo imani imekuja, hatupo tena chini ya kiongozi. Kwa kuwa ninyi nyote mmekuwa wana wa Mungu kwa njia ya imani katika Kristo Yesu. Maana ninyi nyote mliobatizwa katika Kristo mmemvaa Kristo. Hapana Myahudi wala Myunani. Hapana mtumwa wala huru. Hapana mtu mume wala mtu mke. Maana ninyi nyote mmekuwa mmoja katika Kristo Yesu. Na kama ninyi ni wa Kristo, basi, mmekuwa uzao wa Ibrahimu, na warithi sawasawa na ahadi” (Wagalatia 3:25-29).

Mtume Paulo alisema hapa kuwa, *“Iwapo imani imekuja, hatupo tena chini ya kiongozi.”* Kiongozi anayetajwa hapa ni Sheria. Sheria inazionyesha dhambi zetu na inatuwezesha kujitambua kuwa sisi ni wenye dhambi na kwamba

tumefungwa kwenda kuzimu kwa sababu ya dhambi zetu. Ndio maana inasemwa kuwa Sheria inatuongoza kwenda kwa Mwokozi.

Sasa, tunapokutana na Yesu katika injili ya maji na Roho, na tunapokuwa tumeipokea imani inayoamini kuwa Yesu ni Mwokozi wetu, basi ni hakika kuwa hapo hatupo tena chini ya Sheria. Kutokana na imani hii ni hakika kuwa hatupo chini ya laana hii tena. Hata kama itatokea kuwa tunafanya dhambi tena kwa namna yoyote ile, basi jambo tunalopaswa kulifanya ni kukiri kwa wazi makosa yetu kwa Mungu na kisha kusonga mbele, na hapo utakuwa ni wakati wetu mwingine tena kujithibitishia kwa imani kuwa tulisha ondolewa hizo dhambi. Hivyo, hata kama tuna mapungufu, tunachotakiwa kukifanya ni kuishi kwa imani kuanzia sasa na kuendelea. Yesu Kristo alikwisha zibeba laana zetu zote wakati alipoangikwa mtini.

Yesu alikwisha zibeba laana zetu zote mara moja na kwa wote kwa kuzipokea dhambi zetu kupitia ubatizo wake na kwa kusulubiwa kwake. Kwa sasa hatuna sababu ya kuzihofia laana zetu, kwa kweli hatupaswi kuwa na hofu. Tunachopaswa kukifanya ni kuyakiri madhaifu yetu kama yalivyo na kisha kusonga mbele kwa imani. Hivi ndivyo Bwana alivyotuambia.

Imeandikwa hivi, *“Kwa kuwa ninyi nyote mmekuwa wana wa Mungu kwa njia ya imani katika Kristo Yesu. Maana ninyi nyote mliobatizwa katika Kristo mmemvaa Kristo” (Wagalatia 3:26-27)*. Mtume Paulo alisema hapa kuwa sisi sote tumefanywa kuwa wana wa Mungu kwa kumwamini Yesu Kristo Mwana wa Mungu kuwa ni Mwokozi wetu. Kule kusema kuwa tumefanyika kuwa wana wa Mungu maana yake ni kuwa tumefanyika kuwa wasio na dhambi.

Je, sisi tumefanywa kuwa wasio na dhambi kwa imani gani? Kama vile Wagalatia 3:27 inavyosema, *“Maana ninyi nyote mliobatizwa katika Kristo mmemvaa Kristo,”* sisi tumefanyika wasio na dhambi kwa kuamini kuwa Yesu alikuja

hapa duniani akafanyika mwili wa mwanadamu, na kwamba alizipokea dhambi zote za mwanadamu, yaani dhambi zako na zangu kwa kubatizwa na Yohana Mbatizaji, ambaye ni mwakilishi wa wanadamu. Dhambi zote za ulimwengu zilipitishwa kwenda kwa Yesu Kristo wakati Yohana Mbatizaji alipoiweka mikono yake katika kichwa cha Kristo. Yesu aliweza kusulubiwa ili kuwa laana kwa niaba yetu kwa kuwa Yesu alikuwa amezipokea dhambi zote za mwanadamu kwa ubatizo wake. Yesu amefanyika kuwa Mwokozi wetu kwa kufufuka kwake toka kwa wafu.

Ndio maana Mtume Paulo alisema, *“Maana ninyi nyote mliobatizwa katika Kristo mmemvaa Kristo” (Wagalatia 3:27)*. Kule kusema kuwa *“tulibatizwa katika Kristo”* maana yake ni kuwa tunaamini kama ifuatavyo: yaani tunaamini kuwa Yesu alizichukua dhambi zetu katika mwili wake wakati alipobatizwa; na kwamba ilimpasa Yesu kufa Msalabani kwa sababu ya hizo dhambi; na kwamba Yesu alifufuka toka kwa wafu ili kutuonyesha kuwa yeye ni Mungu Mwenyewe na ili aweze pia kutufufua nasi na kutupatia uzima; na kwamba kwa kupitia haya yote, Yesu amefanyika kuwa Mwokozi wetu. Hivyo, Yesu alizaliwa hapa duniani ili kuzitoweshea mbali dhambi zetu zote kwa injili ya maji na Roho.

Hivyo katika Wagalatia 3:27, Mtume Paulo aliikiri imani yake kwa kusema hivi, *“Maana ninyi nyote mliobatizwa katika Kristo mmemvaa Kristo.”* Imani ya Paulo ili kuwa ni ile inayoamini katika injili ya maji na Roho. Ikiwa mtu hatauamini ubatizo wa Yesu na damu yake Msalabani, basi ni hakika kuwa mtu huyo atatupwa kuzimu. Kwa kuwa Yesu alizichukua dhambi za mwanadamu mara moja na kwa wote kwa kubatizwa na Yohana Mbatizaji, ndio maana aliweza kusulubiwa hadi kifo ili kubeba laana zetu zote, na kwa kufufuka kwake toka kwa wafu, Yesu amefanyika kuwa

Masihi na Mwokozi wetu. Ili kuutimiza wokovu wetu, ilimpasa Yesu kuishi tena na ndio maana alifufuka toka kwa wafu baada ya kuwa amebatizwa na kufa Msalabani, na kwa msingi huo amefanyika kuwa Mwokozi wetu wa kweli.

Kuna mambo mengi sana ya kujadiliana hapa, lakini hebu nifanye hitimisho kwa kuyanukuu mawazo ya Paulo. Katika Wagalatia 3:28, *“Hapana Myahudi wala Myunani. Hapana mtumwa wala huru. Hapana mtu mume wala mtu mke. Maana ninyi nyote mmekuwa mmoja katika Kristo Yesu.”*

Hii ina maanisha kuwa kila mtu ana umoja na Kristo. Sisi sote tuliweza kupokea ondoleo lile lile la dhambi katika Yesu Kristo. Sisi sote ni wamoja, kwa kuwa sisi sote tunaweza kupokea ondoleo la dhambi zetu, na tunaweza kuwa watu wa Mungu na watenda kazi wake kwa kuiamini injili ya maji na Roho. Mara tunapofanyika kuwa watu wa Mungu tunafanywa kuwa wamoja.

Paulo aliendelea kusema, *“Na kama ninyi ni wa Kristo, basi, mmekuwa uzao wa Ibrahimu, na warithi sawasawa na ahadi”* (Wagalatia 3:29). Kwa ujumbe huu Paulo alikuwa akieleza ifuatavyo: “Hamfanywi kuwa wana wa Ibrahimu kwa kutahiriwa, bali mnaafanywa kuwa watu wa Kristo na mnaungamanishwa naye kwa kumwamini Yesu Kristo kuwa ni Mwokozi wenu aliyekuja kwa injili ya maji na Roho. Ikiwa mmepokea Yesu Kristo basi hapo ndipo mmekuwa wana wa Ibrahimu kwa imani. Ikiwa mna imani hii, basi ninyi ni warithi wa Ufalme wa Mbinguni kwa mujibu wa ile ahadi.” Na huu ndio Ukweli.

Mara nyingi wanatheolojia huwa wanaifupisha imani ya Paulo kuwa ni “kuhesabiwa haki kwa imani.” Hilo ni sahihi. Hata hivyo, tatizo lililopo ni kuwa wanasema hivyo ilhali hawafahamu kile ambacho Paulo alikimaanisha, yaani kitu kilichomfanya Paulo ahesabiwe haki kwa imani. Ndio maana

kwa kuwa hawaifahamu injili ya maji na Roho ndio maana hawana namna nyingine ya kuuongelea wokovu huku wakidhani kuwa wokovu unapatikana kwa kuamini damu ya Msalaba pekee. Kwa matokeo hayo wamefikia hatua ya kudai kuwa ili mtu aweze kuokolewa ni lazima aweze kuufikia utakaso. Kwa kuwa watu hawa wanaiongelea imani yenye makosa ndio maana hawa wanaowasikia pia wanapotea. Hata kama Mungu ametuwezesha kuupata wokovu wetu kwa kuiweka imani yetu katika injili ya maji na Roho iliyotolewa na Mungu, wanatheolojia hao wameongeza mafundisho yao ya kidini yenye msingi wake kwenye matendo kiasi cha kuuharibu wokovu wa neema ya Mungu.

Sasa ili tuweze kwua watu wa Yesu Kristo tunapaswa kuamini vipi? Tunapaswa kuamini kuwa Yesu amezitoweshea mbali dhambi zetu zote pasipo kutuuliza wala kupata ushauri wetu. Wokovu wetu wa kweli unapatikana kwa kuamini kuwa ni Yesu ndiye aliyebatizwa na Yohana Mbatizaji; na kwamba ni Yesu ndiye aliyezibeba dhambi za ulimwengu hadi Msalabani na akasulubiwa; na kwamba ni Yesu ndiye aliyeteseka na kufa Msalabani ili afanyike laana; na kwamba ni Yesu ndiye aliyefanyika Mwokozi wetu. Hivi ndivyo Bwana Mwenyewe alivyokamilisha wokovu wetu. Kwa kuwa Yesu alitupenda sana ndio maana alituokoa kutokana na mapenzi yake binafsi. Na hii haikuwa kazi ya mtu mwingine bali ni kazi ya Mungu mwenyewe. Hivyo tunachotakiwa kukifanya sisi sote ni kuamini injili ya maji na Roho. Na hapo ndipo tutakapookolewa kwa imani.

Ni kitu gani tulikipokea wakati tulipoamini katika injili ya maji na Roho iliyotolewa na Mungu? Tulipokea karama ya Roho wa Mungu. Kwa kuwa Roho Mtakatifu amekuja katika mioyo yetu kama karama ya Mungu kwetu, basi ni hakika kuwa Roho Mtakatifu anafanya kazi ndani yetu. Je, kuna kitu

chochote ambacho tunaweza kukiongeza ili kuupokea wokovu wetu toka kwa Mungu? Hapana, kwa kweli hakuna kitu chochote kile cha kuongeza.

Je, kuna mtu yeyote ambaye alitoa hata mchango mdogo kwa wokovu wetu uliofikiwa na Mwana wa Mungu wakati alipokuja hapa duniani? Nimesikia baadhi ya watu wanamsifia Mkirene mmoja aliyeitwa Simon, huku wakisema kuwa alikuwa ni mshirika katika kazi ya Bwana ya wokovu, wanasema hivyo kutokana na ukweli kuwa mtu huyo aliubeba Msalaba wa Yesu kwa niaba yake (Marko 15:21). Hata hivyo, hataka kama huyu Simon asingeliubeba Msalaba wa Yesu kwa niaba yake, ukweli ni kuwa wokovu wa Bwana ungelionekana kuwa si mkamilifu. Wakati huo wa zamani Kirene ulikuwa ni mji uliokuwa umeshamiri katika nchi ya Libya, na inawezekana kuwa Simon alikuwa ni Myahudi aliyekuwa ameongokea Uyahudi na aliyekuwa amekuja Yerusalemu kwa ajili ya sikukuu ya Pasaka. Hata hivyo, hata kama mtu huyu alimsaidia Yesu, je, atakuwa alikwenda Mbinguni kwa sababu ya tendo hili? Hapana, kwa kweli si hivyo.

Ndugu waamini wenzangu, tunaweza kupokea baraka za Mungu zilizoahidiwa kwa kuamini katika injili ya maji na Roho. Sisi tunaokolewa kwa imani katika injili ya maji na Roho, na tunaingia Mbinguni kwa sababu ya imani hii, na tunafanywa kuwa wenye haki kwa imani hii.

Wakristo wengi wanasema, “Ni lazima tupokee ondoleo la dhambi zetu kwa kufanya sala za toba.” Lakini kila tunaposikia madai kama hayo, kuna jambo moja kubwa ambalo tunatakiwa kulikumbuka: Ingawa jambo hili linawezekana kuwa jema, ukweli ni kuwa hoja hiyo ni hoja potofu. Haya ni maneno ya watu waovu sana. Bila shaka wapo watu wanaokuzunguka wanaosema hivyo, “Kwa nini hufanyi sala za toba? Yeyote asiyeifanya sala za toba ana makosa.” Mara nyingi watu hao

humlaumu kila mtu anayesema kuwa sala za toba si muhimu katika suala la wokovu.

Lakini wakati watu hawa wanaposema kuwa dhambi zao zinatoweshwa ikiwa tu watafanya sala za toba, ukweli ni kuwa kwa kufanya hivyo wanafanya dhambi kubwa sana mbele za Mungu. Kufanya hivyo ni kukifanya kifo cha Yesu kuwa ni bure. Tunawezaje kufanya hivi na kisha kutegemea kuokolewa?

Kama Watu Tuliozaliwa Tena Upya, Tufanye Nini Tunapokuwa Tumetenda Dhambi?

Ni aina gani ya sala ambayo tunatakiwa kuifanya wakati sisi tuliozaliwa tena upya tunapokuwa tumefanya dhambi? Katika hali kama hiyo tunatakiwa kufanya sala za ungamo, tunatakiwa kumwambia Mungu hivi, “Bwana, nimefanya dhambi hizi na zile. Ninaomba radhi sana. Ninaamini kuwa umezitoweshea mbali hata hizi dhambi kwa injili ya maji na Roho.” Tunapaswa kuzikiri dhambi zetu kwa namna hiyo, kisha tunapaswa kuthibitisha kwa msingi wa injili kuwa Bwana amezitoweshea mbali dhambi zetu zote.

Na baada ya kufanya ungamo hilo ni muhimu kugeuka na kuyaacha makosa yetu. Kwa kuwa Yesu amekwisha tuokoa kwa kuzichukua dhambi zetu zote kwa kupitia ubatizo wake, na kwa kuzibeba laana zetu zote pale Msalabani, na kwa kufufuka kwake toka kwa wafu, basi ni hakika kuwa sisi hatuna kitu chochote kile cha kutulaani, basi tunachotakiwa kukifanya ni kugeuka na kuyaacha maovu yetu.

Tunapaswa wakati wote kuyakiri makosa yetu kwa Mungu kila tunapokuwa tumekosea. Tunapaswa kuithibitisha tena kwa upya imani yetu kuwa Bwana amezitoweshea mbali

dhambi zetu zote kwa injili ya maji na Roho, na baada ya hapo tunachopaswa kukifanya ni kuyafuata mapenzi ya Bwana ambaye amefanyika kuwa Mwokozi wetu mkamilifu, na wala hatupaswi kufungwa na fikra za dhambi mbaya tena.

Wakati fulani huwa ninapata huzuni. Hii ni kwa sababu kuna watu wengi sana hapa duniani wanaoamini kuwa ondoleo la dhambi linapatikana kwa sala za toba. Lakini ni hakika na hakuna shaka yoyote ile kuwa hakuna mtu anayeweza kupokea ondoleo la dhambi zake ikiwa hataiamini injili ya maji na Roho. Kwa wale wasioamini katika injili ya maji na Roho, sala za toba zimejaa tele katika mioyo yao. Mara nyingi huwa wanasema hivi, “Bwana naomba unisamehe. Pia ninaomba uzioshe dhambi zangu.”

Hata hivyo yeyote yule ambaye bado hajabatizwa katika Kristo bado hajamvaa Kristo. Je, unatambua sasa shida ilipo? Wale wanaoamini katika injili ya maji na Roho watamvaa Kristo na watafanyika kuwa wana wa Mungu na watu wake, lakini baraka hizi zote zipo mbali sana na wale wasioamini injili hii. Unaweza kuamini vizuri injili ya maji na Roho pale tu utakapoweza kuuweka mpaka vizuri katika moyo wako, na hapo ndipo utakapoweza kupokea ondoleo la dhambi zako ambayo ni hazina kubwa sana hapa ulimwenguni.

Kwa upande mwingine, ikiwa mtu haiamini injili ya maji na Roho, na badala yake anaamini kuwa ondoleo la dhambi zake linapatikana kwa kufanya sala za toba, basi ni hakika kuwa mtu huyo atabakia kuwa mwenye dhambi anayengonea siku yake ya maangamizi. Hii ni kwa sababu imani yake ni ile inayofanya ubatizo wa Yesu Kristo na kifo chake kuwa ni bure.

Je, unaweza kuufanya upendo wa Yesu Kristo wa maji na Roho kuwa ni kitu kisicho na maana? Baadhi ya watu wanaweza kufikiria hivi, “Ingawa imani ya jinsi hiyo ina

makosa, lakini sidhani kama ina makosa makubwa kivile.” Hata hivyo, kitendo cha kuliadini fundisho la kidini la sala za toba ni kutenda dhambi kubwa sana inayouharibu Ukweli wa Mungu. Hivyo ni lazima ulikumbuke hivyo.

Kwa sasa, tukiwa waamini wa injili ya maji na Roho ni lazima tuihubiri injili hii halisi ulimwenguni kote hadi mwisho ufike. Hali tukiiimarisha imani yetu, ni lazima tuwasaidie Wakristo waliochoka na waliopoteza tumaini ili waweze kuokoka na kuachana na imani yao potofu ya sala za toba, na tunapaswa kuyafanya hayo yote kwa kupitia Ukweli wa injili ya maji na Roho.

Ninamshukuru sana Bwana kwa kutukabidhi jukumu hili. Hivyo, ni lazima tukitekeleze kile ambacho Bwana ametukabidhi huku tukiliweka tumaini letu katika injili ya maji na Roho. ☒

PAKUA

Vitabu na vitabu vya sauti vya Mchungaji Paul C. Jong kwenye simu yako mahiri, kompyuta kibao au PC kwenye wavuti yetu. Unaweza kusoma na kusikiliza mahali popote, hata wakati hauna muunganisho wa mtandao.

 www.bjnewlife.org



Ukurasa wa nyumbani



vitabu

vya

Vitabu pepe





Rev. PAUL C. JONG

**Mwandishi amekuwa akihubiri
Injili ya maji na Roho kwa Roho za
Ulimwengu zilizo potea kwa karibu
miongo miwili hadi sasa.**

**Yeye ndiye mwanzilishi wa The
New Life Mission, kwa sasa
anafundisha wanafunzi Wengi wa
Yesu katika shule. (The New Life
Mission School)**

**Ameanzisha makanisa
Yanayofundisha Utume, anaeneza
Injili kupitia kazi zake za Uandishi.**

**Vitabu vyake Sasa
vimetafasiriwa na vinasomwa katika
Lugha zaidi ya 96 za Ulimwengu.**

Maoni ya Mwandishi kwa Msomaji



Wakristo wengi ulimwenguni kote sasa wanaishi kama wenye dhambi, hawawezi Kuzaliwa tena. Hii ni kutokana na ukweli kwamba hadi leo wamekuwa Wakitegemea tu mafundisho ya Kikristo, bila kujua Injili ya Maji na Roho. Leo Ukristo katika ulimwengu huu umegeuka kuwa kama dini tu. Walakini bado Haijachelewa sana, hata sasa, lazima uamini kweli Mwokozi wetu ambaye amekuja Kwetu kwa Injili ya Maji na Roho, na kuwa Mkristo wa kweli; lazima sasa usimame Juu ya Injili ya kweli ya maji na Roho na uimarisha Imani yako.

Lazima ujiweke wazi kutoka katika Imani ya waasi, ukigundua jinsi ilivyo na Kusudi. Lazima ufahamu makosa ya sala za toba. Lazima utambue kuwa kupitia Maombi yako mwenyewe ya toba, huwezi kamwe kuosha dhambi zako. Katika Kitabu hiki, ninakuhubiria tena Injili ya Maji na Roho. Lazima umfuata Bwana Ukigundua na kuamini kuwa Baraka za Mungu zimekuja kupitia Injili ya Maji Na Roho

- Mwandishi -